


UNIVERSITY OF TORONTO




3 1761 00004224 2



$$\frac{3}{4}$$

T. LIVII PATAVINI
HISTORIARUM
LIBRI

QUI SUPERSUNT OMNES
CUM INTEGRIS
JOANNIS FREINSHEMII
SUPPLEMENTIS



VOLUMEN SEPTIMUM

BIPONTI
EX TYPOGRAPHIA SOCIETATIS

CIDICCOLXXXV

PAWLOWITZ

bei

PRERAU


PA

6452

A2

1784

V. 7



887653

TITI LIVII PATAVINI
HISTORIARUM
AB URBE CONDITA
LIBER XLII.

EPITOME

LIBRI QUADRAGESIMI SECUNDI.

Q. Fulvius Flaccus censor templum Junonis Laciniae tegulis marmoreis spoliavit, ut ædem, quam dedicabat, tegeret. tegulæ ex senatusconsulto reportatæ. Eumenes, Asiæ rex, in senatu de Perseo, Macedoniae rege, questus est: cujus injuriæ in populum Romanum referuntur. ob quas bello ei indicto, P. Licinius Crassus consul, cui id mandatum erat, in Macedoniam transiit, levibusque expeditionibus, equestribus præliis, in Thessalia cum Perseo parum felici eventu pugnavit. Inter Masinissam & Carthaginienfes de agro fuit arbiter ad disceptandum a senatu datus. Legati missi ad civitates socias & reges rogandos, ut in fide permanerent, dubitantibus Rhodiis. Lustrum a censoribus conditum est. Censa sunt civium capita ducenta quinquaginta septem millia ducenta triginta unum. Res præterea adversus Corsos & Ligures prospere gestas continet.

T. Liv. Vol. VII.

A

L. POSTUMIUS ALBINUS, M. Popillius Lænas cum omnium primum de provinciis exercitibusque ad senatum retulissent, Ligures utrique decreti sunt: ut novas ambo, quibus eam provinciam obtinerent, legiones, (binæ singulis decretæ) & socium Latini nominis, dena millia peditum & sexcenos equites, & supplementum Hispaniæ tria millia peditum Romanorum scriberent, & ducentos equites. Ad hoc mille & quingenti pedites Romani cum centum equitibus scribi iussi; cum quibus prætor, cui Sardinia obtigisset, in Corsicam transgressus bellum gereret; interim M. Atilius, vetus prætor, provinciam obtineret Sardiniam. Prætores deinde provincias sortiti sunt, A. Atilius Serranus urbanam, C. Cluvius Saxula inter cives & peregrinos, N. Fabius Buteo Hispaniam citeriorem, M. Matienus ulteriorem, M. Furius Crassipes Siciliam, C. Cicerejus Sardiniam. Priusquam magistratus profiscerentur, senatui placuit, L. Postumium consulem ad agrum publicum a privato terminandum in Campaniam ire; cujus ingentem modum possidere privatos, paulatim proferendo fines, constabat. Hic, iratus Prænestinis, quod, cum eo privatus sacrificii in templo Fortunæ faciundi causa profectus esset, nihil in se honorifice, neque publice, neque privatim, factum a Prænestinis esset, priusquam ab Roma profisceretur, literas Prænesti misit, ut sibi magistratus obviam exiret, locum publice pararet, ubi diverteretur, jumenta-que, cum exiret inde, præsto essent. Ante hunc

consulem nemo unquam fociis in ulla re oneri aut sumtui fuit. ideo magistratus mulis tabernaculisque & omni alio instrumento militari ornabantur, ne quid tale imperarent fociis. privata hospitia habebant: ea benigne comiterque colebant; domusque eorum Romæ hospitibus patebant, apud quos ipsis diverti mos esset. Legati, qui repente aliquo mitterentur, singula jumenta per oppida, iter qua faciundum erat, imperabant: aliam impensam focii in magistratus Romanos non faciebant. Injuria consulis, etiamsi justa, non tamen in magistratu exercenda, & silentium nimis aut modestum, aut timidum Prænestinorum, jus, velut probato exemplo, magistratibus fecit graviorum in dies talis generis imperiorum.

II. Principio hujus anni legati, qui in Ætoliā & Macedoniam missi erant, renuntiaverunt, *sibi conveniendi regis Persei, cum alii abesse eum, alii ægrum esse, falso utrumque, fingerent, potestatem non factam: Facile tamen apparuisse sibi, bellum parari, nec ultra ad arma ire dilaturum. Item in Ætolia seditionem gliscere in dies, neque discordiarum principes auctoritate sua coerceri potuisse.* Cum bellum Macedonicum in exspectatione esset, priusquam id susciperetur, prodigia expiari, pacemque Deūm peti precationibus, quæ editæ ex fatalibus libris essent, placuit. Lanuvii classis magnæ species in cœlo visæ dicebantur; & Priverni lana pulla terra enata; & in Vejenti apud Rementem lapidatum; Pomptinum omne velut nubibus locustarum coopertum esse; in Gallico agro, qua induceretur aratrum, sub existentibus

glebis pisces emerfisse. Ob hæc prodigia libri fastales inspecti, editumque ab decemviris est, & quibus Diis, quibusque hostiis sacrificaretur, & ut supplicatio prodigiis expiandis fieret: altera, quæ priore anno valetudinis populi causa vota esset, ea uti feriæque essent. itaque sacrificatum est, ut decemviri scriptum ediderunt.

III. Eodem anno ædis Junonis Laciniae detecta. Q. Fulvius Flaccus censor ædem Fortunæ Equestris, quam in Hispania prætor bello Celtiberico voverat, faciebat eniso studio, ne ullum Romæ amplius aut magnificentius templum esset. Magnum ornamentum se templo ratus adjecturum, si tegulæ marmoreæ essent, profectus in Bruttios, ædem Junonis Laciniae ad partem dimidiam detegit. id satis fore ratus ad tegendum, quod ædificaretur. Naves paratæ fuerunt, quæ tollerent atque asportarent, auctoritate censoria fociis deterritis id sacrilegium prohibere. Postquam censor rediit, tegulæ, expositæ de navibus, ad templum portabantur. quamquam, unde essent, fitebatur, non tamen celari potuit. Fremitus igitur in curia ortus est: ex omnibus partibus postulabatur, ut consules eam rem ad senatum referrent. Ut vero arcessitus in curiam censor venit, multo infestius singuli universique præsentem lacerare: *Templum augustissimum regionis ejus, quod non Pyrrhus, non Hannibal violassent, violare parum habuisse, nisi detexisset fœde, ac prope diruisset. Detractum culmen templo, nudatum tectum patere imbribus putrefaciendum. censorem, moribus regendis creatum, cui sarta tecta exigere sacris publicis,*

& loca tuenda, more majorum traditum esset; eum per sociorum urbes diruentem templa, nudantemque teſta ædium sacrarum, vagari: & quod, si in privatis sociorum ædificiis faceret, indignum videri posset, id Deum immortalium templa demolientem facere: & obstringere religionē populum Romanum, ruinis templorum templa ædificantem: tanquam non iidem ubique Dii immortales sint, sed spoliis aliorum alii colendi exornandique. Cum, priusquam referretur, appareret, quid sentirent Patres, relatione facta, in unam omnes sententiam ierunt, ut hæ regulæ reportandæ in templum locarentur, piaculariaque Junoni fierent. Quæ ad religionem pertinent, cum cura facta: tegulas relictas in area templi, quia reponendarum nemo artifex inire rationem potuerit, redemptores nuntiarunt.

IV. Ex prætoribus, qui in provincias ierant, N. Fabius Massiliæ moritur, cum in citeriorem Hispaniam iret. Itaque, cum id nuntiatum a Massiliensibus legatis esset, senatus decrevit, ut P. Furius & Cn. Servilius, quibus succedebatur, inter se sortirentur, uter citeriorem Hispaniam prorogato imperio obtineret. Sors opportuna fuit; P. Furius idem, cujus ea provincia fuerat, remaneret. Eodem anno, cum agri Ligustini & Gallici, quod bello captum erat, aliquantum vacaret, senatusconsultum factum, ut is ager viritim divideretur. Decemviros in eam rem ex senatusconsulto creavit A. Atilius prætor urbanus, M. Æmiliū Lepidum, C. Cassium, T. Æbutium Carum, C. Tremellium, P. Cornelium Cethegum, Q. & L. Appulejos, M.

Cæcilium, C. Salonium, C. Munatium. Diviserunt dena jugera in singulos, fociis nominis Latini terna. Per idem tempus, quo hæc agebantur, legati ex Ætolia Romam venerunt de discordiis seditionibusque suis, & Thessali legati, nuntiantes, quæ in Macedonia gererentur.

V. Perseus, jam bellum vivo patre cogitatum in animo volvens, omnes, non gentes modo Græciæ, sed civitates etiam, legationibus mittendis, pollicendo plura, quam præstando, sibi conciliabat. Erant tamen magna ex parte hominum ad favorem ejus inclinati animi, & aliquanto quam in Eumenem propensiores: cum Eumenis beneficiis muneribusque omnes Græciæ civitates & plerique principum obligati essent: & ita se in regno suo gereret, ut, quæ sub ditione ejus, urbes nullius liberæ civitatis fortunam secum mutatam vellent. contra Persea fama erat post patris mortem uxorem manu sua occidisse: Apellem, ministrum quondam fraudis in fratre tollendo, atque ob id requisitum a Philippo ad supplicium, exsulantem, arcessitum post patris mortem ingentibus promissis ad præmia tantæ perpetratæ rei, clam interfecisse. intestinis externisque præterea multis cædibus infamem, nec ullo commendabilem merito, præferebant vulgo civitates tam pio erga propinquos, tam justo in cives, tam munifico erga omnes homines regi, seu fama & majestate Macedonum regum præoccupati ad spernendam originem novi regni; seu mutationis rerum cupidi; seu quia eum objectum esse Romanis volebant. Erant autem non Ætoli modo in

seditionibus , propter ingentem vim æris alieni , sed Theſſali etiam : ea contagione, velut tabes, in Perrhæbiam quoque id pervaſerat malum. Cum Theſſalos in armis eſſe nuntiatum eſt, Ap. Claudium legatum ad eas res aſpiciendas componendaſque ſenatus miſit. Qui, utriuſque partis principibus caſtigatis, cum injuſto ſcœnore gravatum æs alienum, iſſis magna ex parte concedentibus, qui onerarant, levaffet, juſti crediti ſolutionem in * annorum penſiones diſtribuit. Per eundem Appium eodemque modo compoſitæ in Perrhæbia res. Ætolorum cauſas Marcellus Delphis per idem tempus hoſtilibus actas animis, quas in teſtino geſſerant bello, cognovit. Cum certatum utrinque temeritate atque audacia cerneret, decreto quidem ſuo neutram partem aut levare, aut onerare voluit: communiter ab utriſque petiit, abſtinerent bello, & oblivione præteritorum diſcordias finirent. Hujus reconcilia-tionis inter ipſos fides, obſidibus ultro citroque datis, firmata eſt. Corinthum, ut ibi deponerentur obſides, convenitur.

VI. A Delphis & Ætolico concilio Marcellus in Peloponneſum trajecit, quo Achæis edixerat conventum. Ubi, collaudata gente, quod conſtan-ter vetus decretum de arcendis aditu finium regi-bus Macedonum tenuiſſent, inſigne adverſus Perſea odium Romanorum fecit: quod ut maturius erumperet, Eumenes rex, commentarium ferens ſecum, quod de apparatibus belli omnia inquirens fecerat, Romam venit. Per idem tempus quinque legati ad regem miſſi, qui res in Macedonia aſpi-

cerent. Alexandriam iidem ad Ptolemæum renovandæ amicitiae causa proficisci iussi. Legati erant hi, C. Valerius, Cn. Lutatius Cerco, Q. Bæbius Sulca, M. Cornelius Mammula, M. Cæcilius Denter. Et ab Antiocho rege sub idem tempus legati venerunt: quorum princeps Apollonius, in senatum introductus, multis iustisque causis regem excusavit, *Quod stipendium serius quoad diem præstaret. id se omne advexisse, ne cuius, nisi temporis, gratia regi fieret. Donum præterea asferre, vasa aurea quingentum pondo. Peterè regem, ut, quæ cum patre suo societas atque amicitia fuisset, ea secum renovaretur; imperaretque sibi populus Romanus, quæ bono fidelique socio regi essent imperanda. se nullo usquam cessaturum officio. Ea merita in se senatus fuisse, cum Romæ esset, eam comitatem juventutis, ut pro rege, non pro obside, omnibus ordinibus fuerit.* Legatis benigne responsum, & societatem renovare cum Antiocho, quæ cum patre ejus fuerat, A. Atilius prætor urbanus iussus. Quæstores urbani stipendium, vasa aurea censores acceperunt: eisque negotium datum est, ut ponerent ea, in quibus templis videretur: legatoque centum millium æris munus missum, & ædes liberæ hospitio datæ, sumtusque decretus, donec in Italia esset. Legati, qui in Syria fuerant, renuntiaverunt, in maximo eum honore apud regem esse, amicissimumque populo Romano.

VII. In provinciis eo anno hæc. C. Cicerejus prætor in Corsica signis collatis pugnavit: septem millia Corforum cæsa; capti amplius mille & septingenti. Voverat in ea pugna prætor ædem Ju-

noni Monetæ. Pax deinde data petentibus Corsis, & exacta ceræ ducena millia pondo. Ex Corsica subacta Cicerejus in Sardiniam transmisit. Et in Liguribus in agro Statiellati pugnatum ad oppidum Carystum. Eo se magnus exercitus Ligurum contulerat. Primo sub adventum M. Popillii consulis mœnibus sese continebant: deinde, postquam oppidum oppugnaturum Romanum cernebant, progressi ante portas, aciem struxerunt: nec consul (ut qui id ipsum oppugnatione comminanda quæfisset) moram certamini fecit. Pugnatum est amplius tres horas, ita ut neutro inclinaret spes. Quod ubi consul vidit, nulla parte moveri Ligurum signa, imperat equitibus, ut equos conscendant, ac tribus simul partibus in hostes, quanto maximo possent tumultu, incurrant. Pars magna equitum mediam trajecit aciem, & ad terga pugnantium pervasit. Inde terror injectus Liguribus. diversi in omnes partes fugerunt. perpauci retro in oppidum, quia inde se maxime objecerat eques. & pugna tam pervicax multos absumserat Ligurum, & in fuga passim cæsi sunt. Decem millia hominum cæsa traduntur; amplius septingenti passim capti: signa militaria relata octoginta duo. Nec incruenta victoria fuit. amplius tria millia militum amissa; cum, cedentibus neutris, ex parte utraque primores caderent.

VIII. Post hanc pugnam ex diversa fuga in unum collecti Ligures, cum majorem multo partem civium amissam, quam superesse, cernerent, (nec enim plus decem millia hominum erant) dediderunt sese; nihil quidem illi pacti. speraverant tamen,

non atrocius, quam superiores imperatores, consulem in se sæviturum. At ille arma omnibus ademit, oppidum diruit, ipsos bonaque eorum vendidit: literasque senatui de rebus ab se gestis misit. Quas cum A. Atilius prætor in curia recitasset, (nam consul alter Postumius, agris recognoscendis in Campania occupatus, aberat) atrox rex visa senatui: *Statiellates, qui uni ex Ligurum gente non tulissent arma adversus Romanos, tum quoque oppugnatos, non ultro inferentes bellum; deditos in fidem populi Romani omni ultimæ crudelitatis exemplo lacertos ac deletos esse: tot millia capitum innoxiorum, fidem implorantia populi Romani, ne quis unquam se postea dedere auderet, pessimo exemplo venisse: & distractos passim justis quondam hostibus populi Romani pacatis servire. Quas ob res placere senatui, M. Popillium consulem Ligures, pretio emtoribus reddito, ipsos restituere in libertatem; bonaque ut iis, quidquid ejus recuperari possit, reddantur curare. Arma primo quoque tempore fieri in ea gente. consulem de provincia decedere, cum deditos in sedem suam Ligures restituisset. Claram victoriam vincendo oppugnantes, non sæviendo in afflictos, fieri.*

IX. Consul, qua ferocia animi usus erat in Liguribus, eandem ad non parendum senatui habuit. Legionibus extemplo Pisas in hibernacula missis, iratus Patribus, infestus prætori, Romam rediit: senatuque extemplo ad ædem Bellonæ vocato, multis verbis invehctus est in prætorem: *qui, cum ob rem bello bene gestam, uti Diis immortalibus honos haberetur, referre ad sciætum debuisset, adversus se pro-*

hostibus senatusconsultum fecisset, quo victoriam suam ad Ligures transferret, dedique iis prope consulem prætor juberet. Itaque mulctam ei se dicere: a patribus postulare, ut senatusconsultum in se factum tolli juberent: supplicationemque, quam absentes ex literis, de bene gesta republica missis, decernere debuerint, præsentis honoris Deorum primum causa, deinde & sui aliquo tandem respectu, decernerent. Nihil lenioribus, quam absens, senatorum aliquot orationibus increpitus, neutra impetrata re, in provinciam redit. Alter consul Postumius, consumta ætate in recognoscendis agris, ne visa quidem provincia sua, comitiorum causa Romam rediit. consules C. Popillium Lænetem, P. Ælium Ligurem creavit. Prætores exinde facti C. Licinius Crassus, M. Junius Pennus, Sp. Lucretius, Sp. Cluvius, Cn. Sicinius, C. Memmius iterum.

X. Eo anno lustrum conditum est. Censores erant Q. Fulvius Flaccus, A. Postumius Albinus. Postumius condidit. Censa sunt civium Romanorum capita ducenta sexaginta novem millia & quindecim. Minor aliquanto numerus, quia L. Postumius consul pro concione edixerat, qui socium Latini nominis ex edicto C. Claudii consulis redire in civitates suas debuissent, ne quis eorum Romæ, sed omnes in suis civitatibus censerentur. Concors & e republica censura fuit. omnes, quos senatu moverunt, quibusque equos ademerunt, ærarios fecerunt, & tribu moverunt: neque ab altero notatum alter probavit. Fulvius ædem Fortunæ Equestris, quam proconsul in Hispania, dimicans cum

Celtiberorum legionibus, voverat, annos sex post; quam voverat, dedicavit: & scenicos ludos per quatrimum, unum diem in circo fecit. L. Cornelius Lentulus, decemvir sacrorum, eo anno mortuus est. in locum ejus suffectus A. Postumius Albinus. Locustarum tantæ nubes a mari vento repente in Apuliam illatæ sunt, ut examinibus suis agros late operirent. ad quam pestem frugum tollendam Cn. Sicinius prætor designatus, cum imperio in Apuliam missus, ingenti agmine hominum ad colligendas eas coacto, aliquantum temporis absumsit. Principium insequentis anni, quo C. Popillius & P. Ælius fuerunt consules, residuas contentiones ex priore anno habuit. Patres referri de Liguribus renovarique senatusconsultum volebant, & consul Ælius referebat. Popillius & collegam & senatum pro fratre deprecabatur; præ se ferens, si qui decernerent, intercessurum, collegam deteruit. Patres, eo magis utrique pariter consulum insensu, in cœpto perstabant. Itaque, cum de provinciis ageretur, & Macedonia, jam imminente Persei bello, peteretur, Ligures ambobus consulibus decernuntur. Macedoniam decreturos negant, ni de M. Popillio referretur. Postulantibus deinde, ut novos exercitus scribere, aut supplementum veteribus liceret, utrumque negatum est. Prætoribus quoque in Hispaniam supplementum petentibus negatum: M. Junio in citeriorem, Sp. Lucretio in ulteriorem. C. Licinius Crassus urbanam jurisdictionem, Cn. Sicinius inter peregrinos erat sortitus, C. Memmius Siciliam, Sp. Cluvius Sardiniam. Con-

sules, ob ea irati senatui, Latinis feriis in primam quamque diem indictis, in provinciam abituros esse denuntiarunt; nec quidquam reipublicæ acturos, præterquam quod ad provinciarum administrationem attineret.

XI. Attalum, regis Eumenis fratrem, legatum venisse Romam, Valerius Antias his consulibus scribit, ad deferenda de Perseo crimina, indicandosque apparatus belli. Plurium annales, & quibus credidisse malis, ipsum Eumenem venisse tradunt. Eumenes igitur, ut Romam venit, exceptus cum tanto honore, quantum non meritis tantum ejus, sed beneficiis etiam suis, ingentia quæ in eum congesta erant, existimaret deberi populus Romanus, in senatum est introductus. *Causam veniendi sibi Romam fuisse*, dixit, *præter cupiditatem visendi Deos hominesque, quorum beneficio in ea fortuna esset, supra quam ne optare quidem auderet: etiam ut coram moneretur senatum, ut Persei conatis obviam iret.* Orsus inde a Philippi consiliis, *necem Demetrii filii retulit, adversantis Romano bello; Bastarnarum gentem excitam sedibus suis, quorum auxiliis fretus in Italiam transfret.* Hæc eum volutantem in animo, oppressum fato, regnum ei reliquisse, quem infestissimum esse sensisset Romanis. itaque Persea, hereditarium a patre relictum bellum, & simul cum imperio traditum, jamjam primum alere ac fovere omnibus consiliis. Florere præterea juventute, quam stirpem longa pax ediderit, florere opibus regni, florere etiam ætate. Quæ cum corporis robore ac viribus vigeat, animum esse inveteratum diutina arte atque usu belli. Jam inde a pue-

ro, patris contubernio, Romanis quoque bellis, non finitimis tantum, assuetum, missum a patre in expeditiones multas variasque. Jam ex quo ipse accepisset regnum, multa, quæ non vi, non dolo, Philippus, omnia expertus, potuisset moliri, admirando rerum successu tenuisse. Accessisse ad vires eam, quæ longo tempore, multis magnisque meritis pareretur, auctoritatem.

XII. Nam apud Græciæ atque Asiæ civitates vereri majestatem ejus omnes. nec, pro quibus meritis, pro qua munificentia tantum ei tribuatur, cernere: nec dicere pro certo posse, utrum felicitate id quadam ejus accidat, an, quod ipse vereatur dicere, invidia adversus Romanos favorem illi conciliet. Inter ipsos quoque reges ingentem auctoritate; Seleuci filiam duxisse eum, non petentem, sed petutum ultero; sororem dedisse Prussiæ precanti ac oranti: celebratas esse utrasque nuptias gratulatione donisque innumerabilium legationum, & velut auspiciis nobilissimis populis deductas esse. Bæotiorum gentem, captatam Philippo, nunquam ad scribendum amicitiae fœdus adduci potuisse: tribus nunc locis cum Perseo fœdus incisum literis esse: uno Thebis, altero ad Delum, augustissimo & celeberrimo in templo, tertio Delphis. in Achaico concilio vero, nisi discussa res per paucos Romanum imperium intentantes esset, eo rem prope adductam, ut aditus & in Achajam daretur. At, Hercule, suos honores, cujus merita in eam gentem privatim, an publice, sint majora, vix dici posset, partim desertos per incultum ac negligentiam, partim hostiliter sublatos esse. Jam, Ætolos, quem ignorare, in seditionibus suis non ab Romanis, sed a Perseo præsidium petiisse? His eam fultum socie-

tatibus atque amicitiiis eos domesticos apparatus belli habere, ut externis non egeat; triginta millia peditum, quinque millia equitum: in decem annos frumentum præparare, ut abstinere & suo & hostium agro frumentandi causa possit. Jam pecuniam tantam habere, ut decem millibus mercenariorum militum, præter Macedonum copias, stipendium in totidem annos præparatum habeat: præter annuum, quod ex metallis regiis capiat, vectigal. Arma vel tribus tantis exercitibus in armamentaria congeffisse. Juventutem, ut jam Macedonia deficiat, velut ex perenni fonte unde hauriat, Thraciam subjctam esse.

XIII. Reliquum orationis adhortatio fuit. Non ego hæc, inquit, incertis jactata rumoribus, & cupidius credita, quia vera esse de inimico crimina volebam, assero ad vos, Patres conscripti; sed comperta & explorata, haud secus, quam si speculator missus a vobis subjcta oculis referrem. Neque, relicto regno meo, quod amplum & egregium vos fecistis, mare tantum trajecissem, ut vana ad vos asserendo fidem abrogarem mihi. Cernebam nobilissimas Asiæ & Græciæ civitates, in dies magis denudantes judicia sua, mox, si permitteretur, eo processuras, unde receptum ad pœnitendum non haberent. Cernebam Persea, non continentem se Macedonia regno, alia armis occupantem, alia, quæ vi subigi non possunt, favore ac benevolentia complectentem. Videbam, quam impar esset fors, cum ille vobis bellum, vos ei securam pacem præstaretis; quanquam mihi quidem non parare, sed gerere pœne bellum videbatur. Abrupolim, socium atque amicum vestrum, regno expulit. Artetarum Illyrium, quia scripta ab eo quædam

vobis comperit, socium item atque amicum vestrum, interfecit. Eversam & Callicritum Thebanos, principes civitatis, quia liberius adversus eum in concilio Bæotorum locuti fuerant, delaturosque ad vos, quæ agerentur, professi erant, tollendos curavit. Auxilium Byzantiis adversus sædus tulit, Dolopiæ bella intulit, Thessaliam & Doridem cum exercitu pervasit, ut in bello intestino deterioris partis auxilio meliorem affligeret. Confudit & miscuit omnia in Thessalia Perrhæbiaque spe novarum tabularum, ut manu debitorum obnoxia sibi optimates opprimeret. Hæc cum vobis quiescentibus & patientibus fecerit, & concessam sibi Græciam esse a vobis videat; pro certo habet, neminem sibi, antequam in Italiam trajecerit, armatum occursurum. Hoc quam vobis tutum aut honestum sit, vos videritis: ego certe mihi turpe esse duxi, prius Persea ad bellum inferendum, quam me socium ad prædicendum, ut caveretis, venire in Italiam. Functus necessario mihi officio, & quodam modo liberata atque exonerata fide mea, quid ultra facere possum, quam uti Deos Deasque precer, ut vos & vestræ reipublicæ, & nobis sociis atque amicis, qui ex vobis pendemus, consulatis?

XIV. Hæc oratio movit Patres conscriptos. ceterum in præsentia nihil, præterquam fuisse in curia regem, scire quisquam potuit: eo silentio clausa curia erat. bello denique perfecto, quæque dicta ab rege, quæque responsa essent, emanavere. Persei deinde regis legatis post paucos dies senatus datus est. Ceterum, præoccupatis non auribus magis, quam animis, ab Eumene rege, omnis & defensio & deprecatio legatorum respuebatur: & exa-

speravit animos ferocia animi Harpali, qui princeps legationis erat. Is, *velle quidem & laborare, dixit, regem, ut purganti, se nihil hostile dixisse aut fecisse, fides habeatur: ceterum, si pervicacius causam belli quæri videat, forti animo defensurum se. Martem communem esse, & eventum incertum belli.* Omnibus civitatibus Græciæ atque Asiæ curæ erat, quid Persei legati, quid Eumenes in senatu egisset: & propter adventum ejus, quem moturum aliquid rebantur, miserant pleræque civitates, alia in speciem præferentes, legatos. & legatio Rhodiorum erat, ac Satyrus princeps, haud dubius, quin Eumenes civitatem quoque suam Persei criminibus junxisset. Itaque omni modo per patronos hospitesque disceptandi cum rege locum in senatu quærebat. Quod cum contigisset, libertate intemperantius inVectus in regem, quod Lyciorum gentem adversus Rhodios concitasset, graviorque Asiæ esset, quam Antiochus fuisset; popularem quidem ac gratam populis Asiæ (nam eo quoque jam favor Persei venerat) orationem habuit: ceterum invisam senatui, inutilemque sibi & civitati suæ. Eumeni vero conspiratio adversus eum, favorem apud Romanos fecit. ita omnes ei honores habiti, donaque quam amplissima data, cum sella curuli atque eburneo scipione.

XV. Legationibus dimissis, cum Harpalus, quanta eximia celeritate poterat, regressus in Macedoniam, nuntiaffet regi, nondum quidem parantes bellum reliquisse se Romanos, sed ita infestos, ut facile appareret, non dilaturos; & ipse, præter-

quam quod & ita credebat futurum, jam etiam volebat, in flore virium se credens esse. Eumeni ante omnes infestus erat: a cujus sanguine ordiens bellum, Evandrum Cretensem, ducem auxiliorum, & Macedonas tres, assuetos ministeriis talium facinorum, ad cædem regis subornat: literasque eis dat ad Praxo hospitam, principem auctoritate & opibus Delphorum. Satis constabat, Eumenem, ut sacrificaret Apollini, Delphos ascensurum. Progressi cum Evandro insidiatores, nihil aliud ad peragendum inceptum, quam loci opportunitatem, omnia circumeuntes, quærebant. Ascendentibus ad templum a Cirrha, priusquam perveniretur ad frequentia ædificiis loca, maceria erat ab læva semitæ paulum exstans a fundamento, qua singuli transirent; dextra pars labe terræ in aliquantum altitudinis diruta erat. post maceriam se abdiderunt, gradibus adstructis, ut ex ea, velut e muro, tela in prætereuntem conjicerent. Primo a mari circumfusa turba amicorum ac satellitum procedebat: deinde extenuabant paulatim angustię agmen. Ubi ad eum locum ventum est, qua singulis eundum erat, primus semitam ingressus Pantaleon Ætolię princeps, cum quo institutus regi sermo erat. Tum insidiatores exorti saxa duo ingentia devolvunt: quorum altero caput ictum est regi, altero humerus sopitus. ex semita proclivi in declive multis super prolapsum jam saxis congestis, & ceteri quidem etiam amicorum & satellitum, postquam cadentem videre, diffugiunt, Pantaleon constanter impavidus mansit ad protegendum regem.

XVI. Latrones, cum brevi circumitū maceriæ decurrere ad conficiendum faucium possent, velut perfecta re, in jugum Parnasi refugerunt eo cursu, ut, cum unus non facile sequendo per invia atque ardua moraretur fugam eorum, ne comprehenso indicium emanaret, occiderint comitem. Ad corpus regis primo amici, deinde satellites ac servi concurrerunt, tollentes sopitum vulnere ac nihil sentientem. Vivere tamen ex calore & spiritu remanente in præcordiis senserunt; victurum exigua ac prope nulla spes erat. Quidam ex satellitibus, secuti latronum vestigia, cum usque ad jugum Parnasi, nequidquam fatigati, pervenissent, re infecta redierunt. Aggressi facinus Macedones, ut inconsulte, ita audacter cœptum, nec consulte & timide reliquerunt. Compotem jam sui regem amici postero die deferunt ad navem: inde Corinthum: a Corintho, per Isthmi jugum navibus traductis, Æginam trajiciunt. Ibi adeo secreta ejus curatio fuit, admittentibus neminem, ut fama mortuum in Asiam perferret. Attalus quoque celerius, quam dignum concordia fraterna erat, credidit. nam & cum uxore fratris, & præfecto arcis, tanquam jam haud dubius regni heres, est locutus. Quæ postea non fefelleret Eumenem: &, quanquam dissimulare & tacite habere id patique statuerat, tamen in primo congressu non temperavit, quin uxoris petendæ præmaturam festinationem fratri objiceret. Romam quoque fama de morte Eumenis perlata est.

XVII. Sub idem tempus C. Valerius ex Græcia, qui legatus ad visendum statum regionis ejus spe-

culandaque consilia Persei regis missus erat, rediit; congruentiaque omnia criminibus ab Eumene allatis referebat. simul & adduxerat secum Praxo a Delphis, cujus domus receptaculum latronum fuerat, & L. Rammium Brundisium, qui talis indicii delator erat. Princeps Brundisii Rammius fuit; hospitio quoque & duces Romanos omnes, & legatos exterarum quoque gentium insignes, præcipue regios, accipiebat. ex eo notitia ei cum absente Perseo fuerat: literisque spem amicitiae interioris magnæque inde fortunæ facientibus, ad regem profectus, brevi perfamilialis haberi, trahique, magis quam vellet, in arcanos sermones est cœptus. Promissis enim ingentibus præmiis petere institit ab eo rex, *Quoniam duces omnes legatique Romani hospitio ejus uti assuessent, quibus eorum ipse scripsisset, ut venenum dandum curaret. cujus scire se comparationem plurimum difficultatis & periculi habere, pluribus consciis comparari. eventu præterea incerto esse, ut aut satis efficacia ad rem peragendam, aut tuta ad rem celandam dentur. Se daturum, quod nec in dando, nec datum, ullo signo deprendi possêt.* Rammius, veritus ne, si abnuisset, primus ipse veneni experimentum esset, facturum pollicitus proficitur. nec Brundisium ante redire, quam convento C. Valerio legato, qui circa Chalcidem esse dicebatur, voluit. Ad eum primum indicio delato, jussu ejus Romam simul venit. Introductus in curiam, quæ acta erant, exposuit.

XVIII. Hæc ad ea, quæ ab Eumene delata erant, accessere, quo maturius hostis Perseus judicaretur:

quippe quem non iustum modo apparare bellum regio animo, sed per omnia clandestina grassari scelera latrociniorum ac veneficiorum cernebant. Belli administratio ad novos consules rejecta est: in præsentia tamen Cn. Sicinium prætorem, cuius inter cives & peregrinos jurisdictio erat, scribere milites placuit; qui, Brundisium ducti, primo quoque tempore Apolloniam in Epirum trajicerentur ad occupandas maritimas urbes, ubi consul, cui provincia Macedonia obvenisset, classem appellere tuto, & copias per commodum exponere posset. Eumenes, aliquamdiu Æginæ retentus periculosa & difficili curatione, cum primum tuto potuit, profectus Pergamum, præter pristinum odium recenti etiam scelere Persei stimulante, summa vi parabat bellum. Legati eo ab Roma, gratulantes quod e tanto periculo evasisset, venerunt. Cum Macedonicum bellum in annum dilatum esset, ceteris prætoribus jam in provincias profectis, M. Junius & Sp. Lucretius, quibus Hispaniæ provinciæ obveniant, fatigato sæpe idem petendo senatu, tandem pervicerunt, ut supplementum sibi ad exercitum daretur tria millia peditum, centum & quinquaginta equites in Romanas legiones: in socialem exercitum quinque millia peditum, & trecentos equites, imperare sociis iussi. Hoc copiarum in Hispanias cum prætoribus novis portatum est.

XIX. Eodem anno, quia per recognitionem Possunii consulis magna pars agri Campani, quem privati sine discrimine passim possederant, recuperata in publicum erat, M. Lucretius tribunus plebis

promulgavit, ut agrum Campanum censores fruendum locarent: quod factum tot annis post captam Capuam non fuerat, ut in vacuo vagaretur cupiditas privatorum. Cum in expectatione senatus esset, bello etsi non indicto, tamen jam decreto, qui regum suam, Persei qui secuturi amicitiam essent, legati Ariarathis, puerum filium regis secum adducentes, Romam venerunt. quorum oratio fuit, *regem educandum filium Romam misisse, ut jam inde a puero assuesceret moribus Romanis hominibusque. Petere, ut eum non sub hospitum modo privatorum custodia, sed publicæ etiam curæ ac velut tutelæ vellent esse.* Ea regis legatio grata senatui fuit. Decreverunt, ut Cn. Sicinius prætor ædes instructas locaret, ubi filius regis comitesque ejus habitare possent. Et Thracum legatis, apud se disceptantibus, & societatem amicitiamque petentibus, &, quod petebant, datum est, & munera binum millium æris summæ in singulos missa. Hos utique populos, quod ab tergo Macedonia Thracia esset, assumptos in societatem gaudebant. Sed ut in Asia quoque & insulis explorata omnia essent, Ti. Claudium Neronem, M. Decimium legatos miserunt. adire eos Cretam & Rhodum jusserunt, simul renovare amicitiam, simul speculari, num sollicitati animi sociorum ab rege Perseo essent.

XX. In suspenfa civitate ad expectationem novi belli, nocturna tempestate columna rostrata in Capitolio * bello Punico consulis, cui collega Ser. Fulvius fuit, tota ad imum fulmine discussa est. Ea res, prodigii loco habita, ad senatum relata est. Patres

ad haruspices referre, & decemviros adire libros iusserunt. Decemviri, lustrandum oppidum, supplicationem obsecrationemque habendam, victimis majoribus sacrificandum & in Capitolio Romæ, & in Campania ad Minervæ promontorium, renuntiavit: ludos per decem dies Jovi optimo maximo primo quoque die faciendos. Ea omnia cum cura facta. Haruspices, in bonum versurum id prodigium, prolationemque finium & interitum perduellium portendi, responderunt; quod ex hostibus spolia fuissent ea rostra, quæ tempestas disjecisset. Accesserunt, quæ cumularent religiones animis. Saturniæ, nuntiatum erat, sanguine per triduum in oppido pluuisse: Calatiæ asinum tripedem natum, & taurum cum quinque vaccis uno ictu fulminis examinatos. Auximi terra pluuisse. Horum quoque prodigiorum causa res divinæ factæ, & supplicatio unum diem feriæque habitæ.

XXI. Consules ad id tempus in provincias non exierant, quia neque, uti de M. Popillio referrent, senatui obsequebantur, &, nihil aliud decernere prius, statutum Patribus erat. Aucta etiam invidia est Popillii literis ejus, quibus iterum cum Statiellatibus Liguribus proconsul pugnasse se scripsit, ac se decem millia eorum occidisse. propter cujus injuriam belli ceteri quoque Ligurum populi ad arma ierunt. Tum vero non absens modo Popillius, qui deditis contra jus ac fas bellum intulisset, & pacatos ad rebellium incitasset, sed consules, quod non exirent in provinciam, in senatu increpiti. hoc consensu Patrum accensi M. Marcius Sermo & Q. Mar-

cus Scylla, tribuni plebis, & consulibus multam se dicturos, nisi in provinciam exirent, denuntiarent; & rogationem, quam de Liguribus deditis promulgare in animo haberent, in senatu recitarunt. Sanciebatur, *ut qui ex Statiellis deditis in libertatem restitutus ante Kalendas Sextiles primas non esset, cujus dolo malo is in servitutem venisset, ut juratus senatus decerneret, qui eam rem quæreret an adverteretque.* Ex auctoritate deinde senatus eam rogationem promulgarunt. Priusquam proficiscerentur consules, C. Cicerejo prætori prioris anni ad ædem Bellonæ senatus datus est. Is, expositis, quas in Corsica res gessisset, postulatoque frustra triumpho, in monte Albano, quod jam in morem venerat, ut sine publica auctoritate fieret, triumphavit. Rogationem Marciam de Liguribus magno consensu plebes scivit jussitque. ex eo plebiscito C. Licinius prætor consuluit senatum, quem quærare ea rogatione vellet. Patres ipsum eum quærare jusserunt.

XXII. Tum demum consules in provinciam profecti sunt, exercitumque a M. Popillio ceperunt. Neque tamen M. Popillius reverti Romam audebat, ne causam diceret, adverso senatu, infestiore populo, apud prætorem, qui de quæstione in se posita senatum consulisset. Huic detrectationi ejus tribuni plebis, alterius rogationis denuntiatione, occurrerunt: ut, si non ante Idus Novembres in urbem Romam introisset, de absente eo C. Licinius statueret ac judicaret. Hoc tractus vinculo cum redisset, ingenti cum invidia in senatum venit. Ibi cum laceratus jurgiis multorum esset, senatuscon-

sultum factum est, ut, qui Ligurum post Q. Fulvium, L. Manlium consules hostes non fuissent, ut eos C. Licinius, Cn. Sicinius prætores in libertatem restituendos curarent, agrumque iis trans Padum consul C. Popillius daret. Multa millia hominum hoc senatusconsulto restituta in libertatem, transductisque Padum ager est assignatus. M. Popillius rogatione Marcia bis apud C. Licinium causam dixit: tertio prætor, gratia consulis absentis & Popilliae familiae precibus victus, Idibus Martiis adesse reum iussit, quo die novi magistratus inituri erant honorem; ne diceret jus, qui privatus futurus esset. Ita rogatio de Liguribus arte fallaci elusa est.

XXIII. Legati Carthaginienses eo tempore Romæ erant, & Gulussa filius Masinissæ: inter eos magnæ contentiones in senatu fuere. Carthaginienses querebantur, præter agrum, de quo ante legati ab Roma, qui in re præsentī cognoscerent, missi essent, amplius septuaginta oppida castellaque agri Carthaginiensis biennio proximo Masinissam vi atque armis possedisse. Id illi, cui nihil pensi sit, facile esse. Carthaginienses fœdere illigatos silere. Prohiberi enim extra fines efferre arma. Quanquam sciant, in suis finibus, si inde Numidas pellerent, se gesturos bellum; illo haud ambiguo capite fœderis deterreri, quo diserte vetentur cum sociis populi Romani bellum gerere. Sed jam ultra superbiam crudelitatemque & avaritiam ejus non pati posse Carthaginienses. missos esse, qui orarent senatum, ut triumpharum rerum unam ab se impetrari sinerent: ut vel ex æquo apud socium populum, quid cujusque esset,

*disceptarent: vel permetterent Carthaginiensibus, ut adversus injusta arma pio. justoque se tutarentur bello: vel ad extremum, si gratia plus, quam veritas, apud eos valeret, semel statuerent, quid donatum ex alieno Masinissæ vellent. Modestius certe duros eos, & sciuros, quid dedissent: ipsum nullum, præterquam suæ libidinis arbitrio, finem facturum. Horum si nihil impetrarent, & aliquod suum post datam a P. Scipione pacem delictum esset, ipsi potius animadverterent in se. Tutam servitutem se sub dominis Romanis, quam libertatem expositam ad injurias Masinissæ, malle. Perire namque semel ipsis satius esse, quam sub acerbissimi carnificis arbitrio spiritum ducere. Sub hæc dicta lacrimantes procubuerunt; stratique humi, non sibi magis misericordiam, quam regi *.*

XXIV. Interrogari Gulussam placuit, quid ad ea responderet, aut, si prius mallet, expromeret, super qua re Romam venisset. Gulussa, Neque sibi facile esse, dixit, de iis rebus agere, de quibus nihil mandati a patre haberet: neque patri facile fuisse mandare, cum Carthaginienses, nec de qua re acturi essent, nec omnino ituros se Romam, indicaverint. In æde Æsculapii clandestinum eos per aliquot noctes consilium principum habuisse, unde præterea legatos occultis cum mandatis Romam mitti. Eam causam fuisse patri mittendi se Romam, qui deprecaretur senatum, ne quid communibus inimicis criminantibus se crederent, quem ob nullam aliam causam, nisi propter constantem fidem erga populum Romanum, odissent. His utrinque auditis, senatus, de postulatis Carthaginiensium consultus, respondere ita jussit: *Gulussæ*

sam placere extemplo in Numidiam proficisci, & nuntiare patri, ut de iis, de quibus Carthaginienses querantur, legatos quamprimum ad senatum mittat; denuntietque Carthaginiensibus, ut ad disceptandum veniant. Si aliquid possent Masinissæ honoris causa, & fecisse & facturos esse: jus gratiæ non dare. Agrum, qua cujusque sit, possideri velle: nec novos statuere fines, sed veteres observari, in animo habere. Carthaginiensibus victis se & urbes, & agros concessisse; non ut in pace eriperent per injuriam, quæ jure belli non ademissent. Ita regulus Carthaginiensesque dimissi. Munera ex instituto data utrisque, aliaque hospitalia comiter conservata.

XXV. Sub idem tempus Cn. Servilius Cæpio, Ap. Claudius Centho, T. Annius Luscus legati, ad res repetendas in Macedoniam renuntiandamque amicitiam regi missi, redierunt: qui jam sua sponte infestum Persi senatum insuper accenderunt, relatis ordine, quæ vidissent, quæque audissent. *Vidisse se per omnes urbes Macedonum summa vi parari bellum. Cum ad regem pervenissent, per multos dies conveniendi ejus potestatem non factam: postremo, cum desperato jam colloquio profecti essent, tum demum se ex itinere revocatos, & ad eum introductos esse. Suae orationis summam fuisse, foedus, cum Philippo iactum, cum ipso eo post mortem patris renovatum: in quo diserte prohiberi eum, extra fines arma efferre; prohiberi, socios populi Romani laceßere bello. Exposita deinde ab se ordine, quæ ipsi nuper in senatu Eumenem vera omnia & comperta referentem audissent. Samothracæ præterea per multos dies occultum*

consilium cum legationibus civitatum Asiæ regem habuisse. Pro his injuriis satisfieri, senatum æquum censere, reddique sibi res sociisque suis, quas contra jus fœderis habeat. Regem ad ea primo accensum ira inclementer locutum, avaritiam superbiamque Romanis objicientem frequenter: quod alii super alios legati venirent speculari dicta factaque sua, quod se ad nutum imperiumque eorum omnia dicere ac facere æquum censerent. Postremo, multum ac diu vociferatum, reverti postero die jussisse. scriptum se responsum dare velle. Tum ita sibi scriptum traditum esse: Fœdus, cum patre ictum, ad se nihil pertinere. Id se renovari, non quia probaret, sed quia in nova possessione regni patienda omnia essent, passum. Si novum fœdus secum facere vellent, convenire prius de conditionibus debere: & si in animum inducerent, ut ex æquo fœdus fieret, & se visurum, quid sibi faciundum esset, & illos credere reipublicæ consulturos. Atque ita se proripuisse, & submoveri e regia omnes cæptos. Tum se amicitiam & societatem renuntiassse. qua voce eum accensum restitisse, atque voce clara denuntiassse sibi, ut triduo regni sui decederent finibus. Ita se profectos: nec sibi, aut venientibus, aut manentibus, quidquam hospitalliter aut benigne factum. Thessali deinde Ætolique legati auditi. Senatui, ut scirent quam primum, quibus ducibus usura respublica esset, literas mitti consulibus placuit, ut, uter eorum posset, Romam ad magistratus creandos veniret.

XXVI. Nihil magnopere, quod memorari attineat, rei publicæ eo anno consules gesserant. magis e republica visum erat, comprimi ac sedari exa-

speratos Ligures. Cum Macedonicum bellum expectaretur, Gentium quoque Illyriorum regem suspectum Iffenses legati fecerunt: simul questi, fines suos secundo populatum, simul nuntiantes, *uno animo vivere Macedonum atque Illyriorum regem: communi consilio parare Romanis bellum: & specie legatorum Illyrios speculatores Romæ esse, Perse auctore missos, ut, quid ageretur, scirent.* Illyrii vocati in senatum. qui cum legatos se esse missos ab rege dicerent ad purganda crimina, si qua de rege Iffenses deferrent; quæsitum, ecquid ita non adissent magistratum, ut ex instituto loca, lautia, acciperent? sciretur denique venisse eos, & super qua re venissent? Hæsitantibus in responso, ut curia excederent, dictum. Responsum tanquam legatis, ut qui adire senatum non postulassent, dari non placuit: mittendosque ad regem legatos censuerunt, qui nuntiarent, *qui socii quererentur apud senatum, exustum a rege agrum. non æquum eum facere, qui ab sociis suis non abstineret injuriam.* In hanc legationem missi, A. Terentius Varro, C. Plætorius, C. Cicerejus. Ex Asia, qui circa socios reges missi erant, legati redierunt, qui renuntiarunt, *Eumenem in ea, Antiochum in Syria, Ptolemæum in Alexandria sese convenisse. Omnes sollicitatos legationibus Persei, sed egregie in fide permanere, pollicitosque omnia, quæ populus Romanus imperasset, præstaturus. & civitates socias adisse: ceteras satis fidas; solos Rhodios fluctuantes & imbutos Persei consiliis invenisse.* Venerant Rhodii legati ad purganda ea, quæ vulgo jactari de civitate sciebant: ceterum senatum

iis dari, cum novi consules magistratum inissent; placuit.

XXVII. Belli apparatus non differendum censuerunt. C. Licinio prætori negotium datur, ut ex veteribus quinquereimis, in navalibus Romæ subductis, quæ possent usui esse, reficeret, pararetque naves quinquaginta. Si quid ad eum numerum explendum deesset, C. Memmio collegæ in Siciliam scriberet, ut eas, quæ in Sicilia naves essent, reficeret atque expediret, ut Brundisium primo quoque tempore mitti possent. Socios navales libertini ordinis in viginti & quinque naves ex civibus Romanis C. Licinius prætor scribere iussus: in quinque & viginti parem numerum Cn. Sicinius fociis imperaret: idem prætor peditum octo millia, quadringentos equites a fociis Latini nominis exigeret. Hunc militem qui Brundisii acciperet, atque in Macedoniam mitteret, A. Atilius Serranus, qui prioris anno prætor fuerat, deligitur: Cn. Sicinius prætor qui exercitum paratum ad trajiciendum haberet, C. Popillio consuli ex auctoritate senatus C. Licinius prætor scribit, ut & legionem secundam, quæ maxime veterana in Liguribus erat, & socios Latini nominis quatuor millia peditum, ducentos equites Idibus Februariis Brundisii adesse juberet. Hæc classe & hoc exercitu Cn. Sicinius provinciam Macedoniam obtinere, donec successor veniret, iussus, prorogato in annum imperio. Ea omnia, quæ senatus censuit, impigre facta sunt. Duodequadraginta quinquereimes ex navalibus deductæ: qui deduceret eas Brundisium, L. Porcius Licinus præ-

positus: duodecim ex Sicilia missæ. Ad frumentum classi exercituique coemendum in Apuliam Calabriamque tres legati missi, Sex. Digitius, T. Juventius, M. Cæcilius. Ad omnia præparata Cn. Sici-nius prætor, paludatus ex urbe profectus, Brundisium venit.

XXVIII. Exitu prope anni C. Popillius consul Romam rediit aliquanto serius, quam senatus censuerat: cui primo quoque tempore magistratus creari, cum tantum bellum immineret, jussum erat. Itaque non secundis auribus Patrum auditus est consul, cum in æde Bellonæ de rebus in Liguribus gestis differeret. succlamationes frequentes erant interrogationesque, cur scelere fratris oppressos Ligures in libertatem non restituisset? Comitia consularia, in quam edicta erant diem, ante diem duodecimum Kalendas Martias sunt habita. Creati consules, P. Licinius Crassus, C. Cassius Longinus. Postero die prætores facti, C. Sulpicius Galba, L. Furius Philus, L. Canulejus Dives, C. Lucretius Gallus, C. Caninius Rebilus, L. Villius Annalis. His prætoribus provinciæ decretæ: duæ jure Romæ dicendo, Hispania, & Sicilia, & Sardinia, ut uni fors integra esset, quo senatus censuisset. Consulibus designatis imperavit senatus, ut, qua die magistratum inissent, hostiis majoribus rite mactatis, precarentur, ut, quod bellum populus Romanus in animo haberet gerere, ut id prosperum eveniret. Eodem die decrevit senatus, C. Popillius consul ludos per dies decem Jovi optimo maximo voveret, donaque circa omnia pulvinaria dari, si respublica

decem annos in eodem statu fuisset. Ita ut censuerant, in Capitolio vovit consul ludos fieri, donariaque dari, quanta ex pecunia decreffet senatus, cum centum & quinquaginta non minus adessent. præeunte verba Lepido pontifice maximo, id votum susceptum est. Eo anno sacerdotes publici mortui, L. Æmilius Papus decemvir sacrorum, & Q. Fulvius Flaccus pontifex, qui priore anno fuerat censor. Hic foeda morte periit. Ex duobus filiis ejus, qui tum in Illyrico militabant, nuntiatum alterum decessisse, alterum gravi & periculoso morbo ægrum esse. Obruit animum simul luctus metusque: mane ingressi cubiculum servi laqueo dependentem invenere. Erat opinio, post censuram minus compotem fuisse sui: vulgo Junonis Laciniæ iram ob spoliatum templum alienasse mentem ferebant. Suffectus in Æmilii locum decemvir M. Valerius Messalla: in Fulvii pontifex Cn. Domitius Ahenobarbus, oppido adolescens sacerdos lectus.

XXIX. P. Licinio, C. Cassio consulibus, non urbs tantum Roma, nec terra Italia, sed omnes reges civitatesque, quæ in Europa, quæque in Asia erant, converterant animos in curam Macedonici ac Romani belli. Eumenem cum vetus odium stimulabat, tum recens ira, quod scelere ejus prope ut victima mactatus Delphis esset. Prusias, Bithyniæ rex, statuerat abstinere armis, eventumque expectare. nam neque pro Romanis se æquum censere adversus fratrem uxoris arma ferre; & apud Persea victorem veniam per sororem impetrabilem fore. Ariarathes, Cappadocum rex, præterquam

quod Romanis suo nomine auxilia pollicitus erat, ex quo est junctus Eumeni affinitate, in omnia belli pacisque se confociaverat consilia. Antiochus imminebat quidem Ægypti regno, & pueritiam regis, & inertiam tutorum spernens; & ambigendo de Coele Syria causam belli se habiturum existimabat, gesturumque sine ullo impedimento, occupatis Romanis in Macedonico bello, id bellum: tamen omnia & per suos legatos senatui, & ipse legatis eorum eximie pollicitus erat. Ptolemæus propter ætatem alieni etiam tum arbitrii erat. tutores & bellum adversus Antiochum parabant, quo vindicarent Coelen Syriam, & Romanis omnia pollicebantur ad Macedonicum bellum. Masinissa & frumento juvabat Romanos, & auxilia cum elephantis Misagenemque filium mittere ad bellum parabat. consilia autem in omnem fortunam ita disposita habebat: si penes Romanos victoria esset, suas quoque in eodem statu mansuras res, neque ultra quidquam movendum: non enim passuros Romanos, vim Carthaginensibus afferri. Si fractæ essent opes Romanorum, quæ tum protegerent Carthaginenses, suam omnem Africam fore. Gentius, rex Illyriorum, fecerat potius, cur suspectus esset Romanis, quam satis statuerat, utram foveret partem; impetuque magis, quam consilio, his aut illis se adjuncturus videbatur. Cotys Thrax, Odrysarum rex, evidenter Macedonum partis erat.

XXX. Hæc sententia regibus cum esset de bello, in liberis gentibus populisque plebs ubique omnis ferme, ut solet, deterioribus erat ob regem

Macedonasque inclinata; principum diversa cerne-
res studia. pars ita in Romanos effusi erant, ut au-
doritatem immodico favore corrumpèrent: pauci
ex iis iustitia imperii Romani capti; plures ita, si
præcipuam operam navassent, potentes sese in ci-
vitatibus suis futuros rati. pars altera regiæ adula-
tionis erat, quos æs alienum & desperatio rerum
suarum, eodem manente statu, præcipites ad no-
vanda omnia agebat; quosdam ventosum ingenium,
quia Perseus magis auræ popularis erat. tertia pars,
optima eadem & prudentissima, si utique optio do-
mini potioris daretur, sub Romanis, quam sub re-
ge, malebat esse. si liberum inde arbitrium fortu-
næ esset, neutram partem volebant potentiorē
altera oppressa fieri; sed, illibatis potius viribus
utriusque partis, pacem ex eo manere. ita inter
utrosque optimam conditionem civitatum fore;
protegente altero semper inopem ab alterius inju-
ria. Hæc sentientes, certamina fautorum utriusque
partis taciti ex tuto spectabant. Consules, quo die
magistratum inierunt, ex senatusconsulto cum cir-
ca omnia fana, in quibus lectisternium majorem
partem anni esse solet, majoribus hostiis immolaf-
sent, inde preces suas acceptas ab Diis immortalibus
ominati, senatui, rite sacrificatum, precatio-
nemque de bello factam, renuntiaverunt. Haruspices
ita responderunt, *si quid rei novæ inciperetur, id mau-
randum esse. victoriam, triumphum, prorogationem
imperii portendi.* Patres, *quod faustum felixque popu-
lo Romano esset, centuriatis comitiis primo quoque die
ferre ad populum consules,* jussērunt, *ut, quod Per-*

seus, Philippi filius, Macedonum rex, adversus fœdus cum patre Philippo ielum, & secum post mortem ejus renovatum, sociis populi Romani arma intulisset, agros vastasset, urbesque occupasset; quodque belli parandi adversus populum Romanum consilia inisset, arma, milites, classẽ ejus rei causa comparasset; ut, nisi de iis rebus satisfecisset, bellum cum eo iniretur. Hæc rogatio ad populum lata est.

XXXI. Senatusconsultum inde factum est, *Ut consules inter se provincias Italiam & Macedoniam compararent, sortirenturve. Cui Macedonia obvenisset, ut is regem Persea, quique ejus sectam secuti essent, nisi populo Romano satisfecissent, bello persequeretur. Legiones quatuor novas scribi placuit, binas singulis consulibus. Id præcipue provinciæ Macedoniæ datum, quod, cum alterius consulis legionibus quina millia & duceni equites ex vetere instituto darentur in singulas legiones, in Macedoniam sena millia peditum scribi jussa; equites treceni æqualiter in singulas legiones. & in sociali exercitu consuli alteri auctus numerus: sexdecim millia peditum, octingentos equites (præter eos, quos Cn. Sicinius duxisset, sexcentos equites) in Macedoniam trajiceret. Italiæ satis visa duodecim millia sociorum peditum, sexcenti equites. Illud quoque præcipuum datum forti Macedoniæ, ut centuriones militesque veteres scriberet, quos vellet, consul usque ad quinquaginta annos. In tribunis militum novatum eo anno propter Macedonicum bellum, quod consules ex senatusconsulto ad populum tulerunt, ne tribuni militum eo anno suffragiis crearentur, sed*

consululum prætorumque in iis faciendis iudicium arbitriumque esset. Inter prætores ita partita imperia. prætorem, cuius fors fuisset, ut iret, quo senatus censuisset, Brundisium ad classem ire placuit; utque ibi recognosceret socios navales, dimissisque, si qui parum idonei essent, supplementum legeret ex libertinis, & daret operam, ut duæ partes civium Romanorum, tertia sociorum esset. Commeatus classi legionibusque ut ex Sicilia Sardiniaque subveherentur, prætoribus, qui eas provincias fortiti essent, mandari placuit, ut alteras decumas Siculis Sardisque imperarent, utque id frumentum ad exercitum in Macedoniam portaretur. Siciliam C. Caninius Rebilus est fortitus, L. Furius Philus Sardiniam, L. Canulejus Hispaniam, C. Sulpicius Galba urbanam jurisdictionem, L. Villius Annalis inter peregrinos. C. Lucretio Gallo, quo senatus censuisset, fors evenit.

XXXII. Inter consules magis cavillatio, quam magna contentio, de provincia fuit. Cassius, *sine sorte se Macedoniam oppugnaturum*, dicebat, *nec posse collegam, salvo iurejurando, secum sortiri. Prætorem eum, ne in provinciam iret, in concione jurasse, se statim loco statisque diebus sacrificia habere, quæ, absente se, recte fieri non possent: quæ non magis consule, quam prætore, absente recte fieri possent. Si senatus, non quid vellet in consulatu potius, quam quid in prætura iuraverit P. Licinius, animadvertendum esse censeat, se tamen futurum in senatus potestate.* Consulti Patres, cui consulatum populus Romanus non negasset, ab se provinciam negari, superbum rati, sortiri con-

fules jufferunt. P. Licinio Macedonia, C. Cassio Italia obvenit. Legiones inde sortiti sunt. prima & tertia in Macedoniam trajicerentur, secunda & quarta ut in Italia remanerent. Delectus consules multo intentiorem, quam alias, curam habebant. Licinius veteres quoque scribebat milites centurionesque : & multi voluntate nomina dabant, quia locupletes videbant, qui priore Macedonico bello, aut adversus Antiochum in Asia, stipendia fecerant. Cum tribuni militum centuriones, sed primum quemque, citarent, tres & viginti centuriones, qui primos pilos duxerant, citati tribunos plebis appellarunt. Duo ex collegio, M. Fulvius Nobilior & M. Claudius Marcellus, ad consules rejiciebant : *Eorum cognitionem esse debere, quibus delectus, quibusque bellum mandatum esset. ceteri, cognituros se, de quo appellati essent, ajebant; &, si injuria fieret, auxilium civibus laturos.*

XXXIII. Ad subfellia tribunorum res agebatur. eo M. Popillius consularis, advocatus, centuriones, & consul venerunt. Consule inde postulanti, ut in concione ea res ageretur, populus in concionem advocatus. Pro centurionibus M. Popillius, qui biennio ante consul fuerat, ita verba fecit : *Militares homines & stipendia justa, & corpora, & ætate, & assiduis laboribus, confecta habere : nihil recusare tamen, quo minus operam reipublicæ dent. id tantum deprecari, ne inferiores iis ordines, quam quos, cum militassent, habuissent, attribuerentur.* P. Licinius consul senatusconsulta recitari jussit : primum, quod bellum senatus Perseo jussisset : deinde, quod vete-

res centuriones quam plurimum ad id bellum scribi censuisset, nec ulli, qui non major annis quinquaginta esset, vacationem militiæ esse. Deprecatus est deinde, *ne novo bello, tam propinquo Italiæ, adversus regem potentissimum, aut tribunos militum, delectum habentes, impedirent; aut prohiberent consulem, quem cuique ordinem assignari e republica esset, eum assignare. Si quid in ea re dubium esset, ad senatum rejicerent.*

XXXIV. Postquam consul, quæ voluerat, dixit, Sp. Ligustinus ex eo numero, qui tribunos plebis appellaverant, a consule & ab tribunis petiit, ut sibi paucis ad populum agere liceret. Permissu omnium ita locutus fertur. *Sp. Ligustinus tribus. Crustumina ex Sabinis sum oriundus, Quirites. Pater mihi jugerum agri reliquit & parvum tugurium, in quo natus educatusque sum: hodieque ibi habito. Cum primum in ætatem veni, pater mihi uxorem fratris sui filianz dedit: quæ secum nihil attulit, præter libertatem pudicitiamque, & cum his fœcunditatem, quanta vel in diviti domo satis esset. Sex filii nobis, duæ filiæ sunt: utraq; jam nuptæ. Filii quatuor togas viriles habent, duo prætextati sunt. Miles sum factus, P. Sulpicio, C. Aurelio consulitus. In eo exercitu, qui in Macedoniam est transportatus, biennium miles gregarius fui adversus Philippum regem: tertio anno virtutis causa mihi T. Quinctius Flaminius decimum ordinem hastatum assignavit. Devicto Philippo Macedonibusque, cum in Italiam portati ac dimissi essemus, continuo miles voluntarius cum M. Porcio consule in Hispaniam sum profectus. Neminem omnium imperatorum, qui vivant, acriorem virtutis spectatorem ac judicem*

fuiffe sciunt, qui & illum & alios duces longa militia experti sunt. hic me imperator dignum judicavit, cui primum hastatum prioris centuriæ assignaret. Tertio iterum voluntarius miles factus sum in eum exercitum, qui adversus Ætolos & Antiochum regem est missus. a M. Acilio mihi primus princeps prioris centuriæ est assignatus. Expulso rege Antiocho, subactis Ætolis, reportati sumus in Italiam: & deinceps bis, quæ annua merebant legiones, stipendia feci. Bis deinde in Hispania militavi, semel Q. Fulvio Flacco, iterum Ti. Sempronio Graccho prætor. A Flacco inter ceteros, quos virtutis causa secum ex provincia ad triumphum deducebat, deductus sum. a Tiberio Graccho rogatus, in provinciam ii. Quater intra paucos annos primum pilum duxi: quater & tricies virtutis causa donatus ab imperatoribus sum: sex civicas coronas accepi. viginti duo stipendia annua in exercitu emerita habeo, & major annis sum quinquaginta. Quod si mihi nec stipendia omnia emerita essent, necdum ætas vacationem daret, tamen, cum quatuor milites pro me uno vobis dare, P. Licini, possem, æquum erat me dimitti. Sed hæc pro causa mea dicta accipiat velim: ipse me, quoad quisquam, qui exercitus scribit, idoneum militem judicabit, nunquam sibi excusaturus. Ordinem quo me dignum judicent tribuni militum, ipso- rum est potestatis: ne quis me virtute in exercitu præstet, dabo operam; ut semper ita fecisse me & imperatores mei, & qui una stipendia fecerunt, testes sunt. Vos quoque æquum est, commilitones, etsi appellationis vobis usurpatis jus, cum adolescentes nihil adversus magistratum senatusque auctoritatem usquam feceritis,

nunc quoque in potestate senatus ac consulum esse, & omnia honesta loca ducere, quibus rempublicam defensuri sitis.

XXXV. Hæc ubi dixit, collaudatum multis verbis consul ex concione in senatum duxit. Ibi quoque ei ex auctoritate senatus gratiæ actæ, tribunique militares in legione prima primum pilum virtutis causa ei assignarunt. ceteri centuriones, omissa appellatione, ad delectum obedienter responderunt. Quo maturius in provincias magistratus profiscerentur, Latinæ Kalendis Juniis fuere: eoque sollempni perfecto, C. Lucretius prætor, omnibus, quæ ad classem opus erant, præmissis, Brundisium est profectus. Præter eos exercitus, quos consules comparabant, C. Sulpicio Galbæ prætori negotium datum, ut quatuor legiones scriberet urbanas iusto numero peditum equitumque; iisque quatuor tribunos militum ex senatu legeret, qui præessent: sociis Latini nominis imperaret quindecim millia peditum, mille & ducentos equites. Is exercitus uti paratus esset, quo senatus censuisset. P. Licinio consuli ad exercitum civilem socialemque petenti addita auxilia, Ligurum duo millia, Cretenses sagittarii, (incertus numerus, quantum rogati auxilia Cretenses misissent) Numidæ item equites elephantique. In eam rem legati ad Masinissam Carthaginienfisque missi, L. Postumius Albinus, Q. Terentius Culleo, C. Aburius. In Cretam item legatos tres ire placuit, A. Postumium Albinum, C. Decimium, A. Licinium Nervam.

XXXVI. Per idem tempus legati ab rege Perseo

venerunt. eos in oppidum intromitti non placuit, cum jam bellum regi eorum & Macedonibus & senatus decreffet, & populus iussisset. In ædem Bellonæ in senatum introducti ita verba fecerunt: *Mirari Persea regem, quid in Macedoniam exercitus transportati essent. Si impetrari a senatu posset, ut ii revocentur, regem de injuriis, si quas sociis factas quererentur, arbitratus senatus satisfacturum esse.* Sp. Carvilius, ad eam ipsam rem ex Græcia remissus ab Cn. Sicinio, in senatu erat. is Perrhæbiam expugnatam armis, Thessaliæ aliquot urbes captas, cetera, quæ aut ageret, aut pararet rex, cum argueret, respondere ad ea legati iussi. Postquam hæsitabant, negantes sibi ultra quidquam mandatum esse, iussi renuntiare regi, *Consulem P. Licinium brevi cum exercitu futurum in Macedonia esse. ad eum, si satisfacere in animo esset, mitteret legatos. Romam quod præterea mitteret, non esse: neminem eorum per Italiam ire liciturum.* Ita dimissis, P. Licinio consuli mandatum, intra undecimum diem juberet eos Italia excedere, & Sp. Carvilius mitteret, qui, donec navem conscendissent, custodiret. Hæc Romæ acta, nondum profectis in provinciam consulibus. Jam Cn. Sicinius, qui, priusquam magistratu abiret, Brundisium ad classem & ad exercitum præmissus erat, trajectis in Epirum quinque millibus peditum, trecentis equitibus, ad Nymphæum in agro Apolloniati castra habebat. Inde tribunos cum duobus millibus militum ad occupanda Dassaretiorum & Illyriorum castris, ipsis arcessentibus præsidia, ut tutiores a finitimorum impetu Macedonum essent, misit.

XXXVII. Paucis post diebus Q. Marcius, A. Atilius, & P. & Ser. Cornelii Lentuli, & L. Decimius, legati in Græciam missi, Corcyram peditum mille secum advexerunt: ibi inter se & regiones, quas obirent, & milites diviserunt. Decimius missus est ad Gentium, regem Illyriorum, quem, si aliquem respectum amicitiae eum habere cerneret, tentare, aut etiam ad belli societatem perlicere iussus. Lentuli in Cephalleniam missi, ut in Peloponnesum trajicerent, oramque maris, in occidentem versi, ante hiemem circumirent. Marcio & Atilio Epirus, Ætolia, & Thessalia circumeundæ assignantur. Inde Bœotiam atque Eubœam aspicere iussi; tum in Peloponnesum trajicere. ibi congressuros se cum Lentulis constituunt. Priusquam digrederentur a Corcyra, literæ a Perseo allatæ sunt, quibus quærebat, quæ causâ Romanis aut in Græciam trajiciendi copias, aut urbes occupandi, esset? Cui rescribi nihil placuit; nuntio ipsius, qui literas attulerat, dici, *præsidiî causa ipsarum urbium Romanos facere*. Lentuli, circumeuntes Peloponnesi oppida, cum sine discrimine omnes civitates adhortarentur, ut, quo animo, qua fide adjuvissent Romanos, Philippi primum, deinde Antiochi bello, eodem adversus Persea juvarent, fremitum in concionibus audiebant: Achæis indignantibus, eodem se loco esse, (qui omnia a principiis Macedonici belli præstitissent Romanis, & Macedonum Philippi bello hostes fuissent) quo Messenii atque Elii, qui pro Antiocho hoste arma adversus populum Romanum tulissent; ac, nuper in Achaicum contributi concilium, ve-

Iut præmium belli se victoribus Achæis tradi quererentur.

XXXVIII. Marcius & Atilius ad Gitanas, Epiri oppidum decem millia ab mari, cum ascenderent, concilio Epirotarum habito, cum magno omnium assensu auditi sunt: & quadringentos juventutis eorum in Orestas, ut præsidio essent liberatis ab se Macedonibus, miserunt. Inde in Ætoliā progressi, ac paucos ibi morati dies, dum in prætoris mortui locum alius sufficeretur, & Lycisco prætorē faciō, quem Romanorum favere rebus satis compertum erat, transierunt in Thessaliā. Eo legati Acarnanum, & Bœotorum exsules venerunt. Acarnanes nuntiare jussi, *Quæ Philippi primum, Antiochi deinde bello, decepti pollicitationibus regis, adversus populum Romanum commisissent, ea corrigendi occasionem illis oblatam. Si male meriti clementiam populi Romani experti essent, bene merendo liberalitatem experirentur.* Bœotis exprobratum, societatem eos cum Perseo junxisse. iis, cum culpam in Ismeniam, principem alterius partis, conferrent, & quasdam civitates dissentientes in causam deductas, *appariturum id esse*, Marcius respondit: *singulis enim civitatibus de se ipsis consulendi potestatem facturos.* Thessalorum Larissæ fuit concilium. ibi & Thessalis benigna materia gratias agendi Romanis pro libertatis munere fuit; & legatis, quod, & Philippi prius & post Antiochi bello, enise adjuti a gente Thessalorum essent. hac mutua commemoratione meritorum accensi animi multitudinis ad omnia decernenda, quæ Romani vellent. Secundum hoc concilium

legati a Perseo rege venerunt, privati maxime hospitii fiducia, quod ei paternum cum Marcio erat. Ab hujus necessitudinis commemoratione orsi, petierunt legati, in colloquium veniendi regi potestatem faceret. Marcus, *Et se ita a patre suo accepisse, dixit, amicitiam hospitiumque cum Philippo fuisse. minime immemorem necessitudinis ejus legationem eam suscepisse. Colloquium, si satis commode valeret, non fuisse dilaturum: nunc, ubi primum posset, ad Peneum flumen, qua transitus ab Homolio Dium esset, præmissis, qui nuntiarent regi, venturos.*

XXXIX. Et tum quidem ab Dio Perseus in interiora regni recipit se, levi aura spei objecta, quod Marcus ipsius causa suscepisse se legationem dixisset. Post dies paucos ad constitutum locum venerunt. Magnus comitatus fuit regius, cum amicorum, tum satellitum turba stipante. Non minore agmine legati venerunt, & ab Larissa multis prosequentibus, & legationibus civitatum, quæ convenerant Larissam, & renuntiare domum certa, quæ audissent, volebant. Inerat cura insita mortalibus videndi congregientes nobilem regem, & populi principis terrarum omnium legatos. Postquam in conspectu steterunt, dirimente amne, paulisper internuntiando cunctatio fuit, utri transgredierentur. aliquid illi regiæ majestati, aliquid hi populi Romani nomini, cum præsertim Perseus petisset colloquium, existimabant deberi. Joco etiam Marcus cunctantes movit. *Minor, inquit, ad majorem, & (quod Philippo ipsi cognomen erat) filius ad patrem transeat.* Facile persuasum id regi est. Aliud

deinde ambigebatur, cum quam multis transiret. Rex, cum omni comitatu transire, æquum censebat: legati vel cum tribus venire jubebant, vel, si tantum agmen traduceret, obsides daret, nihil fraudis fore in colloquio. Hippian & Pantauchum, quos & legatos miserat, principes amicorum, obsides dedit. Nec tam in pignus fidei obsides desiderati erant, quam ut appareret sociis, nequaquam ex dignitate parî congredi regem cum legatis. Salutatio non tanquam hostium, sed hospitalis ac benigna fuit; positisque sedibus confederunt.

XL. Cum paulisper silentium fuisset: *Exspectari nos, inquit Marcius, arbitror, ut respondeamus literis tuis, quas Corcyram misisti; in quibus quæris, quid ita legati cum militibus venerimus, & præsidia in singulas urbes dimittamus? Ad hanc interrogationem tuam & non respondere vereor, ne superbum sit, & vera respondere, ne nimis acerbum audienti tibi videatur. Sed cum aut verbis castigandus, aut armis sit, qui fœdus rumpit; sicut bellum adversus te alii, quam mihi, mandatum malim, ita orationis acerbiter adversus hospitem, utcunque est, subibo: sicut medici, cum salutis causa tristiora remedia adhibent. Ex quo regnum adeptus es, unam rem te, quæ facienda fuerit, senatus fecisse censet; quod legatos Romam ad renovandum *** judicat potius, quam, cum renovatum esset, violandum. Abrupolim, socium atque amicum populi Romani, regno expulisti. Artetari interfectores, ut cæde (ne quid ultra dicam) latatum appareret, recepisti, qui omnium Illyriorum fidißimum Romano nomini regulum occiderant. Per Theßaliam & Maliensem*

agrum cum exercitu contra fœdus Delphos isti: Evgantiis item contra fœdus misisti auxilia. Cum Bœotiiis, sociis nostris, secretam tibi ipsi societatem, quam non licebat, jurejurando pepigisti. Thebanos legatos, Eversam & Callicritum, venientes a nobis, quærere malo, quis interfecerit, quam arguere. In Ætolia bellum intestinum & cædes principum per quos, nisi per tuos, factæ videri possunt? Dolops a te ipso evaslati sunt. Eumenes rex, ab Roma cum in regnum rediret, prope ut victima Delphis in sacrato loco ante aras mactatus, quem insimulet, piget referre. Quæ hospes Brundisinus occulta facinora indicet, certum habeo, & scripta tibi omnia ab Roma esse, & legatos tuos renuntiassè. Hæc ne dicerentur a me, uno modo vitare potuisti, non quærendo, quam ob causam exercitus in Macedoniam trajicerentur, aut præsidia in sociorum urbes mitteremus. Quærenti tibi superbius tacuissimus, quam vera respondimus. Equidem pro paterno nostro hospitio faveo orationi tuæ, & opto, ut aliquam mihi materiam præbeas agendæ tuæ apud senatum causæ.

XLI. Ad ea rex: Bonam causam, si apud iudices æquos ageretur, apud eosdem & accusatores & iudices agam. Eorum autem, quæ objecta sunt mihi, partim ea sunt, quibus nescio an gloriari debeam; partim, quæ fateri non erubescam; partim, quæ verbo objecta verbo negare sit. Quid enim, si legibus vestris hodie reus sim, aut index Brundisinus, aut Eumenes mihi objiciat, ut accusare potius vere, quam conviciari, videantur? Scilicet, nec Eumenes, cum tam multis gravis publice ac privatim sit, alium, quam me, inimicum habuit: neque ego potiore quemquam ad ministeria facinorum, quam

Rammium, (quem neque unquam ante videram, nec eram postea visurus) invenire potui. Et Thebanorum, quos naufragio perisse constat, & Artetari cædis mihi reddenda ratio est. in qua tamen nihil ultra objicitur, quam interfectores ejus in regno exsulasse meo. Cujus conditionis iniquitatem ita non sum recusaturus, si vos quoque accipitis, ut, quicumque exsules in Italiam aut Romam se contulerunt, his facinorum, propter quæ damnati sunt, auctores vos fuisse fateamini. Si hoc & vos recusabitis, & omnes aliæ gentes, ego quoque inter ceteros ero. Et, Hercule, quid attinet cuiquam exsilium patere, si nusquam exsuli futurus locus est? Ego tamen istos, ut primum in Macedonia esse, admonitus a vobis, comperi, requisitos abire ex regno jussi, & in perpetuum interdixi finibus meis. Et hæc quidem mihi, tanquam causam dicenti reo, objecta sunt: illa, tanquam regi, & quæ de fœdere, quod mihi est vobiscum, disceptationem habeant. Nam, si est in fœdere ita scriptum, ut ne, si bellum quidem quis inferat, tueri me regnumque meum liceat, mihi fatendum est, quod me armis adversus Abrupolim, socium populi Romani, defenderim, fœdus violatum esse. Sin autem hoc & ex fœdere licuit, & jure gentium ita comparatum est, ut arma armis propulsentur, quid tandem me facere decuit, cum Abrupolis fines mei regni usque ad Amphipolim pervastasset, multa libera capita, magnam vim Mancipiorum, multa millia pecorum abegisset? Quiescerem & paterer, donec Pellam & in regiam meam armatus pervenisset? At enim bello quidem justo sum persecutus; sed vinci non oportuit eum, neque ea, quæ victis accidunt, pati: quorum casum cum ego subierim,

qui sum armis laceffitus, quid potest queri sibi accidisse, qui causa belli fuit? Non sum eodem modo defensusurus, Romani, quod Dolopas armis coercuerim: quia, etsi non merito eorum, jure feci meo; cum mei regri, meæ ditionis essent, vestro decreto patri attributi meo. Nec, si causa reddenda sit, non vobis, nec fœderatis, sed iis, qui ne in servos quidem sæva atque injusta imperia probant, plus æquo & bono sævisse in eos videri possum. quippe Euphranorem, præfectum, a me impositum, ita occiderunt, ut mors pœnarum ejus levissima fuerit.

XLII. At, cum processissem inde ad visendas Larissam, & Antrona, & Pylleon, quo in propinquo multo ante debita vota persolverem, Delphos sacrificandi causa ascendi. Et hic, criminis augendi causa, cum exercitu me fuisse adjicitur. Scilicet, ut, quod nunc vos facere queror, urbes occuparem, arcibus imponerem præsidia. Vocate in concilium Græciæ civitates, per quas iter feci; queratur unusquilibet militis mei injuriam; non recusabo, quin, simulato sacrificio, aliud petisse videar. Ætolis & Byzantiis præsidia misimus, & cum Bæotis amicitiam fecimus. Hæc, qualiacunque sunt, per legatos meos non solum indicata, sed etiam excusata sunt sæpe in senatu vestro: ubi aliquos ego disceptatores, non tam æquos, quam te, Q. Marci, paternum amicum & hospitem, habebam. Sed nondum Romam accusator Eumenes venerat; qui calumniando omnia detorquendoque suspecta & invisa efficeret, & persuadere vobis conaretur, non posse Græciam in libertate esse, & vestro munere frui, quoad regnum Macedoniæ incolume esset. Circumagetur hic

orbis : erit mox , qui arguat , nequidquam Antiochum ultra juga Tauri remotum : graviores multo Asiae , quam Antiochus fuerit , Eumenem esse : nec conquiescere socios vestros posse , quoad regia Pergami sit. eam arcem supra capita finitimarum civitatum impositam. Ego hæc , Q. Marci & A. Atili , quæ aut a vobis objecta , aut purgata a me sunt , talia esse scio , ut aures , ut animi audientium sint : nec tam referre , quid ego , aut qua mente fecerim , quam quomodo id vos factum accipiatis. Consciens mihi sum , nihil me scientem deliquisse : & , si quid fecerim imprudentia lapsus , corrigi me & emendari castigatione hac posse. Nihil certe insanabile , nec quod bello & armis persequendum esse censeatis , commisi : at frustra clementiæ gravitatisque vestræ fama vulgata per gentes est , si talibus de causis , quæ vix querela & expostulatione dignæ sunt , arma capitis , & regibus sociis bellum inferitis.

XLIII. Hæc dicenti tum assensus Marcius auctor fuit mittendi Romam legati , cum experienda omnia ad ultimum , nec prætermittendum spem ullam censuisset. Reliqua consultatio erat , quonam modo tutum iter legatis esset. ad id cum necessaria petitio induciarum videretur , cuperetque Marcius , neque aliud colloquio petisset , gravate & in magnam gratiam petentis concessit. nihil enim satis paratum ad bellum in præsentia habebant Romani , non exercitum , non ducem : cum Perseus (ni spes vana pacis occæcasset consilia) omnia præparata atque instructa haberet , & suo maxime tempore atque alieno hostibus incipere bellum posset. Ab hoc colloquio , fide induciarum interposita , legati Romani in Bœo-

tiam comparati sunt. Ibi jam motus cœperat esse, discedentibus a societate communis concilii Bœotorum quibusdam populis, ex quo renuntiatum erat, respondisse legatos, apparituros, quibus populis proprie societatem cum rege jungi displicuisset. Primi a Chæronea legati, deinde a Thebis, in ipso itinere occurrerunt, affirmantes non interfuisse se, quo societas ea decreta esset, concilio: quīs legati, nullo in præsentia responso dato, Chalcidem se sequi iusserunt. Thebis magna contentio orta erat ex alio certamine. Comitibus prætoriis Bœotorum victa pars, injuriam persequens, coacta multitudine decretum fecit Thebis, ne Bœotarchæ urbibus reciperentur. Exsules Thespias universi concesserunt: inde (recepti enim sine cunctatione erant) Thebas, jam mutatis animis, revocati decretum faciunt, ut duodecim, qui privati cœtum & concilium habuissent, exilio multarentur. Novus deinde prætor (Ismenias is erat, vir nobilis ac potens) capitalis poenæ absentes eos decreto damnat. Chalcidem fugerant: inde ad Romanos Larissam profecti, causam cum Perseo societatis in Ismeniam contulerant. Ex contentione ortum certamen. utriusque tamen partis legati ad Romanos venerunt, & exsules accusatoresque Ismenia, & Ismenias ipse.

XLIV. Chalcidem ut ventum est, aliarum civitatum principes, id quod maxime gratum erat Romanis, suo quique proprio decreto Persei societatem aspernati, Romanis se adjungebant: Ismenias gentem Bœotorum in fidem Romanorum permitti æquum censebat, inde certamine orto, nisi in tri-

bunal legatorum perfugisset, haud multum abfuit, quin ab exfulibus fautoribusque eorum interficeretur. Thebæ quoque ipsæ, quod Bœotiæ caput est, in magno tumultu erant, aliis ad regem trahentibus civitatem, aliis ad Romanos. & turba Coronæorum Haliartiorumque convenerat ad defendendum decretum regiae societatis. sed constantia principum, docentium cladibus Philippi Antiochique, quanta esset vis & fortuna imperii Romani, victa eadem multitudo &, ut tolleretur regia societas, decrevit, & eos, qui auctores paciscendæ amicitiae fuerant, ad satisfaciendum legatis Chalcidem misit, fideique legatorum commendari civitatem iussit. Thebanos Marcius & Atilius læti audierunt, auctoresque & his separatim singulis fuerunt ad renovandam amicitiam mittendi Romam legatos. Ante omnia exfulles restitui iusserunt, & auctores regiae societatis decreto suo damnarunt. Ita, quod maxime volebant, discussio Bœotico concilio, Peloponnesum proficiscuntur, Ser. Cornelio Chalcidem arcessito. Argis præbitum est iis concilium: ubi nihil aliud a gente Achæorum petierunt, quam ut mille milites darent. id præsidium ad Chalcidem tuendam, dum Romanus exercitus in Græciam trajiceretur, missum est. Marcius & Atilius, peractis, quæ agenda in Græcia erant, principio hiemis Romam redierunt.

XLV. Inde legatio sub idem tempus in Asiam circum insulas missa. tres erant legati, Ti. Claudius, P. Postumius, M. Junius. ii circumeuntes hortabantur socios ad suscipiendum adversus Persæa pro Romanis bellum: &, quo quæque opulentior civitas

erat, eo accuratius agebant, quia minores secuturæ majorum auctoritatem erant. Rhodii maximi ad omnia momenti habebantur, quia non favere tantum, sed adjuvare etiam viribus suis bellum poterant, quadraginta navibus auctore Hegesilocho comparatis. qui, cum in summo magistratu esset, (Prytanin ipsi vocant) multis rationibus pervicerat Rhodios, ut, omissa, quam sæpe vanam experti essent, regum fovendorum spe, Romanam societatem (unam tum in terris vel viribus, vel fide stabilem) retinerent. *Bellum imminere cum Perseo: desideraturos Romanos eundem navalem apparatus, quem nuper Antiochi, quem Philippi ante bello vidissent. trepidaturos tum repente paranda classe, cum mittenda esset; nisi reficere naves, nisi instruere navalibus sociis cœpissent. Id eo magis enise faciendum esse, ut crimina delata ab Eumene fide rerum refellerent.* His incitati, quadraginta navium classem instructam ornataque legatis Romanis advenientibus, ut non exspectatam adhortationem esse appareret, ostenderunt. Et hæc legatio magnum ad conciliandos animos civitatum Asiæ momentum fuit. Decimius unus sine ullo effectu, captarum etiam pecuniarum ab regibus Illyriorum suspicione infamis, Romam rediit.

XLVI. Perseus, cum a colloquio Romanorum in Macedoniam recepisset sese, legatos Romam de inchoatis cum Marcio conditionibus pacis misit: & Byzantium & Rhodum literas legatis ferendas dedit. In literis eadem sententia ad omnes erat: *collocutum se cum Romanorum legatis. quæ audisset, quæ-*

que dixisset, ita disposita, ut superior fuisse in disceptatione videri posset. Apud Rhodios legati addiderunt, *Confidere pacem futuram. auctoribus enim Marcio atque Atilio, missos Romam legatos. Si pergerent Romani contra fœdus movere bellum, tum omni gratia, omni ope evitandum fore Rhodiis, ut reconcilient pacem. Si nihil deprecando proficiant, id agendum, ne omnium rerum jus ac potestas ad unum populum perveniat. Cum ceterorum id interesset, tum præcipue Rhodiorum, qui plus inter alias civitates dignitate atque opibus excellent: quæ serva atque obnoxia fore, si nullus alio sit, quam ad Romanos, respectus.* Magis & literæ & verba legatorum benigne sunt audita, quam momentum ad mutandos animos habuerunt: potentior esse partis melioris auctoritas cœperat. Responsum ex decreto est: *Optare pacem Rhodios. si bellum esset, ne quid ab Rhodiis sperare aut peteret rex, quod veterem amicitiam, multis magnisque meritis pace belloque partam, disjungeret sibi ab Romanis.* Ab Rhodo redeuntes, Bœotiæ quoque civitates, & Thebas, & Coroneam, & Haliartum, adierunt: quibus expressum invitis existimabatur, ut, relicta regia societate, Romanis adjungerentur. Thebani nihil moti sunt: quanquam nonnihil, & damnatis principibus, & restitutis exsulibus, succensebant Romanis. Coronæi & Haliartii, favore quodam insito in reges, legatos in Macedoniam miserunt, præsidium petentes, quo se adversus impotentem superbiam Thebanorum tueri possint. Cui legationi responsum ab rege est, *præsidium se propter inducias cum Romanis factas mittere non posse: tamen suadere,*

ita a Thebanorum injuriis, qua possent, ut se vindicarent, ne Romanis præberent causam in se sæviendi.

XLVII. Marcius & Atilius Romam cum venissent, legationem in Capitolio ita renuntiarunt, ut nulla re magis gloriarentur, quam decepto per inducias & spem pacis rege. Adeo enim apparatibus belli fuisse instructum, ipsis nulla parata re, ut omnia opportuna loca præoccupari ante ab eo potuerint, quam exercitus in Græciam trajiceretur. Spatio autem induciarum sumto, venturum illum nihilo paratiorem; Romanos omnibus instructiores rebus cæpturos bellum. Bæotorum quoque se concilium arte distraxisse, ne conjungi amplius ullo consensu Macedonibus possent. Hæc, ut summa ratione acta, magna pars senatus approbabat: veteres & moris antiqui memores negabant, se in ea legatione Romanas agnoscere artes. Non per insidias & nocturna prælia, nec simulatam fugam improvisosque ad incautum hostem reditus, nec ut astu magis, quam vera virtute, gloriarentur, bella majores gessisse. indicare prius, quam gerere, solitos bella, denuntiare etiam; interdum locum finire, in quo dimicaturi essent. Eadem fide indicatum Pyrrho regi medicum, vitæ ejus insidiantem: eadem Faliscis vinctum traditum proditorem liberorum regis. Hæc Romana esse, non versutiarum Punicarum, neque calliditatis Græcæ: apud quos fallere hostem, quam vi superare, gloriosius fuerit. Interdum in præsertim tempus plus profici dolo, quam virtute: sed ejus demum animum in perpetuum vinci, cui confessio expressa sit, se neque arte, neque casu, sed collatis cominus viribus, jussu ac pio bello esse superatum. Hæc seniores, quibus nova hæc minus

placebat sapientia. vicit tamen ea pars senatus, cui potior utilis, quam honesti, cura erat, ut comprobaretur prior legatio Marcii, & eodem rursus in Græciam cum quinquereimibus remitteretur, jubeturque cetera, uti e republica maxime visum esset, agere. A. quoque Atilium miserunt ad occupandam Larissam in Theffalia, timentes, ne, si induciarum dies exisset, Perseus, præsidio eo misso, caput Theffaliæ, in potestate haberet. Duo millia peditum Atilius ab Cn. Sicinio accipere ad eam rem agendam iussus. & P. Lentulo, qui ex Achaja redierat, trecenti milites Italici generis dati, ut Thebis daret operam, ut in potestate Boeotia esset.

XLVIII. His præparatis, quanquam ad bellum consilia erant destinata, senatum tamen præberi legatis placuit. Eadem fere, quæ in colloquio ab rege dicta erant, relata ab legatis. Infidiarum Eumeni faciarum crimen, & maxima cura, & minime tamen probabiliter, (manifesta enim res erat) defensum. Cetera deprecatio erat: sed non eis animis audiebantur, qui aut doceri, aut flecti possent. Denuntiatur, extemplo moenibus urbis Romæ, Italia intricesimum diem excederent. P. Licinio deinde consuli, cui Macedonia provincia obvenerat, denuntiatur, ut exercitui diem primam quamque diceret ad conveniendum. C. Lucretius prætor, cui classis provincia erat, cum quadraginta quinquereimibus ab urbe profectus: nam ex relictis navibus alias in alium usum retineri ad urbem placuit. Præmissus a prætore est frater Lucretius cum quinquereime una: iussusque, ab sociis ex fœdere acceptis navibus, ad

Cephallemiam classi occurrere. ab Rheginis triremi una, ab Locris duabus, ab Uritibus quatuor, præter oram Italiæ supervectus Calabriæ extremum promontorium in Jonio mari, Dyrrhachium trajicit. Ibi decem ipsorum Dyrrhachinorum, duodecim Issæorum, quinquaginta quatuor Gentii regis lembos nactus, simulans se credere, eos in usum Romanorum comparatos esse, omnibus abductis, die tertio Corcyram, inde protinus in Cephallemiam trajicit. C. Lucretius prætor ab Neapoli profectus, superato freto, die quinto in Cephallemiam transmisit. Ibi stetit classis, simul opperiens, ut terrestres copię trajicerentur, simul, ut onerariæ, ex agmine suo per altum dissipatæ, consequerentur.

XLIX. Per hos forte dies P. Licinius consul, votis in Capitolio nuncupatis, paludatus ab urbe profectus est. Semper quidem ea res cum magna dignitate ac majestâte geritur: præcipue tamen convertit oculos animosque, cum ad magnum nobilemque, aut virtute aut fortuna, hostem, euntem consulem prosequuntur. Contrahit enim non officii modo cura, sed etiam studium spectaculi, ut videant ducem suum, cujus imperio consilioque summam rempublicam tuendam permiserunt. Subit deinde cogitatio animum, qui belli casus, quam incertus fortunæ eventus, communisque Mars belli sit: adversa, secunda, quæque inscitia & temeritate ducum clades sæpe acciderint; quæ contra bona prudentia & virtus attulerit. Quem scire mortalium, utrius mentis, utrius fortunæ consulem ad bellum mittant? triumphantemne mox cum exerci-

tu victore scandentem Capitolium ad eosdem Deos, a quibus proficiscatur, visuri; an hostibus eam præbituri lætitiā sint? Persi autem regi, adversus quem ibatur, famam & bello clara Macedonum gens, & Philippus pater, inter multa prospere gesta Romano etiam nobilitatus bello, præbebat; tum ipsius Persei nunquam, ex quo regnum accepisset, desitum belli exspectatione celebrari nomen: cum his cogitationibus omnium ordinum homines proficiscentem consulem prosecuti sunt. Duo consulares tribuni militum cum eo missi, C. Claudius, Q. Mucius; & tres illustres juvenes, P. Lentulus, & duo Manlii Acidini. alter M. Manlii, alter L. Manlii filius erat. Cum iis consul Brundisium ad exercitum, atque inde, cum omnibus copiis transvectus, ad Nymphæum in Apolloniati agro posuit castra.

L. Paucos ante dies Perseus, postquam legati; ab Roma regressi, præciderant spem pacis, consilium habuit. Ibi aliquamdiu diversis sententiis certatum est. Erant, quibus vel stipendium pendendum, si injungeretur, vel agri parte cedendum, si mulctarent; quidquid denique aliud pacis causa patiendum esset, non recusandum videretur, nec committendum, ut in aleam tanti casus se regnumque daret. *Si possessio haud ambigua regni maneret, multa diem tempusque afferre posse, quibus non amissa modo recuperare, sed timendus ultro iis esse, quos nunc timeret, posset.* Ceterum multo major pars ferocioris sententiæ erat: *Quidquid cessisset, cum eo simul regno protinus cedendum esse, affirmabant. Neque enim*

*Romanos pecunia aut agro egere : sed hoc scire, cum omnia humana, tum maxima quæque & regna & imperia sub casibus multis esse. Carthaginiensium opes fre- gisse sese, & cervicibus eorum præpotentem finitimum regem imposuisse : Antiochum progeniemque ejus ultra juga Tauri remotum. Unum esse Macedoniae regnum, & regione propinquum, & quod, sicubi populo Roma- no sua fortuna labet, antiquos animos regibus suis vi- deatur posse facere. Dum integræ res ** apud animum suum Persea debere, utrum, singula concédendo, nu- datus ad extremum opibus extorrisque regno, Samo- thraciam aliamve quam insulam petere ab Romanis, ubi privatus superstes regno suo in contemptu atque ino- pia consenescat, malit : an, armatus vindex fortunæ dignitatisque suæ, ita ut viro forti dignum sit, patia- tur, quodcunque casus belli tulerit ; aut victor liberet orbem terrarum ab imperio Romano. Non esse admi- rabilius Romanos Græcia pelli, quam Hannibalem Ita- lia pulsum esse. neque, Hercule, videre, qui conveniat, fratri, affectanti per injuriam regnum, summa vi re- stitisse ; alienigenis bene parto eo cedere. Postremo ita bello & pace quæri, ut inter omnes conveniat, nec tur- pius quidquam esse, quam sine certamine cecidisse regno : nec præclarius quidquam, quam pro dignitate ac ma- jestate omnem fortunam expertum esse.*

LI. Pellæ, in vetere regia Macedonum, hoc con- silium erat. Geramus ergo, inquit, *Diis bene juvan- tibus, quando ita videtur, bellum : literisque circa præfectos dimissis, Citium (Macedoniæ oppidum est) copias omnes contrahit. ipse centum hostiis sacrificio regaliter Minervæ, quam vocant Alci-*

dem, confecto, cum purpuratorum & satellitum manu profectus Citium est. eo jam omnes Macedonum externorumque auxiliorum convenerant copiae. Castra ante urbem ponit, omnesque armatos in campo struxit. Summa omnium quadraginta millia armata fuere: quorum pars ferme dimidia phalangitæ erant. Hippias Berœæus præerat. Delecta deinde & viribus & robore ætatis, ex omni cetratorum numero, duo erant agemata: hanc ipsi legionem vocabant. Præfectos habebant Leonatum & Thrasippum Eulyestas. Ceterorum cetratorum, trium ferme millium hominum, dux erat Antiphilus Edeffæus. Pæones, & ex Parorea & Parsfrymonia (sunt autem ea loca subiecta Thraciæ) & Agrianes, admixtis etiam Thracibus incolis, trium millium ferme & ipsi expleverunt numerum. Armaverat contraxeratque eos Didas Pæon, qui adolescentem Demetrium occiderat. Et armatorum duomillia Gallorum erant, præfecto Asclepiodoto. Ab Heraclea ex Sintiis tria millia Thracum liberorum suum ducem habebant. Cretensium par pæne numerus suos duces sequebatur, Susum Phalarneum & Syllum Gnoffium. Et Leonides Lacedæmonius quingentis ex Græcia, mixto generi hominum, præerat. Regii is generis ferebatur; exsul, damnatus frequenti concilio Achæorum, literis ad Persæa deprensus. Ætolorum & Bœotorum, qui non explebant plus quam quingentorum omnes numerum, Lyco Achæus præfectus erat. Ex his mixtis tot populorum, tot gentium auxiliis, duodecim millia armatorum ferme efficiebantur. Equitum ex tota Mace-

donia contraxerat tria millia. Venerat eodem Co-
tys, Seuthæ filius, rex gentis Odryfarum, cum mil-
le delectis equitibus, pari ferme peditum numero.
Summa totius exercitus triginta novem millia pe-
ditum erant, quatuor equitum. Satis constabat, se-
cundum eum exercitum, quem Magnus Alexander
in Asiam trajecit, nunquam ullius Macedonum re-
gis copias tantas fuisse.

LII. Sextus & vicesimus annus agebatur, ex quo
petenti Philippo data pax erat: per id omne tem-
pus quæta Macedonia & progeniem ediderat, cu-
jus magna pars matura militiæ esset, & levibus bel-
lis Thracum accolarum, quæ exercerent magis,
quam fatigarent, sub assidua tamen militia fuerat:
& diu meditatum Philippo primo, deinde & Persi,
Romanum bellum, omnia ut instructa parataque es-
sent, effecerat. Mota parumper acies, (non iusto
decurfu tamen) ne stetisse tantum in armis vide-
rentur: armatosque, sicut erant, ad concionem vo-
cavit. Ipse constitit in tribunali, circa se habens fi-
lios duos: quorum major Philippus, natura frater,
adoptione filius; minor, quem Alexandrum voca-
bant, naturalis erat. Cohortatus est milites ad bel-
lum: injuriam populi Romani in patrem seque com-
memoravit: *Illum, omnibus indignitatibus com-
pulsus ad rebellandum, inter apparatus belli fato op-
pressum: ad se simul legatos, simul milites ad occu-
pandas Græciæ urbes missos. Fallaci deinde colloquio
per speciem reconciliandæ pacis extractam hiemem, ut
tempus ad comparandum haberent. Consulem nunc ve-
nire cum duabus legionibus Romanis, quæ ** trecentos*

equites habeant, & pari ferme numero sociorum peditum equitumque. Eo ut accedant regum auxilia Eumenis & Masinissæ, non plus septem millia peditum, duo equitum futura. Auditis hostium copiis, respicerent suum ipsi exercitum; quantum numero, quantum genere militum præstarent tironibus, raptim ad id bellum conscriptis, ipsi, a pueris eruditi artibus militiæ, tot subacti atque durati bellis. Auxilia Romanis Lydos, & Phrygas, & Numidas esse: sibi Thracas, Gallosque, ferocissimas gentium. Arma illos habere ea, quæ sibi quisque paraverit pauper miles: Macedonas prompta ex regio apparatu, per tot annos patris sui cura & impensa facta. Commeatum illis cum procul, tum omnibus sub casibus maritimis fore: se & pecuniam & frumentum, præter redditus metallorum, in decem annos seposuisse. Omnia, quæ Deorum indulgentia, quæ regia cura præparanda fuerant, plena cumulatæque habere Macedonas. animum habendum esse, quem habuerint majores eorum; qui, Europa omni domita, transgressi in Asiam, incognitum famæ aperuerint armis orbem terrarum: nec ante vincere desierint, quam Rubro mari inclusis, quod vincerent, desuerit. At, Hercule, nunc non de ultimis Indiæ oris, sed de ipsius Macedoniæ possessione certamen fortunam indixisse. Cum patre suo gerentes bellum Romanos speciosum Græciæ liberandæ tulisse titulum. nunc propalam Macedoniam in servitutem petere, ne rex vicinus imperio sit Romano, ne gens bello nobilis arma habeat. Hæc enim tradenda superbis dominis esse cum rege regnoque, si absistere bello, & facere imperata velint.

LIII. Cum per omnem orationem satis frequenti

assenſu ſucclamatum eſſet; tum vero ea vocifera-
tio, ſimul indignantium minitantiumque, partim
jubentium bonum animum habere regem, exorta
eſt, ut finem dicendi faceret. tantum juffis ad iter
parare, (jam enim dici, movere caſtra ab Nym-
phæo Romanos) concione dimiſſa, ad audiendas
legationes civitatum Macedoniæ ſe contulit. ve-
nerant autem ad pecunias, pro facultatibus quæque
ſuis, & frumentum pollicendum ad bellum. Omni-
bus gratiæ actæ, remiſſum omnibus; ſatis regioſ
apparatus ad ea dictum ſufficere: vehicula tantum
imperata, ut tormenta, telorumque miſſilium in-
gentem vim præparatam, bellicumque aliud inſtru-
mentum veherent. Profeſtus inde toto exercitu,
Eordæam petens, ad Begorritem, quem vocant,
lacum poſitis caſtris, poſtero die in Elimeam ad
Haliacinona fluvium proceſſit. Deinde ſaltu angu-
ſto ſuperatis montibus, quos Cambunios vocant,
deſcendit ad (Tripolim vocant) Azorum, Pythium,
& Dolichen incolentes. Hæc tria oppida pauliſper
cunctata, quia obſides Lariffæis dederant, victa ta-
men præſenti metu, in deditionem conceſſerunt.
Benigne hiſ appellatis, haud dubius Perrhæbos quo-
que idem facturos, urbem, nihil cunctatis, qui in-
colebant, primo adventu recipit. Cyretias oppu-
gnare coactus, primo etiam die acri concurſu ad
portas armatorum eſt repulſus: poſtero die omni-
bus copiis adortus, in deditionem omnes ante no-
ctem accepit.

LIV. Mylæ, proximum oppidum, ita munitum,
ut inexſuperabilis munimenti ſpes incolas ferocio-

res faceret, non portas claudere regi satis habuerunt, sed probris quoque in ipsum Macedonasque procacibus jaculati sunt. quæ res, cum infestiores hostem ad oppugnandum fecisset, ipsos desperatione veniæ ad tuendos sese acrius accendit. Itaque per triduum ingentibus utrinque animis & oppugnatae sunt, & defensæ. Multitudo Macedonum ad subeundum invicem proelium haud difficulter succedebat: oppidanos, diem, noctem eosdem tuentes moenia, non vulnera modo, sed etiam vigiliæ & continens labor conficiebat. quarto die cum & scalæ undique ad muros erigerentur, & porta vi majore oppugnaretur; oppidani depulsi muris ad portam tuendam concurrunt, eruptionemque repentinam in hostes faciunt. quæ cum iræ magis inconsultæ, quam veræ fiduciæ virium esset, pauci & fessi ab integris pulsi terga dederunt; fugientesque per patentem portam hostes acceperunt. Ita capta urbs ac direpta est. libera quoque corpora, quæ cædibus superfuerunt, venundata. Diruto magna ex parte & incenso oppido profectus, ad Phalannam castra movit: inde postero die Gyrtone pervenit. Quo cum T. Minucium Rufum & Hippium, Thessalorum prætorem, cum præsidio intrasse accepisset, ne tentata quidem oppugnatione, prætergressus, Elatiam & Gonnum, percussis inopinato adventu oppidanis, recepit. Utraque oppida in faucibus sunt, quæ Tempe adeunt; magis Gonnus. itaque & firmiore id præsidio tutum equitum perditumque, ad hoc fossa triplici ac vallo munitum, reliquit. Ipse, ad Sycurium progressus, opperiri ibi

hostium adventum statuit: simul & frumentari passim exercitum jubet in subiecto hostium agro. namque Sycurium est sub radicibus Ossæ montis. qua in meridiem vergit, subiectos habet Thessaliæ campos: ab tergo Macedoniam atque Magnesium. Ad has opportunitates accedit summa salubritas & copia, pluribus circumjectis fontibus, perennium aquarum.

LV. Consul Romanus, per eosdem dies Thessaliam cum exercitu petens, iter expeditum primo per Epirum habuit: deinde, postquam in Athamaniam est transgressus, asperi ac prope invii soli, cum ingenti difficultate parvis itineribus ægre Gomphos pervenit: cui si, vexatis hominibus equisque, tironem exercitum ducenti acie instructa & loco suo & tempore obstitisset rex, ne Romani quidem abnuunt, magna sua cum clade fuisse pugnatuos. Postquam Gomphos sine certamine ventum est, præter gaudium periculosi saltus superati, contemptus quoque hostium, adeo ignorantium opportunitates suas, accessit. Sacrificio rite perfecto, consul, & frumento dato militibus, paucos ad requiem jumentorum hominumque moratus dies, cum audiret vagari Macedonas effusos per Thessaliam, vastarique sociorum agros, fatis jam refectum militem ad Larissam ducit. Inde, cum tria millia ferme abesset a Tripoli, (Sceam vocant) super Peneum amnem posuit castra. Per idem tempus Eumenes ad Chalcidem navibus accessit cum Attalo atque Athenæo fratribus, Philetæro fratre relicto Pergami ad tutelam regni. inde cum Attalo & quatuor millibus

peditum, mille equitum, ad consulem venit. Chalcide relicta duo millia peditum, quibus Athenæus præpositus. Et alia eodem auxilia Romanis ex omnibus undique Græciæ populis convenerunt, quorum pleraque (adeo parva erant) in oblivionem adducta. Apolloniatae trecentos equites, centum pedites miserunt. Ætolorum alæ unius instar, quantum in tota gente equitum erat, venerant: & Thesfalorum omnis equitatus separatus erat. non plus quam trecenti erant equites in castris Romanis. Achæi juventutis suæ, Cretico maxime armatu, ad mille dederunt.

LVI. Sub idem tempus & C. Lucretius prætor, qui navibus præerat ad Cephalleniam, M. Lucretio fratre cum classe super Maleam Chalcidem jussu petere, ipse triremem conscendit, sinum Corinthium petens ad præoccupandas in Bœotia res. tardior ei navigatio propter infirmitatem corporis fuit. M. Lucretius, Chalcidem adveniens, cum a P. Lentulo Haliartum oppugnari audisset, nuntium, prætoris verbis, qui abscedere eum inde juberet, misit. Bœotorum juventute, quæ pars cum Romanis stabat, eam rem aggressus legatus, a mœnibus abcessit. Hæc soluta obsidio locum alteri novæ obsidioni dedit. namque extemplo M. Lucretius cum exercitu navali, decem millibus armatorum, ad hoc duobus millibus regionum, qui sub Athenæo erant, Haliartum circumfedit: parantibusque jam oppugnare, supervenit a Creusa prætor. Ad idem fere tempus & ab fociis naves Chalcidem convenerunt: duæ Punicæ quinquereines, duæ ab Heraclea ex

Ponto triremes, quatuor Chalcedone, totidem Samo, tum quinque Rhodiæ quadriremes. Prætor, quia nusquam erat maritimum bellum, remisit sociis. & Q. Marcius Chalcidem navibus venit, Alope capta, Larissa, quæ Cremaste dicitur, oppugnata. Cum hic status in Bœotia esset, Perseus, cum ad Sycurium (sicut ante dictum est) stativa haberet, frumento undique circa ex agris convecto, ad vastandum agrum Pheræorum misit: ratus ad juvandas sociorum urbes longius ab castris abstractos apprehendi Romanos posse. Quos cum eo tumultu nihil motos animadvertisset, prædam quidem, præterquam hominum, (pecora autem maxime omnis generis fuere) divisit ad epulandum militibus.

LVII. Sub idem deinde tempus consilium & consul & rex habuerunt, unde bellum ordirentur. Regis creverunt animi vastatione concessa sibi ab hoste Pheræi agri. itaque eundum inde ad castra, necdandum ultra spatium cunctandi, censebat. Et Romani censebant, cunctationem suam infamem apud socios esse, maximopere indigne ferentes, non latam Pheræis opem. Consultantibus, quid agerent, (aderant autem Eumenes & Attalus in consilio) trepidus nuntius affert, hostem magno agmine adesse. Concilio dimisso, signum extemplo datur, ut arma capiant. Interim placet, ex regiis auxiliis centum equites & parem numerum jaculatorum peditum exire. Perseus horâ ferme diei quarta, cum paulo plus mille passus abesset a castris Romanis, consistere signa peditum iussit. prægressus ipse cum equitibus ac levi armatura, & Cotys cum eo ducesque

aliorum auxiliorum præcefferunt. Minus quingentos passus ab castris aberant, cum in conspectu fuere hostium equites: duæ alæ erant magna ex parte Gallorum, (Cassignatus præerat) & levis armaturæ centum fere & quinquaginta Myfi aut Cretenfes. Constitit rex, incertus quantum esset hostium. Duas inde ex agmine turmas Thracum, duas Macedonum, cum binis Cretenfium cohortibus & Thracum, misit. Proelium, cum pares numero essent, neque ab hac aut illa parte nova auxilia subvenirent, incerta victoria finitum est. Eumenis ferme triginta interfecti; inter quos Cassignatus dux Gallorum cecidit. & tunc quidem Perseus ad Sycurium copias reduxit. postero die circa eandem horam in eundem locum rex copias admovit, plaustris cum aqua sequentibus. nam duodecim millium passuum via omnis sine aqua, & plurimi pulveris erat: affectosque siti, si primo in conspectu dimicassent, pugnatuos fuisse apparebat. Cum Romani quiescent, stationibus etiam intra vallum reductis, regii quoque in castra redeunt. Hoc per aliquot dies fecerunt, sperantes fore, ut Romani equites abeuntium novissimum agmen aggredierentur. inde certamine orto, cum longius a castris eos elicuissent, facile, ubiubi essent, se, qui equitatu & levi armatura plus possent, conversuros aciem.

LVIII. Postquam inceptum non succedebat, castra propius hostem movit rex, & a quinque millibus passuum communiit. inde, luce prima in eodem, quo solebat, loco peditum acie instructa, equitatum omnem levemque armaturam

ad castra hostium ducit. Visus & plurium & propior solito pulvis trepidationem in castris Romanis fecit. Et primo vix creditum nuntianti est, quia prioribus continuis diebus nunquam ante horam quartam hostis apparuerat. tum solis ortus erat. Deinde ut plurium clamore & cursu a portis dubitatio exempta est, tumultus ingens oboritur. tribuni, præfectique, & centuriones in prætorium; miles ad sua quisque tentoria discurrit. Minus quingentos passus a vallo instruxerat Perseus suos circa tumulum, quem Callicinum vocant. Lævo cornu Cotys rex præerat cum omnibus suæ gentis: equitum ordines levis armatura interposita distinguebat. In dextro cornu Macedones erant equites: intermixti turmis eorum Cretenses. Huic armaturæ Milo Berœæus, equitibus & summæ partis ejus Meno Antigonensis præerat. Proximi cornibus constiterant regii equites, & mixtum genus, delecta plurium gentium auxilia: Patrocles Antigonensis hic & Pæoniæ præfectus Didas erant præpositi. Medius omnium rex erat. circa eum agema, quod vocant, equitumque sacræ alæ. Ante se statuit funditores jaculatoresque: quadrigentorum manus utraque numerum expleverat. Jonem Thessalonicensem & Timanora Dolopem iis præfecit. sic regii constiterant. Consul, intra vallum peditum acie instructa, & ipse equitatum omnem cum levi armatura misit. pro vallo instructi sunt. Dextro cornu præpositus C. Licinius Crassus, consulis frater, cum omni Italico equitatu, velitibus intermixtis: sinistro M. Valerius Lævinus sociorum ex Græcis populis equites

habebat, ejusdem gentis levem armaturam. Mediam autem aciem cum delectis equitibus extraordinariis tenebat Q. Mucius. ducenti equites Galli ante signa horum instructi, & de auxiliis Eumenis Cyrtiorum gentis trecenti. Thessali quadringenti equites parvo intervallo super lævum cornu locati. Eumenes rex Attalusque cum omni manu sua ab tergo inter postremam aciem ac vallum steterunt.

LIX. In hunc modum maxime instructæ acies, par ferme utrinque numerus equitum ac levis armaturæ, concurrunt, a funditoribus jaculatoribusque, qui præcesserunt, prælio orto. Primi omnium Thraces, haud secus quam diu claustris retentæ feræ, concitati cum ingenti clamore in dextrum cornu, Italicos equites, incurrerunt; ut usu belli & ingenio impavida gens turbaretur. gladiis hastas petere pedites, nunc fuccidere crura equis, nunc illa suffodere. Perseus, in mediam invehctus aciem, Græcos primo impetu avertit: quibus cum gravis ab tergo instaret hostis, Thessalorum equitatus, qui a lævo cornu brevi spatio disjunctus in subsidiis fuerat extra concursum, primo spectator certaminis, deinde, inclinata re, maximo usui fuit. Cedentes enim sensim integris ordinibus, postquam se Eumenis auxiliis adjunxerunt, & cum eo tutum inter ordines suos receptum sociis fuga dissipatis dabant, & cum minus conferti hostes instarent, progredi etiam ausi, multos fugientium obvios exceperunt. Nec regii, sparsi jam ipsi passim sequendo, cum ordinatis & certo incedentibus gradu manus conferere audebant. Cum, victor equestri prælio

rex parvo momento si adjuvisset, debellatum esset; opportune adhortanti supervenit phalanx, quam sua sponte, ne audaci cœpto deessent, Hippias & Leonatus raptim adduxerant, postquam prospere pugnasse equitem acceperunt. Fluctuante rege inter spem metumque tantæ rei conandæ, Cretensis Evander, quo ministro Delphis ad insidias Eumenis regis usus erat, postquam agmen impeditum venientium sub signis vidit, ad regem accurrit, & monere institit, *ne elatus felicitate summam rerum temere in non necessariam aleam daret. Si contentus bene re gesta quiesset eo die, vel pacis honestæ conditionem habiturum, vel plurimos belli socios, qui fortunam sequerentur, si bellare mallet.* In hoc consilium pronior erat animus regis. Itaque, collaudato Evandro, signa referri, peditumque agmen redire in castra jubet; equitibus receptui canere.

LX. Cecidere eo die ab Romanis ducenti equites, duo millia, haud minus, peditum; capti ferme ducenti equites. ex regiis autem viginti equites, quadraginta pedites interfecti. Postquam redire in castra victores, omnes quidem læti, ante alios Thracum insolens lætitia eminebat: cum cantu enim superfixa capita hostium portantes redierunt. Apud Romanos non mœstitia tantum ex male gesta re, sed pavor etiam erat, ne extemplo castra hostis aggrederetur. Eumenes suadere, ut trans Peneum transferret castra; ut pro munimento amnem haberet, dum perculsi milites animos colligerent. Consul moveri flagitio timoris fatendi: victus tamen ratione, silentio noctis transductis copiis,

castra in ulteriore ripa communit. Rex, postero die ad laceffendos prælio hostes progressus, postquam trans amnem in tuto posita castra animadvertit, fatebatur quidem peccatum, quod pridie non institisset victis; sed aliquanto maiorem culpam esse, quod nocte foret cessatum. nam, ut neminem alium suorum moveret, levi armatura immissa, trepidantium in transitu fluminis hostium deleri magna ex parte copias potuisse. Romanis quidem præsens pavor demtus erat, in tuto castra habentibus: damnum inter cetera præcipue famæ movebat. & in consilio apud consulem pro se quisque in Ætolos conferebat causam; *ab iis fugæ terrorisque principium ortum. secutos pavorem Ætolorum & ceteros socios Græcorum populorum.* Quinque principes Ætolorum primi terga vertentes conspecti dicebantur. Theffali pro concione laudati, ducesque eorum etiam virtutis causa donati.

LXI. Ad regem spolia cæsorum hostium referebantur. dona ex his, aliis arma insignia, aliis equos, quibusdam captivos dono dabat. scuta erant supra mille quingenta; loricæ thoracesque mille amplius summam explebant, galearum gladiatorumque & missilium omnis generis major aliquanto numerus. Hæc, per se ampla, pleraque multiplicata verbis regis, quæ ad concionem vocato exercitu habuit. *Præjudicatum eventum belli habetis. Meliorem partem hostium, equitatum Romanum, quo invictos se esse gloriabantur, fudistis. Equites enim illis principes juvenutis, equites seminarium senatus: inde lectos in Patrum numerum consules, inde imperatores creant. ho-*

rum spolia paulo ante divisimus inter vos. Nec minorem de legionibus peditum victoriam habetis. quæ, nocturna fuga vobis subtrahæ, naufragorum trepidatione passim natantium flumen compleverunt. Sed facilius nobis sequentibus victos Peneum superare erit, quam illis trepidantibus fuit; transgressique extemplo castra oppugnabimus, quæ hodie cepissemus, ni fugissent. Aut, si acie decernere volent, eundem pugna pedestris eventum exspectate, qui equitum in certamine fuerit. Et qui vicerant alacres, spolia cæforum hostium humeris gerentes, ante ora sua audivere, ex eo, quod acciderat, spem futuri præcipientes: & pedites, aliena gloria accensi, præcipue qui Macedonum phalangis erant, sibi quoque & navandæ rei operæ, & similem gloriam ex hoste parendi, occasionem optabant. Concione dimissa, postero die profectus inde ad Mopsium posuit castra. tumulus hic inter Tempe & Larissam medius est.

LXII. Romani, non abscedentes ab ripa Penei, transtulerunt in locum tutiorem castra. Eo Misagenes Numida venit cum mille equitibus, pari peditum numero, ad hoc elephantis duobus & viginti. Per eos dies consilium habenti regi de summa, cum jam consedisset ferocia ab re bene gesta, ausi sunt quidam amicorum consilium dare, ut secunda fortuna in conditione honestæ pacis uteretur potius, quam, spe vana evectus, in casum irrevocabilem se daret. *Modum imponere secundis rebus, nec nimis credere serenitati præsentis fortunæ, prudentis hominis & merito felicitis esse. Mitteret ad consulem, qui fœdus in easdem leges renovarent, quibus Philippus pater ejus*

pacem a T. Quintio victore accepisset. Neque finiri bellum magnificentius, quam a tam memorabili pugna; neque spem firmiorem pacis perpetuæ dari, quam quæ perculsos adverso prælio Romanos molliores factura sit ad paciscendum. Quod si Romani tum quoque infita pertinacia aqua aspernarentur, Deos hominesque & moderationis Persei, & illorum pervicacis superbiæ, futuros testes. Nunquam ab talibus consiliis abhorrebat regis animus. itaque plurium assensu comprobata est sententia. Legati, ad consulem missi, adhibito frequenti consilio, auditi sunt. Pacem petere, vectigal, quantum Philippus pactus esset, datum Persea Romanis pollicentes. urbibus, agris, locisque, quibus Philippus cessisset, cessurum primum. hæc legati. Submotis his, cum consultarent, Romana constantia vicit in consilio. Ita tum mos erat, in adversis vultum secundæ fortunæ gerere, moderari animos in secundis. Responderi placuit: Ita pacem dari, si de summa rerum liberum senatui permittat rex de se deque universa Macedonia statuendi jus. Hæc cum renuntiassent legati, miraculo ignaris moris pertinacia Romanorum esse; & plerique vetare, amplius mentionem pacis facere. ultro mox quæsituros, quod oblatum fastidiant. Perseus hanc ipsam superbiam, quippe ex fiducia virium esse, timere: & summam pecuniæ augens, si pretio pacem emere posset, non destitit animum consulis tentare. Postquam nihil ex eo, quod primo responderat, mutabat, desperata pace, ad Sycurium, unde profectus erat, rediit, belli casum de integro tentaturus.

LXIII. Fama equestris pugnae, vulgata per Græ-

ciam, nudavit voluntates hominum. non enim solum, qui partis Macedonum erant, sed plerique, ingentibus Romanorum obligati beneficiis, quidam vim superbiamque experti, læti eam famam accipere: non ob aliam causam, quam pravo studio, quo etiam in certaminibus ludicris vulgus utitur deteriori atque infirmiori favendo. Eodem tempore in Bœotia summa vi Haliartum Lucretius prætor oppugnarat: & quanquam nec habebant externa auxilia obsessi, præter Coronæorum juniores, qui prima obsidione mœnia intraverant, neque sperabant, tamen ipsi animis magis, quam viribus, resistebant. nam & eruptiones in opera crebro faciebant: & arietem admotum, libramento plumbi gravatum, ad terram urgebant: & si qua declinarent, qui agebant, ictum, pro diruto muro novum tumultuario opere, raptim ex ipsa ruinæ strage congestis faxis, exstruebant. Cum operibus oppugnatio lentior esset, scalas per manipulos dividi prætor iussit, ut corona undique mœnia aggressurus; eo magis suffecturam ad id multitudinem ratus, quod, qua parte palus urbem cingit, nec attinebat oppugnari, nec poterat. Ipse ab ea parte, qua duæ turres, quodque inter eas muri prorutum fuerat, duo millia militum delectorum admovit; ut eodem tempore, quo ipse transcendere ruinas conaretur, concursu adversus se oppidanorum-facto, scalis vacua defensoribus mœnia capi parte aliqua possent. Haud segniter oppidani vim ejus arcere parant. nam superstratum ruinis locum, fascibus aridis farmentorum injectis, stantes cum ardentibus facibus accensuros

ea se sæpe minabantur, ut, incendio intersepti ab hoste, spatium ad obijciendum interiorem murum haberent. Quod inceptum eorum fors impediit: nam tantus repente effusus est imber, ut nec accendi facile pateretur, & exstingueret accensa. Itaque & transitus per distracta fumantia virgulta patuit; &, in unius loci præsidium omnibus versis, mœnia quoque pluribus simul partibus scalis capiuntur. In primo tumultu captæ urbis seniores impubesque, quos casus obvios obtulit, passim cæsi: armati in arcem confugerunt: & postero die, cum spei nihil superesset, deditione facta, sub corona venierunt. Fuerunt autem duo millia ferme & quingenti: ornamenta urbis, statuæ & tabulæ pictæ, & quidquid pretiosæ prædæ fuit, ad naves delatum: urbs diruta a fundamentis. Inde Thebas ductus exercitus: quibus sine certamine receptis, urbem tradidit exsulis, & qui Romanorum partis erant: adversæ factionis hominum, fautorumque regis ac Macedonum familias sub corona vendidit. his gestis in Bœotia, ad mare ac naves rediit.

LXIV. Cum hæc in Bœotia gererentur, Perseus ad Sycurium stativa dierum aliquot habuit. Ubi cum audisset, raptim Romanos circa ex agris demessum frumentum convehere, deinde ante sua quemque tentoria spicas fascibus defecantem, quo purius frumentum tereret, ingentes acervos per tota castra stramentorum fecisse: ratus incendio opportuna esse, faces, tædamque, & malleolos stuppæ illitos pice parari jubet: atque ita media nocte profectus, ut prima luce aggressus falleret. Nequid-

quam. primæ stationes oppressæ tumultu ac terrore suo ceteros exciverunt: signumque datum est arma extemplo capiendi; simulque in vallo, ad portas, miles instructus erat, & intentus propugnationi castrorum. Perseus & extemplo circumegit aciem, & prima impedimenta ire, deinde peditum signa ferri iussit. ipse cum equitatu & levi armatura substitit ad agmen cogendum, ratus, id quod accidit, infecuturos ad extrema ab tergo carpenda hostes. Breve certamen levis armaturæ maxime cum procuratoribus fuit. equites peditesque sine tumultu in castra redierunt. Demessis circa segetibus, Romani ad Cranonium intactum agrum castra movent. Ibi cum securi, & propter castrorum longinquitatem, & viæ inopis aquarum difficultatem, quæ inter Sycurium & Cranona est, stativa haberent; repente prima luce in imminentibus tumulis equitatus regius cum levi armatura visus ingentem tumultum fecit. Pridie per meridiem profecti ab Sycurio erant: peditum agmen sub lucem reliquerant in proxima planitie. Stetit paulisper in tumulis, elici posse ratus ad equestre certamen Romanos: qui postquam nihil movebant, equitem mittit, qui pedites referre ad Sycurium signa juberet; ipse mox infecutus. Romani equites, modico intervallo sequentes, sicubi sparsos ac dissipatos invadere possent, postquam confertos abire, signa atque ordines servantes, viderunt, & ipsi in castra redeunt.

LXV. Inde, offensus longinquitate itineris, rex ad Mopsium castra movit; & Romani, demessis Cranonis segetibus, in Phalannæum agrum transf-

eunt. Ibi cum ex transfuga cognosset rex, sine ullo armato præsidio passim vagantes per agros Romanos metere, cum mille equitibus, duobus millibus Thracum & Cretensium profectus, cum, quantum accelerare poterat, effuso agmine issent, improviso aggressus est Romanos. juncta vehicula, pleraque onusta, mille admodum capiuntur, sexcenti ferme homines. Prædam custodiendam ducendamque in castra trecentis Cretensium dedit. ipse, revocato ab effusa cæde equite & reliquis peditum, ducit ad proximum præsidium, ratus haud magno certamine opprimi posse. L. Pompejus tribunus militum præerat, qui perculsos milites repentino hostium adventu in propinquum tumulum recepit; loci se præsidio, quia numero & viribus impar erat, defensusurus. Ibi cum in orbem milites coegisset, ut densatis scutis ab jactu sagittarum & jaculorum sese tuerentur, Perseus, circumdato armatis tumulo, alios ascensum undique tentare jubet, & cominus proelium conferere, alios eminus tela ingerere. Anceps Romanos terror circumstabat: nam neque conferti pugnare propter eos, qui ascendere in tumulum conabantur, poterant: &, ubi ordines procurando solvissent, patebant jaculis sagittisve. Maxime cestrosphendonis vulnerabantur. hoc illo bello novum genus teli inventum est. Bipalme spiculum hastili femicubitali infixum erat, crassitudine digiti: huic ad libramen pinnæ tres, velut sagittis solent, circumdabantur: funda media duo funalia imparia habebat. cum majori sinu libratum funditor habena rotaret, excussum, velut glans, emica-

bat. Cum & hoc, & alio omni genere telorum, pars vulnerata militum esset, nec facile jam arma fessi sustinerent, instare rex, ut dederent se, fidem dare, præniam interdum polliceri: nec cujusquam ad deditiōem flectebatur animus; cum ex insperato jam obstinatis mori spes affulsit. Nam cum ex frumentatoribus refugientes quidam in castra nuntiassent consuli, circumfideri præsidium; motus periculo tot civium (nam octingenti ferme, & omnes Romani erant) cum equitatu ac levi armatura (accesserant nova auxilia, Numidæ pedites equitesque & elephanti) castris egreditur: & tribunis militum imperat, ut legionum signa sequantur. Ipse, velitibus ad firmanda levium armorum auxilia adjectis, ad tumulum præcedit. consulis latera tegunt Eumenes, Attalus, & Misagenes, regulus Numidarum.

LXVI. Cum in conspectu prima signa suorum circumfessis fuerunt, Romanis quidem ab ultima desperatione recreatus est animus: Perseus, cui primum omnium fuerat, ut, contentus fortuito successu, captis aliquot frumentatoribus occisisque, non tereret tempus in obsidione præsidii; secundum, ea quoque tentata utcunque, cum sciret nihil roboris secum esse, dum liceret intacto, abire; & ipse hostium adventum, elatus successu, mansit, &, qui phalangem arcesserent, propere misit. qua & serius, quam res postulabat, & raptim acta, turbati cursu adversus instructos & præparatos erant adventuri. Consul anteveniens extemplo prælium conferuit. Primo resistere Macedones; deinde, ut nulla re pares erant, amissis trecentis peditibus, vi-

ginti quatuor primoribus equitum ex ala, quam Sacram vocant, inter quos Antimachus etiam præfectus alæ cecidit, abire conantur. Ceterum iter prope ipso prælio tumultuosius fuit. Phalanx, abs trepido nuntio accita, cum raptim duceretur, primo in angustiis captivorum agmini oblata vehiculisque frumento onustis: iis cæsis, ingens ibi vexatio partis utriusque fuit, nullo expectante, utcunque explicaretur agmen, sed armatis detrudentibus per præceps impedimenta, (neque enim aliter via aperiri poterat) jumentis, cum stimularentur, in turba sævientibus. Vix ab incondito agmine captivorum expedierant sese, cum regio agmini perculsisque equitibus occurrunt. Ibi vero clamor jubentium referre signa ruinæ quoque prope similem trepidationem fecit: ut, si hostes, introire angustias ausi, longius insecuti essent, magna clades accipi potuerit. Consul, recepto ex tumultu præsidio, contentus modico successu, in castra copias reduxit. Sunt, qui eo die magno prælio pugnatum auctores sint. octo millia hostium cæsa, in his Sopatrum & Antipatrum regios duces: vivos captos circiter duo millia octingentos, signa militaria capta viginti septem. Nec incruentam victoriam fuisse: supra quatuor millia & trecentos de exercitu consulis cecidisse: signa sinistræ alæ quinque amissa.

LXVII. Hic dies & Romanis refecit animos, & Persea perculit, ut, dies paucos ad Mopsium moratus, sepulturæ maxime militum amissorum cura, præsidio satis valido ad Gonnum relicto, in Macedoniam reciperet copias. Timotheum quendam ex

regiis præfectis cum modica manu relinquit ad Philam, jussu Magnetæ & propinquos tentare. Cum Pellam venisset, exercitu in hiberna dimisso, ipse cum Cotye Thessalonicam est profectus. Eo fama affertur, Atleshim regulum Thracum, & Corragum Eumenis præfectum, in Cotyis fines impetum fecisse: & regionem, Marenen quam vocant, cepisse. Itaque, dimittendum Cotyn ad sua tuenda ratus, magnis proficiscentem donis prosequitur. ducenta talenta, semestrem stipendium, equitatu numerat, cum primo annum dare constituisset. Consul, postquam profectum Persea audivit, ad Gonnum castra movet, si potiri oppido posset. Ante ipsa Tempe in faucibus situm, Macedonia claustra tutissima præbet, & in Thessaliam opportunum Macedonibus decursum. Cum & loco & præsidio valido inexpugnabilis res esset, abstinit incepto. In Perrhæbiam flexis itineribus, Malloea primo impetu capta ac direpta, Tripoli aliaque Perrhæbia recepta, Larissam rediit. inde Eumene atque Attalo domum remissis, Misagenem Numidasque in hiberna in proximis Thessalis urbibus distribuit. & partem exercitus ita per totam Thessaliam divisit, ut & hiberna comoda omnes haberent, & præsidio urbibus essent. Q. Mucium legatum cum duobus millibus ad obtinendam Ambraciam misit. Græcarum civitatum socios omnes præter Achæos dimisit. cum exercitus parte profectus in Achajam Phthiotim, Pteleum desertum fuga oppidanorum diruit a fundamentis, Antrona voluntate colentium recepit. Ad Larissam deinde exercitum admovit. urbs deserta erat; in

arcem omnis multitudo concesserat : eam oppugnare aggreditur. Primi omnium Macedonēs, regium præsidium, metu excefferant. a quibus relictī oppidani in deditionem extemplo veniunt. Dubitari inde, utrum Demetrias prius aggredienda foret, an in Bœotia aspiciendæ res. Thebani, vexantibus eos Coronæis, in Bœotiam arcessebant. ad horum preces, quia hibernis aptior regio, quam Magnesia erat, in Bœotiam duxit.

TITI LIVII PATAVINI
 HISTORIARUM
 AB URBE CONDITA
 LIBER XLIII.

EPITOME

LIBRI QUADRAGESIMI TERTII.

Prætores aliquot, eo quod avarè & crudeliter provincias administrassent, damnati sunt. P. Licinius Crassus proconsul complures in Græcia urbes expugnavit, & crudeliter diripuit. ob id captivi, qui ab eo sub corona venierant, ex senatusconsulto postea restituti sunt. Item a præfectis classium Romanarum multa impotenter in socios facta. Res præterea a Perseo rege in Thracia prospere gestas continet, victis Dardanis & Illyrico, cujus rex erat Gentius. Motus, qui in Hispania ab Olonico factus erat, ipso interemto confedit. M. Æmilius Lepidus a censoribus princeps in senatu lectus.

I. **E**ADEM æstate, qua in Theßalia equestri pugna vicere Romani, legatus, in Illyricum a consule missus, opulenta duo oppida vi atque armis coegit

in deditionem; omniaque iis sua concessit, ut opinionione clementiæ eos, qui Carnuntem munitam urbem incolebant, alliceret. postquam nec, ut dederent se, compellere, neque capere obsidendo poterat; ne duabus oppugnationibus nequidquam fatigatus miles esset, quas prius intactas urbes reliquerat, diripuit. Alter consul C. Cassius nec in Gallia, quam fortitus erat, memorabile quidquam gessit: & per Illyricum ducere legiones in Macedoniam vano incepto est conatus. Ingressum hoc iter consulem senatus ex Aquilejensium legatis cognovit: qui, querentes coloniam suam novam & infirmam, necdum satis munitam, inter infestas nationes Istrorum & Illyriorum esse, cum peterent, ut senatus curæ haberet, quomodo ea colonia munitur, interrogati, vellentne eam rem C. Cassio consuli mandari? responderunt, Cassium, Aquilejam indicto exercitu, profectum per Illyricum in Macedoniam esse. Ea res primo incredibilis visa: & pro se quisque credere, Carnis forsitan aut Istris bellum illatum. Tum Aquilejenses, nihil se ultra scire, nec audere affirmare, quam triginta dierum frumentum militi datum; & duces, qui ex Italia itinera in Macedoniam nossent, conquisitos abductosque. Enimvero senatus indignari, tantum consulem ausum, ut suam provinciam relinqueret, in alienam transfiret: exercitum novo periculoso itinere inter exterarum gentes duceret, viam tot nationibus in Italiam aperiret. Decernunt frequentes, ut C. Sulpicius prætor tres ex senatu nominet legatos, qui eo die proficiscantur ex urbe; & quantum ac-

celerare possent, Cassium consulem, ubicunque sit, persequantur; nuntient, ne bellum cum ulla gente moveat, nisi cum qua senatus gerendum censuerat. Legati hi profecti, M. Cornelius Cethegus, M. Fulvius, P. Marcius Rex. Mētus de consule atque exercitu distulit eo tempore muniendæ Aquilejæ curam.

II. Hispaniæ deinde utriusque legati aliquot populorum in senatum introducti. Ii, de magistratuum Romanorum avaritia superbiaque conquesti, nisi genibus ab senatu petierunt, ne se socios foedius spoliari vexarique, quam hostes, patiantur. Cum & alia indigna quererentur, manifestum autem esset, pecunias captas; L. Canulejo prætori, qui Hispaniam sortitus erat, negotium datum est, ut in singulos, a quibus Hispani pecunias peterent, quinos recuperatores ex ordine senatorio daret, patronosque, quos vellent, sumendi potestatem faceret. Vocatis in curiam legatis recitatum est senatusconsultum, jussique nominare patronos: quatuor nominaverunt, M. Porcium Catonem, P. Cornelium Cn. F. Scipionem, L. Æmilium L. F. Paullum, C. Sulpicium Gallum. Cum M. Titinio primum, qui prætor A. Manlio, M. Junio consulibus in citeriore Hispania fuerat, recuperatores sumserunt. Bis amplius, tertio absolutus est reus. Dissensio inter duarum provinciarum legatos est orta: citerioris Hispaniæ populi M. Catonem & Scipionem; ulterioris L. Paullum & Gallum Sulpicium patronos sumserunt. Ad recuperatores adducti a citerioribus populis P. Furius Philus, ab ulterioribus M. Matienus. Ille Sp.

Postumio, Q. Mucio consulibus triennio ante, hic biennio prius, L. Postumio, M. Popillio consulibus, prætor fuerat. Gravissimis criminibus accusati ambo ampliatiq̃ue: cum dicenda de integro causa esset, excusati exilii causa solum vertisse. Furius Præneſte, Matienus Tibur exfulatum abierunt. Fama erat, prohiberi a patronis nobiles ac potentes compellare; auxitque eam suspicionem Canulejus prætor, quod, omiſſa ea re, delectum habere inſtituit. dein repente in provinciam abiit, ne plures ab Hispanis vexarentur. Ita, præteritis ſilentio oblitteratis, in futurum conſultum ab ſenatu Hispanis, quod impetrarunt, ne frumenti æſtimationem magiſtratus Romanus haberet; neve cogeret viceſimas vendere Hispanos, quanti ipſe vellet; & ne præfecti in oppida ſua ad pecunias cogendas imponerentur.

III. Et alia novi generis hominum ex Hispania legatio venit. ex militibus Romanis & ex Hispanis mulieribus, cum quibus connubium non eſſet, natos ſe memorantes, ſupra quatuor millia hominum, orabant, ut ſibi oppidum, in quo habitarent, daretur. Senatus decrevit, *uti nomina ſua apud L. Canulejum profiterentur: eorumque ſi quos manumiſſiſſet, eos Cartejam ad oceanum deduci placere. Qui Cartejenſium domi manere vellent, poteſtatem fore, uti numero colonorum eſſent, agro aſſignato. Latinam eam coloniam fuiſſe, libertinorumque appellari.* Eodem tempore ex Africa & Guluſſa, Maſiniſſæ regis filius, legatus patris, & Carthaginienſes venerunt. Guluſſa prior in ſenatum introductus, &, quæ miſſa erant

ad bellum Macedonicum a patre suo, exposuit; & si qua præterea vellent imperare, præstaturum merito populi Romani est pollicitus: & monuit Patres conscriptos, ut a fraude Carthaginiensium caverent. *classis eos magnæ parandæ consilium cepisse; specie pro Romanis, & adversus Macedonas: ubi ea parata instructaque esset, ipsorum fore potestatis, quem hostem aut socium habeant.*

* * *

IV***. tantum pavorem ingressi castra, ostentantes capita, fecerunt, ut, si admotus extemplo exercitus foret, capi castra potuerint. Tum quoque fuga ingens facta est: & erant, qui legatos mittendos ad pacem precibus petendam censerent: civitatesque complures, eo nuntio audito, in dedicationem venerunt. quibus purgantibus sese, culpamque in duorum amentiam conferentibus, qui se ultro ad poenam ipsi obtulissent, cum veniam dedisset prætor; profectus extemplo ad alias civitates, omnibus imperata facientibus, quieto exercitu pacatum agrum, qui paulo ante ingenti tumultu arferat, peragravit. Hæc lenitas prætoris, qua sine sanguine ferocissimam gentem domuerat, eo gratior plebi Patribusque fuit, quo crudelius avariusque in Græcia bellatum, & ab consule Licinio & ab Lucretio prætore, erat. Lucretium tribuni plebis absentem concionibus assiduè lacerabant, cum reipublicæ causa abesse excusaretur: sed tum adeo vicina etiam inexplorata erant, ut is eo tempore in agro suo Antiati esset, aquamque ex manubiis

Antium ex flumine Loracinæ duceret. Id opus centum triginta millibus æris locasse dicitur. tabulis quoque pictis ex præda fanum Æsculapii exornavit. Invidiam infamiamque ab Lucretio averterunt in Hortensium successorem ejus Abderitæ legati, flentes ante curiam, querentesque, *oppidum suum ab Hortensio expugnatum ac direptum esse. Causam excidii fuisse urbi, quod, cum centum millia denariûm & tritici quinquaginta millia modium imperaret, spatium petierunt, quo de ea re & ad Hostilium consulem & Romam mitterent legatos. Vixdum ad consulem se pervenisse, & audisse oppidum expugnatum, principes securi percussos, sub corona ceteros venisse.* Indigna senatui visa: decreveruntque eadem de Abderitis, quæ de Coronæis decreverant priore anno; eademque pro concione edicere Q. Mænium prætorem jusserunt. Et legati duo, C. Sempronius Blæsus, Sex. Julius Cæsar, ad restituendos in libertatem Abderitas missi. Iisdem mandatum, ut & Hostilio consuli & Hortensio prætori nuntiarent, fenatum, Abderitis injustum bellum illatum, conquiritque omnes, qui in servitute sint, & restitui in libertatem, æquum censere.

V. Eodem tempore de C. Cassio, qui consul priore anno fuerat, tum tribunus militum in Macedonia cum A. Hostilio erat, querelæ ad senatum delatæ sunt, & legati regis Gallorum Cincibili venerunt. Frater ejus verba in senatu fecit, questus, Alpinorum populorum agros fociorum suorum depopulatum C. Cassium esse, & inde multa millia hominum in servitutem abripuisse. Sub id tempus

Carnorum Istrorumque, & Japydum legati venerunt: *Duces sibi ab consule Cassio primum imperatos, qui in Macedoniam ducenti exercitum iter monstrarent: pacatum ab se, tanquam ad aliud bellum gerendum, abisse: inde ex medio regressum itinere hostiliter peragrassse fines suos: passim rapinasque & incendia facta: nec se ad id locorum scire, propter quam causam consuli pro hostibus fuerint.* Et regulo Gallorum absentis, & his populis responsum est, *Senatum ea, quæ facta querantur, neque scisse futura, neque, si sint facta, probare. Sed indicta causa damnari absentem consularem virum, injurium esse, cum is reipublicæ causa absit. Ubi ex Macedonia redisset C. Cassius, tum, si coram eum arguere vellent, cognita re senatum daturum operam, uti satisfiat.* Nec responderi tantum iis gentibus, sed legatos mitti, duos ad regulum trans Alpes, tres circa eos populos placuit, qui indicarent, quæ Patrum sententia esset. Munera mitti legatis ex binis millibus æris censuerunt. duobus fratribus regulis hæc præcipua, torques duo ex quinque pondo auri facti, & vasa argentea quinque ex viginti pondo, & duo equi phalerati cum agasonibus, & equestria arma ac sagula; & comitibus eorum vestimenta liberis servisque. Hæc missa: illa petentibus data, ut denorum equorum iis commercium esset, educendique ex Italia potestas fieret. legati cum Gallis missi trans Alpes, C. Lælius, M. Æmilius Lepidus: ad ceteros populos C. Sicinius, P. Cornelius Blasio, T. Memmius.

VI. Multarum simul Græciæ Asiæque civitatum legati Romam convenerunt. Primi Athenienses in-

introducti: ii, se, quod navium habuerint militumque,
 P. Licinio consuli & C. Lucretio prætori misisse, ex-
 posuerunt, quibus eos non usos frumenti sibi centum
 millia imperasse: quod, quanquam sterilem terram arent,
 ipsosque etiam agrestes peregrino frumento alerent, ta-
 men, ne deessent officio, confecisse; & alia, quæ im-
 perarentur, præstare paratos esse. Milesii, nihil præ-
 stitisse memorantes, si quid imperare ad bellum fe-
 natus vellet, præstare se paratos esse, polliciti sunt.
 Alabandenſes templum urbis Romæ se fecisse com-
 memoraverunt, ludosque anniversarios ei Divæ in-
 stituisse: & coronam auream quinquaginta pondo,
 quam in Capitolio ponerent, donum Jovi optimo
 maximo, attulisse, & scuta equeſtria trecenta; ea,
 cui jussissent, tradituros. Donum ut in Capitolio po-
 nere, & sacrificare liceret, petebant. Hoc Lampſa-
 ceni, octoginta pondo coronam afferentes, pete-
 bant, commemorantes, *Disceſſiſſe ſe a Perſeo, poſt-*
quam Romanus exercitus in Macedoniam veniſſet, cum
ſub ditione Perſei, & ante Philippi fuiſſent. Pro eo,
& quod imperatoribus Romanis omnia præſtitiſſent, id
ſe tantum orare, ut in amicitiam populi Romani re-
ciperentur: & ſi pax cum Perſeo fieret, exciperen-
tur, ne in regiam poteſtatem reciperentur. Ceteris le-
 gatis comiter reſponſum; Lampſacenos in ſocio-
 rum formulam referre Q. Mænius prætor juſſus.
 munera omnibus in ſingulos binûm millium æris
 data. Alabandenſes ſcuta reportare ad A. Hoſti-
 lium conſulem in Macedoniam juſſi. Et ex Africa
 legati ſimul Carthaginienſium, tritici decies cen-
 tum millia & hordei quingenta indicantes ſe ad

mare deveſta habere , ut, quo ſenatus cenſuiſſet , deportarent. *Id munus officiumque ſuum ſcire minus eſſe , quam pro meritis populi Romani & voluntate ſua : ſed ſæpe alias , bonis in rebus utriusque populi , ſe gratorum fideliumque ſocium muneribus functos eſſe.* Item Maſiniſſæ legati , tritici eandem ſummam polliciti , & mille & ducentos equites , duodecim elephantos : & , ſi quid aliud opus eſſet , uti imperaret ſenatus : æque propenſo animo , ac quæ ipſe ultro pollicitus ſit , præſtaturum eſſe. Gratia & Carthaginienſibus & regi actæ ; rogatique , ut ea , quæ pollicerentur , ad Hoſtilium conſulem in Macedoniam deportarent. Legatis in ſingulos binum millium æris munera miſſa.

VII. Cretenſium legatis , commemorantibus , ſe , quantum ſibi imperatum a P. Licinio conſule eſſet ſagittariorum , in Macedoniam miſiſſe , cum interrogati non inſitiarentur , *apud Perſea majorem numerum ſagittariorum , quam apud Romanos , militare , reſponſum eſt : Si Cretenſes bene ac gnaviter deſtinent potioreſ populi Romani , quam Regis Perſei , amicitiam habere , ſenatum quoque Romanum iis , tanquam certis ſociis , reſponſum daturum eſſe.* Interea nuntiarent ſuis , placere ſenatui , dare operam Cretenſes , ut , quos milites intra præſidia regis Perſei haberent , eos primo quoque tempore domum revocarent. Cretenſibus cum hoc reſponſo dimiſſis , Chalcidenſes vocati ; quorum legatio ipſo introitu , ob id quod Miſtio princeps eorum pedibus captus læſica eſt introlatus , ultimæ neceſſitatis extemplo viſa res : in qua ita affecto excuſatio valetudinis , aut ne ipſi quidem

petenda visa foret, aut data petenti non esset. Cum sibi nihil vivi reliquum, præterquam linguam ad deplorandas patriæ suæ calamitates, præfatus esset, exposuit civitatis primum suæ benefacta, & vetera, & ea, quæ Persei bello præstitissent ducibus exercitibusque Romanis: tum quæ primo C. Lucretius in populares suos prætor Romanus superbe, avaro, crudeliter fecisset: deinde quæ tum cum maxime L. Hortensius faceret. Quemadmodum omnia sibi, etiam iis, quæ patiantur, tristiora, patienda esse ducant potius, quam se dedant Persi. *Quod ad Lucretium Hortensiumque attineret, scire, tutius fuisse claudere portas, quam in urbem eos accipere. Qui exclusissent eos, Emathiam, Amphipolim, Maroneam, Ænum, incolumes esse: apud se templa omnibus ornamentis compilata; spoliataque sacrilegiis C. Lucretium navibus Antium devexisse, libera corpora in servitutem abrepta, fortunas sociorum populi Romani direptas esse, & quotidie diripi. Nam, ex instituto C. Lucretii, Hortensium quoque in tectis hieme pariter atque æstate navales socios habere, & domos suas plenas turba nautica esse; versari inter se, conjuges, liberosque suos, quibus nihil neque dicere pensi, neque facere.*

VIII. Arcessere in senatum Lucretium placuit, ut disceptaret coram, purgaretque sese. Ceterum multo plura præsens audivit, quam in absentem jacta erant; & graviores potentioresque accessere accusatores duo tribuni plebis, M^r. Juventius Thalna & Cn. Aufidius. Ii non in senatu modo eum lacerarunt, sed in concionem etiam pertracto, multis objectis probris, diem dixerunt. Senatus jussu Chal-

cidentibus Q. Mænius prætor respondit: *Quæ bene meritos sese, & ante, & in eo bello, quod geratur, de populo Romano dicant, ea & scire vera eos referre senatum, & perinde ac debeant, grata esse. Quæ facta a C. Lucretio, fierique ab L. Hortensio prætoribus Romanis querantur; ea neque facta, neque fieri voluntate senatus, quem non posse existimare? qui sciat, bellum Persi, & ante Philippo patri ejus, intulisse populum Romanum pro libertate Græciæ: non ut ea a magistratibus sociis atque amicis paterentur. Literas se ad L. Hortensium prætorem daturos esse, quæ Chalcidenses querantur acta, ea senatui non placere: si qui in servitutem liberi venissent, ut eos conquirendos primo quoque tempore, restituendosque in libertatem curaret: sociorum navalium neminem, præter magistros, in hospitia deduci æquum censere.* Hæc Hortensio jussu senatus scripta. Munera binum millium æris legatis missa, & vehicula Micioni publice locata, quæ eum Brundisium commode perveherent. C. Lucretium, ubi dies, quæ dicta erat, venit, tribuni ad populum accusarunt, multamque decies centum millium æris dixerunt. Comitiis habitis, omnes quinque & triginta tribus eum condemnarunt.

IX. In Liguribus eo anno nihil memorabile gestum. nam nec hostes moverunt arma, neque consul in agrum eorum legiones induxit: &, satis explorata pace ejus anni, milites duarum legionum Romanarum intra dies sexaginta, quam in provinciam venit, dimisit, sociorum nominis Latini exercitu mature in hiberna Lunam & Pisas deducto, ipse cum equitibus Galliæ provinciæ pleraque op-

pida adiit. Nusquam alibi, quam in Macedonia, bellum erat: suspectum tamen & Gentium Illyriorum regem habebant. itaque & octo naves ornatas a Brundisio senatus censuit mittendas ad C. Furium legatum Issam, qui cum praesidio duarum Issensium navium insulae praeerat. duo millia militum in eas naves sunt imposita, quae Q. Mænius praetor ex senatusconsulto in ea parte Italiae, quae obiecta Illyrico est, conscripsit: & consul Hostilius Ap. Claudium in Illyricum cum quatuor millibus peditum misit, ut accolae Illyrici tutarentur. qui, non contentus iis, quas adduxerat, copiis, auxilia ab sociis corrogando, ad octo millia hominum vario genere armavit: peragrataque omni ea regione, ad Lychnidum Dassaretiorum confedit.

X. Haud procul inde Uscana oppidum finium plerumque Persei erat. decem millia civium habebat, & modicum, custodiae causa, Cretensium praesidium. Inde nuntii ad Claudium occulti veniebant: *Si propius copias admovisset, paratos fore, qui proderent urbem. Et operae pretium esse, non se amicosque tantum, sed etiam milites praeda expleturum.* Spes cupiditati admota ita obcaecavit animum, ut nec ex iis, qui venerunt, quenquam retineret; nec obfides, pignus futuros furto & fraude agenda rei, posceret; nec mitteret exploratum; nec fidem acciperet. die tantum statuta profectus a Lychnido; duodecim millia ab urbe, ad quam tendebat, posuit castra. Quarta inde vigilia signa movit, mille ferme ad praesidium castrorum relictis: incompoti, longo agmine effusi, infrequentes, cum nocturnus error

dissiparet, ad urbem pervenerunt. Crevit negligentia, postquam neminem armatum in muris viderunt. Ceterum, ubi primum sub jactu teli fuerunt, duabus simul portis erumpitur; & ad clamorem erumpentium ingens strepitus e muris ortus ululantium mulierum cum crepitu undique æris: & incondita multitudo, turba immixta fervili, variis vocibus personabat. Hic tam multiplex undique obiectus terror effecit, ne sustinere primam procellam eruptionis Romani possent. Itaque fugientes plures, quam pugnantes, interemti sunt: vix duo millia hominum cum ipso legato in castra perfugerunt. Quo longius iter in castra erat, eo plures fessos confectandi hostibus copia fuit. Ne moratus quidem in castris Appius, ut suos dissipatos fuga colligeret, (quæ res palatis per agros salutis fuisset) ad Lychnidum protinus reliquias cladis reduxit.

XI. Hæc & alia, haud prospere in Macedonia gesta, ex Sex. Digitio tribuno militum, qui sacrificii causa Romam venerat, sunt audita. Propter quæ veriti Patres, ne quæ major ignominia acciperetur, legatos in Macedoniam, M. Fulvium Flaccum, & M. Caninium Rebilum, miserunt, qui comperta, quæ agerentur, referrent: & ut A. Hostilius consul comitia consulibus subrogandis ita ediceret, uti mense Januario comitia haberi possent, & ut primo quoque tempore in urbem rediret. Interim M. Ræcio prætori mandatum, ut edicto senatores omnes ex tota Italia (nisi qui reipublicæ causa abessent) Romam revocaret. Qui Romæ essent, ne quis ultra

mille passuum ab Roma abesset. Ea, uti senatus censuit, sunt facta. Comitia consularia ante diem quintum Kalendas Septembres fuere. Creati consules sunt Q. Marcius Philippus iterum & Cn. Servilius Cæpio. post diem tertium prætores sunt facti C. Decimius, M. Claudius Marcellus, C. Sulpicius Gallus, C. Marcius Figulus, Ser. Cornelius Lentulus, P. Fonteius Capito. Designatis prætoribus præter duas urbanas, quatuor provinciæ sunt decretæ, Hispania, & Sardinia, & Sicilia, & classis. Legati ex Macedonia, exacto admodum mense Februario, redierunt. Hi, quas res ea æstate prospere gessisset rex Perseus, referebant, quantusque timor socios populi Romani cepisset, tot urbibus in potestate regis redactis. *Exercitum consulis infrequentem commentibus vulgo datis per ambitionem esse: culpam ejus rei consulem in tribunos militum, contra illos in consulem conferre. Ignominiam, Claudii temeritate acceptam, elevare eos Patres acceperunt, qui perpauco Italici generis, & magna ex parte tumultuario delectu conscriptos ibi milites amissos referebant.* Consules designati, ubi primum magistratum inissent, de Macedonia referre ad senatum jussi: destinataque provinciæ iis sunt Italia & Macedonia. Hoc anno intercalatum est: tertio die post Terminalia Kalendæ intercalares fuere. Sacerdotes intra eum annum mortui, L. Flamininus * * pontifices duo decesserunt, L. Furius Philus & C. Livius Salinator. in locum Furii T. Manlium Torquatum, in Livii M. Servilium pontifices legerunt.

XII. Principio insequentis anni cum consules

novi Q. Marcius & Cn. Servilius de provinciis retulissent, primo quoque tempore aut comparare eos inter se Italiam & Macedoniam, aut fortiri placuit: priusquam id fors cerneret, in incertum, ne quid gratia momenti faceret, in utramque provinciam, quod res desideraret supplementi, decerni. In Macedoniam peditum Romanorum sex millia, sociorum nominis Latini sex millia: equites Romanos ducentos quinquaginta, socios trecentos. Veteres milites dimitti, ita ut in singulas Romanas legiones ne plus sena millia peditum, trecenti equites essent. Alteri consuli nullus certus finitus numerus civium Romanorum, quem in supplementum liggeret. id modo finitum, ut duas legiones scriberet, quæ quina millia peditum & ducenos haberent, equites trecentos. Latinorum major, quam collegæ, decretus numerus: peditum decem millia & sexcenti equites. quatuor præterea legiones scribi iussæ, quæ, si quo opus esset, educerentur. Tribunos his, non permissum, ut consules facerent: populus creavit. Sociis nominis Latini sexdecim millia peditum, & mille equites imperati. Hunc exercitum parari tantum placuit, ut exiret, si quo res posceret. Macedonia maxime curam præbebat. in classem mille focii navales cives Romani libertini ordinis, ex Italia * scribi iussî; totidem ut ex Sicilia scriberentur: &, cui ea provincia evenisset, mandatum, ut eos in Macedoniam, ubicunque classis esset, deportandos curaret. In Hispaniam tria millia peditum Romanorum in supplementum, trecenti equites decreti. Finitus ibi quoque in legiones militum nume-

rus, peditum quina millia, treceni & triceni equites. Et sociis imperare prætor, cui Hispania obvenisset, jussus quatuor millia peditum, & trecentos equites.

XIII. Non sum nescius, ab eadem negligentia, qua nihil Deos portendere vulgo nunc credant, neque nuntiari admodum nulla prodigia in publicum, neque in annales referri. ceterum & mihi, vetustas res scribenti, nescio quo pacto, antiquus sit animus; & quædam religio tenet, quæ illi prudentissimi viri publice suscipienda censuerint, ea pro dignis habere, quæ in meos annales referam. Anagnia duo prodigia eo anno sunt nuntiata; facem in cœlo conspectam, & bovem feminam locutam publice ali. Minturnis quoque per eos dies cœli ardentis species affulserat. Reate imbri lapidavit. Cum in arce Apollo triduum ac tres noctes lacrimavit. in urbe Romana duo æditui nuntiarunt, alter, in æde Fortunæ anguem jubatum a compluribus visum esse: alter, in æde Primigeniæ Fortunæ, quæ in colle est, duo diversa prodigia; palmam in area enatam, & sanguine interdium pluuisse. Duo non suscepta prodigia sunt, alterum quod in privato loco factum esset, palmam enatam impluvio suo T. Marcius Figulus nuntiabat: alterum, quod in loco peregrino, Fregellis in domo L. Atrei hasta, quam filio militi emerat, interdium plus duas horas arsisse, ita ut nihil ejus ambureret ignis, dicebatur. Publicorum prodigiorum causa libri a decemviris aditi; quadraginta majoribus hostiis, quibus Diis consules sacrificarent, & addiderunt, uti supplicatio fieret,

cunctique magistratus circa omnia pulvinaria victimis majoribus sacrificarent, populusque coronatus esset. Omnia, uti decemviri præierunt, facta.

XIV. Censoribus deinde creandis comitia edicta sunt. petierunt censuram principes civitatis, C. Valerius Lævinus, L. Postumius Albinus, P. Mucius Scævola, M. Junius Brutus, C. Claudius Pulcher, Ti. Sempronius Gracchus. Hos duos censores creavit populus Romanus. Cum delectus habendi major, quam alias, propter Macedonicum bellum cura esset, consules plebem apud senatum accusabant, quod & juniores non responderent. Adversus quos C. Sulpicius & M. Claudius tribuni plebis causam egerunt. *Non consulibus, sed ambitiosis consulibus, delectum difficilem esse. neminem invitum militem ab iis fieri. Id ita ut esse scirent & Patres conscripti, prætores, quibus & vis imperii minor & auctoritas esset, delectum, si ita senatui videretur, perfecturos esse.* Id prætoribus magna Patrum * non sine sugillatione consulum, mandatum est. Censores, ut eam rem adjuvarent, ita in concione edixerunt, *Legem censui censendo dicturos esse, ut, præter commune omnium civium jusjurandum, hæc adjurarent: Tu minor annis sex & quadraginta es, tuque ex edicto C. Claudii, Ti. Sempronii censorum ad delectum prodito: & quotiescunque delectus erit, quem hic censores magistratum habebunt, si miles factus non eris, in delectu prodibis.* Item, quia fama erat, multos ex Macedonicis legionibus, incertis com meatibus per ambitionem imperatorum ab exercitu abesse, edixerunt de militibus, P. Ælio, C. Popillio consulibus, postve eos consu-

les in Macedoniam scriptis, *Ut, qui eorum in Italia essent, intra dies triginta, censi prius apud sese, in provinciam redirent. qui in patris aut avi potestate essent, eorum nomina ad se ederentur. Missorum quoque causas sese cognituros esse: &, quorum ante emerita stipendia gratiosa missio sibi visa esset, eos milites fieri iussuros.* Hoc edicto literisque censorum per fora & conciliabula dimissis, tanta multitudo juniorum Romanam convenit, ut gravis urbi turba insolita esset.

XV. Præter delectum eorum, quos in supplementum mitti oportebat, quatuor a C. Sulpicio prætore scriptæ legiones sunt, intraque undecim dies delectus est perfectus. Consules deinde sortiti provincias sunt. nam prætores propter jurisdictionem maturius sortiti erant. Urbana C. Sulpicio, peregrina C. Decimio obtigerat, Hispaniam M. Claudius Marcellus, Siciliam Ser. Cornelius Lentulus, Sardiniam P. Fontejus Capito, classem C. Marcius Figulus erat sortitus. Consul Cn. Servilio Italia, Q. Marcio Macedonia obvenit. Latinisque actis, Marcius extemplo est profectus. Cæpione deinde referente ad senatum, quas ex novis legionibus duas legiones secum in Galliam duceret, decrevere Patres, ut C. Sulpicius, M. Claudius prætores ex his, quas scripsissent, legionibus, quas videretur, consuli darent. Indigne patiente prætorum arbitrio consulem subjectum, dimisso senatu, ad tribunal prætorum stans postulavit, ex senatusconsulto destinerent sibi duas legiones. prætores consuli in eligendo arbitrium fecerunt. Senatum deinde censores legerunt: M. Æmilius Lepidus princeps ab tertiis

jam censoribus lectus. Septem e senatu ejecti sunt. In censu accipiendo populi milites ex Macedonico exercitu, qui quam multi abessent ab signis, census docuit, in provinciam cogeabant: causas stipendiis missorum cognoscebant: & ,cujus nondum iusta missio visa esset, ita iusjurandum adigebant: *Ex tui animi sententia, tu ex edicto C. Claudii, Ti. Sempronii censorum in provinciam Macedoniam redibis, quod sine dolo malo facere poteris?*

XVI. In equitibus recensendis tristis admodum eorum atque aspera censura fuit: multis equos ademerunt. in ea re cum equestrem ordinem offenderent, flammani invidiæ adjecere edicto, quo edixerunt, *Ne quis eorum, qui Q. Fulvio, A. Postumio censoribus publica vectigalia aut uliro tributa conduxissent, ad hastam suam accederet, sociusve aut affinis ejus conductionis esset.* Sæpe id querendo veteres publicani cum impetrare nequissent ab senatu, ut modum potestati censoriæ imponerent, tandem tribunum plebis P. Rutilium, ex rei privatiæ contentione iratum censoribus, patronum causæ nacti sunt. Clientem libertinum parietem in Sacra via adversus ædes publicas demoliri jusserant, quod publico inædificatus esset. appellati a privato tribunum cum præter Rutilium nemo intercederet, censores ad pignora capienda miserunt, multamque pro concione privato dixerunt. Hinc contentione orta, cum veteres publicani se ad tribunum contulissent, rogatio repente sub unius tribunum nomine promulgatur: *Quæ publica vectigalia, uliro tributa C. Claudius & Ti. Sempronius locassent, ea rata locatio ne esset.*

de integro locarentur, & ut omnibus redimendi & conducendi promiscue jus esset. Diem ad ejus rogationem concilio tribunus plebis dixit. qui postquam venit, ut censores ad dissuadendum processerunt, Graccho dicente, silentium fuit. cum Claudio obstreperetur, audientiam facere præconem jussit. Eo facto, advocatam a se concionem tribunus questus, & in ordinem se coactum, ex Capitolio, ubi erat concilium, abiit. Postero die ingentes tumultus cedere. Ti. Gracchi primum bona consecravit, quod in multa pignoribusque ejus, qui tribunum appellasset, intercessioni non parendo, se in ordinem coegisset. C. Claudio diem dixit, quod concionem ab se avocasset, & utrique censori perduellionem se judicare pronuntiavit, diemque comitiis a C. Sulpicio prætore urbano petiit. Non recusantibus censoribus, qui minus primo quoque tempore iudicium de se populus faceret, in ante dies octavum & septimum Kalendas Octobres comitiis perduellionis dicta dies. Censores extemplo in atrium Libertatis ascenderunt: & ibi signatis tabellis publicis, clausoque tabulario, & dimissis servis publicis, negarunt, se prius quidquam publici negotii gesturos, quam iudicium populi de se factum esset. Prior Claudius causam dixit: & cum ex duodecim centuriis equitum octo censores condemnassent, multæque aliæ primæ classis, extemplo principes civitatis in conspectu populi, annulis aureis positis, vestem mutarunt, ut supplices plebem circumirent. Maxime tamen sententiam veruisse dicitur Ti. Gracchus, quod, cum clamor undique ple-

bis esset, periculum Graccho non esse, conceptis verbis juravit, si collega damnatus esset, non expectato de se iudicio, comitem exilii ejus futurum. Adeo tamen ad extremum spei venit reus, ut octo centuriæ ad damnationem defuerint. Absoluto Claudio, tribunus plebis negavit se Gracchum morari.

XVII. Eo anno, postulantibus Aquilejensium legatis, ut numerum colonorum augeret, mille & quingentæ familiæ ex senatusconsulto scriptæ, triumvirique, qui eas deducerent, missi sunt, T. Annius Luscus, P. Decius Subulo, M. Cornelius Cethegus. Eodem anno C. Popillius & Cn. Octavius legati, qui in Græciam missi erant, senatusconsultum, Thebis primum recitatum, per omnes Peloponnesi urbes circumtulērunt, *Ne quis ullam rem in bellum magistratibus Romanis conferret, præterquam quod senatus censuisset.* Hoc fiduciam in posterum quoque præbuerat, levatos se oneribusque impensisque, quibus, alia aliis imperantibus, exhauriebantur. Achaico concilio Argis agitato, benigne locuti auditique, egregia spe futuri status fidissima gente relicta, in Ætoliam trajecerunt. Ibi nondum quidem seditio erat, sed omnia suspecta, criminumque inter ipsos plena. ob quæ obsidibus postulatis, neque exitu rei imposito, in Acarnaniam inde profecti legati sunt. Thyrii concilium legatis Acarnanes dederunt. Ibi quoque inter factiones erat certamen: quidam principum postulare, ut præsidia in urbes suas inducerentur adversus amentiam eorum, qui ad Macedonas gentem tra-

hebant: pars recusare, ne, quod bello captis & hostibus mos esset, id pacatæ & sociæ civitates ignominia acciperent. Iusta deprecatio hæc visa. Larissam ad Hostilium proconsulem (ab eo enim missi erant) legati redierunt. Octavium retinuit secum. Popillium cum mille ferme militibus in hiberna Ambraciam misit.

XVIII. Perseus, principio hiemis egredi Macedonia finibus non ausus, ne qua in regnum vacuum irrumperent Romani, sub tempus brumæ, cum inexsuperabiles ab Thessalia montes nivis altitudo facit, occasionem esse ratus frangendi finitimum spes animosque, ne quid, averso se in Romanum bellum, periculi subesset, cum a Thracia pacem Cotys, ab Epiro Cephalus repentina defectione a Romanis præstarent, Dardanos recens domuisset bello, solum infestum esse Macedoniae latus, quod ab Illyrico pateret, cernens, neque ipsis quietis Illyriis, & aditum præbentibus Romanis, si domuisset proximos Illyriorum, Gentium quoque regem jam diu dubium in societatem perlici posse, cum decem millibus peditum, quorum pars phalangitæ erant, & duobus millibus levium armatorum, & quingentis equitibus profectus, Stuberam venit. Inde frumento complurium dierum sumto, iussuque apparatu oppugnandarum urbium sequi, tertio die ad Uscanam (Peneftianæ terræ ea maxima urbs est) posuit castra: prius tamen, quam vim admoveret, missis, qui tentarent nunc præfectorum præsidii, nunc oppidanorum animos. erat autem ibi cum juventute Illyriorum Roma-

num præsidium. Postquam nihil pacati referebant; oppugnare est adortus, & corona eam capere conatus est. cum sine intermissione interdiu noctuque alii aliis succedentes, pars scalas muris, ignem portis inferrent, sustinebant tamen eam tempestatem propugnatores urbis; quia spes erat, neque hiemis vim diutius pati Macedonas in aperto posse, nec ab Romano bello tantum regi laxamenti fore, ut posset morari. Ceterum, postquam vineas agi, turreſque excitari viderunt, victa pertinacia est. nam, præterquam quod adversus vim pares non erant, ne frumenti quidem aut ullius alterius rei copia intus erat, ut in necopinata obsidione. Itaque cum spei nihil ad resistendum esset, C. Carvilius Spoletinus & C. Afranius a præsidio Romano missi, qui a Perseo peterent, primo, ut armatos suæque secum ferentes abiire sineret; dein, si id minus impetrarent, vitæ tantum libertatisque fidem acciperent. Promissum id benignius est ab rege, quam præstitum. exire enim sua secum efferentibus iussis primum arma ademit. his urbe egressis, & Illyriorum cohors, (quingenti erant) & Uscanenses se urbemque dediderunt.

XIX. Perseus, præsidio Uscanæ imposito, multitudinem omnem deditorum, quæ prope numero exercitum æquabat, Stuberam abducit. Ibi Romanis, (quatuor millia autem hominum erant) præter principes, in custodiam civitatum divisis, Uscanensibus Illyriisque venditis, in Penestiam exercitum reducit ad Oæneum oppidum in potestatem redigendum. & alioqui opportune situm, & transi-

tus ea est in Labeates, ubi Gentius regnabat. Prætereunti frequens castellum, Draudacum nomine, peritorum quidam regionis ejus, *nihil Oæneo capto opus esse, ait, nisi in potestate & Draudacum sit. opportunius etiam ad omnia positum esse.* Admoto exercitu, omnes extemplo dediderunt sese. Qua spe celeriore deditione erectus, postquam animadvertit, quantus agminis sui terror esset, undecim alia castella eodem metu in potestatem redigit. ad perpaucam vi opus fuit, cetera voluntate dedita: & in his recepti mille & quingenti dispositi per præsidia milites Romani. Magno usui Carvilius Spoletinus erat in colloquiis, dicendo, nihil in ipsos sævitum. Ad Oæneum perventum est, quod sine iusta oppugnatione capi non poterat; & majore aliquanto, quam cetera, juventute, & validum oppidum mœnibus erat. & hinc amnis Artatus nomine, hinc mons præaltus & aditu difficilis cingebat. hæc spem ad resistendum oppidanis dabant. Perseus, circumvallato oppido, aggerem a parte superiore ducere instituit, cujus altitudine muros superaret. quod opus dum perficitur, crebris interim præliis, quibus per excursiones & mœnia sua oppidani tutabantur, & opera hostium impediebant, magna eorum multitudo variis casibus absumpta est: & qui supererant, labore diurno nocturnoque & vulneribus inutiles erant. Ubi primum agger injectus muro est, & cohors regia, quos Nicatoras appellant, transcendit, & scalis multis simul partibus impetus in urbem est factus. puberes omnes interfecti sunt: conjuges liberosque eo-

rum in custodiam dedit: prædæ alia militum cefere. Stuberam inde victor revertens ad Gentium legatos, Plenratum Illyrium, exfulantem apud se, & Aputeum Macedonem a Berœa, mittit. Iis mandat, ut exponerent æstatis ejus hiemisque acta sua adversus Romanos Dardanosque. adjicerent recentia in Illyrico hibernæ expeditionis opera. hortarentur Gentium in amicitiam secum & cum Macedonibus jungendam.

XX. Hi, transgressi jugum Scordi montis, per Illyrici solitudines, quas de industria populando Macedones fecerant, ne transitus faciles Dardanis in Illyricum aut Macedoniam essent, Scodram labore ingenti tandem pervenerunt. Lissi rex Gentius erat. eo acciti legati, mandata exponentes, benigne auditi sunt: qui responsum sine effectu tulerunt, *Voluntatem sibi non deesse ad bellandum cum Romanis: ceterum ad conandum id, quod velit, pecuniam maxime deesse.* Hæc Stuberam retulere regi, tum maxime captivos ex Illyrico vendenti. Extemplo iidem legati, addito Glaucia ex numero custodum corporis, remittuntur sine mentione pecuniæ, qua una barbarus inops impelli ad bellum poterat. Ancyram inde populatus Perseus, in Peneftas rursus exercitum reducit: firmatisque Uscanæ, & circa eam per omnia castella, quæ receperat, præfidiis, in Macedoniam sese recipit.

XXI. L. Coelius, legatus Romanus, præerat Illyrico: qui, moveri non ausus, cum in iis locis rex esset, post profectiorem demum ejus conatus in Peneftis Uscanam recipere, a præsidio, quod

ibi Macedonum erat, cum multis vulneribus repulsus, Lychnidum copias reduxit. Inde post dies paucos M. Trebellium Fregellanum cum satis valida manu in Penestras misit ad obsides ab his urbibus, quæ in amicitia cum fide permanferant, accipiendos. Procedere etiam in Parthinos (ii quoque obsides dare pepigerant) iussit: ab utraque gente sine tumultu exigi. Penestarum obsides Apolloniam, Parthinorum Dyrrachium (tum Epidamni magis celebre nomen Græcis erat) missi. Ap. Claudius, acceptam in Illyrico ignominiam corrigere cupiens, Phanotem Epiri castellum adortus oppugnare, & auxilia Athamanum Thesprotorumque; præter Romanum exercitum, ad sex millia hominum secum adduxit: neque operæ pretium fecit, Cleva, qui relictus a Perseo erat, cum valido præsidio defendente. Et Perseus, in Elimeam profectus, & circa eam exercitu lustrato, ad Stratum, vocantibus Epirotis, ducit. Stratus validissima tum urbs Ætoliae erat. sita est super Ambracium sinum, prope amnem Acheloum. Cum decem millibus peditem eo profectus est & equitibus trecentis: quos pauciores propter angustias viarum & asperitatem duxit. Tertio die cum pervenisset ad Citium montem, vix transgressus propter altitudinem nivis, locum quoque castris ægre invenit. Profectus inde, magis quia manere non poterat, quam quod tolerabilis aut via aut tempestas esset, cum ingenti vexatione, præcipue jumentorum, altero die ad templum Jovis, quem Nicæum vocant, posuit castra. Ad Arachthum inde flumen, itinere ingenti emen-

fo, retentus altitudine amnis, mansit. Quo spatio temporis ponte perfecto, traductis copiis, diei progressus iter, obvium Archidamuni principem Ætolorum, per quem ei Stratus tradebatur, habuit.

XXII. Eo die ad finem agri Ætoli castra posita. Inde altero die ad Stratum perventum: ubi, prope Acheloum amnem castris positus, cum exspectaret, effusos omnibus portis Ætolos in fidem suam venturos, clausas portas, atque ipsa ea nocte, qua venerat, receptum Romanum præsidium cum C. Popillio legato invenit. Principes, qui præsentis Archidami auctoritate compulsi regem arcessierant, obviam egresso Archidamo segniores facti, locum adversæ factioni dederant ad Popillium cum mille peditibus ab Ambracia arcessendum. In tempore & Dinarchus, præfectus equitum gentis Ætolorum, cum sexcentis peditibus & equitibus centum venit. Satis constabat, eum, tanquam ad Persea tendentem, Stratum venisse: mutato deinde cum fortuna animo, Romanis se, adversus quos venerat, iunxisse. Nec Popillius securior, quam debebat esse, inter tam mobilia ingenia erat. claves portarum custodiamque murorum suæ extemplo potestatis fecit: Dinarchum Ætolosque cum juventute Strationum in arcem per præsidii speciem amovit. Perseus, ab imminentibus superiori parti urbis tumultis tentatis colloquiis, cum obstinatos atque etiam telis procul arcentes videret, quinque millia passuum ab urbe trans Petitarum amnem posuit castra. Ibi consilio advocato, cum Archidamus Epirotarumque transfugæ retinerent, Macedonum principes non pu-

gnandum cum infesto tempore anni censerent, nullis præparatis com meatibus; cum inopiam prius ob-
sidentes, quam obsessi, sensuri essent, maxime quod
hostium haud procul inde hiberna erant; territus
in Aperantiam castra movit. Aperantii eum, pro-
pter Archidami magnam in ea gente gratiam aucto-
ritatemque, consensu omnium acceperunt. is ipse
cum octingentorum militum præsidio his est præ-
positus.

XXIII. Rex cum minore vexatione jumentorum
hominumque, quam venerat, in Macedoniam re-
diit. Appium tamen ab obsidione Phanotis fama
ducentis ad Stratum Persei submovit. Clevas, cum
præsidio impigrorum juvenum infecutus, sub ra-
dicibus prope inviis montium ad mille hominum
ex agmine impedito occidit, ad ducentos cepit. Ap-
pius, superatis angustiis, in campo, quem Elæona
vocant, stativa dierum paucorum habuit. Interim
Clevas, assumpto Philostrato, qui Epirotarum gen-
tem habebat, in agrum Antigonensem transcendit.
Macedones ad depopulationem profecti; Philostrat-
us cum cohorte sua in infidiis loco obscuro con-
sedit. in palatos populatores cum erupissent ab An-
tigonea armati, fugientes eos persequentes effusius
in vallem infessam ab hostibus præcipitant. ibi ad
mille occisis, centum ferme captis, ubique prospe-
re gesta re, prope stativa Appii castra movent, ne
qua vis fociis suis ab Romano exercitu inferri pos-
sit. Appius, nequidquam in his locis terens tem-
pus, dimissis Chaonumque, & si qui alii Epirotæ
erant, præsidiis, cum Italicis militibus in Illyricum

regressus, per Parthinorum socias urbes in hiberna militibus dimissis, ipse Romam sacrificii causa rediit. Perseus ex Penestiarum gente mille pedites, ducentos equites revocatos, Cassandriam, præsidio ut essent, misit. Ab Gentio eadem afferentes redierunt. nec deinde alios atque alios mittendo tentare eum destitit, cum appareret, quantum in eo præsidii esset; nec tamen impetrare ab animo posset, ut impensam in rem maximi ad omnia momenti faceret. * * * *

TITI LIVII PATAVINI HISTORIARUM

AB URBE CONDITA

LIBER XLIV.

EPITOME

LIBRI QUADRAGESIMI QUARTI.

Q. Marcius Philippus per invios saltus penetravit in Macedoniam, compluresque urbes occupavit. Rhodii misere legatos Romam, minantes, se Perseo auxilio futuros, nisi populus Romanus cum eo pacem atque amicitiam jungeret. indigne id latum. Cum id bellum L. Æmilio Paulo, sequentis anni consuli iterum, mandatum esset, Paullus, in concione precatus, ut, quidquid diri populo Romano immineret, in domum suam converteretur, & in Macedoniam profectus, vicit Persen, totamque Macedoniam in potestatem redegit. Antequam conflingeret, C. Sulpicius Gallus tribunus militum prædixit exercitui, ne miraretur, quod luna nocte proxima defectura esset. Gentius quoque rex Illyriorum, cum rebellasset, ab Anicio prætore victus, venit in deditionem, & cum uxore, & liberis, & propinquis, Romam missus est. Alexandria legati a Cleopatra & Ptolemæo regibus venerunt, querentes de Antiocho rege

Syriæ, quod his bellum inferret. Perfes, sollicitatis in auxilium Eumene rege Pergami, & Gentio rege Illyriorum, quia his pecuniam, quam promiserat, non dabat, ab iis relictus est.

PRINCIPIO veris, quod hiemem eam, qua hæc gesta sunt, insecutum est, ab Roma profectus Q. Marcius Philippus consul cum quinque millibus (quod in supplementum legionum secum trajecturus erat) Brundisium pervenit. M. Popillius consularis & alii pari nobilitate adolescentes tribuni militum in Macedonicas legiones consulem secuti sunt. Per eos dies & C. Marcius Figulus prætor, cui claffis provincia evenerat, Brundisium venit: & simul ex Italia profecti, Corcyram altero die, tertio Actium Acarnaniæ portum tenuerunt. Inde consul, ad Ambraciam egressus, itinere terrestri petit Theffaliam. Prætor, superato Leucata, Corinthium sinum invectus, & Creusæ relictis navibus, terra & ipse per mediam Bœotiam diei unius expedito itinere Chalcidem ad classiem contendit. Castra eo tempore A. Hostilius in Theffalia circa Palæpharsalum habebat; sicut nulla re bellica memorabili gesta, ita ad cunctam militarem disciplinam ab effusa licentia formato milite, & sociis cum fide cultis, & ab omni genere injuriæ defensis. Audito successoris adventu, cum arma, viros, equos cum cura inspexisset, ornato exercitu obviam venienti consuli processit. Et primus eorum congressus ex dignitate ipsorum ac Romani nominis, & in rebus deinde gerendis *. Proconsul enim ad exercitum **. Paucis

post diebus consul concionem apud milites habuit. orsus a parricidio Persei perpetrato in fratrem, cogitato in parentem, adjecit, *post scelere partum regnum, veneficia, cædes, latrocinio nefando petitum Euménem, injurias in populum Romanum, direptiones sociarum urbium contra fœdus, ea omnia quam Diis quoque invisa essent, sensurum in exitu rerum suarum. Favere enim pietati fideique Deos, per quæ populus Romanus ad tantum fastigii venerit.* Vires deinde populi Romani, jam terrarum orbem complectentis, cum viribus Macedoniæ, exercitus cum exercitibus comparavit. *Quanto majores Philippi Antiochique opes non majoribus copiis fractas esse?*

II. Hujus generis adhortatione accensis militum animis, consultare de summa gerendi belli cœpit. Eo & C. Marcius prætor a Chalcide, classe accepta, venit. Placuit, non ultra morando in Thessalia tempus terere, sed movere extemplo castra, atque pergere inde in Macedoniam; & prætorem dare operam, ut eodem tempore classis quoque invehatur hostium litoribus. Prætoře dimisso, consul, menstruum jussu milite secum ferre, profectus decimo post die, quam exercitum acceperat, castra movit: & unius diei progressus iter, convocatis itinerum ducibus, cum, exponerent in consilio, jussisset, quavisque ducturus esset; submotis iis, quam potissimum peteret, retulit ad consilium. Aliis per Pythium placebat via: aliis per Cambunios montes, qua priore anno duxerat Hostilius consul: aliis præter Aseuridem paludem. Restabat aliquantum viæ communis: itaque in id tempus, quo prope

divortium itinerum castra posituri erant, deliberatio ejus rei differtur. in Perrhæbiam inde ducit, & inter Azorum & Dolichen stativa habuit ad consulendum rursus, quam potissimum capefferet viam. Per eosdem dies Perseus, cum appropinquare hostem sciret, quod iter petiturus esset ignarus, omnes saltus insidere præsiidiis statuit. In jugum Cambuniorum montium (Volustana ipsi vocant) decem millia levis armaturæ juvenum cum duce Asclepiodoto mittit: ad castellum, quod super Ascuridem paludem erat, (Lapathus vocatur locus) Hippias tenere saltum cum duodecim millium Macedonum præsidio jussus. Ipse cum reliquis copiis primo circa Dium stativa habuit. deinde, adeo ut obtorpuisse inops consilii videretur, cum equitibus expeditis litore nunc Heracleum, nunc Philam percurrerat, eodem inde cursu Dium repetens.

III. Interim consuli sententia stetit eo saltu ducere, ubi propter Ostolophum diximus regis castra *. Præmitti tamen quatuor millia armatorum ad loca opportuna præoccupanda placuit: quibus præpositi sunt M. Claudius, Q. Marcius consulis filius. confestim & universæ copię sequebantur. Ceterum adeo ardua & aspera & confragosa via fuit, ut præmissi expediti biduo quindecim millium passuum ægre itinere confecto castra posuerint: turrim Eudieru, quem cepere, locum appellant. Inde postero die septem millia progressi, tumulo haud procul hostium castris capto, nuntium ad consulem remittunt: *perventum ad hostem esse, loco se tuto & ad omnia opportuno consedisse; ut, quantum extendere iter*

posset, consequeretur. Sollicito consuli, & propter itineris difficultatem, quod ingressus erat, & eorum vicem, quos paucos inter media præsidia hostium præmiserat, nuntius ad Ascuridem paludem occurrit. Addita igitur & ipsi fiducia est, conjunctisque copiis, castra tumulo, qui tenebatur, qua aptissimum ad loci naturam erat, sunt acclinata. Non hostium modo castra, quæ paulo plus mille passuum aberant, sed omnis regio ad Diuum & Philam, ora-que maris, late patente ex tam alto jugo prospectu, oculis subjicitur. Quæ res accendit militi animos, postquam summam belli, ac regias omnes copias, terramque hostilem tam e propinquo conspexerunt. Itaque cum alacres, protinus duceret ad castra hostium, consulem hortarentur; dies unus fessis labore viæ ad quietem datus est. tertio die, parte copiarum ad præsidium castrorum relicta, consul ad hostem ducit.

IV. Hippias nuper ad tuendum saltum ab rege missus erat: qui, ex quo castra Romana in tumulo conspexit, præparatis ad certamen animis suorum, venienti agmini consulis obvius fuit: & Romani expediti ad pugnam exierant, & hostes. levis armatura erat, promptissimum genus ad laceffendum certamen. Congressi igitur extemplo, tela conjecerunt. multa utrinque vulnera temerario incurfu & accepta, & illata: pauci utriusque partis ceciderunt. Irritatis in posterum diem animis, majoribus copiis atque infestius concursum ab illis, si loci satis ad explicandam aciem fuisset: jugum montis, in angustum dorsum cuneatum, vix ternis ordinibus ar-

matorum in fronte patuit. Itaque, paucis pugnantibus, cetera multitudo, præcipue qui gravium armorum erant, spectatores pugnae stabant. levis armatura etiam per anfractus jugi procurrere, & ab lateribus cum levi armatura conferere, per iniqua atque æqua loca pugnam petere. ac, pluribus ea die vulneratis, quam interfectis, prælium nocte diremtum est. Tertiò die egere consilio Romanus imperator: nam neque manere in jugo inopi, neque regredi sine flagitio, atque etiam periculo; sed cedenti ex superioribus locis instare hostis poterat: nec aliud restabat, quam audacter commissum pertinaci audacia, quæ prudens interdum in exitu est, corrigere. Ventum quidem erat eo, ut, si hostem similem antiquis Macedonum regibus habuisset consul, magna clades accipi potuerit. sed, cum ad Dium per litora cum equitibus vagaretur rex, & ab duodecim millibus prope clamorem & strepitum pugnantium audiret, nec auxit copias integros fessis submittendo, neque ipse, quod plurimum intererat, certamini adfuit: cum Romanus imperator, major sexaginta annis, & prægravis corpore, omnia militaria munera ipse impigre obiret. Egregie ad ultimum in audacter commissio perseveravit: &, Popilio relicto in custodia jugi, per invia transgressus, præmissis, qui repurgarent iter, Attalum & Misagenem, cum suæ gentis utrumque auxiliariis, præsidio esse saltum aperientibus jubet. ipse, equites impedimenta præ se habens, cum legionibus agmen cogit.

V. Inenarrabilis labor descendentibus cum ruina

jumentorum sarcinarumque : progressis vixdum quatuor millia passuum nihil optabilius esse, quam redire, qua venerant, si possent. Hostilem prope tumultum agmini elephanti præbebant : qui, ubi ad invia venerant, dejectis rectoribus, cum horrendo stridore pavorem ingentem, equis maxime, incutiebant, donec traducendi eos ratio inita est. Perproclive, sumto fastigio, longi duo validi asseres ex inferiore parte in terra defigebantur, distantes inter se paulo plus, quam quanta belluæ latitudo est. in eos transversis incumbentes tigni, ad tricenos longi pedes, ut pons esset, injungebantur : humusque insuper injiciebatur. modico deinde infra intervallo similis alter pons : dein tertius, & plures ex ordine, qua rupes abscisæ erant, fiebant. Solido procedebat elephas in pontem : cujus priusquam in extremum procederet, succisis asseribus collapsus pons, usque alterius initium pontis, prolabi eum leniter cogebat. alii elephanti pedibus insistentes, alii clunibus subsidentes, prolabebantur. ubi planities altera pontis excepisset eos, rursus simili ruina inferioris pontis deferebantur, donec ad æquioremm vallem perventum est. Paulo plus septem millia die Romani processerunt : minimum pedibus itineris confectum. plerumque provolventes se simul cum armis aliisque oneribus, cum omni genere vexationis, processerunt : adeo ut ne dux quidem & auctor itineris infitaretur, parva manu deleri omnem exercitum potuisse. Nocte ad modicam planitiem pervenerunt : neque, an infestus is locus esset, septus undique, circumspiciendi spatium fuit. vix tandem

ex insperato stabilem ad insistendum nactis locum postero quoque die in tam cava valle opperiri Poppillium, ac relictas cum eo copias, necesse fuit: quos & ipsos, cum ab nulla parte hostis terruisset, locorum asperitas hostiliter vexavit. Tertio die conjunctis copiis eunt per saltum, quem incolæ Calipeucen appellant. quarto inde die per æque invia, sed assuetudine peritius, & meliore cum spe, quod nec hostis unquam apparebat, & mari appropinquabant, degressi in campos, inter Heraacleum & Libethrum posuerunt castra peditum: quorum pars major tumulos tenebat. ii vallem, campi quoque partem, ubi eques tenderet, amplectebantur.

VI. Lavanti regi dicitur nuntiatum, hostes adesse. quo nuntio cum pavidus exsiluisset e folio, victum se sine proelio clamitans proripuit; &, subinde per alia atque alia pavida consilia & imperia trepidans, duobus ex amicis Pellam, alterum Asclepiodotum, ubi pecunia deposita erat, ex præsiidiis revocat; omnesque aditus aperit bello. Ipse, ab Dio auratis statuis omnibus raptim, ne præda hosti essent, in classem congestis, ocius demigrare Pydnam cogit: &, quæ temeritas consulis videri potuisset, quod eo processisset, unde invito hoste regredi nequiret, eam non inconsultam audaciam fecit. Duos enim saltus, per quos inde evadere possent, habebant Romani: unum per Tempe in Thessaliam, alterum in Macedoniam præter Dium; quæ utraque regiis tenebantur præsiidiis. Itaque si dux intrepidus decem dies primam speciem appropinquantis terroris

sustinuisset, neque receptus Romanis per Tempe in Thessaliam, neque commeatibus pervehendis eo patuisset iter. Sunt enim Tempe saltus, etiamsi non bello fiat infestus, transitu difficilis. nam præter angustias per quinque millia, qua exiguum jumento onusto iter est, rupes utrinque ita abscisæ sunt, ut despici vix sine vertigine quadam simul oculorum animique possit. terret & sonitus & altitudo per mediam vallem fluentis Penei amnis. Hic locus, tam suapte natura infestus, per quatuor-distantia loca præsidiiis regis fuit infessus. unum in primo aditu ad Gonnum erat: alterum Condylon castello inexpugnabili: tertium circa Lapathuata, quem Characa appellant: quartum viæ ipsi, qua & media & angustissima vallis est, impositum, quam vel decem armatis tueri facile est. Intercluso per Tempe simul aditu commeatibus, simul reditu, ipsi montes, per quos descenderant, repetendi erant. quod ut furto sefellerant, ita propalam, tenentibus superiora cacumina hostibus, non poterant: & experta difficultas spem omnem incidisset. Supererat nihil aliud in temere commisso, quam in Macedoniam ad Dium per medios evadere hostes: quod, nisi Dii mentem regi ademissent, ipsum ingentis difficultatis erat. Nam cum Olympi radices montis paulo plus, quam mille passuum, ad mare relinquant spatium, cujus dimidium loci occupat ostium late restagnans Baphyri amnis, partem planitiæ aut Jovis templum, aut oppidum tenet; reliquum per exiguum fossa modica valloque claudi poterat, & faxorum ad manum silvestrisque materiæ tantum

erat, ut vel murus objici, turreſque excitari potuerint. Quorum nihil cum diſpexiſſet cæcata mens ſubito terrore, nudatis omnibus præſidiis, patefactiſque bello, ad Pydnam refugit.

VII. Conſul, plurimum & præſidii & ſpei cernens in ſtultitia & ſegnitie hoſtis, remiſſo nuntio ad Sp. Lucretium Lariffam, ut caſtella, relicta ab hoſte, circa Tempe occuparet, præmiſſo Popillio ad explorandos tranſitus circa Diū, poſtquam patere omnia in omnes partes animadvertit, ſecundis caſtris pervenit ad Diū: metarique ſub ipſo templo, ne quid ſacro in loco violaretur, juſſit. Ipſe, urbem ingreſſus, ſicut non magnam, ita exornatam publicis locis & multitudine ſtatuarum, munitarumque egregie, vix ſatis credere, in tantis rebus ſine cauſa relictiſ non aliquem ſubeſſe dolum. Unum diem ad exploranda circa omnia moratus, caſtra movet: ſatiſque credens, paratam frumenti copiam fore, eo die ad amnem nomine Mityn proceſſit. Poſtero die progreſſus, Agaffam urbem, tradentibus ſeſe ipſis, recepit: &, ut reliquorum Macedonum animos ſibi conciliaret, obſidibus contentus, ſine præſidio relinquere ſe eis urbem, immunefque ac ſuis legibus victuros, eſt pollicitus. Progreſſus inde diei iter, ad Aſcordum flumen poſuit caſtra: &, quantum procederet longius a Theſſalia, eo majorem rerum omnium inopiam ſentiens, regreſſus ad Diū eſt; dubitatione omnibus exempta, quid intercluſo ab Theſſalia patiendum fuiſſet, cui procul inde abſcedere tutum non eſſet. Perſeus, contractis in unum omnibus copiis ducibuſque, incre-

pare præfectos præsidiorum, ante omnes Asclepiodotum atque Hippiam : ab his dicere claustra Macedoniae tradita Romanis esse : cuius culpæ reus nemo iustius, quam ipse, fuisset. Consuli postquam ex alto conspecta classis spem fecit, cum commeatu naves venire, (ingens enim caritas annonæ ac prope inopia erat) ab inventis jam portum audit, onerarias naves Magnesiæ relictas esse. Incerto inde, quidnam agendum foret, (adeo sine ulla ope hostis quæ aggravaret, cum ipsa difficultate rerum pugnandum erat) peropportune literæ a Sp. Lucretio allatæ sunt : castella se, quæ super Tempe essent & circa Philan, tenere omnia, frumentique in iis & aliarum in usum rerum copiam invenisse.

VIII. His magnopere lætus consul ab Dio ad Philan ducit, simul ut præsidium ejus firmaret, simul ut militi frumentum, cuius tarda subvectio erat, divideret. Ea profectio famam haudquaquam secundam habuit. nam alii, metu recessisse eum ab hoste, ferebant, quia manenti imperatori prælio dimicandum foret : alii ignarum, belli quæ in dies fortuna novaret ; ut qui, offerentibus sese rebus, omisisset e manibus ea, quæ mox repeti non possent. Simul enim cessit possessione Dii, excitavit hostem, ut nunc tandem sentiret, recuperanda esse, quæ prius culpa amissa forent. Audita enim profectio consulis, regressus Dium, quæ disiecta ac vastata ab Romanis erant, reficit : pinnas mœnium decussas reponit, ab omni parte muros firmat : deinde quinque millia passuum ab urbe citra ripam Enipei amnis castra ponit ; amnem ipsum, transitu per-

difficilem, pro munimento habiturus. Fluit ex valle Olympi montis, æstate exiguus, hibernis idem incitatus pluviis: & supra rupes ingentes gurgitibus facit, & intra prorupta, in mare evolvendo terram, præaltas voragines, cavatoque medio alveo ripas utrinque præcipites. Hoc flumine Perseus septum iter hostis credens, extrahere reliquum tempus ejus ætatis in animo habebat. Inter hæc consilium a Phila Popillium cum duobus millibus armatorum Heracleum mittit. abest a Phila quinque millia ferme passuum, media regione inter Diem Tempeque, in rupe amni imminente positum.

IX. Popillius, priusquam armatos muris admo-
veret, misit, qui magistratibus principibusque suaderent, fidem clementiamque Romanorum, quam vim, experiri mallent. nihil ea consilia moverunt, quia ignes ad Enipeum ex regis castris apparebant. Tum terra marique (& classis appulsa ab litore stabat) simul armis, simul operibus machinisque, oppugnari cœpti. Juvenes etiam quidam Romani, ludicro Circensi ad usum belli verso, partem humillimam muri ceperunt. Mos erat tum, nondum hac effusione inducta bestiis omnium gentium Circum complendi, varia spectaculorum conquirere genera: nec, semel quadrigis, semel desultore misso, vix unius horæ tempus utrumque curriculum complebat. Inter cetera sexageni ferme juvenes, interdum plures, apparitoribus ludi armati inducebantur. horum inductio in parte simulacrum decurrentis exercitus erat; ex parte elegantioris exercitii, quam militaris artis, propiorque gladiatorium ar-

morum usum. Cum alios decursus edidissent motus, quadrato agmine facto, scutis super capita densatis, stantibus primis, secundis submissioribus, tertiis magis & quartis, postremis etiam genu nisis, fastigatam, sicut tecta ædificiorum sunt, testudinem faciebant. Hinc quinquaginta ferme pedum spatio distantes duo armati procurrebant, comminatique inter se, ab ima in summam testudinem per densata scuta cum evasissent, nunc velut propugnantes per oras extremæ testudinis, nunc in media inter se concurrentes, haud secus quam stabili solo persultabant. Huic testudini simillima parti muri admota, cum armati superstantes subissent, propugnatoribus muri fastigio altitudinis æquabantur: depulsisque iis, in urbem duorum signorum milites transcenderunt. Id tantum dissimile fuit, quod, & in fronte extrema, & ex lateribus, soli non habebant super capita delata scuta, ne nudarent corpora; sed prætectæ pugnantium more. ita nec ipsos tela ex muro missa subeuntes læserunt, & testudini injecta imbris in modum lubrico fastigio innoxia ad imum labebantur. Et consul, capto jam Heracleo, castra eo promovit; tanquam Diem, atque, inde submoto rege, in Pieriam etiam progressurus. Sed, hiberna jam præparans, vias commeatibus subvehendis ex Theffalia muniri jubet, & eligi horreis opportuna loca, tecta quæ ædificari, ubi diversari portantes comuneatus possent.

X. Perseus, tandem a pavore eo, quo attonitus fuerat, recepto animo, malle, imperiis suis non obtemperatum esse, cum trepidans gazam in mare

dejici Pellæ, Theſſalonicæ navalia jufferat incendi. Andronicus, Theſſalonicam miſſus, traxerat tempus, id ipſum quod accidit, pœnitentiæ relinquens locum. incautior Nicias Pellæ projiciendo pecuniæ partem, quod fuerat naſtus: ſed in rem emendabilem viſus lapſus eſſe, quod per urinatores omne ferme extractum eſt. tantuſque pudor regi pavoris ejus fuit, ut urinatores clam interfici jufferit; deinde Andronicum quoque & Nician, ne quis tam dementis imperii conſcius exiſteret. Inter hæc C. Marcius, cum claſſe ab Heracleo Theſſalonicam profeſtus, & agrum pluribus locis, expoſitis per litora armatis, late vaſtavit, & procurrentes ab urbe, ſecundis aliquot præliis, trepidos intra moenia compulſit. jamque ipſi urbi terribilis erat, cum, diſpoſitis omnis generis tormentis, non vagi modo circa muros, temere appropinquant, ſed etiam qui in navibus erant, faxis tormento emicantibus percutiebantur. Revocatis igitur in naves militibus, omiſſaque Theſſalonicæ oppugnatione, Æniam inde petunt. quindecim millia paſſuum ea urbs abeſt, adverſus Pydnam poſita, fertili agro. Pervaſtatis finibus ejus, legentes oram, Antigoneam perveniunt. ibi, egreſſi in terram, primo & vaſtarunt agros paſſim, & aliquantum prædæ contulerunt ad naves. dein palatos eos adorti Macedones, mixti pedites equiteſque, fugientes effuſe ad mare perſecuti, quingentoſque ferme occiderunt, & non minus ceperunt. Nec aliud, quam ultima neceſſitas, cum recipere ſe tuto ad naves prohiberentur, animos militum Romanorum, ſimul deſperatione alia ſalvæ

tis, simul indignitate, irritavit. Redintegrata in litore pugna est. adjuvare &, qui in navibus erant. Ibi Macedonum ducenti ferme cæsi; par numerus captus. Ab Antigonea classis profecta, ad agrum Pallenensem exscensionem ad populandum fecit. Finium is ager Cassandrensium erat, longe fertilissimus omnis oræ, quam prætervecti fuerant. Ibi Eumenes rex, viginti tectis navibus ab Elea profectus, obvius fuit; & quinque missæ a Prusia rege tectæ naves.

XI. Hac virium accessione animus crevit prætori, ut Cassandream oppugnaret. Condita est a Cassandro rege in ipsis faucibus, quæ Pallenensem agrum ceteræ Macedoniae jungunt, hinc Toronaico, hinc Macedonico septa mari. Eminent namque in altum lingua, in qua sita est: nec minus, quam in altum magnitudine Atho mons, excurrit, obversa in regionem Magnesiæ duobus imparibus promontoriis; quorum majori Posideum est nomen, minori Canastræum. Divisis partibus oppugnare adorti: Romanus ad Clitas, quas vocant, munita, cervis etiam objectis, ut viam intercluderet, a Macedonico ad Toronaicum mare perducit. ab altera parte euripus est: inde Eumenes oppugnabat. Romanis in fossa complenda, quam nuper objecerat Perseus, plurimum erat laboris. Ibi quærenti prætori, quia nusquam cumuli apparebant, quo regeſta e fossa terra foret, monstrati sunt forniceſ: *non ad eandem crassitudinem, qua veterem murum, sed simplici laterum ordine, structos esse.* Consilium igitur cepit, transfosso pariete iter in urbem patefacere. fallere autem ita se posse, si, muros a

parte alia scalis adortus, tumultu injecto, in custodia ejus loci propugnatores urbis avertisset. Erant in præsidio Cassandreæ, præter non contemnendam juventutem oppidanorum, octingenti Agrianes, & duo millia Penestiarum Illyriorum, a Pleurato inde missi, bellicosum utrumque genus. His tumentibus muros, cum subire Romani summa vi niterentur, momento temporis parietes fornicum perfossi urbem patefecerunt. quod si, qui irrupere, armati fuissent, extemplo cepissent. Hoc ubi perfectum esse opus militibus nuntiatum est, clamorem alacres gaudio repente tollunt, aliis parte alia in urbem irrupturis.

XII. Hostes primum admiratio cepit, quidnam sibi repentinus clamor vellet. postquam patere urbem accepere præfecti præsidii Pytho & Philippus, pro eo, qui occupasset aggredi, opus factum esse rati, cum valida manu Agrianum Illyriorumque erumpunt: Romanosque, qui alii aliunde coibant convocabanturque, ut signa in urbem inferrent, incompósitos atque inordinatos fugant, persequunturque ad fossam: in quam compulsos ruina cumulant. sexcenti ferme ibi interfecti, omnesque prope, qui inter murum fossamque deprehensi erant, vulnerantur. Ita suo ipse conatu perculsus prætor, segnior ad alia factus consilia erat: & ne Eumeni quidem, simul a mari, simul a terra aggredienti, quidquam satis procedebat. Placuit igitur utrique, custodiis firmatis, ne quod præsidium ex Macedonia intromitti posset, quoniam vis aperta non processisset, operibus incenia oppugnare. Hæc paran-

tibus his, decem regii lembi, ab Theſſalonica cum delectis Gallorum auxiliaribus miſſi, cum in ſalo ſtantes hoſtium naves conſpexiſſent; ipſi, obſcura nocte, ſimplici ordine, quam poterant proxime litus tenentes, intrarunt urbem. Hujus novi præſidii fama abſiſtere oppugnatione ſimul Romanos regemque coegit. circumveſti promontorium, ad Toronen claſſem appulerunt. Eam quoque oppugnare adorti, ubi valida defendi manu animadverterunt, irritum incepto Demetriadem petunt. Ibi cum appropinquantes repleta mœnia armatis viſiſſent, præterveſti ad Iolcon claſſem appulerunt; inde, agro vaſtato, Demetriadem quoque aggreſſuri.

XIII. Inter hæc & conſul, ne ſegnīs federet tantum in agro hoſtico, M. Popillium cum quinque millibus militum ad Melibœam urbem oppugnandam mittit. Sita eſt in radicibus Oſſæ montis, qua parte in Theſſaliam vergit, opportune imminens ſuper Demetriadem. Primus adventus hoſtium perculit incolas loci: collectis deinde ex necopinato pavore animis, diſcurrunt armati ad portas ac mœnia, qua ſuſpecti aditus erant: ſpemque extemplo inciderunt, capi primo impetu poſſe. Obſidio igitur parabatur, & opera oppugnationum fieri cœpta. Perſeus, cum audiſſet, ſimul Melibœam a conſulis exercitu oppugnari, ſimul claſſem Iolci ſtare, ut inde Demetriadem aggrederetur, Euphranorem quendam ex ducibus cum delectis duobus millibus Melibœam mittit. eidem imperatum, ut, ſi a Melibœa ſubmoviſſet Romanos, Demetriadem prius

occulto itinere intraret, quam ab Iolco ad urbem castra moverent Romani. Et ab oppugnatoribus Melibœæ, cum in superioribus locis repente apparuisset, cum trepidatione multa relicta opera sunt, ignisque injectus. ita a Melibœa abscessum est. Euphranor, soluta unius urbis obsidione, Demetriadem extemplo ducit. nec tum mœnia modo, sed agros etiam considerunt se a populationibus tueri posse: & eruptiones in vagos populatores non sine vulneribus hostium factæ sunt. Circumvecti tamen mœnia sunt prætor & rex, situm urbis contemplant, si qua parte tentare aut opere aut vi possent. Fama fuit, per Cydantem Cretensem & Antimachum, qui Demetriadi præerat, tractatas inter Eumenem & Persea conditiones amicitiae. ab Demetriade certe abscessum est. Eumenes ad consulem navigat: gratulatus, quod prospere Macedoniam intrasset, Pergamum in regnum abit. Marcus Figulus prætor, parte classis in hiberna Scythum missa, cum reliquis navibus Oreum Bœotiae petit, eam urbem aptissimam ratus, unde exercitibus, qui in Macedonia, quique in Thessalia erant, mitti commeatus possent. De Eumene rege longe diversa tradunt. Si Valerio Antiati credas, nec classe adjutum ab eo prætorem esse, cum sæpe eum literis arcessisset, tradit; nec cum gratia ab consule profectum in Asiam, indignatum, quod, ut iisdem castris tenderet, permissum non fuerit. ne ut equites quidem Gallos, quos secum adduxerat, relinqueret, impetrari ab eo potuisse. Attalum fratrem ejus & remansisse apud consulem, & sinceram ejus

fidem æquali tenore egregiamque operam in eo bello fuisse.

XIV. Dum bellum in Macedonia geritur, legati Transalpini ab regulo Gallorum (Balanos ipsius traditur nomen; gentis, ex qua fuerit, non traditur) Romam venerunt, pollicentes ad Macedonicum bellum auxilia. Gratiae ab senatu actæ, muneræque missa, torquis aureus duo pondo, & patere aureæ quatuor pondo, equus phaleratus, armaque equestria. Secundum Gallos Pamphyli legati coronam auream, ex viginti millibus Philippeorum factam, in curiam intulerunt: petentibusque iis, ut id donum in cella Jovis optimi maximi ponere, & sacrificare in Capitolio liceret, permisum. benigneque amicitiam renovare volentibus legatis responsum, & binum millium æris singulis missum munus. Tum ab rege Prusia, & paulo post ab Rhodiis, de eadem re longe aliter differentes legati auditi sunt. utraque legatio de pace reconcilianda cum rege Perseo egit. Prusiæ preces magis, quam postulatio, fuere, profitentis, & *ad id tempus se cum Romanis stetisse, &, quoad bellum foret, statutum. Ceterum cum ad se a Perseo legati venissent de finiendo cum Romanis bello, & iis pollicitum deprecatorem apud senatum futurum; petere, si possent inducere in animum, ut finiant iram, se quoque in gratia reconciliatæ pacis posse uti.* hæc regii legati. Rhodii, superbe commemoratis erga populum Romanum beneficiis, & pæne victoriæ, utique de Antiocho rege, majore parte ad se vindicata, adjecerunt: *Cum pax inter Macedonas Romanosque esset, sibi ami-*

citiam cum rege Perseo cœptam. eam se invitos, nullo ejus in se merito, quoniam ita Romanis visum sit in societatem se belli trahere, interrupisse. Tertium se annum multa ejus incommoda belli sentire. mari intercluso, inopia insulam premi, amissis maritimis vectigalibus atque commeatibus. Cum id ultra pati non possent, legatos alios ad Persea in Macedoniam misisse, qui ei denuntiarent, Rhodiis placere, pacem eum componere cum Romanis: se Romam eadem nuntiatum missos. Per quos stetisset, quo minus belli finis fieret, adversus eos quid sibi faciendum esset, Rhodios consideraturos esse. Ne nunc quidem hæc sine indignatione legi audirive posse, certum habeo. inde existimari potest, qui habitus animorum audientibus ea Patribus fuerit.

XV. Claudius, nihil responsum, auctor est: tantum senatusconsultum recitatum, quo Caras & Lycios liberos esse juberet populus Romanus, literasque extemplo ad utramque gentem * scirent indicatum mitti. Qua audita re, principem legationis, cujus magniloquentiam vix curia paulo ante ceperat, corruisse. Alii responsum esse tradunt, *Populum Romanum & principio hujus belli haud vanis auctoribus compertum habuisse, Rhodios cum Perseo rege adversus rempublicam suam occultæ consilia inisse: &, si id ante dubium fuisset, legatorum paulo ante verba ad certum redeigisse: & plerumque ipsam se fraudem, etiamsi initio cautior fuerit, detegere. Rhodios nuntio in orbe terrarum arbitria belli pacisque agere: Deorum nutu arma sumituros positurosque Romanos esse. jam non Deos sœderum testes, sed Rhodios habituros. Itane*

tandem iis pareatur, exercitusque de Macedonia deportentur? Visuros esse, quid sibi faciendum sit. Quid Rhodii visuri sint, ipsos scire. Populum certe Romanum, devicto Perseo, quod propediem sperent fore, visurum, ut pro meritis cujusque in eo bello civitatis gratiam dignam referat. Munus tamen legatis in singulos binum millium æris missum est: quod ii non acceperunt.

XVI. Literæ deinde recitatæ Q. Marcii consulis sunt, *Quemadmodum, saltu superato, in Macedoniam transisset: ibi & ex aliis locis commeatus a prætore prospectos in hiemem habere, & ab Epirotis viginti millia modium tritici, decem hordei sumfisse: ut pro eo frumento pecunia Romæ legatis eorum curaretur. Vestimenta militibus ab Roma mittenda esse: equis ducentis ferme opus esse, maxime Numidis: nec sibi in his locis ullam copiam esse. Senatusconsultum, ut eà omnia ex literis consulis fierent, factum est. C. Sulpicius prætor sex millia togarum, triginta tunicarum, & equos deportanda in Macedoniam, præbendaque arbitrato consulis locavit, & legatis Epirotarum pecuniam pro frumento solvit; & Onesimum, Pythonis filium, nobilem Macedonem, in senatum introduxit. Is pacis semper auctor regi fuerat, monueratque, sicut pater ejus Philippus institutum usque ad ultimum vitæ diem servabat, quotidie his in die foederis icti cum Romanis perlegendi: ut eum morem, si non semper, crebro tamen usurparet. Postquam deterrere eum a bello nequirit, primo subtrahere sese per alias atque alias causas, ne interesset iis, quæ non probabat, cœpit: postremo, cum su-*

spēctum se esse cerneret, & proditiōis interdum crimine infimulari, ad Romanos transfugit : magno usui consuli fuit. Ea introductus in curiam cum memorasset, senatus in formulam sociorum eum referri iussit : locum, lautia præberi : agri Tarentini, qui publicus populi Romani esset, ducenta jugera dari, & ædes Tarenti emi : uti ea curaret, C. Decimio prætori mandatum. Censores censum Idibus Decembribus, severius quam ante, habuerunt : multis equi ademti, inter quos P. Rutilio, qui tribunus plebis eos violenter accusarat : tribu quoque is motus, & ærarius factus. Ad opera publica facienda cum eis dimidium ex vectigalibus ejus anni attributum ex senatusconsulto a quæstoribus esset ; Ti. Sempronius ex ea pecunia, quæ ipsi attributa erat, ædes P. Africani pone Veteres ad Vortumni signum, lanienasque & tabernas conjunctas in publicum emit, basilicamque faciendam curavit, quæ postea Sempromia appellata est.

XVII. Jam in exitu annus erat, & propter Macedonici maxime belli curam in sermonibus homines habebant, quos in annum consules ad finiendum tandem id bellum crearent. itaque senatusconsultum factum est, ut Cn. Servilius primo quoque tempore ad comitia habenda veniret. Senatusconsultum Sulpicius prætor ad consulem * post paucos dies recitavit, quibus ante diem ** in urbem venturum. Et consul maturavit, & comitia eo die, qui dictus erat, sunt perfecta. Consules creati L. Æmilius Paullus iterum, septimo decimo anno postquam primo consul fuerat, & C. Licinius Cras-

fus. Prætores postero die facti Cn. Bæbius Tamphilus, L. Anicius Gallus, Cn. Octavius, P. Fontejus Balbus, M. Æbutius Elva, C. Papirius Carbo. Omnia ut maturius agerentur, belli Macedonici stimulabat cura. itaque designatos extemplo fortiri placuit provincias; ut, utri Macedonia consuli, cuique prætori classis venisset, sciretur: ut jam inde cogitarent pararentque, quæ bello usui forent, senatumque consulerent, si qua re consulto opus esset. *Latinas, ubi magistratum inissent, quod per religiones posset, primo quoque tempore fieri placere; neque consulem, cui eundem in Macedoniam esset, teneri.* His decretis, consulibus Italia & Macedonia, prætoribus, præter duas jurisdictiones in urbe, classis, & Hispania, & Sicilia, & Sardinia provinciæ nominatæ sunt. Consul, Emilio Macedonia, Licinio Italia evenit. Prætores, Cn. Bæbius urbanam, L. Anicius peregrinam, & si quo senatus censuisset, Cn. Octavius classem, P. Fontejus Hispaniam, M. Æbutius Siciliam, C. Papirius Sardiniam est fortitus.

XVIII. Extemplo apparuit omnibus, non segnitè id bellum L. Æmilium gesturum; præterquam quod alius vir erat, etiam quod dies noctesque intentus ea sola, quæ ad id bellum pertinerent, animo agitabat. Jam omnium primum a senatu petit, ut legatos in Macedoniam mitterent ad exercitus visendos classemque, & comperta referenda, quid aut terrestribus aut navalibus copiis opus esset: præterea ut explorarent copias regias, quantum possent, quaque provincia nostra, qua hostium fo-

ret : utrum intra saltus castra Romani haberent, an jam omnes angustiae exsuperatae, & in aequa loca pervenissent : qui fideles nobis socii, qui dubii suspensæque ex fortuna fidei, qui certi hostes viderentur : quanti præparati commeatus, & unde terrestri itinere, unde navibus supportarentur : quid ea æstate terra marique rerum gestarum esset : ex his bene cognitis certa in futurum consilia capi possent. Senatus Cn. Servilio consuli negotium dedit, ut is in Macedoniam, quos L. Æmilio videretur, legaret. Legati biduo post profecti, Cn. Domitius Ahenobarbus, A. Licinius Nerva, L. Bæbius. Bis in exitu anni ejus lapidatum esse nuntiatum est ; in Romano agro, simul in Vejentibus. novemdiale sacrum factum est. Sacerdotes eo anno mortui sunt, P. Quinctilius Varus, flamen Martialis ; & M. Claudius Marcellus decemvir : in cujus locum Cn. Octavius successit. Et jam magnificentia crescente notatum est, ludis circensibus P. Cornelii Scipionis Nasicae & P. Lentuli ædilium curulium sexaginta tres Africanas, & quadraginta urfos & elephantos iussisse.

XIX. L. Æmilio Paullo, C. Licinio consulibus, Idibus Martiis principio insequentis anni, cum in expectatione Patres fuissent, maxime quidnam consul de Macedonia ; cujus ea provincia esset, referret ; *nihil se habere*, Paullus, *quod referret, cum nondum legati redissent*, dixit. Ceterum Brundisii legatos jam esse, bis ex cursu Dyrrachium ejectos. Cognitis mox, quæ nosci prius in rem esset, relaturum : id fore intra perpaucos dies. Et, ne quid prosecutionem suam

teneret, pridie Idus Aprilis Latinis esse constitutam diem, Sacrificio rite perfecto, se & Cn. Octavium, simul senatus censuisset, exituros esse. C. Licinio collegæ suo fore curæ, se absente, ut, si qua parari mittive ad id bellum opus sit, parentur mittanturque. Interea legationes exterarum nationum audiri posse. Sacrificio rite perfecto, primi Alexandrini, legati ab Ptolemæo & Cleopatra regibus, vocati sunt. Sordidati, barba & capillo promisso, cum ramis oleæ ingressi curiam, procubuerunt: & oratio, quam habitus, fuit miserabilior. Antiochus Syriæ rex, qui obses Romæ fuerat, per honestam speciem majoris Ptolemæi reducendi in regnum, bellum cum minore fratre ejus, qui tum Alexandriam tenebat, gerens, & ad Pelusium navali proelio victor fuerat, &, tumultuario opere ponte per Nilum facto, transgressus cum exercitu, obsidione ipsam Alexandriam terrebatur: nec procul abesse, quin potiretur regno opulentissimo, videbatur, Ea legati querentes orabant senatum, ut opem regno regibusque amicis imperio ferrent. *Ea merita populi Romani in Antiochum, eam apud omnes reges gentesque auctoritatem esse, ut, si legatos misissent, qui denuntiarent, non placere senatui, sociis regibus bellum fieri, extemplo abscessurus a mœnibus Alexandriæ, abducturusque exercitum in Syriam esset. Quod si cunctentur facere, brevi extorres regno Ptolemæum & Cleopatram Romam venturos, cum pudore quodam populi Romani, quod nullam opem in ultimo discrimine fortunarum tulissent.* Moti Patres precibus Alexandrinorum, extemplo C. Popillium Lænatem, & C. Decimium, & C. Hostilium lega-

tos, ad finiendum inter reges bellum, miserunt. Prius Antiochum, dein Ptolemæum adire iussi, & nuntiare, ni absistatur bello, per utrum stetisset, eum non pro amico, nec pro socio habituros esse.

XX. His intra triduum simul cum legatis Alexandrinis profectis, legati ex Macedonia Quinquatribus ultimis adeo exspectati venerunt, uti, nisi vespere esset, extemplo senatum vocaturi consules fuerint. Postero die senatus fuit, legatique auditi sunt. Ii nuntiant, *Majore periculo, quam emolumento, exercitum per invios saltus in Macedoniam inductum. Pieriam, quo processisset, regem tenere: castra castris prope ita collata esse, ut flumine Enipeo interjecto arceantur, neque regem pugnandi potestatem facere, nec nostris vim ad cogendum esse. Hiemem etiam asperam rebus gerendis intervenisse, in otio militem ali, nec plus quam sex ** frumentum habere. Macedonum dici triginta millia armatorum esse. Si Ap. Claudio circa Lychnidum satis validus exercitus foret, potuisse ancipiti bello distingere regem: nunc & Appium, & quod cum eo praesidii sit, in summo periculo esse, nisi propere aut justus exercitus eo mittatur, aut illi inde deducantur. Ad classem se ex castris profectos, sociorum navalium partem morbo audisse absumentam; partem, maxime qui ex Sicilia fuerint, domos suas abisse, & homines navibus deesse. qui sint, neque stipendium accepisse, neque vestimenta habere. Eumenum classemque ejus, tanquam vento allatas naves, sine causa & venisse, & abisse: nec animum ejus regis constare satis visum. Sicut omnia de Eumene dubia, Attali egregie constantem fidem nuntiabant.*

XXI. Legatis auditis, tunc de bello referre sese L. Æmilius dixit. Senatus decrevit, *ut in octo legiones parem numerum tribunorum consules & populus crearent: creari autem neminem eo anno placere, nisi qui honorem gessisset. Tum ex omnibus tribunis militum uti L. Æmilius in duas legiones in Macedoniam, quos eorum velit, eligat, & ut, sollemni Latinorum perfecto, L. Æmilius consul, Cn. Octavius prætor, cui classis obtigisset, in provinciam profisciscantur.* Additus est his tertius L. Anicius prætor, cujus inter peregrinos jurisdictio erat. eum in provinciam Illyricum circa Lychnidum Ap. Claudio succedere placuit. Delectus cura C. Licinio consuli imposita. is septem millia civium Romanorum & equites ducentos scribere iussus; & sociis nominis Latini septem millia peditum imperare, quadringentos equites; & Cn. Servilio Galliam obtinenti provinciam literas mittere, ut sexcentos equites conscriberet. Hunc exercitum ad collegam primo quoque tempore mittere in Macedoniam iussus. neque in ea provincia plus quam duas legiones esse; eas reple-ri, ut sena millia peditum, trecenos haberent equites. ceteros equites peditesque in præsidiis disponi. qui eorum idonei ad militandum non essent, dimitti. Decem præterea millia peditum imperata sociis, & octingenti equites. Id præsidii additum Anicio, præter duas legiones, quas portare in Macedoniam est iussus, quina millia peditum & du- cenos habentes, trecenos equites: & in classem quinque millia navalium socium sunt scripta. Li- cinius consul duabus legionibus obtinere provin-

ciam iussus: eo addere fociorum decem millia pedatum, & sexcentos equites.

XXII. Senatusconsultis perfectis, L. Æmilius consul e curia in concionem processit, orationemque talem habuit. *Animadvertisse videor, Quirites, majorem mihi, sortito Macedoniam provinciam, gratulationem factam, quam cum aut consul essem consalutatus, aut quo die magistratum inissem: neque id ob aliam causam, quam quia bello in Macedonia, quod diu trahitur, existimastis dignum majestate populi Romani exitum per me imponi posse. Deos quoque huic favisse sorti spero, eosdemque in rebus gerendis affuturos esse. Hæc partim opinari, partim sperare possum. Illud affirmare pro certo habeo audeoque, me omni ope annisurum esse, ne frustra vos hanc spem de me conceperitis. Quæ ad bellum opus sunt, & senatus decrevit, & (quoniam extemplo proficisci placet, neque ego in mora sum) C. Licinius collega, vir egregius, æque enise parabit, ac si ipse id bellum gesturus esset. Vos, quæ scripsero senatui, aut vobis, credite. Rumores credulitate vestra ne alatis, quorum auctor nemo existabit. Nam nunc quidem, quod vulgo fieri, hoc præcipue bello, animadverti, nemo tam famæ contemtor est, cujus non debilitari animus possit. In omnibus circulis, atque etiam (si Diis placet) in conviviiis sunt, qui exercitus in Macedoniam ducant; ubi castra locanda sint, sciant; quæ loca præsidiis occupanda; quando, aut quo saltu intranda Macedonia; ubi horrea ponenda; qua terra, mari subvehantur commeatus; quando cum hoste manus conferendæ, quando quiescendum sit. Nec, quid melius faciendum sit, modo statuunt, sed, quid-*

quid aliter, quam ipsi censuere, factum est, consulem veluti dicta die accusant. Hæc magna impedimenta res gerentibus sunt. nec enim omnes tam firmi & constantis animi contra adversum rumorem esse possunt, quam Fabius fuit: qui suum imperium minui per vanitatem populi maluit, quam secunda fama male rem gerere. Non sum is, qui non existimem admonendos duces esse: immo eum, qui de sua unius sententia omnia gerat, superbum iudico magis, quam sapientem. Quid ergo est? Primum a prudentibus, & proprie rei militaris peritis, & usu, doctis, monendi imperatores sunt: deinde ab his, qui intersunt gerendis * loco, qui hostem, qui temporum opportunitatem vident, qui in eodem velut navigio participes sunt periculi. Itaque si quis est, qui, quod e republica sit, suadere se mihi in eo bello, quod gesturus sum, confidat; ne deneget operam reipublicæ, & in Macedoniam mecum veniat. nave, equo, tabernaculo, viatico etiam a me juvabitur. Si quem id facere piget, & otium urbanum militiæ laboribus præoptat, e terra ne gubernaverit. Sermonum satis ipsa præbet urbs. loquacitatem suam contineat: nos castrensibus consiliis contentos futuros esse sciat. Ab hac concione, Latinis, quæ pridie Kalendas Apriles fuerunt, in monte sacrificio rite perpetrato, protinus inde & consul & prætor Cn. Octavius in Macedoniam profecti sunt. Traditum est memoriæ, majore, quam solita, frequentia prosequentium consulem celebratum; ac prope certa specie ominatos esse homines, finem esse Macedonico bello, maturumque reditum cum egregio triumpho consulis fore.

XXIII. Dum hæc in Italia geruntur, Perseus, quod jam inchoatum perficere, quia impensa pecuniæ facienda erat, non inducebat in animum, ut Gentium Illyriorum regem sibi adjungeret; hoc, postquam intrasse saltum Romanos, & adesse discrimen ultimum belli animadvertit, non ultra differendum ratus; cum per Hippiam legatum trecenta argenti talenta pactus esset, ita ut obsides ultro citroque darentur, Pantauchum misit, ex fidissimis amicis, ad ea perficienda. Medeone La-beatidis terræ Pantauchus regi Illyrio occurrit: ibi & jusjurandum ab rege & obsides accepit. missus & a Gentio est legatus, nomine Olympio, qui jusjurandum a Perseo obsidesque exigeret. Cum eodem ad pecuniam accipiendam missi sunt, &, auctore Pantauchus, qui Rhodum legati cum Macedonibus irent, Parmenio & Morcus destinantur. quibus ita mandatum, uti, jurejurando, obsidibusque, & pecunia accepta, tum demum Rhodum proficiscerentur: *duorum simul regum nomine incitari Rhodios ad bellum Romanum posse. adjunctam civitatem, penes quam unam tum rei navalis gloria esset, nec terra nec mari spem relicturam Romanis.* Venientibus Illyriis Perseus, ab Enipeo amni ex castris cum omni equitatu profectus, ad Dium occurrit. Ibi ea, quæ convenerunt, circumfuso agmine equitum facta; quos adesse foederi sancitæ cum Gentio societatis volebat rex, aliquantum eam rem ratus animorum iis adjecturam. & obsides in conspectu omnium dati, acceptique: &, Pellam ad thesauros regiones missis, qui pecuniam acciperent, qui Rhodum irent cum

Illyriis legatis, Theſſalonicæ conſcendere juſſi. Ibi Metrodorus erat, qui nuper ab Rhodo venerat: auctoribuſque Dinone & Polyarato, principibus civitatis ejus, affirmabat, Rhodios paratos ad bellum eſſe. is princeps junctæ cum Illyriis legationis datus eſt.

XXIV. Eodem tempore ad Eumenem & ad Antiochum communia mandata, quæ ſubjicere conditio rerum poterat. *Natura inimica inter ſe eſſe liberam civitatem & regem. Singulos populum Romanum aggreſſi, & quod indignius ſit, regum viribus reges oppugnare. Attalo adjutore, patrem ſuum oppreſſum. Eumene adjuvante, & quadam ex parte etiam Philippo patre ſuo, Antiochum oppugnatum. in ſe nunc & Eumenem & Prusiæ armatos eſſe. Si Macedoniæ regnum ſublato foret, proximam Aſiam eſſe; quam jam ex parte, ſub ſpecie liberandarum civitatum, ſuam fecerint: deinde Syriam. Jam Prusiæ Eumeni honore præferri, jam Antiochum victorem præmio belli ab Ægypto arceri. Hæc cogitantem providere jubebat, ut aut ad pacem ſecum faciendam compelleret Romanos, aut perſeverantes in bello injuſto communes duceret omnium regum hoſtes. Ad Antiochum aperta mandata erant, ad Eumenem per ſpeciem captivorum redimendorum miſſus legatus erat: verum occultiora quædam agebantur, quæ in præſentia inviſum quidem & ſuſpectum Romanis Eumenem falſis gravioribus **. Proditor enim ac prope hoſtis habitus, dum inter ſe duo reges captantes fraude & avaritia certant. Cydas erat Cretenſis, ex intimis Eumenis: hic prius ad Amphipolim cum Chimaro quo-*

dam populari suo, militante apud Persea, inde postea ad Demetriadem, semel cum Menècrate quodam, iterum cum Antimacho, regiis ducibus, sub ipsis mœnibus urbis collocutus fuerat. Eropon quoque, qui tum missus est, duabus ad eundem Eumenem jam ante legationibus functus erat. Quæ colloquia occulta & legationes infames quidem erant: sed, quid actum esset, quidve inter reges convenisset, ignorabatur. Res autem ita sese habuit.

XXV. Eumenes neque favit victoriæ Persei, neque bello eum invadere animo habuit: non tam quia paternæ inter eos inimiciæ erant, quam ipsorum odiis inter se accensæ. Non ea regum æmulatione, ut æquo animo Persea tantas adipisci opes, tantamque gloriam, quanta Romanis victis eum manebat, Eumenes visurus fuerit. Cernebat & Persea, jam inde ab initio belli, omni modo spem pacis tentasse, & in dies magis, quo propior admoveveretur terror, nihil neque agere aliud, neque cogitare. Romanos quoque, quia traheretur diutius spe ipsorum bellum, & ipsos duces, & senatum, non abhorreere a finiendo tam incommodo ac difficili bello. Hac utriusque partis voluntate explorata, quod fieri etiam sua sponte tædio validioris, metu infirmioris credebat posse, in eo suam operam venditare concilianda gratia magis cupiit. Nam, modo ne juvaret bello Romanos terra marique, modo pacis patrandæ cum Romanis paciscebatur mercedem: ne bello interesset, mille & quingenta talenta. in utroque non fidem modo se, sed obsides quoque, dare paratum esse, ostendebat. Per-

seus ad rem inchoandam promptissimus erat, cogente metu, & de obsidibus accipiendis sine dilatione agebat, conveneratque, ut accepti Cretam mitterentur. Ubi ad pecuniæ mentionem ventum erat, ibi hæsitabat: & utique alteram in tanti nominis regibus turpem ac fordidam, & danti, & magis accipienti, mercedem esse. Malebat in spem Romanæ pacis non recusare impensam, sed eam pecuniam perfecta re daturum; interea Samothracæ in templo depositurum. Ea insula cum ipsius ditioris esset, videre Eumenes nihil interesse, an Pellæ pecunia esset: id agere, ut partem aliquam præsentem ferret. Ita, nequidquam inter se captati, nihil præter infamiam movere.

XXVI. Nec hæc tantum Perseo per avaritiam est, dimissa res, cum pecuniam tutam & pacem habere per Eumenem, quæ vel parte regni redimenda esset, ac receptus protrahere inimicum mercede onustum, & hostes merito ei Romanos posset facere: sed etiam Gentii regis parata societas, & tum Gallorum, effusorum per Illyricum, ingens agmen oblatum avaritia dimissum est. Veniebant decem millia equitum, par numerus peditum, & ipsorum iungentium cursum equis, & invicem prolapsorum equitum vacuos capientium ad pugnam equos. Hi pacti erant, eques denos præsentis aureos, pedes quinos, mille dux eorum. Venientibus his Perseus ab Enipeo ex castris profectus obviam cum dimidia copiarum parte denunciare per vicos urbesque, quæ viæ propinquæ sunt, cœpit, ut commeatus expedirent, frumenti, vini, pecorum ut copia esset. ipse equos,

phalerasque, & sagula, donum principibus ferre, & parum auri, quod inter paucos divideret, multitudinem credens trahi spe posse. Ad Almanam urbem pervenit, & in ripa fluminis Axii posuit castra. circa Desudabam in Mædica exercitus Gallorum confederat, mercedem pactam opperiens. Eo mittit Antigonum, ex purpuratis unum, qui juberet, multitudinem Gallorum ad Bylazora (Pæoniæ is locus est) castra movere, principes ad se venire frequentes. septuaginta quinque millia ab Axio flumine & castris regis aberant. Hæc mandata ad eos cum pertulisset Antigonus, adjecissetque, per viam quanta omnium præparata cura regis copia multitudini foret, quibusque muneribus principes advenientes, vestis, argenti, equorumque excepturus rex esset, de his quidem se coram cognituros respondent. illud, quod præsens pepigissent, interrogant, ecquid aurum, quod in singulos pedites equitesque dividendum esset, secum adduxisset? Cum ad id nihil responderetur, Clondicus regulus eorum, *Abi, renuntia ergo, inquit, regi, nisi aurum obsidesque accepissent, nusquam inde Gallos longius vestigium moturos.* Hæc relata regi cum essent, advocato consilio, cum, quid omnes suafuri essent, appareret, ipse, pecuniæ, quam regni, melior custos, institit de perfidia & feritate Gallorum differere. *Multorum jam ante cladibus expertum, periculosum esse, tantam multitudinem in Macedoniam accipere, ne graviores eos socios habeant, quam hostes Romanos. Quinque millia equitum sat esse, quibus & uti ad bellum possent, & quorum multitudinem ipsi non timeant.*

XXVII. Apparebat in omnibus, mercedem multitudinis timere, nec quidquam aliud: sed, cum suadere consulenti nemo auderet, remittitur Antigonus, qui nuntiaret, quinque millium equitum opera tantum uti regem: contemnere multitudinem aliam. Quod ubi audivere barbari, ceterorum quidem fremitus fuit, indignantium se frustra excitos sedibus suis: Clondicus rursus interrogat, ecquid ipsis quinque millibus, quod convenisset, numeraret? Cum adversus id quoque misceri ambages cerneret, inviolato fallaci nuntio, (quod vix speraverat ipse posse contingere) retro ad Istrum, perpopulati Thraciam, qua vicina erat viæ, redierunt. Quæ manus, quieto sedente rege ad Enipeum, adversus Romanos Perrhæbiæ saltum in Thessaliam traducta, non agros tantum nudare populando potuit, ne quos inde Romani commeatus exspectarent, sed ipsas excindere urbes, tenente ad Enipeum Perseo Romanos, ne urbibus fociis opitulari possent. Ipsis quoque Romanis de se cogitandum fuisset: quando neque manere, amissa Thessalia, unde exercitus alebatur, potuissent, neque progredi, cum ex adverso castra Macedonum *** qui ea pependerant spe, haud mediocriter debilitavit. Eadem avaritia Gentium regem sibi alienavit. nam, cum trecenta talenta Pellæ missis a Gentio numerasset, signare eos pecuniam passus. Inde decem talenta ad Pantauchum missa, eaque præsentia dari regi iussit: reliquam pecuniam, signatam Illyriorum signo, portantibus suis præcipit, parvis itineribus veherent: dein, cum ad

• *T. Livii Vol. VII.* K

finem Macedoniae ventum esset, subsisterent ibi, ac nuntios ab se opperirentur. Gentius, exigua parte pecuniae accepta, cum assidue Pantaucho ad lacestandos hostili facto Romanos stimularetur, M. Perpernam & L. Petillium legatos, qui tum forte ad eum venerant, in custodiam conjecit. Hoc audito, Perseus, contraxisse eum necessitates ratus ad bellum utique cum Romanis, ad revocandum, qui pecuniam portabat, misit: velut nihil aliud agens, quam ut, quanta maxima posset, praeda ex victo Romanis reservaretur. Et ab Eumene Eropon, ignotis, quae occulte acta erant, redit. De captivis actum esse & ipsi evulgaverant, & Eumenes consulem, vitandae suspicionis causa, certiore fecit.

XXVIII. Perseus, post reditum ab Eumene Eroponis spe dejectus, Antenorem & Callippum praefectos classis cum quadraginta lembis (adjectae ad hunc numerum quinque priestes erant) Tenedum mittit; ut inde sparsae per Cycladas insulas naves, Macedoniam cum frumento petentes, tutarentur. Cassandreae deductae naves in portus primum, qui sub Atho monte sunt, inde Tenedum placido mari cum trajecissent, stantes in portu Rhodias apertas naves Eudamumque praefectum earum, inviolatas, atque etiam benigne appellatos dimiserunt. Cognito deinde, in latere altero quinquaginta onerarias suarum, stantibus in ostio portus Eumenis rostratis, quibus Damius praerat, inclusas esse; circumvectis propere, ac submotis terrore hostium navibus, onerarias, datis, qui prosequerentur, decem lembis, in Macedoniam mittunt: ita ut in tutum profecuti redirent.

rent Tenedum. Nono post die ad classem, jam ad Sigeum stantem, redierunt. Inde Subota (insula est interjecta Elææ & Atho) trajiciunt. Forte postero die, quam Subota classis tenuit, quinque & triginta naves, quas hippagogos vocant, ab Elæa profectæ cum equitibus Gallis equisque, Phanas promontorium Chiorum petebant, unde transmittere in Macedoniam possent. Attalo ab Eumene mittebantur. Has naves per altum ferri cum ex specula signum datum Antenori esset, profectus a Subotis, inter Erythrarum promontorium Chiumque, qua arctissimum fretum est, iis occurrit. Nihil minus credere præfecti Eumenis, quam Macedonum classem in illo vagari mari: nunc Romanos esse, nunc Attalum, aut remissos aliquos ab Attalo ex castris Romanis Pergamum petere. Sed cum jam appropinquantium forma lemborum haud dubia esset, & concitatio remorum, directæque in se proræ, hostes appropinquare aperuissent; tunc injecta trepidatio est, cum resistendi spes nulla esset, inhabili-que navium genere, & Gallis vix quietem ferentibus in mari. Pars eorum, qui propiores continenti litóri erant, in Erythræam enarunt: pars, velis datis, ad Chium naves ejecere, relictisque equis, effusa fuga urbem petebant. Sed, propius urbem lembi accessuque commodiore cum exposuissent armatos, partim in via fugientes Gallos adepti Macedones ceciderunt, partim ante portam exclusos. clauferant enim Chii portam, ignari, qui fugerent, aut sequerentur. Ostingenti ferme Gallorum occisi, ducenti vivi capti: equi, pars in mari, fra-

ctis navibus, absumti; partim nervos succiderunt in litore Macedones. viginti eximiæ equos formæ cum captivis eosdem decem lembos, quos ante miserat, Antenor devehere Theſſalonicam juſſit, & primo quoque tempore ad claſſem reverti: Phanis ſe eos exſpectaturum. Triduum ferme claſſis ad urbem ſtetit. Phanas inde progreſſi ſunt, &, ſpecelerius reverſis decem lembis, eveſti Ægæo mari Delum trajecerunt.

XXIX. Dum hæc geruntur, legati Romani, C. Popillius, & C. Decimius, & C. Hoſtilius, a Chalcide profeſti, tribus quinquereſibus Delum cum veniſſent, lembos ibi Macedonum quadraginta, & quinque regis Eumenis quinquereſes invenerunt. Sanctitas templi inſulæque inviolatos præſtabat omnes. Itaque permixti Romanique & Macedones & Eumenis navales focii in templo, inducias religione loci præbente, verſabantur. Antenor, Perſei præfeſtus, cum aliquas alto præferri onerarias naves ex ſpeculis ſignificatum foret, parte lemborum ipſe inſequens, parte per Cycladas diſpoſita, præterquam ſi quæ Macedoniam peterent, omnes aut ſupprimebat, aut ſpoliabat naves. quibus poterat, Popillius aut Eumenis naves ſuccurrebat: ſed veſti nocte binis aut ternis plerumque lembis Macedones fallebant. Per id fere tempus legati Macedones Illyriique ſimul Rhodum venerunt, quibus auctoritatem addidit non lemborum modo adventus, paſſim per Cycladas atque Ægæum vagantium mare, ſed etiam conjunctio ipſa regum Perſei Gentique, & fama cum magno numero peditum equitumque ve-

nientium Gallorum. Et jam cum accessissent animi Dinoni ac Polyarato, qui Persei partium erant, non benigne modo responsum regibus est, sed palam pronuntiatum, *bello finem se auctoritate sua imposituros esse. itaque ipsi quoque reges æquos adhiberent animos ad pacem accipiendam.*

XXX. Jam veris principium erat, novique duces in provinciam venerant; consul Æmilius in Macedoniam, Octavius Oreum ad classem, Anicius in Illyricum, cui bellandum adversus Gentium. Patre Pleurato rege Illyriorum & matre Eurydica genitus fratres duos, Platorem utroque parente, Caravantium matre eadem natum, habuit. Hoc propter ignobilitatem paternam minus suspecto, Platorem occidit & duos amicos ejus, Etritum & Epicadum, impigros viros, quo tutius regnaret. Fama fuit, Honuni Dardanorum principis filiam Etutam pacto fratri eum invidisse, tanquam his nuptiis adjungenti sibi Dardanorum gentem. & similis id vero fecit ducta ea virgo, Platore interfecto. Gravis deinde, demto fratris metu, popularibus esse cœpit: & violentiam insitam ingenio intemperantia vini accendebat. Ceterum, sicut ante dictum est, ad Romanum incitatus bellum, Lissum omnes copias contraxit. quindecim millia armatorum fuerunt. Inde, fratre in Caviorum gentem, vi aut terrore subigendam, cum mille peditibus & quinquaginta equitibus misso, ipse ad Bassaniam urbem quinque millia ab Lisso ducit. Socii erant Romanorum. itaque per missos nuntios prius tentati, obsidionem pati, quam dedere sese, maluerunt. Caravantium in Caviis Dur-

nium oppidum advenientem benigne accepit: Caravantis altera urbs exclusit. &, cum agros eorum effuse vastaret, aliquot palati milites agrestium concursu interfecti sunt. Jam & Ap. Claudius, assumtis ad eum exercitum, quem habebat, Bulinorum, & Apolloniatium, & Dyrrachinorum auxiliis, profectus ex hibernis, circa Genusuum annem castra habebat; audito foedere inter Persea & Gentium, & legatorum violatorum injuria accensus, bellum haud dubie adversus eum gesturus. Anicius prætor, eo tempore Apolloniæ auditis, quæ in Illyrico gererentur, præmissisque ad Appium literis, ut se ad Genusuum opperiretur, triduo & ipse in castra venit: & ad ea, quæ habebat, auxilia assumtis Parthinorum juventutis duobus millibus peditum & equitibus ducentis, (peditibus Epicadus, equitibus Algalsus præerat) parabat ducere in Illyricum, maxime ut Bassanitas solveret obsidione. tenuit impetum ejus fama lemborum vastantium maritimam oram. Octoginta erant lembi, auctore Pantaucho missi a Gentio ad Dyrrachinorum & Apolloniatium agros populandos. Tum classis ad

* * *

to eo tradiderunt se.

XXXI. Deinceps & urbes regionis ejus idem faciebant, adjuvante inclinationem animorum clementia in omnes & justitia prætoris Romani. Ad Scodram inde ventum est, id quod belli caput fuerat; non eo solum, quod Gentius eam sibi ceperat velut regni totius arcem, sed etiam quod La-

beatium gentis munitissima longe est & difficilis aditu. Duo cingunt eam flumina, Clausala latere urbis, quod in orientem patet, præfluens, Barbana ab regione occidentis, ex Labeatide palude oriens. hi duo amnes confluentes incidunt Oriundi flumini; quod, ortum ex monte Scodro, multis & aliis auctum aquis, mari Hadriatico infertur. Mons Scodrus, longe altissimus regionis ejus, ab oriente Dardaniam subjectam habet, a meridie Macedoniam, ab occasu Illyricum. Quanquam munitum situ naturali oppidum erat, gensque id tota Illyriorum & rex ipse tuebatur, tamen prætor Romanus, quia prima successerant prospere, fortunam totius rei principia secuturam esse ratus, & repentinum valiturum terrorem, instructo exercitu ad mœnia succedit. Quod si clausis portis muros portarumque turres, dispositis armatis, defendissent, vano cum incepto mœnibus pepulissent Romanos. nunc, porta egressi, prælium loco æquo majore animo commiserunt, quam sustinuerunt. Pulsi enim & fuga conglobati, cum ducenti amplius in ipsis faucibus portæ cecidissent, tantum intulerunt terrorem, ut oratores extemplo ad prætorem mitteret Gentius Teuticum & Bellum, principes gentis, per quos inducias peteret, ut deliberare de statu rerum suarum posset. Triduo in hoc dato, cum castra Romana quingentos ferme passus ab urbe abessent, navem conscendit, & flumine Barbana navigat in lacum Labeatum, velut secretum locum petens ad consultandum; sed, ut apparuit, falsa spe excitus, Caravantium fratrem,

multis millibus armatorum actis ex ea regione, in quam missus erat, adventare. qui postquam evanuit rumor, tertio post die navem eandem secundo amni Scodram demisit: præmissisque nuntiis, ut sibi appellandi prætoris potestas fieret, copia facta, in castra venit. Et principium orationis ab accusatione stultitiæ orsus suæ, postremo ad preces lacrimasque effusus, genibus prætoris accidens, in potestatem sese dedit. Primo, bonum animum habere iussus, ad cœnam etiam invitatus, in urbem ad suos rediit, & cum prætore eo die honorifice est epulatus: deinde in custodiam C. Cassio tribuno militum traditus, vix gladiatorio accepto decem talentis ab rege rex, ut in eam fortunam recideret.

XXXII. Anicius, Scodra recepta, nihil prius quam requisitos Petillium Perpernamque legatos ad se duci, iussit. quibus splendore suo restituto, Perpernam extemplo mittit ad comprehendendos amicos cognatosque regis: qui, Medeonem, Labeatium gentis urbem, profectus, Etlevam uxorem cum filiis duobus, Scerdilædo Pleuratoque, & Caravantium fratrem Scodram in castra adduxit. Anicius, bello Illyrio intra triginta dies perfecto, nuntium victoriæ Perpernam Romam misit: & post dies paucos Gentium regem ipsum cum parente, conjuge, ac liberis, ac fratre, aliisque principibus Illyriorum. Hoc unum bellum prius perpetratum, quam cœptum, Romæ auditum est. Quibus diebus hæc agebantur, Perseus quoque in magno terrore erat, propter adventum simul Æmilii novi consulis, quem

cum ingentibus minis adventare audiebat, simul Octavii prætoris. Nec minus terroris a classe Romana & periculo maritimæ oræ habebat. Thessalonica Eumenès & Athenagoras præerant cum parvo præsidio duorum millium cetratorum. Eo & Androcleum præfectum mittit, jussum sub ipsis navali-
bus castra habere. Æniam mille equites cum Antigono misit ad tutandam maritimam oram: ut, quocunque litore applicuissent naves hostium audis-
sent, extemplo ferrent agrestibus opem. quinque millia Macedonum missa ad præsidium Pythii & Petræ, quibus præpositi erant Histiaeus, & Theogenes, & Milo. His profectis, ripam munire Enipei fluminis aggressus est, quia sicco alveo transiri poterat. Huic ut omnis multitudo vacaret, femina, ex propinquis urbibus coactæ, cibaria in castra afferebant: miles jussus ex propinquis silvis

* * *

XXXIII * * *. postremo sequi se utrarios ad mare, quod minus trecentos passus aberat, jussit, & in litore alios alibi modicis intervallis fodere. montes ingentis altitudinis spem faciebant, eo magis quia nullos apertos evergerent rivos, occultos continere latices, quorum venæ in mare permanentes undæ miscerentur. Vix deducta summa arena erat, cum scaturigines turbidæ primo & tenues emicare, dein liquidam multamque fundere aquam, velut Deum dono, coeperunt. Aliquantum ea quoque res duci famæ & auctoritatis apud milites adjecit. Jussis deinde militibus expedire arma, ipse

cum tribunis primisque ordinibus vadit ad contenti-
plandos transitus, qua descensus facilis armatis, qua
in ulteriorem ripam minime iniquus ascensus esset.
His satis exploratis, illa quoque primum, ut ordi-
ne ac sine tumultu omnia in agmine ad nutum im-
periumque ducis fierent, providit. Ubi omnibus
simul pronuntiaretur, quod fieret, neque omnes
exaudirent; incerto imperio accepto, alios ab se
adjicientes, plus eo, quod imperatum sit, alios mi-
nus facere. clamores deinde dissonos oriri omni-
bus locis, & prius hostes, quam ipsos, quid pare-
tur, scire. Placere igitur, tribunum militum primo
pilo legionis secretum edere imperium: illum, &
dein singulos, proximo cuique in ordine centu-
rioni dicere, quid opus facto sit; sive a primis si-
gnis ad novissimum agmen, sive ab extremis ad pri-
mos perferendum imperium sit. Vigiles etiam novo
more scutum in vigiliam ferre vetuit: non enim in
pugnam vigilem ire, ut armis utatur, sed ad vigi-
landum, ut, cum senserit hostium adventum, re-
cipiat se, excitetque ad arma alios. Scuto præ se
erecto stare galeatos: deinde ubi fessi sint, innisos
pilo, capite super marginem scuti posito, sopitos
stare: ut fulgentibus armis procul conspici ab ho-
ste possint, ipsi nihil provideant. Stationum quo-
que morem mutavit. armati omnes, & frenatis
equis equites, diem totum perstabant. id cum æsti-
vis diebus, urente assiduo sole, fieret, tot hora-
rum æstu & languore ipsos equosque fessos inte-
gri sæpe adorti hostes, vel pauci plures vexabant.
itaque ex matutina statione ad meridiem decedi, &

in postmeridianam succedere alios iussit: ita nunquam fatigatos recens hostis aggredi poterat.

XXXIV. Hæc cum ita fieri placere, concione advocata, pronuntiasset, adjecit urbanæ concioni convenientem orationem. *Unum imperatorem in exercitu providere & consulere, quid agendum sit, debere, nunc per se, nunc cum iis, quos advocaverit in consilium. qui non sint advocati, eos nec palam, nec secreto jactare consilia sua. Militem hæc tria curare debere, corpus ut quam validissimum & perniciosissimum habeat, arma apta, cibum paratum ad subita imperia: cetera scire de se Diis immortalibus & imperatori suo curæ esse. in quo exercitu milites, consul, & imperator rumoribus vulgi circumagatur, ibi nihil salutare esse. Se, quod sit officium imperatoris, provisurum, ut bene gerendæ rei occasionem eis præbeat. illos nihil, quod futurum sit, querere: ubi datum signum sit, tum militarem operam navare.* Ab his præceptis concionem dimisit; vulgo etiam veteranis fatentibus, se illo primum die, tanquam tirones, quid agendum esset in re militari, didicisse. Non sermonibus tantum his, cum quanto assensu audissent verba consulis, ostenderunt; sed rerum præfens effectus erat. Neminem totis mox castris quietum videres: acuere alii gladios: alii galeas buculasque, scuta alii loricasque tergere: alii aptare corpori arma, experiri que sub his membrorum agilitatem: quater alii pila, alii micare gladiis, mucronemque intueri: ut facile quis cerneret, ubi primum conferendi manum cum hoste data occasio esset, aut victoria egregia, aut morte memora-

bili inituros bellum. Perseus quoque cum, adventu consulis simul & veris principio, strepere omnia moverique apud hostes, velut novo bello, cerneret, mota a Phila castra in adversa ripa posita, nunc ad contemplanda opera sua circumire ducem, haud dubie transitus speculantem,

* * *

norum esse.

XXXV. Quæ res Romanis auxit animos, Macedonibus regique eorum haud mediocrem attulit terrorem. Et primo suppressere in occulto famam ejus rei est conatus, missis, qui Pantauchum inde venientem appropinquare castris vetarent. sed jam & pueri quidam visi ab suis erant inter obsides Illyrios ducti: &, quo quæque accuratius curantur, eo facilius loquacitate regionum ministrorum emanant. Sub idem tempus Rhodii legati in castra venerunt cum iisdem de pace mandatis, quæ Romæ ingentem iram Patrum excitavere. Multo iniquioribus animis a castrensi consilio auditi sunt. Itaque cum alii præcipites sine responso * agendos castris, pronuntiavit, post diem quintumdecimum se responsum daturum. Interim, ut appareret, quantum pacificantium Rhodiorum auctoritas valuisset, consultare de ratione belli gerendi cœpit. Placebat quibusdam, & maxime majoribus natu, per Enipei ripam munitionesque vim facere: *confertis & vim facientibus resistere Macedonas non posse: ex tot castellis aliquanto altioribus ac munitioribus, quæ validis præsidiis insedissent, priore anno dejectos, aliis*

placebat, Octavium cum classe Theſſalonicam petere, & populatione maritimæ oræ diſtringere copias regias: ut, altero ab tergo ſe oſtendente bello, circumactus ad interiorem partem regni tuendam, nudare aliqua parte tranſitus Enipei cogeretur. Ipſi natura & operibus inexsuperabilis ripa videbatur: &, præterquam quod tormenta ubique diſpoſita eſſent, miſſilibus etiam melius & certiore ictu hoſtes uti audierat. Alio ſpectabat mens tota ducis: diſmiſſoque conſilio Perrhæbos mercatores, Schœnum & Menophilum, notæ & fidei jam ſibi & prudentiæ homines, arceſſitos ſecreto percontatur, qualis ad Perrhæbiam tranſitus ſit. Cum loca non iniqua eſſe dicerent, præſidiis autem regis obſideri, ſpem cepit, ſi nocte improviſo valida manu aggreſſus necopinantes eſſet, dejici præſidia poſſe. *Ja- cula enim & ſagittas & cetera miſſilia in tenebris, ubi, quid petatur, procul provideri nequeat, inutilia eſſe. gladio cominus geri rem in permixta turba, quo miles Romanus vincat.* His ducibus uſurus, prætorem Octavium arceſſitum, expoſito, quid pararet, Heraclæum cum claſſe petere jubet, & mille hominibus decem dierum cocta cibaria habere. Ipſe P. Scipionem Naſicam, Q. Fabium Maximum filium ſuum cum quinque delectis millibus Heracleum mittit, velut claſſem conſenſuros, ad maritimam oram interioris Macedoniæ, quod in conſilio agitatum erat, vaſtandam. Secreto indicatum, cibaria his præparata ad claſſem eſſe, ne quid eos moraretur. Inde juſſi duces itineris ita dividere viam, ut quarta vigilia tertio die Pythium adoriri poſſent. Ipſe poſte-

ro die, ut distineret regem ab circumspectu rerum aliarum, prima luce medio in alveo cum stationibus hostium proelium commisit. pugnatumque utrinque est levi armatura: nec gravioribus armis in tam inæquali alveo pugnari poterat. Descensus ripæ utriusque in alveum trecentorum ferme passuum erat: medium spatium torrentis, alibi aliter cavati, paulo plus quam mille passus patebat. Ibi in medio, spectantibus utrinque ex vallo castrorum hinc rege, hinc consule cum suis legionibus, pugnatum est. Missilibus procul regia auxilia melius pugnabant, cominus stabilius & tutius, aut parma, aut scuto Ligustino, Romanus erat. Meridie fere receptui cani suis consul jussit. ita eo die diremtum proelium est, haud paucis utrinque interfectis. Sole orto postero die, irritatis certamine animis, etiam acrius concursus est: sed Romani, non ab his tantum, cum quibus contractum certamen erat, sed multo magis ab ea multitudine, quæ disposita in turribus stabat, omni genere missilium telorum ac faxis maxime vulnerabantur. Ubi propius ripam hostium subissent, tormentis missa etiam ad ultimos perveniebant. Multo pluribus eo die amissis, consul paulo serius recepit suos. Tertio die proelio abstinuit, degressus ad imam partem castrorum, veluti per devexum in mare brachium transitum tentaturus. Perseus, quod in oculis erat,

* * *

XXXVI. *** anni post circumactum solstitium erat: hora diei jam ad meridiem vergebat: iter

multo pulvere & incalescente sole factum erat. lassitudo & sitis jam sentiebatur, &, meridie instante, magis accessurum utrumque apparebat. Statuit sic affectos recenti atque integro hosti non objicere. Sed tantus ardor in animis ad dimicandum utrinque erat, ut consuli non minore arte ad suos eludendos, quam ad hostes, opus esset. Nondum omnibus instructis, instabat tribunis militum, ut maturarent instruere: circumibat ipse ordines, animos militum hortando in pugnam accendebat. Ibi primo alacres signum poscebant. deinde, quantum increveret æstus, & vultus minus vigentes & voces segniores erant, & quidam incumbentes scutis, nisque pilis stabant. Tum jam aperte primis ordinibus imperat, metarentur frontem castrorum, & impedimenta constituerent. Quod ubi fieri milites sensere, alii gaudere palam, quod fessos viæ labore flagrantissimo æstu non coegisset pugnare. legati circa imperatorem ducesque externi erant, inter quos & Attalus, omnes approbantes, cum pugnaturum consulem credebant: neque enim ne his cunctationem aperuerat suam. tunc mutatione consilii subita cum alii filerent, Nasica unus ex omnibus ausus est monere consulem, *Ne hostem quidem ludificatos priores imperatores, fugiendo certamen, manibus emittere. Veneri, ne nocte abeat, sequendus maximo labore ac periculo in intima Macedoniæ; exercitusque, sicut prioribus ducibus, per calles saltusque Macedonicorum montium vagando circumagatur. Se magnopere suadere, dum in campo patenti hostem habeat, aggrediatur, nec oblatam occasionem vincendi amittat.* Consul, nihil

offensus libera admonitione tam clari adolescentis, *Et ego,, inquit, animum istum habui, Nasica, quem tu nunc habes: &, quem ego nunc habeo, tu habebis. Multis belli casibus didici, quando pugnandum, quando abstinendum pugna sit. Non operæ sit stanti nunc in acie docere, quibus de causis hodie quiesse melius sit. rationes alias reposcito: nunc auctoritate veteris imperatoris contentus eris.* Conticuit adolescens; haud dubie videre aliqua impedimenta pugnae consulem, quæ sibi non apparerent.

XXXVII. Paullus, postquam metata castra impedimentaue collocata animadvertit, ex postrema acie triarios primos subducit: deinde principes, stantibus in prima acie hastatis, si quid hostis moveret: postremo hastatos, ab dextro primum cornu singulorum paulatim signorum milites subtrahens. Ita pedites, equitibus cum levi armatura ante aciem hosti oppositis, sine tumultu abducti: nec ante, quam prima frons valli ac fossa perducta est, ex statione equites revocati sunt. Rex quoque, cum sine detrectatione paratus pugnare eo die fuisset, contentus, quod per hostem moram fuisse pugnae scirent, & ipse in castra copias reduxit. Castris permunitis, C. Sulpicius Gallus tribunus militum secundæ legionis, qui prætor superiore anno fuerat, consulis permissu ad concionem militibus vocatis pronuntiavit, *nocte proxima, ne quis id pro portento acciperet, ab hora secunda usque ad quartam horam noctis lunam defecturam esse. Id, quia naturali ordine statis temporibus fiat, & sciri ante & prædici posse. Itaque quemadmodum, quia certi solis lunæque & ortus*

& occasus sint, nunc pleno orbe, nunc senescentē exiguo cornu fulgere lunam non mirarentur; ita ne obscurari quidem, cum condatur umbra terræ, trahere in prodigium debere. Nocte, quam pridie Nonas Septembres infecuta est dies, edita hora luna cum defecisset, Romanis militibus Galli sapientia prope divina videri; Macedonas, ut triste prodigium, occasum regni perniciemque gentis portendens, movit: nec aliter vates. clamor ululatusque in castris Macedonum fuit, donec luna in suam lucem emerfit. Postero die tantus utrique ardor exercitui ad concurrendum fuerat, ut & regem & consulem suorum quidam, quod sine proelio discessum esset, accusarent. Regi prompta defensio erat, non eo solum, quod hostis prior, aperte pugnam detrectans, in castra copias reduxisset; sed etiam, quod eo loco signa constituisset, quo phalanx, quam inutilem vel mediocris iniquitas loci efficeret, promoveri non posset. Consul ad id, quod pridie prætermisisset pugnandi occasionem videbatur, & locum dedisse hosti, si nocte abire vellet, tunc quoque per speciem immolandi terere videbatur tempus, cum luce prima signum propositum pugnae ad exeundum in aciem fuisset. Tertia demum hora, sacrificio rite perpetrato, ad consilium vocavit; atque ibi, quod rei gerendæ tempus esset, loquendo & intempestive consultando videbatur quibusdam extrahere. post sermones tamen consul orationem habuit.

XXXVIII. *P. Nasica, egregius adolescens, ex omnibus unus, quibus hesterno die pugnari placuit, denu-*
davit mihi suum consilium: idem postea, ita ut trans-

isse in sententiam meam videri posset, tacuit. Quibusdam aliis absentem carpere imperatorem, quam presentem monere, melius visum est. Et tibi, P. Nasica, & quincunque idem, quod tu, occultius senserunt, non gravabor reddere dilatæ pugnæ rationem. Nam tantum abest, ut me hesternæ quietis pœniteat, ut servatum a me exercitum eo consilio credam. in qua me opinione esse ne quis sine causa vestrum credat, recognoscat, agendum, mecum, si videtur, quam multa pro hoste & adversus nos fuerint. Jam omnium primum, quantum numero nos præsent, neminem vestrum nec ante ignorasse, & hesternò die implicatam intuentes aciem animadvertisse, certum habeo. Ex hac nostra paucitate quarta pars militum præsidio impedimentiis relicta erat: nec ignavissimum quemque relinqui ad custodiam sarcinarum scitis. Sed fuerimus omnes. parvum hoc tandem esse credimus, quod ex his castris, in quibus hac nocte mansimus, exituri in aciem hodierno aut summum crastino die, si ita videbitur, Diis bene juvantibus, sumus? Nihilne interest, utrum militem, quem neque viæ labor hodie, neque operis fatigaverit, requietum, integrum in tentorio suo arma capere jubeas, atque in aciem plenum virium, vigentem & corpore & animo educas? an longo itinere fatigatum, & onere fessum, madentem sudore, ardentibus siti faucibus, ore atque oculis repletis pulvere, torrentem meridiano sole, hosti objicias recenti, quieto, qui nulla re ante consumtas vires ad prælium afferat? Quis, pro Deum fidem! ita comparatus, vel iners atque imbellis, fortissimum virum non vicerit? Quid? quod hostes per summum otium instruxerant aciem, reparaverant animos, stabant com-

positi suis quisque ordinibus? nobis tunc repente trepidandum in acie instruenda erat, & incompeditis concurrendum?

XXXIX. At, Hercule, aciem quidem inconditam inordinatamque habuissimus: castra munita, provisam aquationem, tutum ad eam iter praesidiis impositis, explorata circa omnia; an nihil nostri habentes praeter nudum campum, in quo pugnaremus? Majores vestri castra munita portum ad omnes casus exercitus ducebant esse: unde ad pugnam exirent, quo jactati tempestate pugnae receptum haberent. ideo, cum munimentis ea sepissent, praesidio quoque valido firmabant; quod, qui castris exutus erat, etiam si pugnando acie vicisset, pro victo haberetur. castra sunt victori receptaculum, victo perfugium. Quam multi exercitus, quibus minus prospera pugnae fortuna fuit, intra vallum compulsi, tempore suo, interdum momento post, eruptione facta, victorem hostem pepulerunt? patria altera est militaris haec sedes, vallumque pro mœnibus, & tentorium suum cuique militi domus ac penates sunt. Sine ulla seie vagi dimicassimus, ut quo victores nos reciperemus? His difficultatibus & impedimentis pugnae illud opponitur: Quid si hostis hac interposita nocte abisset, quantum rursus sequendo eo penitus in ultimam Macedoniam exhaustiendum laboris erat? Ego autem, neque mansurum eum, neque in aciem copias educiturum fuisse, certum habeo, si cedere hinc statuisset. quanto enim facilius abire fuit, cum procul abessemus, quam nunc, cum in cervicibus sumus? Nec falleret nos, nec interdum nec nocte abeundo. Quid autem est nobis optatius, quam ut, quorum castra, praeterea fluminis ripa tuta, vallo

insuper septa ac crebris turribus, oppugnare adorti sumus, eos, relictiis munimentis, agmine effuso abeuntes, in patentibus campis ab tergo adoriamur? Hæ dilatæ pugnae ex hesterno die in hodiernum causæ fuerunt. Pugnare enim & ipsi mihi placet; & ideo, quia per Enipeum amnem septa ad hostem via erat, alio saltu, dejectis hostium præsiidiis, novum iter aperui; neque prius, quam debellavero, abssistam.

XL. Post hanc orationem silentium fuit, partim traductis in sententiam ejus, partim verentibus nequidquam offendere in eo, quod, utcunque prætermissum, revocari non posset. Ac ne illo ipso quidem die, aut consule, aut rege, (rege, quod nec fessos, ut pridie, ex via, neque trepidantes in acie instruenda & vixdum compositos aggressurus erat; consule, quod in novis castris non ligna, non pabulum convectum erat, ad quæ petenda ex propinquis agris magna pars militum e castris exierat) neutro imperatorum volente, **F**ortuna, quæ plus consiliis humanis pollet, contraxit certamen. Flumen erat haud magnum propius hostium castris, ex quo & Macedones & Romani aquabantur, præsiidiis ex utraque ripa positis, ut id facere tuto possent. Duæ cohortes a parte Romanorum erant, Marrucina & Peligna; duæ turmae Samnitium equitum, quibus præerat M. Sergius Silus legatus: & aliud pro castris stativum erat præsidium sub C. Cluvio legato, tres cohortes, Firmana, Vestina, Cremonensis; duæ turmae equitum, Placentina & Æternina. Cum otium ad flumen esset, neutris lacerantibus, hora circiter quarta jumentum, e mani-

bus curantium elapsum, in ulteriorem ripam effugit. quod cum per aquam, ferme genu tenus altam, tres milites sequerentur, Thraces duo id jumentum ex medio alveo in suam ripam trahentes; altero eorum occiso, receptoque eo jumento, ad stationem suorum se recipiebant. Octingentorum Thracum præsidium in hostium ripa erat. ex his pauci primo, ægre passi popularem in suo conspectu cæsum, ad persequendos interfectores fluvium transgressi sunt: dein plures, postremo omnes, & cum præsidio,

proelium ducit.

XLI. Movebat imperii majestas, gloria viri, ante omnia ætas, quod major sexaginta annis juvenum munia in parte præcipua laboris periculique capebat. Intervallum, quod inter cetratos & phalanges erat, implevit legio, atque aciem hostium interrupit. A tergo cetratis erat, frontem adversus clypeatos habebat: aglaspides appellabantur. Secundam legionem L. Albinus consularis ducere adversus leucaspidem phalangem iussus: ea media acies hostium fuit. In dextrum cornu, unde circa fluvium commissum proelium erat, elephantes inducti, & ala sociorum: & hinc primum fuga Macedonum est orta. Nam sicut pleraque nova commenta mortaliū in verbis vim habent, experiendo, cum agi, non, quemadmodum agantur, edisseri, oportet, sine ullo effectu evanescunt; ita tum elephanti in acie nomen tantum sine usu fuerunt. Elephantorum impetum subsecuti sunt socii nominis Latini,

pepuleruntque lævum cornu. In medio secunda legio immissa dissipavit phalangem. neque ulla evidentior causa victoriæ fuit, quam quod multa passim proelia erant, quæ fluctuantem turbarunt primo, deinde disjecerunt phalangem: cujus confertæ & intentis horrentis hastis intolerabiles vires sunt. Si carptim aggrediendo circumagere immobilem longitudine & gravitate hastam cogas, confusa strue implicantur: si vero aut ab latere, aut ab tergo aliquid tumultus increpuit, ruinæ modo turbantur. sicut tum adversus catervatim incurrentes Romanos, & interrupta multifariam acie, obviam ire cogebantur: & Romani, quacunque data intervalla essent, insinuabant ordines suos. Qui, si universa acie in frontem adversus instructam phalangem concurrissent, quod Pelignis, principio pugna incaute congressis adversus cetratos, evenit, induissent se hastis, nec confertam aciem sustinuissent.

XLII. Ceterum sicut peditum passim cædes fiebant, nisi qui abjectis armis fugerunt; sic equitatus prope integer pugna excessit. Princeps fugæ rex ipse erat. jam a Pydna cum sacris alis equitum Peliam petebat: confestim Costocus sequebatur Odrysarumque equitatus. ceteræ quoque Macedonum alæ integris abibant ordinibus; quia interjecta peditum acies, cujus cædes victores tenebat, immemores fecerat sequendi equites. Diu phalanx a fronte, a lateribus, ab tergo cæsa est: postremo, qui ex hostium manibus elapsi erant, inermes ad mare fugientes, quidam aquam etiam ingressi, manus ad eos, qui in classe erant, tendentes, suppliciter vi-

tam orabant : & cum scaphas concurrere undique ab navibus cernerent, ad excipiendos sese venire rati, ut caperent potius, quam occiderent, longius in aquam, quidam etiam natantes, progressi sunt. Sed cum hostiliter e scaphis cæderentur, retro, qui poterant, nando repetentes terram, in aliam fœdiorem pestem incidebant. elephanti enim, ab rectoribus ad litus acti, exeuntes obterebant elidebantque. Facile conveniebat, Romanis nunquam una acie tantum Macedonum interfectum. Cæsa enim ad viginti millia hominum sunt : ad sex millia, qui Pydnam ex acie perfugerant, vivi in potestatem pervenerunt : & vagi e fuga quinque millia hominum capta. Ex victoribus ceciderunt non plus centum, & eorum multo major pars Peligni. vulnerati aliquanto plures sunt. Quod si maturius pugnari coeptum esset, ut satis diei victoribus ad persequendum superesset, deletæ omnes copiæ forent : nunc imminens nox & fugientes texit, & Romanis pigritiem ad sequendum locis ignotis fecit.

XLIII. Perseus ad Pieriam silvam via militari, frequenti agmine equitum & regio comitatu, fugit. Simul in silvam ventum est, ubi plures diversæ semitæ erant, & nox appropinquabat; cum perpauca maxime fidis via divertit. Equites, sine duce relictæ, alii alia in civitates suas dilapsi sunt : perpauci inde Pellam celerius, quam ipse Perseus, quia recta expedita via ierant, pervenerunt. Rex ad mediam ferme noctem terrore & variis difficultatibus viæ vexatus est. In regia Perseo, qui Pellæ præerat, Euctus regique pueri præsto erant. contra ea ami-

corum, qui, alii alio casu fervati, ex prælio Pellam venerant, cum sæpe arcessiti essent, nemo ad eum venit. tres erant tantum cum eo fugæ comites, Evander Cretensis, Neo Bœotius, & Archidamus Ætolus. cum iis, jam metuens, ne, qui venire ad se abnuerent, majus aliquid mox auderent, quarta vigilia profugit. Secuti eum sunt admodum quingenti Cretenses. petebat Amphipolim: sed nocte a Pella exierat, properans ante lucem Axiū amnem trajicere, eum finem sequendi, propter difficultatem transitus, fore ratus Romanis.

XLIV. Consulem, cum se in castra victor recepisset, ne sincero gaudio frueretur, cura de minore filio stimulabat. P. Scipio is erat, Africanus & ipse postea, deleta Carthagine, appellatus, naturalis consulis Paulli, adoptione Africani nepos. Is, septimumdecimum tunc annum agens, quod ipsum curam augebat, dum effuse sequitur hostes, in partem aliam turba ablatu erat: &, serius cum redisset, tunc demum, recepto sospite filio, victoriæ tantæ gaudium consul sensit. Amphipolim cum jam fama pugnae pervenisset, concursusque matronarum in templum Dianæ, quam Tauropolon vocant, ad opem exposcendam fieret; Diodorus, qui præerat urbi, metuens, ne Thraces, quorum duo millia in præsidio erant, urbem in tumultu diriperent, ab subornato ab se per fallaciam in tabellarii speciem literas in foro medio accepit. Scriptum in iis erat, *ad Emathiam classē Romanam apput-
sam esse, agrosque circa vexari. orare præfēlos Ema-
thiæ, ut præsidium adversus populos mittat.* His

lectis, hortatur Thracas, *ut ad tuendam Emathie oram profiscantur. magnam eos cædem prædamque, palatis passim per agros Romanis, facturos. Simul elevat famam adversæ pugnæ: quæ si vera foret, alium super alium recentes ex fuga venturos fuisse.* Per hanc causam Thracibus ablegatis, simul transgressos eos Strymonem vidit, portas clausit.

XLV. Tertio die Perseus, quam pugnatum erat, Amphipolim venit. inde oratores cum caduceo ad Paullum misit. Interim Hippias, & Milo, & Pantauchus, principes amicorum regis, Berœam, quo ex acie confugerant, ipsi ad consulem profecti, Romanis dedunt: hoc idem & aliæ deinceps metu percussæ parabant facere. Consul, nuntiis victoriæ Q. Fabio filio & L. Lentulo & Q. Metello cum literis Romam missis, spolia jacentis hostium exercitus peditibus concessit; equitibus prædam circumjecti agri, dum ne amplius duabus noctibus a castris abessent. Ipse propius mare ad Pydnam castra movit. Berœa primum, deinde Thessalonica, & Pella, & deinceps omnis ferme Macedonia intra biduum dedita. Pydnæi, qui proximi erant, nondum miserant legatos: multitudo incondita plurium simul gentium, turbaque, quæ ex acie fuga in unum compulsæ erat, consilium & consensum civitatis impediēbat: nec clausæ modo portæ, sed etiam inædificatæ erant. Missi Milo & Pantauchus sub muros ad colloquium Solonis, qui præsidio erat: per eum emittitur militaris turba. oppidum deditum militibus datur diripiendum. Perseus, una tantum spe Bisaltarum auxilii tentata, ad quos nequidquam mi-

ferat legatos, in concionem processit, Philippum secum filium habens : ut & ipsos Amphipolitanos, & equitum peditumque, qui aut semper secuti, aut fuga eodem delati erant, adhortando animos confirmaret. Sed aliquoties dicere incipientem cum lacrimæ præpedissent ; quia ipse dicere nequii, Evandro Cretenſi editis, quæ agi cum multitudine vellet, de templo descendit. Multitudo, sicut ad conspectum regis fletumque tam miserabilem & ipsa ingemuerat lacrimaveratque, ita Evandri orationem aspernabatur : & quidam ausi sunt media ex concione succlamare, *Abite hinc, ne, qui pauci sumus, propter vos pereamus.* Horum ferocia vocem Evandri clausit. Rex in domum se recepit, pecuniaque & auro argentoque in lembos, qui in Strymone stabant, delatis, & ipse ad flumen descendit. Thraces, navibus se committere non ausi, domos dilapsi, & aliæ militaris generis turbæ : Cretenſes spem pecuniæ secuti. &, quoniam in dividendo plus offensionum, quam gratiæ, erat, quinquaginta talenta iis posita sunt in ripa diripienda. Ab hac direptione cum per tumultum naves conscenderent, lembum unum in ostio annis multitudine gravatum merferunt. Galepsum eo die, postero Samothracam, quam petebant, perveniunt : ad duo millia talentum pervecta eo dicuntur.

XLVI. Paullus, per omnes deditas civitates dimissis, qui præessent, ne qua injuria in nova pace victis fieret, retentisque apud se cauteatoribus re-

gis, P. Nasicam, ignarus fugæ regis, Amphipolim misit cum modica peditum equitumque manu: simul ut Sinticen evastaret, & ad omnes conatus regis impedimento esset. Inter hæc Melibœa a Cn. Octavio capitur diripiturque: ad Æginium, ad quod oppugnandum Cn. Anicius legatus missus erat, ducenti, eruptione ex oppido facta, amissi sunt, ignaris Æginiensibus debellatum esse. Consul, a Pydna profectus, cum toto exercitu die altero Pellam pervenit: &, cum castra mille passus inde posuisset, per aliquot dies ibi stativa habuit, situm urbis undique aspiciens; quam non sine causa delectam esse regiam advertit. Sita est in tumulo, vergente in occidentem hibernum. cingunt paludes inextinguibilis altitudinis æstate & hieme, quas restagnantes faciunt lacus. In ipsa palude, qua proxima urbi est, velut insula eminet, aggeri operis ingentis imposita: qui & murum sustineat, & humore circumfusæ paludis nihil lædatur. Muro urbis conjuncta procul videtur. divisa est intermurali amni, & eadem ponte juncta: ut nec, oppugnante externo, aditum ab ulla parte habeat; nec, si quem ibi rex includat, ullum nisi per facillimæ custodiæ pontem effugium. Et gaza regia in eo loco erat: sed tum nihil præter trecenta talenta, quæ missa Gentio regi, deinde retenta fuerant, inventum est. Per quos dies ad Pellam stativa fuerunt, legationes frequentes, quæ ad gratulandum conveniant, maxime ex Thessalia, auditæ sunt. Nuntio

deinde accepto, Persea Samothracam trajecisse;
profectus a Pella consul quartis castris Amphipo-
lim pervenit. Effusa omnis obviam turba cuius in-
dicio erat, non bono ac justo rege orba

*

*

*



TITI LIVII PATAVINI HISTORIARUM

AB URBE CONDITA

LIBER XLV.

EPITOME

LIBRI QUADRAGESIMI QUINTI.

Perseus ab Æmilio Paulo in Samothrace captus est. Cum Antiochus, Syriæ rex, Ptolemæum & Cleopatram, Ægypti reges obsideret, & missis ad eum a senatu legatis, qui juberent, ab obsidione focii regis absteret, editisque mandatis consideraturum se ille, quid faciendum esset, respondisset; unus ex legatis Popillius virga regem circumscripsit: jussitque, antequam circulo excederet, responsum daret. qua asperitate effecit, ut Antiochus bellum omitteret. Legationes gratulantium populorum ac regum in senatum admissæ. Rhodiorum, quia eo bello contra populum Romanum fuerant, exclusa. postero die, cum de eo quæreretur, ut iis bellum indiceretur, causam in senatu patriæ suæ legati egerunt. nec tanquam hostes, nec tanquam focii dimissi. Macedonia in provinciæ formam redacta est. Æmilius Paullus, repugnantibus militibus ejus propter minorem prædam, & contradicente Ser. Sulpicio

Galba, triumphavit: & Persen cum tribus filiis ante cur-
rum duxit. ejus triumphi lætitia ne solida ei continge-
ret, duorum filiorum funeribus insignita est: quorum al-
terius mors patris triumphum præcessit, alterius secuta
est. Lustrum conditum est a censoribus. Censa sunt civium
capita trecenta duodecim millia, octingenta quinque.
Prusias, Bithyniæ rex, Romam, ut senatui gratularetur
ob victoriam ex Macedonia partam, venit; & Nicome-
dem filium senatui commendavit. Rex, plenus adulatio-
nis, libertum se populi Romani dicebat.

I. **V**ICTORIÆ nuntii, Q. Fabius & L. Lentulus
& Q. Metellus, quanta potuit adhiberi festinatio,
celeriter Romam cum venissent, præcerptam tamen
ejus rei lætitiam invenerunt. Quarto post die, quam
cum rege est pugnatum, cum in circo ludi fie-
rent, murmur repente populi tota spectacula per-
vasit, *pugnatum in Macedonia, & devictum regem esse.*
Dein fremitus increbuit: postremo clamor plausus-
que, velut certo nuntio victoriæ allato, est exor-
tus. Mirari magistratus, & quærere auctorem re-
pentinæ lætitiae: qui postquam nullus erat, eva-
nuit quidem tanquam incertæ rei gaudium; omen
tamen lætum infidebat animis. Quod postquam ve-
ris nuntiis Fabii Lentulique & Metelli adventu fir-
matum est, cum victoria ipsa, tum augurio ani-
morum suorum, lætabantur. Et aliter traditur cir-
censis turbæ non minus similis veri lætitia. Ante
diem decimum Kalendas Octobres, ludorum Roma-
norum secundo die, C. Licinio consuli, ad qua-
drigas mittendas escendenti, tabellarius, qui se ex
Macedonia venire diceret, * laureatas literas dici-

tur : quadrigis missis , consul currum conscendit : & , cum per circum reveheretur ad foros publicos , laureatas tabellas populo ostendit . Quibus conspectis , repente immemor spectaculi populus in medium decurrit . eo senatum consul vocavit , recitatisque tabellis , ex auctoritate Patrum pro foris publicis denuntiavit populo : *L. Æmilium collegam signis collatis cum rege Perseo pugnasse . Macedonum exercitum casum fustumque . Regem cum paucis fugisse . civitates omnes Macedonia in ditionem populi Romani venisse .* His auditis , clamor cum ingenti plausu ortus : ludis relictis , domos magna pars hominum ad conjuges liberosque lætum nuntium portabant . Tertius decimus dies erat ab eo , quo in Macedonia pugnatum est .

II. Postero die senatus in curia habitus , supplicationesque decretæ , & senatusconsultum factum est , ut consul , quos , præter milites sociosque navales , conjuratos haberet , dimitteret . de militibus sociisque navalibus dimittendis referretur , cum legati ab L. Æmilio consule , a quibus præmissus tabellarius esset , * . Ante diem sextum Kalendas Octobres , hora fere secunda , legati urbem ingressi sunt , ingentem secum occurrentium , quacunque ibant , prosequentiumque trahentes turbam , in forum ad tribunal perrexerunt . Senatus forte in curia erat : eo legatos consul introduxit . Ibi tantum temporis retenti , dum exponerent , *quantæ regiæ copiæ peditum equitumque fuissent , quot millia ex his cæsa , quot capta forent ; quam paucorum militum jactura tanta hostium strages facta ; quam cum paucis*

rex fugisset: existimari Samothraciam petiturum, paratam classē ad persequendum esse: neque terra, neque mari elabi posse. eadem hæc paulo post in concionem traducti exposuerunt, renovataque lætitia, cum consul edixisset, ut omnes ædes sacræ aperirentur, pro se quisque ex concione ad gratias agendas ire Diis; ingentique turba, non virorum modo, sed etiam feminarum, conferta tota urbe Deorum immortalium templa. Senatus, revocatus in curiam, supplicationes, ob rem egregie gestam ab L. Æmilio consule, in quinque dies circa omnia pulvinaria decrevit, hostiisque majoribus sacrificari iussit. Naves, quæ in Tiberi paratæ instructæque stabant, ut, si rex posset resistere, in Macedoniam mitterentur, subduci, & in navalibus collocari: socios navales, dato annuo stipendio, dimitti, & cum his omnes, qui in consulis verba juraverant: & quod militum Corcyræ, Brundisii ad mare superum, aut in agro Larinati esset, (omnibus his locis dispositus exercitus fuerat, cum quo, si res posceret, C. Licinius collegæ ferret opem) hos omnes milites dimitti placuit. Supplicatio pro concione populi indicta est, ex ante diem quintum Idus Octobres cum eo die in quinque dies.

III. Ex Illyrico duo legati, C. Licinius Nerva & P. Decius, nuntiarunt, *exercitum Illyriorum cæsum: Gentium regem captum, in ditione populi Romani & Illyricum esse.* Ob eas res, gestas ductu auspicioque L. Anicii prætoris, senatus in triduum supplicationes decrevit, ut Latinæ edictæ a consule sunt in ante quartum & tertium & pridie Idus

Novembres. Tradidere quidam, legatos Rhodios, nondum missos, post victoriam nuntiatam, velut ad ludibrium stolidæ superbiæ, in senatum vocatos esse. Ibi Agesipolim principem eorum ita locutum: *Missos esse legatos ab Rhodiis ad pacem inter Romanos & Persea faciendam; quod id bellum grave atque incommodum Græciæ omni, sumtuosum ac damnosum ipsis Romanis esset. Fortunam perbene fecisse, quando, finito aliter bello, gratulandi sibi de victoria egregia Romanis opportunitatem dedisset. Hæc ab Rhodio dicta. Responsum ab senatu esse, Rhodios nec utilitatem Græciæ, neque cura impensarum populi Romani, sed pro Perseo legationem eam misisse. Nam, si ea fuisset cura, quæ simularetur, tum mittendos legatos fuisse, cum Perseus, in Thessaliam exercitu ducto, per biennium Græcas urbes, alias obsideret, alias denuntiatione armorum terreret. Tum nullam pacis ab Rhodiis mentionem factam. Postquam superatos saltus transgressosque in Macedoniam Romanos audirent, & inclusum teneri Persea, tunc Rhodios legationem misisse, non ad ullam aliam rem, quam ad Persea ex imminente periculo eripiendum. cum hoc responso legatos dimissos.*

IV. Per eosdem dies & M. Marcellus, ex provincia Hispania decedens, Marcolica nobili urbe capta, decem pondo auri, & argenti ad summam sestertii decies in ærarium retulit. Paullus Æmilius consul, cum castra, ut supra dictum est, ad Siras terræ Odomanticæ haberet, cum literas ab rege Perseo per ignobiles tres legatos cerneret, & ipse illacrimasse dicitur forti humanæ: quod, qui paulo

ante, non contentus regno Macedoniae, Dardanos Illyriosque oppugnasset, Bastarnarum excivisset auxilia, is tum, amisso exercitu, extorris regno, in parvam insulam compulsus, supplex, fani religione, non viribus suis, tutus esset. Sed postquam, *Regem Persea consuli Paullo salutem*, legit; miserationem omnem stultitia ignorantis fortunam suam exemit, Itaque quanquam in reliqua parte literarum minime regiae preces erant, tamen sine responso ac sine literis ea legatio dimissa est. Sensit Perseus, cuius nominis obliviscendum victo esset: itaque alterae literae cum privati nominis titulo missae, & petiere, & impetravere, ut aliqui ad eum mitterentur, cum quibus loqui de statu & conditione suae fortunae posset. Missi sunt tres legati, P. Lentulus, A. Postumius Albinus, A. Antonius. Nihil ea legatione perfectum est, Perseo regium nomen omni vi amplectente, Paullo, ut se suaque omnia in fidem & clementiam populi Romani permitteret, contendente.

V. Dum haec aguntur, classis Cn. Octavii Samothracam est appulsa. Is quoque, praesenti admoto terrore, modo minis, modo spe perlicere, ut se traderet, cum conaretur; adjuvit in hoc eum res, seu casu contracta, seu consilio. L. Atilius illustris adolescens, cum in concione esse populum Samothracum animum advertisset, a magistratibus petiit; ut sibi paucis alloquendi populi potestatem facerent. Permisso, *Utrum nos, hospites Samothracae, vere accepimus, an falso, sacram hanc insulam, & augusti totam atque inviolati soli esse?* Cum cre-

ditæ sanctitati assentirentur omnes, *Cur igitur, inquit, pollutam homicida sanguine regis Eumenis violavit? &, cum omnis præfatio sacrorum eos, quibus non sint puræ manus, sacris arceat, vos penetralia vestra contaminari cruento latronis corpore sinetis?* Nobilis fama erat, apud omnes Græciæ civitates, Eumenis regis per Evandrum Delphis prope perpetrata cædes. Itaque, præterquam quod in potestate Romanorum sese insulamque totam & templum cernebant esse, ne immerito quidem ea sibi exprobari rati, Theondam, qui summus magistratus apud eos erat, (regem ipsi appellant) ad Persea mittunt, qui nuntiaret, *Argui cædis Evandrum Cretensem. esse autem judicia apud sese more majorum comparata de iis, qui incestas manus intulisse intra terminos sacros templi dicantur. Si consideret Evander, innoxium se rei capitalis argui, veniret ad causam dicendam: si committere se iudicio non auderet, liberaret religione templum, ac sibi met ipse consuleret.* Perseus, evocato Evandro, iudicium subeundi nullo pacto auctor esse: nec causa, nec gratia parem fore. Suberat & ille metus, ne damnatus auctorem se nefandi facinoris protraheret. *reliqui quid esset, nisi ut fortiter moriatur?* Nihil palam abnuere Evander: sed cum, veneno se malle mori, quam ferro, dixisset; occulte fugam parabat. quod cum renuntiatum regi esset, metuens, ne, tanquam a se subtracto poenæ reo, iram Samothracum in se converteret, interfici Evandrum iussit. Qua perpetrata temere cæde, subiit ex templo animum, in se nimirum receptam labem, quæ Evandri fuisset: ab illo Delphis vulneratum

Eumenem, ab se Samothracæ Evandrum occisum, ita duo sanctissima in terris templa, se uno auctore, sanguine humano violata. Hujus rei crimen, corrupto pecunia Theonda, avertitur, ut renunciaret populo, Evandrum sibi ipsum mortem conscisse.

VI. Ceterum tanto facinore in unicum relictum amicum, ab ipso per tot casus expertum, proditumque, quia non prodiderat, omnium ab se abalienavit animos. Pro se quisque transire ad Romanos: fugæque consilium capere solum prope relictum coegerunt: Oroandemque Cretensem, cui nota Thraciæ ora erat, quia mercaturas in ea regione fecerat, appellat, ut se sublatum in lembum ad Cotym deveheret. Demetrium est portus in promontorio quodam Samothracæ: ibi lembus stabat. Sub occasum solis deferuntur, quæ ad usum necessaria erant: deferitur & pecunia, quanta clam deferri poterat. Rex ipse nocte media, cum tribus conscis fugæ, per posticum ædium in propinquum cubiculo hortum, atque inde, maceriam ægre transgressus, ad mare pervenit. Oroandes jam tum, dum pecunia deferretur, primis tenebris solverat navem, ac per altum Cretam petebat. Postquam in portu navis non inventa est, vagatus Perseus aliquamdiu in litore, postremo timens lucem jam appropinquantem, in hospitium redire non ausus, in latere templi prope angulum obscurum delituit. Pueri regii apud Macedonas vocabantur principum liberi, ad ministerium electi regis: ea cohors, persecuta regem fugientem, ne tum quidem abscedebat, donec jussu Cn. Octavii pronuntiatum est per

præconem, *Regios pueros Macedonasque alios, qui Samothracæ essent, si transfrent ad Romanos, incolumitatem, libertatemque & sua omnia servaturos, quæ aut secum haberent, aut in Macedonia reliquissent.* Ad hanc vocem transitio omnium facta est, nominaque dabant ad C. Postumium tribunum militum. Liberos quoque parvos regios Ion Theſſalonicenſis Octavio tradidit: nec quisquam, præter Philippum, maximum natu e filiis, cum rege relictus. Tum sese filiumque Octavio tradidit; fortunam Deosque, quorum in templo erant, nulla ope supplicem juvantes, accusans. In prætoriam navem imponi iussus: eodem & pecunia, quæ superfuit, delata est: extemploque classis Amphipolim repetit. Inde Octavius regem in castra ad consulem misit, præmissis literis, ut in potestate eum esse & adduci sciret.

VII. Secundam eam Paullus, sicut erat, victoriam ratus, victimas cecidit eo nuntio; &, consilio advocato, literas prætoris cum recitasset, Q. Ælium Tuberonem obviam regi misit: ceteros manere in prætorio frequentes iussit. Non alias ad ultimum spectaculum tanta multitudo occurrit. Patrum ætate Syphax rex captus in castra Romana adductus erat: præterquam quod nec sua, nec gentis fama comparandus, tunc quoque accessio Punici belli fuerat, sicut Gentius Macedonici. Perseus caput belli erat: nec ipsius tantum, patris avique, quos sanguine ac genere contingebat, fama conspectum eum efficiebat, sed effulgebant Philippus ac Magnus Alexander, qui summum imperium in orbe terrarum Macedonum fecerant. Pullo amictus illo Per-

seus ingressus est castra, nullo suorum alio comite; qui focius calamitatis miserabiliorem eum faceret. progredi præ turba occurrentium ad spectaculum non poterat, donec consul lictores misisset, qui submovendo iter ad prætorium facerent. Confurrexit consul, &, iussis sedere aliis, progressusque paulum, introeunti regi dextram porrexit. submittentemque se ad pedes sustulit: nec attingere genua passus, introductum in tabernaculum adversus advocatos in consilium confidere iussit.

VIII. Prima percontatio fuit, *qua subactus injuria contra populum Romanum bellum tam infesto animo suscepisset, quo se regnumque suum ad ultimum discrimen adduceret?* Cum, responsum expectantibus cunctis, terram intuens, diu tacitus fleret, rursum consul: *Si juvenis regnum accepisses, minus equidem mirarer, ignorasse te, quam gravis aut amicus, aut inimicus esset populus Romanus. nunc vero, cum & bello patris tui, quod nobiscum gessit, interfuisses, & pacis postea, quam cum summa fide adversus eum coluimus, meminisses, quod consilium, quorum & vim bello, & fidem in pace expertus esses, cum iis tibi bellum esse, quam pacem, malle?* Nec interrogatus, nec accusatus cum responderet: *Utcunque tamen hæc, sive errore humano, seu casu, seu necessitate inciderunt, bonum animum habe: multorum regum, populorum casibus, cognita populi Romani clementia non modo spem tibi, sed prope certam fiduciam salutis, præbet.* Hæc Græco sermone Perseo: Latine deinde suis, *Exemplum insigne cernitis, inquit, mutationis rerum humanarum. Vobis hoc præcipue dico, juvenes. ideo in*

secundis rebus nihil in quemquam superbe ac violenter consulere decet, nec præsenti credere fortunæ; cum, quid vesper ferat, incertum sit. Is demum vir erit, cujus animus nec prospera flatu suo efferet, nec adversa infringeret. Consilio dimisso, tuendi cura regis Q. Ælio mandatur. Eo die & invitatus ad consulem Perseus, & alius omnis ei honos habitus est, qui haberi in tali fortuna poterat.

IX. Exercitus deinde in hiberna dimissus est. maximam partem copiarum Amphipolis, reliquas propinquæ urbes acceperunt. Hic finis belli, cum quadriennium continuum bellatum esset, inter Romanos ac Persea fuit: idemque finis incliti per Europæ plerumque atque Asiam omnem regni. Vice-simum ab Carano, qui primus regnavit, Persea numerabant. Perseus, Q. Fulvio, L. Manlio consulibus, regnum accepit: a senatu rex est appellatus, M. Junio, A. Manlio consulibus: regnavit undecim annos. Macedonum obscura admodum fama usque ad Philippum Amyntæ filium fuit: inde ac per eum crescere cum cœpisset, Europæ se tamen finibus continuit, Græciam omnem & partem Thraciæ atque Illyrici amplexa. Superfudit deinde se in Asiam: & tredecim annis, quibus Alexander regnavit, primum omnia, qua Persarum prope immenso spatio imperium fuerat, suæ ditionis fecit. Arabas hinc Indianque, qua terrarum ultimus finis Rubrum mare amplectitur, peragravit. tum maximum in terris Macedonum regnum nomenque; inde morte Alexandri distractum in multa regna, dum ad se quisque opes rapiunt, lacerantes viribus: a summo

culmine fortunæ ad ultimum finem centum quin-
quaginta annos stetit.

X. Victoriæ Romanæ fama cum pervasisset in
Asiam, Antenor, qui cum classe lemborum ad Pha-
nas stabat, Cassandriam inde trajecit. C. Popillius,
qui ad Delum præsidio navibus Macedoniam pe-
tentibus erat, postquam debellatum in Macedonia,
& statione submotos hostium lembos audivit, di-
missis & ipse Atticis navibus, ad susceptam legatio-
nem peragendam navigare Ægyptum pergit: ut prius
occurrere Antiocho posset, quam ad Alexandræ
mœnia accederet. Cum præterveherentur Asiam le-
gati, & Loryma venissent, qui portus viginti paulo
amplius millia ab Rhodo abest, ex adverso urbi ipsi
positus; principes Rhodiorum occurrunt (jam enim
eo quoque victoriæ fama perlata erat) orantes, *ut
Rhodum deveherentur. pertinere id ad famam salutem-
que civitatis, noscere ipsos omnia, quæ acta essent, age-
renturque Rhodi, & comperta per se, non vulgata fama,
Romam referre.* Diu negantes perpulerunt, ut mo-
ram navigationis brevem pro salute sociæ urbis
paterentur. Postquam Rhodum ventum est, in con-
cionem quoque eos iidem precibus pertraxerunt.
Adventus legatorum auxit potius timorem civitati,
quam minuit: omnia enim Popillius, quæ singuli
universique eo bello hostiliter dixerant, fecerant-
que, retulit. &, vir asper ingenio, augebat atroci-
tatem eorum, quæ dicerentur, vultu truci & accu-
satoria voce: ut, cum propriæ simultatis nulla causa
cum civitate esset, ex unius senatoris Romani acer-
bitate, qualis in se universi senatus animus esset,

conjectarent. C. Decimii moderatio oratio fuit, qui, *in plerisque eorum, quæ commemorata a Popillio essent, culpam non penes populum, sed penes paucos concitores vulgi esse, dixit. eos, venalem linguam habentes, decreta plena regiæ assentationis fecisse: & eas legationes misisse, quarum Rhodios semper non minus puderet, quam pæniteret. Quæ omnia, si tamen populo foret, in capita noxiorum versura.* Cum magno assensu auditus est, non magis eo, quod multitudinis noxam elevabat, quam quod culpam in auctores verterat. Itaque cum principes eorum Romanis responderent, nequaquam tamen grata oratio eorum fuit, qui, quæ Popillius objecerat, diluere utcunque conati sunt; quam eorum, qui Decimio in auctoribus ad piaculum noxæ objiciendis assensi sunt. Decretum igitur extemplo, ut, qui pro Perseo adversus Romanos dixisse quid, aut fecisse, convincerentur, capitis condemnarentur. Excesserunt urbe sub adventu Romanorum quidam, alii mortem sibi consciverunt. Legati, non ultra quam quinque dies Rhodi morati, Alexandriam profiscuntur. Nec eo segnius judicia ex decreto coram his facto Rhodi exercebantur: quam perseverantiam in exsequenda re Decimii lenitas *.

XI. Cum hæc gererentur, Antiochus frustra tentatis moenibus Alexandriæ abscefferat: ceteraque Ægypto potitus, relicto Memphi majore Ptolemæo, cui regnum quæri suis viribus simulabat, ut victorem mox aggrediretur, in Syriam exercitum abduxit. Nec hujus voluntatis ejus ignarus Ptolemæus, dum conterritum obsidionis metu minorem

fratrem haberet, posse se recipi Alexandreae, & sorore adjuvante, & non repugnantibus fratris amicis, ratus; primum ad sororem, deinde ad fratrem amicosque ejus, non prius destitit mittere, quam pacem cum iis confirmaret. Suspectum Antiochum effecerat, quod, cetera Ægypto sibi tradita, Pelusii validum relictum erat præsidium. apparebat, claustra Ægypti teneri, ut, cum vellet, rursus exercitum induceret: bello intestino cum fratre eum exitum fore, ut victor, fessus certamine, nequaquam par Antiocho futurus esset. Hæc, prudenter animadversa a majore, cum assensu minor frater, quique cum eo erant, acceperunt: soror plurimum adjuvit, non consilio modo, sed etiam precibus. Itaque, consentientibus cunctis pace facta, Alexandream recipitur, ne multitudine quidem adversante: quæ in bello, non per obsidionem modo, sed etiam postquam a mœnibus abscessum est, quia nihil ex Ægypto subvehebatur, omnium rerum attenuata inopia erat. His cum lætari Antiochum conveniens esset, si reducendi ejus causa exercitum Ægyptum induxisset, quo specioso titulo ad omnes Asiæ & Græciæ civitates, legationibus recipiendis literisque dimittendis, usus erat, adeo est offensus, ut multo acrius infestiusque adversus duos, quam ante adversus unum, pararet bellum. Cyprum extemplo classem misit: ipse, primo vere cum exercitu Ægyptum petens, in Coelen Syriam processit. Circa Rhinocolura Ptolemæi legatis agentibus gratias, quod per eum regnum patrium recepisset, petentibusque, ut suum munus tueretur, & diceret potius,

quid fieri vellet, quam, hostis ex socio factus, vi atque armis ageret, respondit: *Non aliter neque classẽ revocaturum, neque exercitum reduẽturum, nisi sibi & tota Cyp̃ro, & Pelusio, agroque, qui circa Pelusiacum ostium Nili esset, cederet*: diemque præstituit, intra quam de conditionibus peractis responsum acciperet.

XII. Postquam dies data induciis præterit, * navigantibus ostio Nili ad Pelusium, per deserta Arabiæ * ad Memphim incolebant, & ab ceteris Ægyptiis, partim voluntate, partim metu, ad Alexandriam modicis itineribus descendit. Ad Leusinem transgresso flumen, qui locus quatuor millia ab Alexandria abest, legati Romani occurrerunt. quos cum advenientes salutasset, dextramque Popillio porrigeret; tabellas ei Popillius scriptum habentes tradit, atque omnium primum id legere jubet. quibus perlectis, cum se consideraturum, adhibitis amicis, quid faciendum sibi esset, dixisset; Popillius, pro cetera asperitate animi, virga, quam in manu gerebat, circumscripsit regem: ac, *Priusquam hoc circulo excedas, inquit, redde responsum, senatui quod referam*. Obstupefactus tam violento imperio parumper cum hæsitasset, *Faciam*, inquit, *quod censet senatus*. Tum demum Popillius dextram regi, tanquam socio atque amico, porrexit. Die deinde finita cum excessisset Ægypto Antiochus, legati, concordia etiam auctoritate sua inter fratres firmata, inter quos vixdum convenerat, pars Cyp̃rum navigant: & inde, quæ jam vicerat proelio Ægyptias naves, classẽ Antiochi dimittunt. Clara

ea per gentes legatio fuit, quod haud dubie ademta Antiocho Ægyptus habenti jam, redditumque patrium regnum stirpi Ptolemæi fuerat. Consulum ejus anni, sicut alterius clarus consulatus insigni victoria, ita alterius obscura fama, quia materiam res gerendi non habuit. Jam primum cum legionibus ad conveniendum diem dixit, non auspicato templum intravit. vitio diem dictam esse augures, cum ad eos relatum est, decreverunt. Profectus in Galliam circa Maeros campos ad montes Siciminam & Papinum stativa habuit: deinde circa eadem loca cum fociis nominis Latini hibernabat: legiones Romanæ, quod vitio dies exercitui ad conveniendum dicta erat, Romæ manserant. Et prætores, præter C. Papirium Carbonem, cui Sardinia evenerat, in provincias iere. eum jus dicere Romæ (nam eam quoque sortem habebat) inter cives & peregrinos Patres censuerant.

XIII. Et Popillius & ea legatio, quæ missa ad Antiochum erat, Romam rediit: retulit, controversias inter reges sublatas esse, exercitumque ex Ægypto in Syriam reductum. Post ipsorum regum legati venerunt: Antiochi legati, referentes, *Omni victoria potiozem pacem regi, quæ senatui placuisset, visam: eumque haud secus, quam Deorum imperio, legatorum Romanorum jussis paruisse.* Gratulati deinde victoriam sunt, *ad quam summa ope, si quid imperatum foret, affuturum regem fuisse.* Ptolemæi legati, communi nomine regis & Cleopatraræ, gratias egerunt, *Plus eos senatui populoque Romano, quam parentibus suis, plus, quam Diis immortalibus, debere.*

per quos obsidione miserrima liberati essent, regnum patrum prope amissum recepissent. Responsum ab senatu est: Antiochum recte atque ordine fecisse, quod legatis paruisset, gratumque id esse senatui populoque Romano. Regibus Ægypti, Ptolemæo Cleopatracque: si quid per se boni commodique evenisset, id magnopere senatum lætari: daturumque operam, ut regni sui maximum semper præsidium positum esse in fide populi Romani ducant. Munera legatis ut ex instituto mittenda curaret, C. Papirio prætori mandatum. Literæ deinde Macedonia allatæ, quæ victoriæ lætitiâ geminarent: Persea regem in potestatem consulis venisse. Dimissis legatis, disceptatum inter Pisanos Lunensesque legatos: Pisanis querentibus, agro se a colonis Romanis pelli; Lunensibus affirmantibus, eum, de quo agatur, a triumviris agrum sibi assignatum esse. Senatus, qui de finibus cognoscerent statuerentque, quinqueviros misit, Q. Fabium Buteonem, P. Cornelium Blasionem, Ti. Sempronium Muscam, L. Nævium Balbum, C. Appulejum Saturninum. Et ab Eumene & ab Attalo & ab Athenæo fratribus, communis legatio de victoriâ gratulatum venit. Et Masgabæ, regis Masinissæ filio, Puteolis navem egresso, præsto fuit, obviam missus cum pecunia, L. Manlius quæstor, qui Romam eum publico sumtu perduceret. Advenienti extemplo senatus datus est. Is adolescens ira locutus est, ut, quæ rebus grata erant, gratiora verbis faceret. Commemoravit, quot pedites equitesque, quot elephantos, quantum frumenti eo quadriennio pater suus in Macedoniam misisset. Sed duas res ei rubori fuisse: unam, quod rogasset

eum per legatos senatus, quæ ad bellum opus essent, & non imperasset; alteram, quod pecuniam ei pro frumento misisset. Masinissam meminisse, regnum a populo Romano partum auctumque & multiplicatum habere: usum regni contentum scire, dominium & jus eorum, qui dederint, esse. Sumere itaque eosdem, non se rogare, æquum esse, neque emere ea, ex fructibus agri ab se dati quæ ibi proveniant. Id Masinissæ satis esse, & fore, quod populo Romano superesset. Cum iis mandatis a patre profectum postea consecutos equites, qui devictam Macedoniam nuntiarent, gratulatumque senatui juberent indicare, tantæ eam rem lætitiæ patri suo esse, ut Romam venire velit, Jovique optimo maximo in Capitolio sacrificare, & grates agere: id, nisi molestum sit, ut ei permittatur, ab senatu petere.

XIV. Responsum regulo est: *Facere patrem ejus Masinissam, quod virum gratum bonumque facere deceat, ut pretium honoremque debito beneficio addat. Et populum Romanum ab eo, bello Punico, forti fidelique opera adjutum; & illum, favente populo Romano, regnum adeptum; æquitate sua postea trium regum bellis deinceps omnibus functum officiis. Victoria vero populi Romani lætari eum regem mirum non esse, qui sortem omnem fortunæ regnique sui cum rebus Romanis immiscuisset. Grates Diis pro populi Romani victoriæ apud suos penates ageret; Romæ filium pro eo acturum. Gratulatum quoque satis suo ac patris nomine esse. Ipsum relinquere regnum, & Africa excedere, præterquam quod illi inutile esset, non esse e republica populi Romani, senatum censere. Petenti Masgabæ, ut Hanno Hamilcaris filius obses in locum * exigeret.*

Munera ex senatusconsulto emere regulo quæstor jussus ex centum pondo argenti, & prosequi eum Puteolos, omnemque suntum, quoad in Italia esset, præbere, & duas naves conducere, quibus ipse comitesque regis in Africam deveherentur: & comitibus omnibus, liberis servisque, vestimenta data. Haud ita multo post de altero Masinissæ filio Misagene literæ allatæ sunt, *missum eum ab L. Paulo post devictum Persea in Africam cum equitibus suis; navigantem, dispersa classe in Hadriatico mari, Brundisium tribus navibus ægrum delatum.* Ad eum cum iisdem muneribus, quæ data Romæ fratri ejus erant, L. Stertinius quæstor Brundisium missus: jussusque curare, ut ædes hospi-

* * *

XV. * * * in quatuor urbanas tribus descripti erant libertini, præter eos, quibus filius quinquenni major ex senatusconsulto esset. Eos, ubi proximo lustro censi essent, censeri jusserunt: & eos, qui prædium prædiave rustica pluris sestertiūm triginta millium haberent, censendi jus factum est. Hoc cum ita servatum esset, negabat Claudius, *fussragii lationem injussu populi censorem cuiquam homini, nedum ordini universo, adimere posse. Neque enim, si tribu movere posset, quod sit nihil aliud, quam mutare jubere tribum, ideo omnibus quinque & triginta tribubus emovere posse; id est, civitatem libertatemque eripere; non, ubi censeatur, finire, sed censu excludere.* Hæc inter ipsos disceptata: postremo eo descensum est, ut ex quatuor urbanis tribubus

unam palam in atrio Libertatis fortirentur, in quam omnes, qui servitutem servissent, conjicerent. Esquilinæ fors exiit: in ea Ti. Gracchus pronuntiavit, libertinos omnes cenferi placere. Magno ea res honori censoribus apud senatum fuit. gratiæ actæ & Sempronio, qui in bene cœpto perseverasset; & Claudio, qui non impedisset. Plures, quam a superioribus, & senatu emoti sunt, & equos vendere jussi. omnes iidem ab utroque & tribu remoti, & ærarii facti: neque ullius, quem alter notaret, ab altero levata ignominia. Petentibus, ut ex instituto ad sarta tecta exigenda, & ad opera, quæ locassent, probanda, anni & bimensis tempus prorogaretur, Cn. Tremellius tribunus, quia lectus non erat in senatum, intercessit. Eodem anno C. Cicerejus ædem in monte Albano dedicavit quinquennio post, quam vovit. Flamen Martialis inauguratus est eo anno L. Postumius Albinus.

XVI. Q. Ælio, M. Junio consulibus de provinciis referentibus, censuere Patres, duas provincias Hispaniam rursus fieri, quæ una per bellum Macedonicum fuerat: & Macedoniam Illyricumque eisdem, L. Paullum & L. Anicium, obtinere, donec de sententia legatorum & res bello turbatas, & statum alium ejus regni formando composuissent. Consulibus Pisæ & Gallia decretæ cum binis legionibus peditum, & equitum quadringentenis. Prætorum sortes fuere, Q. Cassii urbana, M'. Juventii Thalanæ inter peregrinos, Ti. Claudii Neronis Sicilia, Cn. Fulvii Hispania citerior, C. Licinii Nervæ ulterior. A. Manlio Torquato Sardinia obvenerat,

nequirit ire in provinciam, ad res capitales quærendas ex senatusconsulto retentus. De prodigiis deinde nuntiatis senatus est consultus. Ædes Deorum Penatium in Velia de cælo tacta erat: & in oppido Minervio duæ portæ & muri aliquantum. Anagninæ terra pluerat; & Lanuvii fax in cælo visa erat; & Calatinæ in publico agro M. Valerius civis Romanus nuntiabat, e foco suo sanguinem per triduum & duas noctes manasse. Ob id maxime decemviri libros adire jussi, supplicationem in diem unum populo edixerunt, & quinquaginta capris in foro sacrificaverunt. & aliorum prodigiorum causa diem alterum supplicatio circa omnia pulvinaria fuit, & hostiis majoribus sacrificatum est, & urbs lustrata. Inde, quod ad honorem Deum immortalium pertineret, decrevit senatus, *Ut, quoniam perduelles superati, Perseus & Gentius reges cum Macedonia atque Illyrico in potestate populi Romani essent, ut, quanta dona, Ap. Claudio, M. Sempronio consulibus, ob devictum Antiochum regem data ad omnia pulvinaria essent, tanta Q. Cassius & M. Juventius prætores curarent danda.*

XVII. Legatos deinde, quorum de sententia imperatores L. Paullus, L. Anicius componerent res, decreverunt decem in Macedoniam, quinque in Illyricum. In Macedoniam sunt hi nominati, A. Postumius Luscus, C. Claudius, ambo censorii, C. Licinius Crassus, collega in consulatu Pauli; tum prorogato imperio provinciam Galliam habebat. His consularibus addidere Cn. Domitium Ahenobarbum, Ser. Cornelium Sullam, L. Junium,

C. Antistium Labeonem, T. Numisium Tarquinien-
sem, A. Terentium Varronem. In Illyricum autem
hi nominati, P. Ælius Ligus consularis, C. Cicere-
jus, & Cn. Bæbius Tamphilus, (hic priore anno,
Cicerejus multis ante annis prætor fuerat) P. Te-
rentius Tusciveicanus, P. Manilius. Moniti deinde
consules a Patribus, ut, quoniam alterum ex his
succedere C. Licinio, qui legatus nominatus erat,
in Galliam oporteret, primo quoque tempore pro-
vincias aut compararent inter se, aut fortirentur,
fortiti sunt. M. Junio Pisæ obvenērunt, (quem prius,
quam in provinciam iret, legationes, quæ undique
Romam gratulatum convenerunt, introducere in
senatum placuit) Q. Ælio Gallia. Ceterum quan-
quam tales viri mitterentur, quorum de consilio
sperari posset, imperatores nihil indignum nec cle-
mentia nec gravitate populi Romani decreturos es-
se, tamen in senatu quoque agitata est summa con-
siliiorum, ut inchoata omnia legati ab domo ferre
ad imperatores possent.

XVIII. *Omnium primum liberos esse placebat Ma-
cedonas atque Illyrios, ut omnibus gentibus appare-
ret, arma populi Romani non liberis servitutem, sed
contra servientibus libertatem afferre; ut & in libertate
gentes quæ essent, tutam eam sibi perpetuamque sub tu-
tela populi Romani esse, &, quæ sub regibus viverent,
& in præsens tempus mitiores eos iustioresque respectu
populi Romani habere se, &, si quando bellum cum
populo Romano regibus fuisset suis, exitum ejus victo-
riam Romanis, sibi libertatem allaturum crederent. Me-
talli quoque Macedonici, quod ingens vectigal erat,*

locationesque prædiorum rusticorum tolli placebat. nam neque sine publicano exerceri posse; & ubi publicanus est, ibi aut jus publicum vanum, aut libertatem sociis nullam esse. Ne ipsos quidem Macedonas idem exercere posse. ubi in medio præda administrantibus esset, ibi nunquam causas seditionum & certaminis desore. Commune concilium gentis esset, ne improbum vulgus a senatu aliquando libertatem salubri moderatione darem ad licentiam pestilentem traheret. In quatuor regiones describi Macedoniam, ut suum quæque concilium haberet, placuit; & dimidium tributi, quam quod regibus ferre soliti erant, populo Romano pendere. Similia his & in Illyricum mandata. cetera ipsis imperatoribus legatisque relictæ, in quibus præsens tractatio rerum certiora subiectura erat consilia.

XIX. Inter multas regum gentiumque & populorum legationes Attalus, frater regis Eumenis, maxime convertit in se omnium oculos animosque. exceptus enim est ab his, qui simul eo bello militaverunt, haud paulo benignius, quam si ipse rex Eumenes venisset. Adduxerant eum duæ in speciem honestæ res: una, gratulatio, conveniens in ea victoria, quam ipse adjuvisset: altera, querimonia Gallici tumultus, Advertæque gladiis regnum in dubium adductum esse. Suberat & secreta spes honorum præmiorumque ab senatu, quæ vix salva pietate ejus contingere poterant. erant enim quidam Romanorum quoque non boni auctores, qui spe cupiditatem ejus elicerent: *Eam opinionem de Attalo & Eumene Romæ esse, tanquam de altero Romanis certo amico, altero nec Romanis, nec Persi fido*

socio. Itaque vix statui posse, utrum, quæ pro se, an, quæ contra fratrem petiturus esset, ab senatu magis impetrabilia forent: adeo universos omnia & huic tribuere, & illi vero negare. Eorum hominum (ut res docuit) Attalus erat, qui, quantum spes spondidisset, cuperent, ni unius amici prudens monitio velut frenos animo ejus, gestienti secundis rebus, imposuisset. Stratius cum eo fuit medicus, ad id ipsum a non securo Eumene Romam missus, speculator rerum, quæ a fratre agerentur, monitorque fidus, si decedi fide vidisset. Is, ad occupatas jam aures sollicitatumque jam animum cum venisset, aggressus tempestivis temporibus rem prope prolapsam restituit, aliis alia regna crevisse rebus, dicendo: regnum eorum novum, nullis vetustis fundatum opibus, fraterna stare concordia: quod unus nomen regium & præcipuum capitis insigne gerat, omnes fratres regnent. Attalum vero, quia ætate proximus, quis non pro rege habeat? neque eo solum, quia tantas præsentis ejus opes cernat, sed quod haud ambiguum propediem regnaturum eum infirmitate ætateque Eumenis esset, nullam stirpem liberum habentis: (necdum enim agnoverat eum, qui postea regnavit.) Quid autineret vim afferri rei, sua sponte mox ad eum adventuræ? Accessisse etiam novam tempestatem regno tumultus Gallici, cui vix consensu & concordia regum resisti queat. Si vero ad externum bellum domestica seditio adjiciatur, sisti non posse; nec aliud eum, quam, ne frater in regno moriatur, sibi ipsi spem propinquam regni erepturum. Si utraque gloriosa res esset, & servasse fratri regnum, & eripuisse; servati tamen regni, quæ juncta pietati sit, potiore laudem

fuisse. Sed enimvero cum detestabilis altera res & proxima parricidio sit, quid ad deliberationem dubii superesse? Utrum enim partem regni petiturum esse, an totum erepturum? si partem; ambo infirmos, distractis viribus, & omnibus injuriis obnoxios fore: si totum; privaturne ergo majorem fratrem, an exsulem illa aetate, illa corporis infirmitate, an ultimum mori jussurum? Egregium enim (ut fabulis traditus impiorum fratrum eventus taceatur) Persei exitum videri, qui ex fraterna caede raptum diadema in templo Samothracum, velut praesentibus Diis exigentibus poenas, ad pedes victoris hostis prostratus posuerit. Eos ipsos, qui, non illi amici, sed Eumeni infesti, stimulent eum, pietatem constantiamque laudaturos, si fidem ad ultimum fratri praestitisset.

XX. Hæc plus valere in Attali animo. Itaque introductus in senatum, gratulatus victoriam, & sua merita eo bello fratrisque, si qua erant, & Gallorum defectionem, quæ nuper ingenti motu facta erat, exposuit. Petiit, ut legatos mitteret ad eos, quorum auctoritate ab armis avocarentur. His pro regni utilitate editis mandatis, Ænum sibi & Maroneam petiit. Ita destituta eorum spe, qui, fratre accusato, partitionem regni petiturum crediderant, curiam excessit. Ut raro alias quisquam, rex aut privatus, tanto favore tantoque omnium assensu est auditus; omnibus honoribus muneribusque, & præfens est cultus, & proficiscentem prosecuti sunt. Inter multas Asiæ Græciæque legationes Rhodiorum maxime legati civitatem converterunt. nam cum primo in veste candida visi essent, quod gratulantes decebat, &, si sordidam vestem habuissent,

lulentium Persei casum præbere speciem poterant; postquam consulti ab M. Junio consule Patres, stantibus in comitio legatis an locum, lautia, senatumque darent, nullum hospitale jus in iis servandum censuerunt; egressus e curia consul, cum Rhodii, gratulatum se de victoria purgatumque civitatis crimina dicentes venisse, petissent, ut senatus sibi daretur, pronuntiat: *Sociis & amicis & alia comiter atque hospitaliter præstare Romanos, & senatum dare consueſſe: Rhodios non ita meritos eo bello, ut amicorum sociorum numero habendi sint.* His auditis, prostraverunt se omnes humi, consulemque & cunctos, qui aderant, orantes, ne nova falsaque crimina plus obesse Rhodiis æquum censerent, quam antiqua merita, quorum ipsi testes essent. Exemplo, veste sordida sumta, domos principum cum precibus ac lacrimis circumibant, orantes, ut prius cognoscerent causam, quam condemnarentur.

XXI. M'. Juventius Thalna prætor, cujus inter cives & peregrinos jurisdictio erat, populum adversus Rhodios incitabat: rogationemque promulgaverat, *Ut Rhodiis bellum indiceretur: & ex magistratibus ejus anni deligerent, qui ad id bellum cum classe mitteretur, se eum sperans futurum esse.* Huic actioni M. Antonius & M. Pomponius tribuni plebis adversabantur. Sed & prætor novo maloque exemplo rem ingressus erat, quod, ante non consulto senatu, non consulibus certioribus factis, de sua unius sententia rogationem ferret, *Vellent, juberentque, Rhodiis bellum indici?* cum antea semper prius senatus de bello consultus esset, deinde ad popu-

lum latum; & tribuni plebis, cum ita traditum esset, ne quis prius intercederet legi, quam privatis suadendi dissuadendique legem potestas facta esset; eoque persæpe evenisset, ut, qui non professi essent se intercessuros, animadversis vitiis legis ex ratione dissuadentium, intercederent; &, qui ad intercedendum venissent, desisterent, victi auctoritatibus suadentium legem. Tum inter prætorem tribunosque omnia intempestive agendi certamen erat. Tribuni festinationem prætoris, ante tempus intercedendo,

* * *

in adventum im-

* * *

XXII. *** *peccaverimusne, adhuc dubium est: pœnas, ignominias omnes jam patimur. Antea, Carthaginensibus victis, Philippo, Antiocho superatis, cum Romam venissemus, ex publico hospitio in curiam gratulatum vobis, Patres conscripti, ex curia in Capitolium ad Deos vestros dona ferentes; nunc ex sordido deversorio, vix mercede recepti, ac prope hostium more extra urbem manere iussi, in hoc squalore venimus in curiam Romanam Rhodii, quos provinciis nuper Lycia atque Caria, quos præmiis atque honoribus amplissimis donastis. Et Macedonas Illyriosque liberos esse (ut audimus) jubetis, cum servierint, antequam vobiscum bellarent: (nec cujusquam fortunæ invidemus, immo agnoscimus clementiam populi Romani) Rhodios, qui nihil aliud quam quieverunt hoc bello, hostes ex sociis facturi estis? Certe quidem vos estis Romani, qui idcirco felicia bella vestra esse, quia iusta sint, præ vobis fertis; nec tam exitu eorum, quod vincatis, quam principiis, quod*

non sine causa suscipiatis, gloriimini. Messana in Sicilia oppugnata Carthaginenses, Athenæ oppugnatae & Græcia in servitutem petita, & adjutus Hannibal pecunia, auxiliis, Philippum hostem fecerunt. Antiochus ipse, ultro ab Ætolis hostibus vestris arcessitus, ex Asia classe in Græciam trajecit; Demetriade, & Chalcide, & saltu Thermopylarum occupato, de possessione imperii vos dejicere conatus. Cum Perseo socii vestri oppugnati, alii interfecti reguli principesque gentium aut populorum, causa belli vobis fuere. Quem tandem titulum nostra calamitas habitura est, si perituri sumus? Non dum segrego civitatis causam a Polyarato & Dinone; civibus nostris, & iis, quos, ut traderemus vobis, adduximus. Si omnes Rhodii æque noxii essemus, quod nostrum in hoc bello crimen esset? Persei partibus favimus; & quemadmodum Antiochi Philippique bello pro vobis adversus reges, sic nunc pro rege adversus vos stemus. Quemadmodum soleamus socios juvare, & quam impigre capeßere bella, C. Livium, L. Æmilium Regillum interrogate, qui classibus vestris in Asia præfuerunt. Nunquam vestrae naves pugnare sine nobis. nostra classe pugnâvimus semel ad Samum, iterum in Pamphylia adversus Hannibalem imperatorem. quæ victoria nobis eo gloriosior est, quod, cum ad Samum magnam partem navium adversa pugna & egregiam juventutem amisissemus, ne tanta quidem clade territi, iterum ausi sumus regiae classi ex Syria venienti obviam ire. Hæc non gloriandi causa retuli, (neque enim ea nunc nostra est fortuna) sed ut admonerem, quemadmodum adjuvare socios solerent Rhodii.

XXIII. Præmia, Philippo & Antiocho devictis;

amplissima accepimus a vobis. Si, quæ vestra nunc est fortuna Deum benignitate & virtute vestra, ea Persei fuisset, & præmia petitem ad victorem regem venissemus in Macedoniam, quid tandem diceremus? Pecuniane a nobis adjutum, an frumento? auxiliis terrestribus, an navalibus? quod præsidium tenuisse nos? ubi pugnasse, aut sub illius ducibus, aut per nos ipsos? Si quæreret, ubi miles noster, ubi navis intra præsidia sua fuisset; quid responderemus? Causam fortasse diceremus apud victorem, quemadmodum apud vos dicimus. Hoc enim, legatos utroque de pace mittendo, consecuti sumus, ut ne ab utraque parte gratiam iniremus; ab altera etiam crimen & periculum esset. Quanquam Perseus vere objiceret, id quod vos non potestis, Patres conscripti, nos principio belli misisse ad vos legatos, qui pollicerentur vobis, quæ ad bellum opus essent; navalibus, armis, juventute nostra, sicut prioribus bellis, ad omnia paratos fore. Ne præstaremus, per vos stetit, qui de quacunque causa tum aspernati nostra auxilia estis. Neque fecimus igitur quidquam tanquam hostes, neque bonorum sociorum defuimus officio; sed a vobis prohibiti præstare fuimus. Quid igitur? nihilne factum neque dictum est in civitate vestra, Rhodii, quod nolletis, quo merito offenderetur populus Romanus? Hinc jam non, quod factum est, defensurus sum, (non adeo insanio) sed publicam causam a privatorum culpa segregaturus. Nulla enim est civitas, quæ non & improbos cives aliquando, & imperitam multitudinem semper habeat. Etiam apud vos fuisse audiui, qui assentando multitudini grassarentur: & secessisse aliquando a vobis plebem, nec in potestate vestra rempublicam fuisse. Si hoc in hæ

tam bene morata civitate accidere potuit, mirari quisquam potest, aliquos fuisse apud nos, qui, regis amicitiam petentes, plebem nostram consiliis depravarent? qui tamen nihil ultra valuerunt, quam ut in officio cessaremus. Non præteribo id, quod gravissimum est in hoc bello crimen civitatis nostræ. Legatos eodem tempore & ad vos, & ad Persea de pace misimus: quod infelix consilium furiosus (ut postea audivimus) orator stultissimum fecit: quem sic locutum constat, tanquam C. Popillius legatus Romanus, quem ad submovendos a bello Antiochum & Ptolemæum reges misistis, loqueretur. Sed tamen ea, sive superbia sive stultitia appellanda est, eadem, quæ apud vos, & apud Persea fuit. Tam civitatum, quam singulorum hominum mores sunt: gentes quoque aliæ iracundæ, aliæ audaces, quædam timidæ: in vinum, in Venerem proniores aliæ sunt. Atheniensium populum fama est celerem & supra vires audacem esse ad conandum: Lacedæmoniorum cunctatorem, & vix in ea, quibus fudit, ingredientem. Non negaverim, & totam Asiæ regionem inaniora parere ingenia, & nostrorum tumidiorem sermonem esse, quod excellere inter finitimas civitates videamur; & id ipsum non tam viribus nostris, quam vestris honoribus ac judiciis. Satis quidem & tunc in præsentia castigata illa legatio erat, cum tam tristi responso vestro dimissa. si tum parum ignominie pensum est, hæc certe tam miserabilis ac supplex legatio etiam insolentioris, quam illa fuit, legationis satis magnum piaculum esset. Superbiam, verborum præsertim, iracundi oderunt, prudentes irrident; utique si inferioris adversus superiorem est: capitali pœna nemo unquam dignam judicavit. Id enim-

vero periculum erat, ne Romanos Rhodii contemnerent. Etiam Deos aliqui verbis ferocioribus increpant, nec ob id quemquam fulmine ictum audimus.

XXIV. Quid igitur superat, quod purgemus, si nec factum hostile ullum nostrum est, & verba tumidiora legati offensionem aurium, non perniciem civitatis, meruerunt? Voluntatis nostræ tacitæ velut litem æstimari vestris inter vos sermonibus audio, Patres conscripti: favisse nos regi, & illum vincere maluisse; ideo bello persequendos esse credunt. Alii vestrum, voluisse quidem nos hoc, non tamen ob id bello persequendos esse: neque moribus, neque legibus ullius civitatis ita comparatum esse, ut, si quis vellet inimicum perire, si nihil fecerit, quo id fiat, capitis damnetur. His, qui nos pœna, non crimine, liberant, grâtiâ quidem habemus: ipsi nobis hanc dicimus legem; si omnes volumus, quod arguimur, non distinguimus voluntatem à facto: omnes plectamur. Si alii principum nostrorum vobis, alii regi faverunt; non postulo, ut propter nos, qui partium vestrarum fuimus, regis fautores salvi sint: illud deprecor, ne nos propter illos pereamus. Non estis vos illis infestiores, quam civitas ipsa; & hoc qui sciebant, plerique eorum aut profugerunt, aut mortem sibi consciverunt. alii, damnati a nobis, in potestate vestra erunt, Patres conscripti. Ceteri Rhodii, sicut gratiam nullam meriti hoc bello, ita ne pœnam quidem, sumus. Priorum nostrorum benefactorum cumulus hoc, quod nunc cessatum in officio est, expleat. Cum tribus regibus gessistis bella per hos annos. ne plus obsit nobis, quod uno bello cessavimus, quam quod duobus bellis pro vobis pugnavimus. Philippum, Antiochum, Per-

sea, tanquam tres sententias, ponite. duæ nos absolvunt: una dubia est, ut gravior sit. Illi de nobis si judicarent, damnati essemus. vos judicatẽ, Patres conscripti, sit Rhodus in terris, an funditus deleatur. Non enim de bello deliberatis, Patres conscripti, quod inferre potestis, gerere non potestis; cum nemo Rhodiorum arma adversus vos laturus sit. Si perseverabitis in ira, tempus a vobis petemus, quo hanc funestam legationem domum referamus: omnia libera capita, quidquid Rhodiorum virorum, feminarum est, cum omni pecunia nostra naves conscendemus; ac, relictis penetibus publicis privatisque, Romam veniemus: & omni auro & argento, quidquid publici, quidquid privati est, in comitio, in vestibulo curiæ vestræ, cumulado, corpora nostra conjugumque ac liberorum vestræ potestati permittemus, hic passuri, quodcunque patiendum erit. procul ab oculis nostris urbs nostra diripiatur, incendatur. Hostes Rhodios esse, Romani judicare possunt: est tamen & nostrum aliquod de nobis iudicium, quo nunquam judicabimus nos vestros hostes: nec quidquam hostile, etiam si omnia patiemur, faciemus.

XXV. Secundum talem orationem universi rursus prociderunt, ramosque oleæ supplices jactantes, tandem excitati, curia excefferunt. Tunc sententiæ interrogari cœptæ. Infestissimi Rhodiis erant, qui consules prætoresve aut legati gesserant in Macedonia bellum. Plurimum causam eorum adjuvit M. Porcius Cato; qui, asper ingenio, tum lenem mitemque senatorem egit. Non inferam simulacrum viri copiosi, quæ dixerit, referendo: ipsius oratio scripta exstat, Originum quinto libro inclusa. Rho-

diis responsum ita redditum est, ut nec hostes fierent, nec focii permanerent. Philocrates & Astymedes principes legationis erant. Partem cum Philocrate renuntiare Rhodum legationem placuit, partem cum Astymede Romæ subsistere, quæ agerentur, sciret, certioresque suos faceret. In præsentia deducere ante certam diem ex Lycia Cariaque iusserunt præfectos. Hæc Rhodum nuntiata, quæ per se tristitia fuissent, quia majoris mali levatus erat timor, cum bellum timuissent, in gaudium renuntiata venterunt. Itaque extemplo coronam viginti millium aureorum decreverunt: Theodotum, præfectum classis, in eam legationem miserunt. Societatem ab Romanis ita volebant peti, ut nullum de ea re scitum populi fieret, aut literis mandaretur: quod, nisi impetrarent, major repulsis ignominia esset. Præfecti classis id unius erat jus, ut agere de ea re sine rogatione ulla perlata posset. nam ita per tot annos in amicitia fuerant, ut sociali foedere se cum Romanis non illigarent, ob nullam aliam causam, quam ne spem regibus abscinderent auxilii sui, si cui opus esset, neu sibi ipsis fructus ex benignitate & fortuna eorum percipiendi. Tunc utique petenda societas videbatur; non quæ tutiores eos ab aliis faceret, (nec enim timebant quemquam, præter Romanos) sed quæ ipsis Romanis minus suspectos. Sub idem fere tempus & Caunii descivere ab his, & Mylasenses Euromensium oppida occuparunt. Non ita fracti animi civitatis erant, ut non sentirent, si Lycia & Caria ademtæ ab Romanis forent, cetera aut se ipsa per defectionem liberarent, aut a finitimis

occuparentur, includi se insulæ parvæ & sterilis agrî litoribus, quæ nequaquam alere tantæ urbis populum posset. missa igitur juventute, propere & Caurios, quanquam Cibratarum adsciverant auxilia, coegerunt imperio parere; & Mylasenses Alabandenosque, qui, Euromensium provincia adempta, ad ipsos conjuncto exercitu venerunt, circa Orthosiam acie vicerunt.

XXVI. Dum hæc ibi, alia in Macedonia, alia Romæ geruntur; interim in Illyrico L. Anicius, rege Gentio, sicut ante dictum est, in potestatem redacto, Scodraë, quæ regia fuerat, præsidio imposito Gabinium præfecit, Rhizoni & Olcinio urbibus opportunis C. Licinium. Præpositis his Illyricis, cum reliquo exercitu in Epirum est profectus. ubi prima Phanota ei dedita, tota multitudine cum insulis obviam effusa. hic præsidio imposito, in Molossidem transgressus: cujus omnibus oppidis, præter Passaronem, & Tecmonem, & Phylacen, & Horreum, receptis, primum ad Passaronem ducit. Antinous & Theodotus principes ejus civitatis erant, insignes & favore Persei, & odio adversus Romanos: iidem universæ genti auctores desciscendi ab Romanis. Hi conscientia privatæ noxæ, quia ipsis nulla spes veniæ erat, ut communi ruina patriæ opprimerentur, clausurunt portas, multitudinem, ut mortem servituti præponerent, hortantes. Nemo adversus præpotentes viros hiscere audebat. Tandem Theodotus quidam, nobilis & ipse adolescens, cum major a Romanis metus timorem a principibus suis vicisset, *Quæ vos rabies*, inquit,

*agitat, qui duorum hominum noxæ civitatis accessionem facitis? Equidem pro patria qui letum oppetissent, sæpe fando audiui: qui patriam pro se perire æquum censerent, hi primi inventi sunt. Quin aperimus portas, & imperium accipimus, quod orbis terrarum accepit? Hæc dicentem cum multitudo sequeretur, Antinous & Theodotus in primam stationem hostium irruerunt, atque ibi, offerentes se ipsi vulneribus, interfecti. urbs dedita est Romanis. Simili pertinacia Cephalî principis clausum Tecmonem, ipso interfecto, per deditionem recepit. Nec Phylace, nec Horreum, oppugnationem tulerunt. Pacata Epiro, divisisque in hiberna copiis per opportunas urbes, regressus ipse in Illyricum, Scodræ, quo quinque legati ab Roma venerant, evocatis ex tota provincia principibus, conventum habuit. Ibi pro tribunali pronuntiavit de sententia consilii: *Senatum populumque Romanum Illyrios esse liberos jubere. præsidia ex omnibus oppidis, arcibus, & castellis sese deducturum. Non solum liberos, sed etiam immunes fore Issenses, & Taulantios, Dassaretiorum Pirustas, Rhizonitas, Olciniatas, quod, incolumi Gentio, ad Romanos defecissent. Daorseis quoque immunitatem dare; quod, relicto Caravantio, cum armis ad Romanos transfissent. Scodrensisibus, & Dassarensibus, & Selepitanis, ceterisque Illyriis, vectigal dimidium ejus, quod regi pendissent. Inde in tres partes Illyricum divisit. unam eam fecit, quæ supra dicta est; alteram Labeatas omnes; tertiam Agrauonitas, & Rhizonitas, & Olciniatas, accolæque eorum. hac formula dicta in Illyrico, ipse in Epiri Passaronem in hiberna rediit.**

XXVII. Dum hæc in Illyrico geruntur, Paullus ante adventum decem legatorum Q. Maximum filium, jam ab Roma regressum, ad Æginium & Agassas diripiendas mittit: Agassas, quod, cum Marcio consuli tradidissent urbem, petita ultro societate Romana, defecerant rursus ad Persea: Æginiensium novum crimen erat. famæ de victoria Romanorum fidem non habentes, in quosdam militum, urbem ingressos, hostiliter sævierant. Ad Æniorum quoque hostiliter urbem diripiendam L. Postumium misit, quod pertinacius, quam finitimæ civitates, in armis fuerant. Autumni fere tempus erat; cuius temporis initio circumeundam Græciam, visendaque, quæ nobilitata fama magis auribus accepta sunt, quam oculis noscuntur, ut statuit, præposito castris C. Sulpicio Gallo, profectus cum haud magno comitatu, tegentibus latera Scipione filio & Athenæo Eumenis regis fratre, per Thessaliam Delphos petit, inclitum oraculum: ubi, sacrificio Apollini factò, inchoatas in vestibulo columnas, quibus imposituri statuas regis Persei fuerant, suis statuis victor destinavit. Lebadia quoque templum Jovis Trophonii adiit. ibi cum vidisset os specus, per quod oraculo utentes sciscitatum Deos descendunt, sacrificio Jovi Hercynnæque factò, quorum ibi templum est, Chalcidem ad spectaculum Euripi * ævoque ante insulæ, ponte continenti junctæ, descendit. A Chalclide Aulidem trajicit, trium millium spatio distantem, portum inclitum statione quondam mille navium Agamemnoniæ classis, Dianæque templum, ubi navibus cursum ad Trojam, fi-

lia víctima aris admota, rex ille regum petiit. Inde Oropum Atticæ ventum est; ubi pro Deo vates Amphilocho colitur, templumque vetustum est, fontibus rivisque circa amœnum. Athenas inde, plenas quidem & ipsas vetustate famæ, multa tamen visenda habentes: arcem, portus, muros Piræum urbi jungentes, navalia magnorum imperatorum, simulacra Deorum hominumque, omni genere & materiæ & artium insignia.

XXVIII. Sacrificio Minervæ præfidi arcis in urbe facto profectus, Corinthum altero die pervenit. urbs erat tunc præclara ante excidium. arx quoque & Isthmus præbuere spectaculum: arx inter omnia in immanem altitudinem edita, scatens fontibus: Isthmus duo maria, ab occasu & ortu solis finitima, arctis faucibus dirimens. Sicyonem inde & Argos nobiles urbes adit: inde haud parem opibus Epidaurum, sed inclitam Æsculapii nobili templo; quod, quinque millibus passuum ab urbe distans, nunc vestigiis revulsorum donorum, tum donis dives erat, quæ remediorum salutarium ægri mercedem sacraverant Deo. Inde Lacedæmonem adit, non operum magnificentia, sed disciplina institutisque memorabilem: unde per Megalopolin Olympiam ascendit. Ubi & alia quidem spectanda visa, &, Jovem velut præsentem intuens, motus animo est. Itaque, haud secus quam si in Capitolio immolaturus esset, sacrificium amplius solito apparari iussit. Ita peragrata Græcia, ut nihil eorum, quæ quisque Persei bello privatim aut publice sensisset, inquireret, ne cujus metu sollicitaret animos sociorum, Demetriadem

cum revertit, in itinere sordidata turba Ætolorum occurrit; mirantique & percontanti, quid esset, defertur, quingentos quinquaginta principes ab Lycisco & Tisippo, circumfesso senatu per milites Romanos, missos a Bæbio præside, interfectos; alios in exilium actos esse: bonaque eorum, qui interfecti essent, & exsulum possidere, qui arguebant. Jussis Amphipolim adesse, ipse, convento Cn. Octavio Demetriade, postquam fama accidit, trajecisse jam mare decem legatos, omnibus aliis omissis, Apolloniam ad eos pergit. quo cum Perseus obviam Amphipoli nimis soluta custodia processisset, (id diei iter est) ipsum quidem benigne allocutus est: ceterum, postquam in castra ad Amphipolim venit, graviter increpuisse traditur C. Sulpicium: primum, quod Persea tam procul a se vagari per provinciam passus esset: deinde, quod adeo indulgisset militibus, ut nudare tegulis muros urbis ad tegenda hibernacula sua pateretur. referrique tegulas & refarciri tecta, sicut fuerant, jussit. Et Persea quidem cum majore filio Philippo, traditos A. Postunio, in custodiam misit: filiam cum minore filio, a Samothrace accitos Amphipolim, omni liberali cultu habuit.

XXIX. Ipse, ubi dies venit, quo adesse Amphipoli denos principes civitatum jusserat, literasque omnes, quæ ubique depositæ essent, & pecuniam regiam conferri, cum decem legatis, circumfusa omni multitudine Macedonum, in tribunali confedit. Assuetis regio imperio tamen novum formam terribilem præbuit tribunal, submotor aditus, præco, accensus, insueta omnia oculis auribusque;

quæ vel socios, nedum hostes victos, terrere possent. Silentio per præconem factò, Paullus Latine, quæ senatui, quæ sibi ex consilii sententia visa essent, pronuntiavit: ea Cn. Octavius prætor (nam & ipse aderat) interpretata sermone Græco referebat. *Omniū primum liberos esse jubere Macedonas, habentes urbes easdem agrosque, utentes legibus suis, annuos creantes magistratus: tributum dimidium ejus, quod pependissent regibus, pendere populo Romano. Deinde in quatuor regiones dividi Macedoniam. unam fore & primam partem, quod agri inter Strymonem & Nessum amnem sit: accessurum huic parti trans Nessum, ad orientem versum, qua Perseus tenuisset vicos, castella, oppida, præter Ænum, & Maroneam, & Abdera; trans Strymonem autem vergentia ad occasum, Bisalticam omnem cum Heraclea, quam Sinticen appellant. Secundam fore regionem, quam ab ortu Strymo amplecteretur amnis, præter Sinticen Heracleam & Bisaltas: ab occasu qua Axius terminaret fluvius, additis Pæonibus, qui prope Axium flumen regionem orientis colerent. Tertia pars facta, quam Axius ab oriente, Peneus amnis ab occasu, cingunt: ad septemtrionem Bora mons objicitur. adjecta huic parti regio Pæoniæ, qua ab occasu præter Axium amnem porrigitur: Edessa quoque & Berœa eodem concesserunt. Quarta regio trans Boram montem, una parte confinis Illyrico, altera Epiro. Capita regionum, ubi concilia fierent, primæ regionis Amphipolim, secundæ Theſsalonicen, tertiæ Pellam, quartæ Pelagoniam fecit. Eo concilia suæ cujusque regionis indici, pecuniam conferri, ibi magistratus creari jussit. Pronuntiavit*

deinde, *neque connubium, neque commercium agrorum ædificiorumque inter se placere cuiquam extra fines regionis suæ esse. Metalla quoque auri atque argenti non exerceri: ferri & æris permitti. vectigal exercentibus dimidium ejus impositum, quod pendissent regi. Et sale invec̃to uti vetuit. Dardanis repetentibus Pæoniam, quod & sua fuisset, & continens esset finibus suis, omnibus dare libertatem pronuntiavit, qui sub regno Persei fuissent. Post non impetratam Pæoniam, salis commercium dedit: tertiæ regioni imperavit, ut Stobos Pæoniæ deberent, pretiumque statuit. Navalem materiam & ipsos cædere, & alios pati vetuit. Regionibus, quæ affines barbaris essent, (excepta autem tertia, omnes erant) permisit, ut præsidia armata in finibus extremis haberent.*

XXX. Hæc, pronuntiata primo die conventus, varie affecerunt animos. Libertas præter spem data arrexit, & levatum annuum vectigal. Regionatim commerciis interruptis ita videri lacerata, tanquam animalia in artus, alterum alterius indigentes, distracta: adeo, quanta Macedonia esset, quam divisui facilis, & a se ipsa quæque contempta pars esset, Macedones quoque ignorabant. Pars prima Bisaltas habet, fortissimos viros, (trans Nestum amnem incolunt & circa Strymonem) & multas frugum proprietates, & metalla, & opportunitatem Amphipolis: quæ objecta claudit omnes ab oriente sole in Macedoniam aditus. Secunda pars celeberrimas urbes, Thessalonicen & Cassandriam, habet; ad hoc Pallenen, fertilem ac frugiferam ter-

ram : maritimas quoque opportunitates ei præbent portus ad Toronen ac montem Atho , (Æneæ vocant hunc) alii ad insulam Eubœam, alii ad Hellespontum opportune versi. Tertia regio nobiles urbes , Edeffam & Berœam & Pellam , habet , & Vettiorum bellicosam gentem : incolas quoque permultos Gallos & Illyrios, impigros cultores. Quartam regionem Eordæi & Lyncestæ & Pelagones incolunt ; juncta his Atintania , & Stymphalis , & Elimiotis. frigida hæc omnis , duraque cultu , & aspera plaga est : cultorum quoque ingenia terræ similia habet. ferociores eos & accolæ barbari faciunt ; nunc bello exercentes , nunc in pace miscentes ritus suos. Divisæ itaque Macedoniæ partium usibus separatis , quanta universos teneat Macedonas , formula dicta , cum leges quoque se daturum ostendisset.

XXXI. Ætoli deinde citati : in qua cognitione magis , utra pars Romanis , utra regi favisset , quæsitum est , quam utri fecissent injuriam , aut accepissent. Noxa liberati interfectores : exilium pulsæ æque ratum fuit , ac mors interfectis. A. Bæbius unus est damnatus , quod milites Romanos præbuiisset ad ministerium cædis. Hic eventus Ætolorum causæ in omnibus Græciæ gentibus populisque eorum , qui partis Romanorum fuerant , inflavit ad intolerabilem superbiam animos ; & obnoxios pedibus eorum subjecit , quos aliqua parte suspicio favoris in regem contigerat. Tria genera principum in civitatibus erant : duo , quæ adulando aut Romanorum imperium , aut amicitiam re-

gum, sibi privatim opes oppressis faciebant civitatibus: medium unum, utrique generi adversum, libertatem & leges tuebatur. His ut major apud suos caritas, ita minor apud externos gratia erat. Secundis rebus elati Romanorum partis ejus fautores, soli tum in magistratibus, soli in legationibus erant. Hi cum frequentes & ex Peloponneso, & ex Bœotia, & ex aliis Græciæ conciliis adessent, implevere aures decem legatorum: *Non eos tantum, qui se propalam per vanitatem jactassent, tanquam hospites & amicos Persei, sed multo plures alios ex occulto fuisse. reliquos per speciem tuendæ libertatis in conciliis adversus Romanos omnia instruxisse. nec aliter eas mansuras in fide gentes, nisi, fractis animis partium, aleretur confirmareturque auctoritas eorum, qui nihil præter imperium Romanorum spectarent.* Ab his editis nominibus, evocati literis imperatoris ex Ætolia, Acarnaniaque, & Epiro, & Bœotia, qui Romam ad causam dicendam sequerentur: in Achajam ex decem legatorum numero profecti duo, C. Claudius & Cn. Domitius, ut ipsi edicto evocarent. Id duabus de causis factum: una, quod fiduciæ plus animorumque esse Achæis ad non parendum credebant, & forsitan etiam in periculo fore Callicratem & ceteros criminum auctores delatoresque: altera, cur præsentem evocarent, causa erat, quod ex aliis gentibus principum literas deprehensas in commentariis regiis habebant: in Achæis cæcum erat crimen, nullis eorum literis inventis. Ætolis dimissis, Acarnanum citata gens: in his nihil novatum, nisi quod Leucas exempta est

Acarnanum concilio. Quærendo deinde latius, qui publice aut privatim partium regis fuissent, in Asiam quoque cognitionem extendere: & ad Antissan in Lesbo insula diruendam, traducendos Methymnam Antissæos, Labeonem miserunt; quod Antenorem, regium præfectum, quo tempore cum lembis circa Lesbum est vagatus, portu receptum com meatibus juvissent. Duo securi percussi viri insignes: Andronicus Andronici filius Ætolus, quod, patrem secutus, arma contra populum Romanum tulisset; & Neo Thebanus, quo auctore societatem cum Perseo junxerant.

XXXII. His rerum externarum cognitionibus interpositis, Macedonum rursus advocatum concilium: pronuntiatum, *Quod ad statum Macedoniæ pertinebat, senatores, quos Synedros vocant, legendos esse, quorum consilio respublica administraretur.* Nomina deinde sunt recitata principum Macedonum, quos cum liberis, majoribus quam quindecim annos natis, præcedere in Italiam placeret. Id, prima specie sævum, mox apparuit multitudini Macedonum pro libertate sua esse factum. nominati sunt enim regis amici purpuratique, duces exercituum, præfecti navium aut præsidiorum; servire regi humiliter, aliis superbe imperare assueti: prædivites alii, alii, quos fortuna non æquarent, his sumtibus pares: regius omnibus victus vestitusque: nulli civilis animus, neque legum neque libertatis æquæ patiens. Omnes igitur, qui in aliquibus ministeriis regiis, etiam qui in minimis legationibus fuerant, jussi Macedonia excedere, atque in

Italiam ire: qui non paruisset imperio, mors denuntiata. Leges Macedoniæ dedit cum tanta cura, ut non hostibus victis, sed fociis bene meritis, dare videretur: & quas ne usus quidem longo tempore (qui unus est legum corrector) experiendo argueret. Ab seriis rebus ludicrum, quod ex multo ante præparato, & in Asiæ civitates, & ad reges missis, qui denuntiarent, & cum circumiret ipse Græciæ civitates, indixerat principibus, magno apparatu Amphipoli fecit. Nam & artificum omnis generis, qui ludicram artem faciebant, ex toto orbe terrarum multitudo, & athletarum, & nobilium equorum convenit: & legationes cum victimis, & quidquid aliud Deorum hominumque causa fieri magnis ludis in Græcia solet. Ita factum est, ut non magnificentiam tantum, sed prudentiam in dandis spectaculis, ad quæ rudes tum Romani erant, admirarentur. Epulæ quoque legationibus paratæ & opulentia & cura eadem. Vulgo dictum ipsius ferebant, & convivium instruere, & ludos parare, ejusdem esse, qui vincere bello sciret.

XXXIII. Editio ludicro omnis generis, clypeisque æreis in naves impositis, cetera omnis generis arma, cumulata in ingentem acervum, precatus Martem, Minervam, Luamque matrem, & ceteros Deos, quibus spolia hostium dicare jus fasque est, ipse imperator, face subdita, succendit. deinde circumstantes tribuni militum pro se quisque ignes conjecerunt. Notata est in illo conventu Europæ Asiæque, undique partim ad gratulationem, partim ad spectaculum contracta multitudo, tantis

navalibus terrestribusque exercitibus, ea copia rerum, ea vilitas annonæ, ut & privatis, & civitatibus, & gentibus, dona data pleraque ejus generis sint ab imperatore, non in usum modo præsentem, sed etiam quod domos aveherent. Spectaculo fuit ei, quæ venerat, turbæ non scenicum magis ludicrum, non certamina hominum, aut curricula equorum, quam præda Macedonica omnis, ut viseretur, expōita statuarum, tabularumque, textilium, & vasorum ex auro & argento & ære & ebore factorum ingenti cura in ea regia: ut non in præsentem modo speciem, qualibus referta regia Alexandriæ erat, sed in perpetuum usum fierent. Hæc, in classem imposita, devehenda Roman Cn. Octavio data. Paullus, benigne legatis dimissis, transgressus Strymonem, mille passuum ab Amphipoli castra posuit: inde profectus, Pellam quinto die pervenit. Prætergressus urbem, ad Spelæum (quod vocant) biduum moratus, P. Nasicam, & Q. Maximum filium cum parte copiarum ad depopulandos Illyrios, qui Persea juverant bello, misit, jussos ad Oricum sibi occurrere: ipse, Epirum petens, quintisdecimis castris Passaronem pervenit.

XXXIV. Haud procul inde Anicii castra aberant. ad quem literis missis, ne quid ad ea, quæ fierent, moveretur; *senatum prædam Epiri civitatum, quæ ad Persea defecissent, exercitui dedisse*, submissis centurionibus in singulas urbes, qui se dicerent ad præsidia deducenda venisse, ut liberi Epirotæ, sicut Macedones, essent, denos principes ex singulis evocavit civitatibus: quibus cum denun-

tiaffet, ut aurum atque argentum in publicum proferretur, per omnes civitates cohortes dimisit. ante in ultiores, quam in propiores, profecti, ut uno die in omnes perveniretur. Edita tribunis centurionibusque erant, quæ agerentur: mane omne aurum argentumque collatum: hora quarta signum ad diripiendas urbes datum est militibus: tantaque præda fuit, ut in equitem quadringeni denarii, peditibus duceni dividerentur, centum quinquaginta millia capitum humanorum abducerentur. Muri deinde direptarum urbium diruti sunt: ea fuere oppida circa septuaginta. Vendita præda omnium, de ea summa militi numeratum est. Paullus ad mare Oricum descendit, nequaquam, ut ratus erat, expletis militum animis: qui, tanquam nullum in Macedonia gessissent bellum, expertes regiæ prædæ esse indignabantur. Orici cum missas cum Scipione Nasica Maximoque filio copias invenisset, exercitu in naves imposito, in Italiam trajecit. Et post paucos dies Anicius, conventu reliquorum Epirotarum Acarnanumque acto, jussisque in Italiam sequi principibus, quorum cognitionem causæ reservarat, & ipse, navibus expectatis, quibus usus Macedonicus exercitus erat, in Italiam trajecit. Cum hæc in Macedonia Epiroque gesta sunt, legati, qui cum Attalo ad finiendum bellum inter Gallos & regem Eumenum missi erant, in Asiam pervenerunt. Induciis per hiemem factis, & Galli domos abierant, & rex in hiberna concesserat Pergamum, gravique morbo æger fuerat. Ver primum ex domo excivit: jamque Synnada pervenerant, cum Eumenes ad Sardes un-

dique exercitum contraxerat. Ibi & Romani Solovettium ducem Gallorum Synnadis allocuti, & Attalus cum eis profectus; sed castra Gallorum intrare eum non placuit, ne animi ex disceptatione irritarentur. P. Licinius cum regulo Gallorum est locutus, retulitque, ferociorem eum deprecando factum: ut mirum videri posset, inter tam opulentos reges, Antiochum Ptolemæumque, tantum legatorum Romanorum verba valuisse, ut exemplo pacem facerent; apud Gallos nullius momenti fuisse.

XXXV. Romam primum reges captivi, Perseus & Gentius, in custodiam cum liberis abducti; dein turba alia captivorum: tum quibus Macedonum denuntiatum erat, ut Romam venirent, principumque Græciæ. nam hi quoque non solum præsentis exciti erant, sed etiam, si qui apud reges esse dicebantur, literis arcessiti sunt. Paullus ipse post dies paucos regia nave ingentis magnitudinis, quam sexdecim versus remorum agebant, ornata Macedonicis spoliis, non insignium tantum armorum, sed etiam regionum textilium, adverso Tiberi ad urbem est subvectus, completis ripis obviam effusa multitudine. Paucos post dies Anicius & Octavius classe sua advecti. Tribus iis omnibus decretus est ab senatu triumphus: mandatumque Q. Cassio prætori, cum tribunis plebis ex auctoritate Patrum ageret, rogationem ad plebem ferrent, ut iis, quo die urbem triumphantes inveherentur, imperium esset. Intacta invidia media sunt: ad summa ferme tendit. nec de Anicii, nec de Octavii triumpho dubitatum

est: Paullum, cui ipsi quoque se comparare erubuisse, obrectatio carpsit. Antiqua disciplina milites habuerat; de præda parcius, quam speraverant ex tantis regiis opibus, dederat nihil relicturis, (si aviditati indulgeretur) quod in ærarium deferret. Totus Macedonicus exercitus imperatori erat negligenter affuturus comitiis ferendæ legis. Sed eos Ser. Sulpicius Galba, qui tribunus militum secundæ legionis in Macedonia fuerat, privatim imperatori inimicus, prensando ipse, & per suæ legionis milites sollicitando, stimulaverat, ut frequentes ad suffragium adessent: *Imperiosum ducem & malignum antiquando rogationem, quæ de triumpho ejus ferretur, ulciscerentur. plebem urbanam secuturam esse militum judicia. Pecuniam illum dare non potuisse, militem honorem dare posse? ne speraret ibi fructum gratiæ, ubi non meruisset.*

XXXVI. His incitatis, cum in Capitolio rogationem eam Ti. Sempronius tribunus plebis ferret, & privatis lege dicendi locus esset, nec ad suadendum, ut in re minime dubia, quisquam procederet; Ser. Galba repente processit, & a tribuno postulavit, *Ut, quoniam hora jam octava diei esset, nec satis temporis ad demonstrandum haberet, cur L. Æmilius non juberent triumphare, in posterum diem differrent, & mane eam rem agerent. Integro sibi die ad causam eam orandam opus esse.* Cum tribunus dicere eo die, si quid vellet, juberet, in noctem rem dicendo extraxit, referendo admonendoque, *Exacta acerbè munia militiæ; plus laboris, plus periculi, quam desiderasset res, injunctum; contra in præmiis, in honori-*

bus, omnia arctata: militiamque, si talibus succedat ducibus, horridiorem asperiolemque bellantibus, eandem victoribus inopem atque inhonoratam futuram. Macedonas in meliore fortuna, quam milites Romanos, esse. Si frequentes postero die ad legem antiquandam adessent, intellecturos potentes viros, non omnia in ducis, aliquid & in militum manu esse. His vocibus incitati, postero die milites tanta frequentia Capitolium compleverunt, ut aditus nulli præterea ad suffragium ferendum esset. Intro vocatæ primæ tribus cum antiquarent, concursus in Capitolium principum civitatis factus est, Indignum facinus esse clamitantium, L. Paullum, tanti belli victorem, dispoliari triumpho. obnoxios imperatores tradi licentiæ atque avaritiæ militari: in uno nimis se per ambitionem peccare. Quid, si domini milites imperatoribus imponantur? In Galbam pro se quisque probra ingerere. Tandem, hoc tumultu sedato, M. Servilius, qui consul & magister equitum fuerat, ut de integro eam rem agerent, ab tribunis petere, dicendique sibi ad populum potestatem facerent. Tribuni, cum ad deliberandum secessissent, victi auctoritatibus principum, de integro agere cœperunt, revocatosque se easdem tribus renuntiarent, si M. Servilius aliique privati, qui dicere vellent, dixissent.

XXXVII. Tum Servilius: *Quantus imperator L. Æmilius fuerit, Quirites, si ex alia re nulla æstimari possit, vel hoc satis erat, quod, cum tam seditiosos & leves milites, tam nobilem, tam temerarium, tam eloquentem ad instigandam multitudinem inimicum in castris haberet, nullam in exercitu seditionem habuit.*

Eadem severitas imperii, quam nunc oderunt, tunc eos continuit. Itaque, antiqua disciplina habiti, neque fecerunt. Ser. quidem Galba, si in L. Paulo accusando atrocitatem ponere, & documentum eloquentiæ dare voluit, non triumphum impedire debuit, quem, si nihil aliud, senatus justum esse judicaverat: sed postero die, quam triumphatum est, privatum eum visurus esset, nomen deferret, & legibus interrogaret; aut serius paulo, cum primum magistratus ipse cepisset, diem diceret, inimicum ad populum accusaret. Ita & pretium recte facti triumphum haberet L. Paullus pro egregie bello gesto; & pœnam, si quid & vetere gloria sua & nova indignum fecisset. Sed videlicet, cui crimen nullum, nullum probrum dicere poterat, ejus obrectare laudes voluit. Diem integrum hesterno die ad accusandum L. Paullum petiit: quatuor horas, quantum supererat diei, dicendo absumpsit. Quis unquam tam nocens reus fuit, cujus vitia vitæ tot horis expromi non possent? Quid interim objecit, quod L. Paullus, si causam dicat, negatum velit? Duas mihi aliquis conciones parumper faciat: unam militum Macedonicorum; puram alteram, integrioris judicii, & a favore & odio, universo judicante populo Romano. Apud concionem togatam & urbanam prius reus agatur. Quid apud Quirites Romanos, Ser. Galba, diceres? illa enim tibi tota abscisa oratio esset: « In statione severius & intentius institisti; vigiliæ » acerbius & diligentius circumitæ sunt; operis plus, » quam antea, fecisti, cum ipse imperator & exactor cir- » cumires; eodem die & iter fecisti, & in aciem ex itinere » re duxisti. Ne victorem quidem te acquiescere passus est: » statim ad persequendos hostes duxit. Cum te præda

» partienda locupletem facere posset, pecuniam regiam
 » translaturus in triumpho est, & in ærarium laturus. »
 Hæc sicut ad militum animos stimulandos aliquem aculeum habent, qui parum licentiæ, parum avaritiæ suæ inservitum censent; ita apud populum Romanum nihil valuisse: qui, ut vetera atque audita a parentibus suis non repetat, quæ ambitione imperatorum clades acceptæ sint, quæ severitate imperii victoriæ partæ, proximo certe Punico bello, quid inter M. Minucium magistrum equitum & Q. Fabium Maximum dictatorem interfuerit, meminit. Itaque accusatorem id scire potuisse, & supervacaneam defensionem Paulli fuisse. Transeat ad alteram concionem: nec Quirites vos, sed milites videor appellaturus, si nomen hoc saltem ruborem incutere, & verecundiam aliquam imperatoris violandi afferre possit.

XXXVIII. Equidem ipse aliter affectus animo sum, qui apud exercitum mihi loqui videar, quam paulo ante eram, cum ad plebem urbanam spectabat oratio. Quid etiam dicitis, milites? Aliquis est Romæ, præter Persea, qui triumphari de Macedonibus nolit? & eum non iisdem manibus discerpitis, quibus Macedonas vicistis? Vincere vos prohibuisset, si potuisset, qui triumphantes urbem inire prohibet. Erratis, milites, si triumphum imperatoris tantum, & non militum quoque & universi populi Romani, esse decus censetis. Non unius hoc Paulli. Multi etiam, qui ab senatu non impetrarunt triumphum, in monte Albano triumpharunt. Nemo L. Paullo magis eripere decus perfecti belli Macedonici potest, quam C. Lutatius primi Punici belli, quam P. Cornelio secundi, quam illis, qui post eos triumphave-

runt. Nec L. Paullum minorem aut majorem imperato-
rem triumphus facit. militum magis in hoc universi-
que populi Romani fama agitur. primum ne invidiæ
& ingrati animi adversus clarissimum quemque civem
opinionem habeat, & imitari in hoc populum Athe-
niensem, lacerantem invidia principes suos, videatur.
Satis peccatum in Camillo a majoribus vestris est, quem
tamen ante receptam per eum a Gallis urbem violarunt :
satis insuper a vobis in P. Africano. Literni domici-
lium & sedem fuisse domitoris Africæ! Literni sepul-
crum ostendi! Erubescamus, gloria si par illis viris L.
Paullus, injuria vestra exæquetur. Hæc igitur primum
infamia deleatur, fœda apud alias gentes, damnosa
apud nostros. Quis enim aut Africani, aut Paulli,
similis esse in ingrata & inimica bonis civitate velit?
Si infamia nulla esset, & de gloria tantum ageretur,
qui tandem triumphus non communem nominis Romani
gloriam habet? Tot de Gallis triumphi, tot de Hispani-
is, tot de Pœnis, ipsorum tantum imperatorum, an
populi Romani, dicuntur? Quemadmodum non de
Pyrrho modo, nec de Hannibale, sed de Epirotis Car-
thaginensibusque triumphi acti sunt; sic non M. Cu-
rius tantum, nec P. Cornelius, sed Romani triumphar-
unt. Militum quidem propria est causa; qui & ipsi
laureati, & quisque donis, quibus donati sunt, insi-
gnes, triumphum nomine cient, suasque & imperatoris
laudes canentes per urbem incedunt. Si quando non de-
portati ex provincia milites ad triumphum sint, fre-
munt: & tamen tum quoque se absentes, quod suis ma-
nibus parta victoria sit, triumphare credunt. Si quis
vos interroget, milites, ad quam rem in Italiam depor-

cati, & non statim, confecta provincia, dimissi sitis; quid Romam frequentes sub signis veneritis, quid morimini hic, & non diversi domos quisque abeat vestras: quid aliud respondeatis, quam vos triumphantes videri velle? Vos certe victores conspici velle debebatis.

XXXIX. Triumphatum nuper de Philippo, patre hujus, & de Antiocho est. ambo regnabant, cum de his triumphatum est. De Perseo capto, in urbem cum liberis abducto, non triumphabitur? Quod si in curru scandentes Capitolium, auratos purpuratosque, ex inferiore loco L. Paullus in turba togatorum unus privatus interroget: L. Anici, Cn. Octavi, utrum vos digniores triumpho esse, an me, censetis? currum ei celsuri, & præ pudore videntur insignia ipsi sua tradituri. Et vos Gentium, quam Persea, duci in triumphum mavultis, Quirites, & de accessione potius belli, quam de bello, triumphari? Et legiones ex Illyrico laureatæ urbem inibunt, & navales socii? Macedonicæ legiones, suo abrogato, triumphos alienos spectabunt? Quid deinde tam opimæ prædæ, tam opulentæ victoriæ spoliis fiet? Quonam abdentur illa tot millia armorum, detracta corporibus hostium? an in Macedoniam remittentur? Quo signa aurea, marmorea, eburnea, tabulæ pictæ, textilia, tantum argenti celati, tantum auri, tanta pecunia regia? An noctu, tanquam furtiva, in ærarium deportabuntur? Quid illud spectaculum maximum, nobilissimus opulentissimusque rex captus, ubi victori populo ostendetur? Quos Syphax rex captus, accessio Punici belli, concursus fecerit, plerique meminimus. Perseus rex captus, Philippus & Alexander filii regis, tanta nomina, subtrahen-

zur civitatis oculis? Ipsum L. Paullum, bis consulem, domitorem Græciæ, omnium oculi conspiciere urbem curru ingredientem avent. Ad hoc fecimus consulem, ut bellum, per quadriennium ingenti etiam pudore nostro tractum, perficeret. cui sortito provinciam, cui proficiscenti præsagientibus animis victoriam triumphumque destinavimus, ei victori triumphum negaturi? & quidem non homines tantum, sed Deos etiam suo honore fraudaturi? Diis quoque enim, non solum hominibus, debetur. Utrum maiores vestri omnium magnarum rerum & principia exorsi ab Diis sunt, & finem eum statuerunt? Consul, proficiscens, prætorve, paludatis liCTORibus, in provinciam & ad bellum, vota in Capitolio nuncupat: victor, perpetrato eodem, in Capitolio triumphans ad eosdem Deos, quibus vota nuncupavit, merita dona populi Romani traducit. pars non minima triumphi est victimæ præcedentes; ut appareat, Diis grates agentem imperatorem ob rempublicam bene gestam redire. Omnes illas victimas, quas traducendas in triumpho vindicavit, alias alio cædente, mactate. illas quidem epulas senatus, quæ nec privato loco, nec publico profano, sed in Capitolio eduntur, utrum hominum voluptatis causa, an Deorum hominumque, auctore Ser. Galba turbaturi estis? L. Paulli triumpho portæ claudentur? Rex Macedonum Perseus cum liberis & turba alia captivorum, spolia Macedonum, citra flumen relinquentur? L. Paullus privatus, tanquam rure rediens, a porta domum ibit? Et tu, centurio, miles, quid de imperatore Paulo senatus decrerit potius, quam quid Ser. Galba fabuletur, audi: & hoc dicere me potius, quam illum, audi. Ille

nihil, præterquam loqui, & ipsum maledice ac maligne, didicit: ego ter & vicies cum hoste per provocationem pugnavi: ex omnibus, cum quibus manum conserui, spolia retuli. insigne corpus honestis cicatricibus, omnibus adverso corpore exceptis, habeo. Nudasse deinde se dicitur, &, quo quæque bello vulnera accepta essent, retulisse. quæ dum ostentat, adaperitis forte, quæ velanda erant, rumor inguinum proximis risum movit. Tum, Hoc quoque, quod ridetis, inquit, in equo dies noctesque persedendo habeo: nec magis me ejus, quam cicatricum harum, pudet pœnitetque; quando nunquam mihi impedimento ad rempublicam bene gerendam domi militiæque fuit. Ego hoc ferro sæpe vexatum corpus vetus miles adolescentibus militibus ostendi. Galba nitens & integrum denudet. Revocate, si videtur, tribuni, ad suffragium tribus; ego ad vos milites,

* * *

XL. Summam omnis captivi auri argenti que translati sestertiûm millies ducenties fuisse; Valerius Antias tradit: quæ haud dubie major aliquanto summa ex numero plaustrorum ponderibusque auri, argenti, generatim ab ipso scriptis, efficitur. Alterum tantum aut in bellum proximum absumtum, aut in fuga, cum Samothracen peteret, dissipatum tradunt: eoque id mirabilius erat, quod tantum pecuniæ intra triginta annos post bellum Philippi cum Romanis, partim ex fructu metallorum, partim ex vestigalibus aliis, coacervatum fuerat. Itaque admodum inops pecuniæ Philippus, Perseus contra

prædives, bellare cum Romanis cœpit. Ipse postremo Paullus in curru magnam, cum dignitate alia corporis, tum senectâ ipsa, majestatem præ se ferens: post currum inter alios illustres viros filii duo, Q. Maximus & P. Scipio: deinde equites turmatim, & cohortes peditum suis quæque ordinibus. Pediti in singulos dati centeni, duplex centurioni, triplex equiti. tantum pediti daturum fuisse credunt, & pro rata aliis, si aut non refragati honori ejus fuissent, aut benigne, hac ipsa summa nuntiata, acclamassent. Sed non Perseus tantum per illos dies documentum humanorum casuum fuit, in catenis ante currum victoris ducis per urbem hostium ductus; sed etiam victor Paullus, auro purpuraque fulgens. Nam duobus e filiis, quos, duobus datis in adoptionem, solos nominis, sacrorum, familiæque heredes retinuerat domi, minor, ferme duodecim annos natus, quinque diebus ante triumphum, major, quatuordecim annorum, triduo post triumphum decessit: quos prætextatos curru vehi cum patre, sibi ipsos similes prædestinantes triumphos, oportuerat. Paucis post diebus, data a M. Antonio tribuno plebis concione, cum de suis rebus gestis more ceterorum imperatorum disseruisset, memorabilis ejus oratio & digna Romano principe fuit.

XLI. *Quanquam & quam feliciter rempublicam administraverim, & quod duo fulmina donum meam per hos dies perculerint, non ignorare vos, Quirites, arbitror, cum spectaculo vobis nunc triumphus meus, nunc funera liberorum meorum fuerint; tamen paucis,*

quæso, sinatis me cum publica felicitate comparare eo, quo debeo, animo privatam meam fortunam. Profectus ex Italia, classẽ a Brundisio sole orto solvi; nona diei hora cum omnibus meis navibus Corcyram tenui. Inde quinto die Delphis Apollini pro me, exercitibusque, & classibus lustra sacrificavi. A Delphis quinto die in castra perveni: ubi exercitu accepto, mutatis quibusdam, quæ magna impedimenta victoriæ erant, progressus, quia inexpugnabilia castra hostium erant, neque cogi pugnare poterat rex, inter præsidia ejus saltum ad Petram evasi, & ad pugnam rege coactõ, acie vici: Macedoniam in potestatem populi Romani redegei, & quod bellum per quadriennium quatuor ante me consules ita gesserunt, ut semper successorĩ traderent gravius, id ego quindecim diebus perfeci. Aliarum deinde secundarum rerum velut proventus secutus. civitates omnes Macedoniae se dediderunt; gazæ regia in potestatem venit; rex ipse, tradentibus prope ipsis Diis, in templo Samothracum cum liberis est captus. Mihi quoque ipsi nimia jam fortuna mea videri, eoque suspecta esse. Maris pericula timere cœpi, in tanta pecunia regia in Italiam trajicienda, & victore exercitu transportando. Postquam omnia secundo navium cursu in Italiam pervenerunt, neque erat, quod ultra precarer, illud optavi, ut, cum ex summo retro volvi fortuna consueisset, mutationem ejus domus mea potius, quam respublica, sentiret. Itaque defunctam esse fortunam publicam mea tam insigni calamitate spero; quod triumphus meus, velut ad ludibrium casuum humanorum, duobus funeribus liberorum meorum est interpositus. Et, cum ego & Perseus nunc nobilia maxime sortis mortaliũ exemplũ

*spectemur, ille, qui ante se captivos captivus ipse duci liberos vidit, incolumes tamen eos habet: ego, qui de illo triumphavi, ab alterius funere filii curru in * * * ex Capitolio prope jam expirantem veni: neque ex tanta stirpe liberum superest, qui L. Æmilii Paulli nomen ferat. Duos enim, tanquam ex magna progenie liberorum in adoptionem datos, Cornelia & Fabia gens habent; Paulli in domo, præter se, nemo superest. Sed hanc cladem domus meæ vestra felicitas & secunda fortuna publica consolatur.*

XLII. Hæc, tanto dicta animo, magis confudere audientium animos, quam si miserabiliter orbitatem suam deflendo locutus esset. Cn. Octavius Kalendis Decembribus de rege Perseo navalem triumphum egit. Is triumphus sine captivis fuit, sine spoliis. Dedit fociis navalibus in singulos denarios septuagenos quinos; gubernatoribus, qui in navibus fuerant, duplex; magistris navium quadruplex. Senatus deinde habitus est. Patres censuerunt, ut Q. Cassius Persea regem cum Alexandro filio Albam in custodiam duceret; comites, pecuniam, argentum, instrumentum quod haberet. Bitis, regis Thracum filius, cum obsidibus in custodiam Carseolos est missus. Ceteros captivos, qui in triumpho ducti erant, in carcerem condi placuit. Paucos post dies, quam hæc acta, legati ab Cotye rege Thracum venerunt, pecuniam ad redimendum filium aliosque obsides apportantes. Eis, in senatum introductis, & id ipsum argumenti prætendentibus orationis, non sua voluntate Cotyn bello juvisse Persea, quod obsides dare coactus esset, orantibusque, ut eos pretio,

quantum ipsi statuissent Patres, redimi paterentur, responsum ex auctoritate senatus est: *Populum Romanum meminisse amicitiae, quæ cum Cōtye, majoribusque ejus, & gente Thracum fuisset. Obsides datos crimen, non criminis defensionem, esse: cum Thracum genti ne quietus quidem Perseus, nedum bello Romano occupatus, timendus fuerit. Ceterum, etsi Cotys Persei gratiam prætulisset amicitiae populi Romani, magis, quid se dignum esset, quam quid merito ejus fieri posset, aestimaturum: filium atque obsides ei remissurum. Beneficia gratuita esse populi Romani: pretium eorum malle relinquere in accipientium animis, quam præsens exigere.* Legati nominati, T. Quinctius Flamininus, C. Licinius Nerva, M. Caninius Rebilus, qui obsides in Thraciam reducerent: & Thracibus munera data in singulos binum millium æris. Bitis, cum ceteris obsidibus a Carseolis arcessitus, ad patrem cum legatis missus. Naves regiae, captæ de Macedonibus inusitatæ ante magnitudinis, in campo Martio subductæ sunt.

XLIII. Hærente adhuc, non in animis modo, sed pæne in oculis, memoria Macedonici triumpho, L. Anicius Quirinalibus triumphavit de rege Gentio Illyriisque. Similia omnia magis visa hominibus, quam paria. minor ipse imperator, & nobilitate Anicius cum Æmilio, & jure imperii prætor cum consule collatus: non Gentius Perseo, non Illyrii Macedonibus, non spolia spoliis, non pecunia pecuniæ, non dona donis comparari poterant. Itaque sicut præfulgebat huic triumphus recens; ita apparebat ipsum per se intuentibus ne-

quaquam esse contemnendum. Perdomuerat intra paucos dies, terra marique ferocem, locisque munitis fretam, gentem Illyriorum: regem regiæque omnes stirpis ceperat: transtulit in triumphum multa militaria signa, spoliaque alia, & suppellectilem regiam: auri pondo viginti & septem, argenti decem & novem pondo: denariûm tria millia, & centum viginti millia Illyrii argenti. Ante currum ducti Gentius rex cum conjuge & liberis, & Caravan-tius frater regis, & aliquot nobiles Illyrii. De præda militibus in singulos quadragenos quinos denarios, duplex centurioni, triplex equiti, sociis nominis Latini quantum civibus, & sociis navalibus dedit quantum militibus. Lætior hunc triumphum est secutus miles, multisque dux ipse carminibus celebratus. festertiûm ducentes ex ea præda redactum esse, auctor est Antias, præter aurum argentumque, quod in ærarium sit latum: quod quia unde redigi potuerit, non apparebat, auctorem pro re posui. Rex Gentius cum liberis, & conjuge, & fratre Spoletium in custodiam ex senatusconsulto ductus, ceteri captivi Romæ in carcerem coniecti: recusantibusque custodiam Spoletinis, Igiturvium reges traducti. Reliquum ex Illyrico prædæ ducen-ti viginti lembi erant; de Gentio rege captos eos Corcyræis, & Apolloniatis, & Dyrrachinis Q. Cassius ex senatusconsulto tribuit.

XLIV. Consules eo anno, agro tantum Ligurum populato, cum hostes exercitus nunquam eduxissent, nulla re memorabili gesta, Romam ad magistratus subrogandos redierunt; & primo comitali

die consules crearunt M. Claudium Marcellum, C. Sulpicium Gallum. Deinde prætores postero die L. Julium, L. Appulejum Saturninum, A. Licinium Nervam, P. Rutilium Calvum, P. Quinctilium Varum, M. Fontejum. His prætoribus duæ urbanæ provinciæ sunt decretæ, duæ Hispaniæ, Sicilia ac Sardinia. Intercalatum eo anno: postridie Terminalia intercalares fuerunt. Augur eo anno mortuus est C. Claudius: in ejus locum augures legerunt T. Quinctium Flamininum. & flamen Quirinalis mortuus Q. Fabius Pictor. Eo anno rex Prusias venit Romam cum filio Nicomede. Is, magno comitatu urbem ingressus, ad forum a porta tribunalque Q. Cassii prætoris perrexit: concursuque undique facto, *Deos, qui urbem Romam incolerent, senatumque & populum Romanum salutatum se dixit venisse: & gratulatum, quod Persea Gentiumque reges vicissent; Macedonibusque & Illyriis in ditionem redactis, auxissent imperium.* Cum prætor senatum ei, si velit, eo die daturum dixisset; biduum petiit, quo templa Deum urbemque & hospites amicosque viferet. Datus, qui circumduceret eum, L. Cornelius Scipio quæstor, qui & Capuam ei obviam missus fuerat: & ædes, quæ ipsum comitesque ejus benigne reciperent, conductæ. Tertio post die senatum adit; gratulatus victoriam est; merita sua in eo bello commemoravit; petiit, *Ut votum sibi solvere, Romæ in Capitolio decem majores hostias, & Præneste unam Fortunæ, liceret. ea vota pro victoria populi Romani esse. Et ut societas secum renovaretur; agerque sibi, de rege Antiocho captus, quem*

*nulli datum a populo Romano Galli possiderent, daretur. Filium postremo Nicomedem senatui commendavit. Omnium, qui in Macedonia imperatores fuerant, favore est adjutus. Itaque cetera, quæ petebat, concessa: de agro responsum est, Legatos ad rem inspiciendam missuros. Si ager populi Romani fuisset, nec cuiquam datus esset, dignissimum eo dono Prusiam habituros esse. Si autem Antiochi non fuisset, eo ne populi quidem Romani factum apparere: aut, si datus Gallis esset, ignoscere Prusiam debere, si ex nullius injuria quidquam ei datum vellet populus Romanus. Ne quod detur quidem, gratum esse donum posse, quod eum, qui det, ubi vellet, ablaturum esse sciat. Facile Nicomedis commendationem accipere. Quanta cura regum amicorum liberos tueatur populus Romanus, documento Ptolemæum Ægypti regem esse. Cum hoc responso Prusias est dimissus. Munera ei ex * festertiis iussa dari, & vasorum argenteorum pondō quinquaginta. & filio regis Nicomedi ex ea summa munera dari censuerunt, ex qua Masgabæ filio regis Masinissæ data essent: & ut victimæ aliaque, quæ ad sacrificium pertinerent, seu Romæ, seu Præneste immolare vellet, regi ex publico, sicut magistratibus Romanis, præberentur: & ut ex classe, quæ Brundisii esset, naves longæ viginti assignarentur, quibus uteretur, donec ad classem, dono datam ei, rex pervenisset. L. Cornelius Scipio ne ab eo abscederet, sumtumque ipsi & comitibus præberet, donec navem conscendisset. Mire lætum & ea benignitate in se populi Romani regem fuisse, ferunt: munera sibi ipsum emisisse; filium jussisse do-*

num populi Romani accipere. Hæc de Prusia nostri scriptores. Polybius, eum regem indignum majestate nominis tanti, tradit; pileatum, capite raso, obviam ire legatis solitum, libertumque se populi Romani ferre; & ideo insignia ordinis ejus gerere. Romæ quoque, cum veniret in curiam, submisisse se, & osculo limen curiæ contigisse: & *Deos servatores suos* senatum appellasse, aliamque orationem, non tam honorificam audientibus, quam sibi deformem, habuisse. Moratus circa urbem triginta haud amplius dies in regnum est profectus.

JOANNIS FREINSHEMII
 SUPPLEMENTORUM
 LIVIANORUM
 LIBER XI.

IN LOCUM LIB. XLVI LIVIANI.

E P I T O M E

LIBRI QUADRAGESIMI SEXTI.

Eumenes rex Romam venit : qui , quia Macedonico bello se medium egerat , ne aut hostis judicatus videretur , si exclusus esset , aut liberatus crimine , si admitteretur ; in commune lex lata est , ne cui regi Romam venire liceret. Claudius Marcellus consul Alpinos Gallos , C. Sulpicius Gallus consul Ligures subegit. Legati Prusiæ regis conquesti sunt de Eunene , quod fines suos depopularetur : dixeruntque , eum conspirasse cum Antiocho contra populum Romanum. Societas cum Rhodiis deprecantibus juncta est. Lusitum a censoribus conditum [est. Censa sunt civium capita trecenta viginti septem millia viginti duo. Princeps senatus lectus M. Æmilius Lepidus. Ptolemæus Ægyptiorum rex , pulsus regno a minore fratre , missis ad eum legatis , restitutus est. Ariarathe Cappadociæ rege mortuo , filius eius Ariarathes regnum accepit , & amicitiam cum populo Romano per legatos renovavit. Res præterea adversus Ligures , & Corsos , & Lusitanos , vario eventu gestas , & motus Syriæ , mortuo Antiocho , qui filium Antio-

chum puerum admodum reliquerat, continet. Hunc Antiochum puerum cum Lysia tutore ejus Demetrius, Seleuci filius, qui Romam obses missus fuerat, clam, quia minime dimittebatur a Romanis, interemit: & ipse in regnum receptus. L. Emilio Paulo, qui Persen vicerat, mortuo, tanta ejus abstinencia fuit, ut, cum ex Hispania & ex Macedonia opes retulisset, vix ex auctione bonorum ejus redactum sit, unde uxori ejus dos redderetur. Pomptinae paludes a Cornelio Cethego consule, cui ea provincia evenerat, siccatae, agerque ex iis factus.

I. **A**FFLICTA Macedonum regia, totque nobiles provinciae imperio adjectae, cum potentiam Romanam omnibus jam regibus nationibusque formidabilem effecissent; nullum ferme regnum, nulla respublica fuit, quin mittendis Romam legatis victori gentium populo adularetur. Acuerat praeterea diligentiam quorundam non injustus terror, ne poenae reposcerentur parum ex fide cultae societatis. Ista maxime causa movit Eumenem Asiae regem, ut in Italiam navigaret. Comperto regis consilio dubitavere Patres, quonam modo excipi venientem verum esset. quippe cum proximo bello Macedonico, neque satis pro amico, neque pro hoste se gessisset, haerebant, ne aut repulsus condemnari isto crimine, aut admissus liberari videretur. Nam & absolvere pigebat haudquaquam illibatae fidei virum: & pudebat bello petere, quem ipsi paulo ante principem amicorum, ut aliis ad colendam amicitiam Romanam exemplum esset, opibus & honoribus ambitiose auxerant.

II. Tandem ea via placuit, qua animi viresque regis frangerentur, nec in illum tamen nominatim aliquid constitueretur. Igitur in commune lata lex est, *ne cui regi Romam venire liceret*. Ejus exemplum missus a senatu quaestor Eumeni, qui jam Brundisium appulerat, attulit: simul denuntiatio, *si quid ei a populo Romano opus esset, uti ederet; quod*

si nihil esset opus, quamprimum excederet Italia. Breve responsum Eumenis fuit, & quale in animo regio metus & ira pepererant, *nulla sibi re opus esse.* Submoto sic Eumene, senatus aliarum gentium civitatumque legatis operam dedit, qui gratulandi causa cum muneribus venerant. ii perhumaniter auditi dimissique sunt, impetratis ferme, quae postulaverant.

III. Sed Atheniensium legatio, neque moribus civitatis, ad quam mittebatur, neque famae ejus, quae mittebat, satis convenire visa est. *Pro Haliariis, quorum urbem C. Lucretius prator bello Persei deleverat, nequidquam deprecata; prolatis aliis mandatis repente vertit sermonem, & agros miserorum, quos precibus suis juvare instituerant, populo Atheniensi petiverunt.* Minore indignatione acceptum est, quod *Delon & Lemnum insulas restitui sibi postulavere: nam eas & olim obtinuerant. itaque tunc quoque reddi senatus iussit.*

IV. Sub idem tempus Theætetus Rhodiorum legatus apud Patres verba *de societate* fecit. sed cum res in curia trahe-
retur, ille moerore & annis oppressus, (erat enim octogenario major,) diem suum obiit. Supervenere deinde Caudiorum & Stratonicensium exsules, *urbesque suas contra quam senatui placuisset, Rhodiorum praesidiis teneri, quæsi, novum impetravere senatusconsultum, quo urbibus istis excedere Rhodii jubebantur.* Erant adhuc in Urbe Philophron & Astymedes: quos cum cepisset metus, ne civitatis suae contumacia Romanorum iram asperaret, validiores parendi auctores futuri, si cœtibus publicis interessent, continuo in patriam sunt profecti. Movit representatio discriminis Rhodios, ut non modo statim deducenda curarent praesidia; sed etiam *legationem decernerent Romam, quæ de societate conjungenda omni ope contenderet.* Aristoteles legationis ejus caput erat. is cum adulta jam ætate in Urbem pervenisset, *obsequium Rhodiorum & promptam ad parendum etiam du-*

ris imperiis voluntatem exposuit. deinde *de societate ineunda* multa verba fecit, vario sermone usus ad expugnandos iratorum animos. At Patres ad extremum amicitiae neutram in partem facta mentione, responderunt: ut *societas in praesentia Rhodiis daretur, ex dignitate populi Romani non videri.*

V. Ludos interea Megalenses M. Fulvius, M'. Acilius Glabrio aediles curules ediderunt. Consulibus, nullo usquam maiore bello, Inalpini Galli & Ligures provinciae fuere. ex utraque gente triumphatum: cum Cl. Marcellus Gallos, C. Sulpicius Ligures subegisset. Consularibus deinde comitiis tanta candidatorum ambitio fuit, ut convocato in Capitolium senatu opus esset. Eo se milvus avis intulit, raptanique de cella Jovis mustelam in medium confectum misit. Id prodigium solitis sacrificiis, & lustratione urbis procuratum est. Plura mox sequens annus attulit, cum T. Manlius A. F. T. N. Torquatus, Cn. Octavius Cn. F. Cn. N. consulatum inivissent. Nam & pestilentia sic in Urbe laboratum est, ut ex Sibyllinis libris populus, circum compita & facella operatus, federit. & in aede Penatium noctu sua sponte fores patuerunt: lupi quoque in Esquilis & colle Quirinali media luce conspecti, persequentibus eos, qui viderant, fugerunt. Urbe iterum lustrata, domi forisque tranquillae res fuerunt. Ludis Magnis pugilum & funambulorum spectacula in scenam Sex. Julius Caesar, Cn. Cornelius Dolabella aediles curules introduxere.

VI. Hic quoque annus memorabilior legationibus, quam rebus bello gestis, fuit. Venere Gallograecorum in Urbem legati, magna spe, fore ut suspectus Eumenes, & tantum non pro hoste habitus, gratiorem apud Romanos petitionem suam faceret. Bellum enim habebant cum Eumene, praeter solita hostibus, peculiari quadam feritate gentis exitiabile, quod ex captivis aetate & forma praecipuum quemque victimarum in morem ornatos Diis suis immolaverant; cetera omni turba, quanquam multi olim noti amique in

§ IV. Pol. excerpt. Legat. 99 & 100. § V. Tit. And. Terent. Jul. Obseq. Col. Triumph. Liv. Epit. 46. Prolog. Hecyrae Terent.

ea essent, telis obruta. Concessum his est ab senatu, *ut legibus suis uterentur*: jussi tamen sunt *domi se continere, neque cum armis fines suos egredi.*

VII. Haud æque propitiis auribus, licet justiore in desiderio, Achæorum est audita legatio. Populus iste unus ea tempestate per Græciam erat, cui ad res novandas neque animus, si ferret occasio, neque vires deesse viderentur. Igitur has accidere quærentibus Callicrates & Andronidas aperuere viam, *plerosque primores Achæorum, quasi cum Perseo sensissent*, criminati. Ex quibus Xenon, qui & ipse per ea tempora exercitum duxerat, cum innocentie conscientia exclamasset, *se vel in ipso senatu causam suam defensurum esse*: dedit occasionem legato Romano, qui tum aderat, ut *mitti Romam omnes, qui ab accusatoribus nominati fuerant*, imperaret. Duris & insolentibus mandatis (neque enim aut Philippus olim, aut filius ejus Alexander, cum rerum potirentur, tam acerba jusserant) Achæi deteriorum metu paruerunt; missis in Urbem principibus gentis, & quotquot aliorum per tempora Macedonici belli in imperiis aut curationibus alicujus momenti fuerant, circiter mille. Hos Romani, tanquam a suis judicatos, circum municipia coloniasque Italiæ custodiendos dimiserunt. Ergo repetitis legationibus, *ut causa civium suorum cognosceretur, aut si credere innocentes senatus, quam reperire mallet, patriæ redderentur*, Achæi orabant.

VIII. Quod ubi frustra fiebat, vacuique in Peloponnesum legati revertebantur, tanta omnium indignatio in Callicratem & ceteros ejusdem sectæ exarsit, ut non jam secretis odiis, sed plane confessa similitate ab omnibus incescerentur, eoque, ut etiam a pueris e schola redeuntibus palam *proditores* appellarentur: neque in sacris Græcorum conventibus quisquam eorum cum laude mentionem facere posset, quin libilis & tumultu vix credendo excipe-

§ VI. Just. 38, 6. Pol. excerpt. Legat. 97 & 102. Front. Strat. 1, 2, 16. Casaub. in Polyæn. p. 714. Diod. ap. Vales.
§ VII. Just. 34, 1. Polyb. ap. Vales. Pausan. l. 7.

retur. estque tradita res non indigna memotatu, aliquando Sicyone cum inter Antigoniorum solemnia balneis publice instructis Callicrates & Andronidas usi fuissent; neminem in eadem solia postmodum voluisse descendere, nisi prius emissâ priore aqua omni, novaque infusa, veluti expiata & lustrata viderentur.

IX. Sed Achæi, cum aliud auxilium præterquam in precibus nullum esset, & harum vim maxime in perseverando positam crederent, denuo legationem decernunt, quam Eureas & cum Anaxidamo Satyrus obierunt. Ii sub idem ferme tempus venere Romam, quo inter complures minorum gentium legatos a Rhodiis Astymedes, & a rege Prusia Python quidam accesserat. Hic introductus in senatum Eumenis accusationem orsus est, *cujus incurfionibus fines Bithyniæ vastarentur, oppidis etiam aliquot ereptis occupatisque. neque aliud magnopere Prusiam Eumeni displicere, quam quod amicitiam Romanorum cum fide retineret. idque ex eo intelligi posse, quod cum Antiocho Syriæ rege de bello Romano agita- ret consilia: neque senatusconsultis haberet honorem, sed contra hæc vexaret Gallogræciam, omnesque in universum socios client- esque Romanorum: res autem suas ubivis confirmando, qui suæ fustionis essent, stabiliret.* Non spernenda res senatui visa: ne tamen adhuc nudarent consilia, sufficere creditum, si fa- vore suo Gallogræcorum sustinerent animos, illorumque li- bertatem, quantum citra manifestam Eumenis injuriam fieri posset, tutarentur.

X. Post hos Astymedes Rhodius iteravit civitatis suæ preces: *satis eam magnas superbiæ temeritatisque pœnas luisse, quin & graviora delictis pertulisse supplicia. Nam & Lycia Cariaque decedere coacti sumus, quas regiones non sine maximis suntibus, triumque bellorum laboribus & periculis, civitas nostra quaesiverat. Nunc igitur vestigalibus istarum tributisque ca- remus, unde nobis egregii nuper fructus, & opum publicarum accessiones magnæ certaque fuere. Quanquam de Lycia Caria*

§ VIII. Pol. excerpt. Legat. 103. Polyb. ap. Vales. § IX. Pol. excerpt. Leg. 104. Liv. Epit. 46. Polyb.

T. Liv. Vol. VII.

Q

que, si quis insensius urgeat, forte minus licitum sit queri. Quod enim vestro munere possederamus, videri potest non inique nobis ademptum esse, offensionibus obortis, & civium nostrorum vacordia suspiciones & iram vestram provocante. Sed Caunum certe ducentis talentis a Ptolemæo, sed Stratoniceam ab Antiocho & Ptolemæo in magni beneficii loco accepimus: unde nobis annuus proventus centum viginti talentorum uno decreto vestro periit: cui quidem obedire quanquam maximo cum reipublicæ nostræ detrimento conjuncta res erat, non distulimus. Quibus ex rebus effectum est, ut majores pœnas Rhodii dederimus semel dubii amici, quam semper certi hostes Macedones. ut jam alias taceamus gentes, ne cui incolumitatem suam invidere potius, quam velificari nostræ videamur.

XI. Et tamen præcipuum civitatis nostræ vulnus nondum attingi, quod exemptione Deli, demtaque populo de portu & publicis statuendi potestate, portorium, hoc est, Rhodiæ rei fundus & columen sic interiit, ut quod paulo ante quadragies H-S. locari consueverat, hodie vix in sexcenta millia nummum inveniat redemptorem. adeo, Patres conscripti, jugulum premit ira vestra, & ipsos quasi nervos incidit civitatis. Quod si meritos hæc urgeret calamitas, non foret absonum, publico delicta consilio, publicis quoque miseriis expiari: nunc autem, quando & paucorum iste furor fuit, & reorum omnium suppliciis a populo Rhodio expiatus; relinquitur, ut remotis a sensu malorum fontibus, indignatio vestra tantummodo adversus innocentes desæviat. Quod quia neque pro cetera mansuetudine vestra, neque pro gloria sæpius ignoscendo, quam vindicando quæsitâ, facere videmini; certa me spes tenet, fore, ut aliquando misericordiæ, quam iræ, meminisse malitis.

XII. Ob amentiam paucorum, iracundiam non injustam contra Rhodios concepistis. quanto æquius fuerit venia prosequi sceleris innoxios, ob errorem supplices, & pœnitentia ac obsequiis admissa correcturos? Amisimus dignitatem, potentiam, vestigalia, etiam libertate, pro qua jam inde ab antiquissimis temporibus nihil non sustinuimus, haud parum imminuta. & tamen ferimus

ista patimurque : modo sic tandem satisfactum sit iræ vestræ, Patres conscripti, ærumnæque Rhodiorum vel in hac fortuna finem inveniant. id autem nullo pacto sperare audemus, nisi, quod toties oravimus, in amicitiam societatemque populi Romani recipiamur. olim invidiosa & suspecta multis potuit hæc esse postulatio, ne ad spes nimias præscriptione vestræ societatis abuti cogitaremur : nunc ad eam, velut ad asyllum confugimus, nec ut aliis timori simus, sed ut timere ipsi desinamus.

XIII. Huic orationi, cum similis argumenti alia quædam adjecisset, imagine humilitatis, in quam ex tanto fastu subito deciderat clarissima civitas, movit animos Patrum, ut societatem cum deprecantibus jungendam esse decernerent. Neque deerant, qui reniterentur, simulatam Rhodiorum pœnitentiam arguentes : sed apud plures misericordia valuit, adjuta Ti. Gracchi testimonio, qui *senatusconsultis omnibus obtemperatum a Rhodiis fuisse* referebat, *condemnatosque publico judicio universos, qui populum a Romanis alienaverant.* Nam hujus Gracchi, A. Manlio A. F. T. N. Torquato, Q. Cassio L. F. Q. N. Longino Coss. celebris legatio per Asiam fuit, quam missus ab senatu ad res sociorum inspiciundas obiverat. Causa mittendi maxime fuit, ut coram cognosceret, quid Antiochus & Eumenes animi consiliique invicem aut adversus populum Romanum haberent. Honorificentissime ab utroque rege exceptum ferunt, nullo conspirationis inter eos certo indicio, benevolum iplis faventemque revertisse.

XIV. Acerrimi viri diligentiam Eumenes prudentia eluserat, qua nemine tum regum inferior fuit ; vicinia potentiorum ad consilia sua sollicitate tegenda tam longa ætate exercitus. Antiocho loco sapientiæ temeritas fuit, qua omnibus in negotiis usus, vix ullum animi sui certum firmumque vestigium sinebat animadverti. Cum enim alii reges potentiam divitiasque suas pari sollicitudine augerent tegerentque, gnari magnarum opum famam suspicionibus obnoxiam esse ; hic, quasi data opera, produxit thesauros suos,

& ostentavit. Magnificentissimos enim ludos instruxit, ex universo fere terrarum orbe per ambitiosa præmia coactis artificibus: quo tempore quidquid regię supellectilis, ceteręque opulentię, fuerat reconditum, id omne publice spectandum proposuit. Vix peracta hac solemnitate supervenit Ti. Gracchus, quem omni comitate ac liberalitate sic obruit, ut animum regis ob ereptam Ægyptum a populo Romano alienissimi nullo indicio posset deprehendere. Cum enim natura largitor animus esset; tunc etiam studio honoris cultusque omnia argumenta sic intendit, ut toto eo tempore aliis in ædibus diversaretur, quo vacuum legatis Romanis regiam relinqueret. Ea res, & quoniam paulo ante inter ludos animum usque ad pudendas ineptias effusissima hilaritate laxaverat, Romanis facile persuasit, nihil in tali mente magnę ferięque cogitationis agitari.

XV. Ceterum, ut ad institutum redeamus, non eadem humanitate, qua priores, Achaici oratores excepti sunt ab senatu. Negabant illi, *principes Achæorum tanquam damnatos, sed, uti causam dicerent, missos Romam fuisse.* rogare igitur nunc quoque, *ut ita fiat, si Patribus videatur. quod si isthoc nolint, ac saltem remittant illos domum. spondere concilium Achaicum enise daturum operam, ne iudicium suum lenius, quam pro cuiusque merito, fuisse dicatur.* Nihil impetratum. literę quin etiam ad principes Græcarum civitatum, qui Romanę factionis erant, & in Achajam ad Callicratem missę: *Neque civitatibus publice, neque ipsis privatim profuturum videri, si homines isti suam quisque in patriam revertantur.* Hoc per Græciam vulgato responso, passim metus erat & trepidatio, non eorum modo, qui Macedonum rebus studuerant, sed omnium, quibus erat patrię caritas externa dominatione potior. At Charopus & Callicrates, & ceteri ejusdem consilii, quanto humiliores videbant alios redigi, tanto ipsi majores spiritus fumebant.

XVI. Dum ista diversis locis sic aguntur, Perseo, qui

¶ XIV. Pol. ap. Valef. Diod. ap. Valef. Pol. excerpt. Legat. 101. Joseph. 12, 11. § XV. Pol. excerpt. Legat. 105.

rerum istarum omnium causa fuerat, dubium an voluntarius exitus, calamitatis vitæque finem attulit. Post L. Æmilii triumphum in carcerem Albanum conditus, & inde eodem L. Æmilio, senatusque principe M. Lepido adjuvante exemptus, in libera custodia biennium extraxit. tum vero miseras certas, spem incertam reputans, inedia sibi conscivit necem. quidam a custodibus, quos forte offenderat, somno prohibitum exspirasse tradiderunt. Defunctum publico funere in honorem pristinae fortunæ senatus efferri iussit, missō ad hoc quæstore Albam, ubi decesserat. Nec omittendum est in casu tanti modo regis aliud fortunæ ludibrium, etiam ipsa, ut mihi videtur, captivitate ac morte miserabilius. Alexander solus liberorum patri superstes fabriles artes didicit, quibus se toleraret: deinde scriptum fecit, operamque eam magistratibus Albanis locavit. Hoc anno Romæ cēsus actus est, lustrumque conditum. L. Æmilius Paullus, Q. Marcius Philippus condidere. censa sunt civium capita trecenta triginta septem millia, quadringenta quinquaginta duo.

XVII. Mitis ea censura fuit, moribusque & mansuetudini Pauli conveniens. tres tantum senatu moti: nemo ex insignibus. eadem in equitibus Romanis recensendis moderatio fuit. Principem senatus, quem & antecedentes quidam censores, legere M. Æmiliū Lepidum. operum, quæ locavere, quod mireris, splendidiora nesciuntur. memoratur Horologium, quod diligentius ordinatum Q. Marcius in publico posuit, grato in populum Romanum munere, quia vetus, quod ibidem centesimum ferme ante annum M. Valerius Messalla statuerat, ad horas Romanas parum conveniebat. Publicavit idem & Concordiæ signum, quod deinceps in curia collocavit C. Cassius. At L. Æmilius Minervam, Phidiæ præclarum opus, in æde Fortunæ posuit. Hoc primum anno in Italiam venisse mor-

§ XVI. Diodor. Plut. Æmil. c. 63. Diod. ap. Vales. Sal. Hist. 4 in Ep. Mithrid. Val. Max. 5, 1. Zonar. Marcellin. 14, 40. Oros. 4, 20. Liv. Epit. 46. Fasti Capitol.

bum, qui carbunculus appellatur, in annalibus annotatum est.

XVIII. Comitia deinde consularia habente A. Manlio, nam collega ejus Q. Cassius in magistratu decesserat, Ti. Sempronius P. F. Ti. N. Gracchus iterum, M'. Juventius T. F. T. N. Thalna facti sunt. Ii cum magistratum inivissent, Ti. Gracchus Galliam, M'. Juventius Corsos provincias acceperunt. sed in urbe ludi Megalenses a L. Cornelio Lentulo, L. Valerio Flacco, ædilibus curulibus acti sunt. In Corsis feliciter bellatum causa fuisse putatur consuli, ut rarissimo fati genere interiret. Cum enim sacrificanti forte literæ senatus allatæ essent, quæ *ob res ab eo gestas supplicationem decretam* nuntiabant; eas attentissime legens ante foculum, subito concidit, extinctus, ut putatur, gaudio, cujus in translatitia felicitate intemperiem angustus animus non ferebat.

XIX. Circum hæc tempora, cum jam mirifice amplificata res Romana esset, moribus omnium ferme regnorum se permiscuit. quare deinceps domestica externaque gesta, sicuti causis eventibusque sunt connexa, sic etiam narratione conjunguntur. Prusias nunquam æquus Eumeni, & jam apud senatum criminationes adversus illum pronis auribus accipi doctus, non desinebat intendere suspiciones, etiam Gallogræcis & Selgensibus, aliisque per Asiam populis, ad idem faciendum excitatis. Igitur Eumenes, quoniam ipse Roma excludebatur, fratres Attalum & Athenæum misit, querelis omnium responsuros. Quod illi cum haud incommode perfecisse viderentur, magnis honoribus donisque affecti discessere. Neque tamen omnis cura decessit Patribus, nunquam satis credito, *conspirationis adversus populum Romanum cum Antiocho initæ vanæ delationem fuisse.*

XX. Placuit igitur, C. Sulpicium Gallum, M. Sergium spe-

§ XVII. Liv. 43, 15. Diod. 31, 2. Censorius c. 19. Plin. 7, 60. & 26, 1. Scaliger. Cic. pro Domo. § XVIII. Fasti Capitol. Victor. in 1. Rhet. Cicer. Titulus Heautontim. Terentiani. Plin. 7, 53. Val. Max. 9, 12. § XIX. Polyb. exc. Legat. 106. Diod. ap. Ursin.

cie legationis ad consilia regum exploranda proficisci. Obten-
debantur res Græciæ passim interna discordia dissidentis : &
controversia Megaleopolitanorum , qui cum Lacedæmoniis de agri
parte disceptabant. In ea legatione C. Sulpicius multa insolent-
er fecisse, Græci scriptores arguunt. Nam & cognitionem de
finibus inter Argivos Spartanosque, Philippo quondam, qui Alex-
andrum genuit, disceptatam, ad Callicratem impurum invisumque
toti Græciæ hominem rejecisse : & Ætolis a Pleurone , qui se-
jungi a concilio Achaico cupiebant, indulgisse, ut suo nomine le-
gatos Romam mitterent. Sane senatui placebat, imminui poten-
tiam Achæorum , spiritusque frangi : quapropter & Ætolis ,
quod petierunt, concessum est ; & C. Sulpicius occulto Pa-
trum mandato morem gerens, alias quoque civitates , quæ
Achaicæ formulæ erant, ab eo fœdere dissociare instituit.
Neque minore deinceps acerbitate tractatus est Eumenes ,
cum idem ille C. Sulpicius in Asiam transjecisset. per ce-
leberrimas enim Asiæ urbes edicta legatus proposuit, ut
quibus de Eumene queri decretum esset, dicto die Sardis occur-
rerent. Quo ubi venisset, posito apud gymnasium tribunali,
decendium solidum audiendis adversus regem querelis va-
cavit : convicia in illum probraque tam avide suscipiens,
ut invitare accusatores , & desiderio reum faciundi quidlibet
in crimen trahere videretur : vanus ingenio, & ex claris
inimiciis constantis animi famam appetens.

XXI. Cum hic Asiaticarum rerum status esset, in Ægypto Ptolemæi fratres iterum æmulatione & discordiis exarsere. validior tum junioris factio, Philometorem, cognomen id majori fuit, regno pulsum, ad petendam ab senatu opem Romam compulerat. Paucis comitatus servis, ex præsentis fortunæ fqualore pedes ad urbem faciebat iter, cum Demetrius Seleuci F. qui obses Syriæ regum Romæ hærebat, re cognita obviam profectus est, familiamque suam & cum diademate ac veste regia equum eximie ornatum obtulit, ne loci sui majestatem fordido cultu prodidisse visus, a Romanis despectui haberetur. At ille De-

§ XX. Pausan. l. 2 & 7. Polyb. ap. Vales.

metrii comitate prolixè laudata, illorum accepit nihil: rogavitque Demetrium, ut alicubi subsistens in via, se quo instituisset modo ingredi urbem pateretur. Id sive misericordiae movendae causa fecerit, sive metu, ne tanto cum fastu accedens, legem, qua reges urbis aditu prohibebantur, adversam haberet, parum mihi compertum est.

XXII. Ceterum tacite ingressus urbem, in hospitium pictoris cujusdam Alexandrini se contulit. Quod ubi rescivere Patres, advocatum humanissime sunt allocuti, excusaruntque diligenter, *quod ei quaestorem non misissent obviam, neque publicum hospitium praebuissent; id enim non sua negligentia, sed ipsius improvise adventu commissum esse. ceterum posse illum senatus adeundi diem petere, & ab eo, quidquid amicis sociisque regibus tribui par esset, expectare.* Statim deinde e curia deductus est in publicam domum: decretaque pecunia quaestori, ex qua ei quotidie munera mitteret. Sic erectus ad spem pristinae fortunae, non deteriore his initiis eventura habuit. Missi enim deinde ab fenatu legati, concordiam inter fratres, & pulso reditum confecerunt.

XXIII. Inter hæc mortuum Cappadociae regem Ariarathen cognominis patri filius excepit. Qui statim inter initia regni legatos in urbem ad amicitiam cum populo Romano renovandam misit, maxima cum demonstratione benevolentiae studiorumque. Neque fides orationi defuit, quod Ti. Gracchus, *quo tempore legationem Asiaticam obiverit, cum hujus, tum defuncti regis animum abunde inspexisse, testabatur.* Sed etiam postea M. Junium, qui ad bellum inter eos reges & Gallogræcos componendum venerat, perhonorifice habuerant. neque minoribus officiis coluerant Cn. Octavium & Sp. Lucretium post paulo ab urbe missos. Nam & cetera omnia promte copioseque præstiterant: & cum in Syriam ituros comperissent, *suas regni vires obtulerant, si iis ad res Syriae constituendas egiissent.* pertinere enim magnopere ad se negotia Syriae judicabant: non magis ob terrarum, quam

§ XXI. Liv. Epit. 46. Trog. Pomp. prolog. 34. Val. Max. 5, 1. Diod. ap. Vales.

ob sanguinis conjunctionem, quia senior Ariarathes filium istum ex Antiochide susceperat, Magni Antiochi nata. Sed recusaverunt id auxilium legati, majestate nominis Romani tutos se rati fore: quod longe secus evenit. Nam apud tranquillos & modestos auctoritas ac reverentia plurimum valet: ubi turbari res cœpere, adversus improbitatem armatam debile munimentum pudor est.

XXIV. Quibus autem initiis concuti regiones istæ cœperint, operæ pretium ex exponere. Puerum Antiochum pater Epiphanes Philippo cuidam amicorum commendaverat, expeditionis Elymaicæ comiti. Sed audita morte regis Lysias, qui relictus in custodia regni fuerat, tutelam pueri novennis occupavit. Quod ubi Romæ Demetrius comperit, adito senatu ostendit, *patris Seleuci nomine obsidem se in urbem venisse: sub Antiochi deinde regno, magis quia per ætatem jus suum nesciverit, quam legitima ex causa, eadem in conditione permanfisse: nunc etiam hoc extincto, se obligatione omni liberatum videri, æquumque putare dimitti ab senatu, atque etiam in regno recuperando adjuvari. Non enim modo jure potior sum, inquit, Antiochi filio, cujus pater ætatem & absentiam meam occasionem suam ratus est; sed non minus etiam favori vestro confido. Puer in hanc urbem veni: nunc tertio & vicesimo ætatis anno, tanto tempore inter vos educatus, civis potius vester, quam externus videri debeo. Vos ego patres mihi, vestros liberos, æquales meos, fratres esse reor: neque alia aut vos reverentia, aut illos caritate amplector.*

XXV. Non erat equidem vel injusta Demetrii causa, vel ingrata oratio. Sed vicit utilitas, ut potius immaturum puerum, quam ætate florenti adolescentem, opulentissimo regno præesse vellent. Itaque non retentus modo ille; sed etiam paulo post tres legati Cn. Octavius, Sp. Lucretius, L. Aurelius delecti, qui in Syriam proficiscerentur, ex voluntate

§ XXIII. Liv. Epit. Pol. excerpt. Legat. 107 & 109. Diod. 31, 3. Polyb. § XXIV. Machabæorum 1-6. Joseph. 12, 14. Hieronym. in Daniel. 110. Polyb. & Diod. ap. Vales. Appian. Syriac. Polyb. excerpt. Legat. 107. Justin. 34, 3. Polyb. Zonar.

senatus regnum ordinaturi. Facile passuros hoc Syros rebantur, rege per ætatem invalido, & tutoribus satis habituris, si Demetrio Romæ retento, ipsi in administratione rerum relinquerentur. Neque species honesti consilio aberat: *cura socii & amici regni prætendebatur, ne quietem ejus mors regis & ex ea timendi tumultus turbarent; maxime cum procurationem regni Lysias invasisset; jus ex mandato morientis regis, cum reliquiis exercitus rediens Philippus vindicaret.*

XXVI. Ceterum occasio nata videbatur ad opes regni minuendas, mandataque in hoc legati acceperant: & nominatim, *ut naves testas incenderent, elephantos occiderent, quæ contra fœderis leges habere Antiochus dicebatur.* Iisdem etiam commissa Macedoniæ pacandæ cura, quam ex regio imperio insolita libertas, & publicorum consiliorum nondum bene composita forma in seditiones egerat. *Gallogracos etiam & Cappadociæ regnum diligenter inspicere jussi sunt: & jam digressis advenere literæ, quibus negotium dabatur, ut ad conciliandos Ægypti reges nihil laboris industriæque prætermitterent.*

XXVII. Interea Ti. Gracchus Cos. subacta Cammanorum gente, Romam ad triumphum regressus, comitia consularia in annum sequentem habuit. quibus P. Cornelius P. F. Cn. N. Scipio Nasica, C. Marcius C. F. Q. N. Figulus designati. Notabilis tum res accidisse traditur: inter creandos consules, cum primus rogatorum eos retulisset, illico exspiravit, neque segnius peracta sunt comitia: id in omen versum, sermonibusque populi agitatum est, timentis, ne quid in religiones peccatum esset, publicis malis expiandum. Gracchus rem ad senatum retulit: *senatus consulendos censuit haruspices.* Hi ubi, *rogatorem comitiorum non fuisse justum*, responderunt, incensus ira Gracchus, *itane*, inquit, *ego non justus, qui & consul rogavi, & augur, & auspicato? Vos justii comitiorum, Romanique juris interpretes, Tusci homines, & barbari?* sic in præsentia nihil mutatum. Consul peractis comitiis in Corsos profectus videtur, ut

§ XXV. Just. Appian. Liv. Epit. 47. Polyb. Zonar. Machab. 1, 6. Joseph. 12, 14. § XXVI. Cic. Philippic. 9, 2. Polyb.

morte collegæ tumultuantes coerceret : inde, forte quod ibi quoque novarum rerum semina erant, in Sardiniam transjecisse. Neque enim de gestis hujus & proximorum annorum certa satis memoria superest, sed leviter annotatum, circum hæc tempora contra Ligures, Corfos, & Lulitanos, vario successu bellatum esse.

XXVIII. Jam Scipio Figulusque non magistratum inierant modo; sed etiam in provincias fuerant profecti, cum Ti. Gracchi literas ad senatum augures detulere, ad collegium suum ex Sardinia missas, quibus significabat, *comitiis consularibus, cum ad auspicium repetendum urbe in campum rediisset, eodem se tabernaculo, quo antea de cælo servaverat, usum*: id jam libros augurales legenti apparere rectum non fuisse: eamque rem, licet cum suo pudore conjuncta esset, quia pertinere ad religiones populi Romani videretur, perscribere voluisse. Tanta res senatui visa, ut a prætore urbano literas ad consules scribendas censeret, quibus certiores de eo negotio fierent, provinciisque decedere juberentur. Atqui illi vitio creatos rati, & antiquiorem reipublicæ, quam suæ dignitatis, curam esse oportere; Scipio e Corsica, Figulus e Gallia maturato reditu, magistratum abdicarunt. Nam & ingenio probò modestoque erant (Scipio etiam sapientiæ fama celebris) & recordabantur, quale C. Flaminius in causa simili senatus auctoritate spreta, certamen cum Patribus, & postremo fatum habuisset.

XXIX. Per interregem deinde suffecti consules. P. Cornelius L. F. L. N. Lentulus, Cn. Domitius L. F. Cn. N. Ahenobarbus fuerunt. Cum inter hæc in Syriam legati ab senatu pervenissent, & *multa passim a regibus contra fœdus facta* arguerent, mutarentque; in odium gentis, atque ex eo in periculum inciderunt. Maxime movebant naves pulcherrimæ sumtuque ingenti fabricatæ, quas incendi Cn. Octavius jusserrat; etiam elephantorum incendebat miseratio, quod egre-

§ XXVII. Polyb. excerpt. Legat. 106. Plut. in Gracch. c. 1. Cic. de Nat. Deor. 2, 4. Liv. Epit. 46. § XXVIII. Val. Max. 1, 1. Plut. Marcello c. 5. Cic. ad Q. fratrem. 2, 2. Idem de Nat. Deor. 2, 4. Auctor de Vir. ill. c. 46.

giæ belluæ, raræque possessionis, domitæ insuper mansuetæque, nulla, ut putabant, de causa concidebantur. Itaque non difficulter inducti Syri, gens læta seditionibus, ut Romanos ejicerent, Cn. Octavium etiam interficerent, cui Laodiceæ, dum in Gymnasio ungitur, Leptines quidam manus attulit. Lysias, ad dissimulandam facinoris, cujus ipse præcipuus auctor ferebatur, conscientiam, & Octavium magnifico funere extulit, & ad purgandum crimen nomine regis legatos e vestigio misit Romam. Ii cum multis verbis, *nihil publico consilio gestum esse*, contendissent, sine responso dimissi sunt. Cn. Octavio, *quod pro republica mortem appetisse videretur*, statuam in Rostris, loco celeberrimo, senatus decrevit.

XXX. Nec Romani tantum succensebant Syris, sed in exterorum quoque mentibus immanitas rei conciverat indignationem. Inter quos præcipuus Ariarathes Cappadox, præter insitum virtutis amorem, studiumque in populum Romanum, etiam amicitia privata movebatur, quam cum Octavio in regia sua contraxerat. Quia tamen, legatis ad puerum Antiochum missis, matris suæ sororisque reliquias repetebat, alieno tempore Lysiam offendere timens, earum rerum mentionem a suis fieri vetuit. Ceterum haud obscurum ejus judicium erat, cum populi Romani amicitiam plurimi faceret: ita quidem, ut sub idem fere tempus reversis, quos Romam miserat, legatis, promptamque Patrum erga regem voluntatem referentibus, honorem habuerit Diis, sacrificioque magno peracto, cum ducibus suis hilariter fuerit epulatus.

XXXI. Dum hæc in istis locis fiunt, alibi quoque parum tranquillæ res fuerunt. Calyndenses obsidione Cauniorum, a quibus defecerant, pressi, a Cnidiis auxilio impetrato aliquamdiu restiterunt: deinde, timentes de exitu belli, ni majoribus opibus defenderentur, Rhodios implorare, se suæque dedere polliciti. Rhodii receperant quidem parumper ex priori consternatione animos: sed tamen iram

§ XXIX. Fasti Capitol. Appian. Syriac. Zonar. Julius Obsequ. Polyb. excerpt. Legat. 114. Cic. Philipp. 9, 2. Plin. 34, 6. § XXX. Polyb. excerpt. Legat. 112. Diod. ap. Vales.

senatus verebantur, si inconsulto eo quidquam majoris negotii aggredierentur. Ablegatis igitur Cleagora & Lygdami petiverunt, *ut sibi recipere Calyndenses liceret; utque possessiones, quas in Caria Lyciaque privatim Rhodii haberent, eodem essent jure, quo ante fuissent.* Donum præterea decreverant in æde Minervæ, colossum cubitorum triginta, populo Romano ponere. cessitque res iis feliciter. nam & subsidiis terra marique missis, Calyndensium oppidum hoste submoto receperunt: & Romæ accepta facti ratio est, jusque novæ ditionis auctoritate senatus stabilitum.

XXXII. Major deinde res occasionem præbuit Patribus, ex aliena discordia suam potentiam augendi. Quippe minor Ptolemæus, cui Physcon cognomentum erat, Romam profectus, *institutam cum fratre divisionem retractari* orabat. *neque enim se sponte assensum, sed iniquitati temporum cecidisse,* petebat igitur, *ut Cyprus adjiceretur sorti suæ, sic quoque fraternam non adæquaturæ.* Contradicebat his Menithyllus Alabandensis, princeps legationis, quam ob id ipsum Ptolemæus major miserat, ut senatum edoceret, *suo beneficio fratrem non modo Cyrenaicum regnum, sed etiam vitam ipsam habere: quam citra ipsius operam contracto tam acri omnium odio tueri non potuisset.* Præterea religionibus, quæ apud Ægyptios sanctissimæ censeantur, *mutuoque jurejurando firmata pacta violari non debere.* Isthæc differentes, etiam Canuleji & ceterorum, qui rebus omnibus interfuerant, testimonio juvabantur.

XXXIII. At Patres, quibus potentissimi regni vires dividi opportunum videbatur, refellenti isthæc Physconi credere maluerunt: & legatione, quæ illi Cyprum a fratre impetraret, decreta, T. Manlium Torquatum, Cn. Merulam proficisci jusserunt, cum mandatis, *ut conciliatis inter se fratribus, minori Ptolemæo Cypri regnum citra vim & arma traderetur.* Cum in eo statu res regnorum essent, Demetrius Seleuci F. ad Syriæ recuperandum regnum apertam sibi occasionem judicabat, infensis Lyfiæ Romanis, & ob facinus

§ XXXI. Polyb. excerpt. Legat. 110 & 111. § XXXII. Polyb. excerpt. Legat. 113 & 114. Diod. ap. Vales.

contra gentium jura patratum, totam istam aulam averfantibus. Igitur, Apollonio Apollonii F. consultore (quippe Polybius, ingenio & usu excellenti præditus, communi proverbio usus, *caveret bis ad eundem lapidem impingere*, dissuaserat) senatum adire statuit, ut, *si regnare Patres Antiochum mallent, ipse saltem necessitate pro obside manendi solveretur. Nec enim jure se attineri, mortuo Epiphane, cujus in locum obses ipse factus esset.*

XXXIV. Hæc cum ita nequidquam postulasset (nihil enim acciderat, cur priorem sententiam senatus mutaret) ad alia consilia conversus, Diodorum ad se vocat, educatorem suum, qui nuper ex Syria Romam advenerat. Is, ut erat homo callidus, & qui præsentem regni statum accurate teneret, ostendit, *nulla re alia, præterquam præsentia Demetrii, fore opus: ei, ubi conspectus primum esset, protinus omnes adhæsus. Nam & Lysiam invisum popularibus, & populum Lysiae suspectum esse, neque a Romanis timendum; nunquam enim iis, quorum opera Cn. Octavius occisum esse crederent, auxilium laturos. Nihil igitur aliud in præsentia meditandum, nisi qua ratione fugæ consilium solertissime nunc tegere, mox exsequi possit.* Adolescens, probata Diodori sententia, rem cum Polybio communicat: per hunc Menithyllus, Philometoris Ægyptii legatus, Demetrio conciliatur. Is navem Punicam nactus, quæ primitias Carthagine Tyrum ex veteri religione vehebat, quasi usufructus ea ad redditum suum, palam cum nautis paciscitur: convenit de mercede; comparatur ac infertur commeatus; tempus profectiois constituitur.

XXXV. His ita præparatis, præmittitur in Syriam Diodorus. Demetrius in eam diem, qua erat abiturus, paucis domesticorum secum retentis, *ceteram turbam præcedere Anagniam*, jubet; & *cum canibus apparatuque venatico, ad Circaum sibi occurrere.* nam ibi sæpe antea venationi operam dare consueverat. Idem fit a ceteris, quos consilii participes,

§ XXXIII. Polyb. exc. Leg. 114. Appian. Syriac. § XXXIV. Polyb.

viæque comites legerat. in quibus & Nicanor fuit, mox præcipuus amicorum. Ii cum singulis pueris ad navem, quæ ad Ostiam stabat, sese conferunt. venit eodem Demetrius, reperitque Menithyllum, qui nautis obtentu *novi a rege mandati* excusat, *quod ipse nequeat discedere: ceterum se juvenes istos probatæ fidei ad illum mittere.* Non interfuit nautarum, quos vectores tollerent, quandoquidem de mercede nihil ipsis decedebat. Itaque prima luce sublatis ancoris vela fecerunt, de comitibus suis præter id, quod a Menithyllo acceperant, nihil suspicati. Hac fraude quatrimum abiit, priusquam de fuga Demetrii dubitatum est.

XXXVI. Quinto demum die coactus ob eam rem senatus, quia multum itineris ille jam præceperat, *minime prosequendum esse* censuit. Sed haud multo post tempore Ti. Gracchum, L. Lentulum, & Servilium Glauciam ad res Græciæ inspiciundas miserunt. iis mandatum, *ut ex Græcia in Asiam transjicientes, cum aliorum regum, tum præcipue Demetrii consilia specularentur.* Datum etiam negotium est, *ut regum cum Gallogræcis controversias judicarent.* præsertim Graccho injectum, *ut his rebus omnibus præsens superesset.* M. deinde Valerius M. F. M. N. Messalla, C. Fannius C. F. C. N. Strabo consulatum acceperunt. In horum magistratu conviviorum luxui obviam itum: qui tum, ut rebus prosperis solemne est, in dies sumtuosiore intemperantia valescebat. Neque lex Orcia, quam vicesimo ante anno C. Orcius de senatus sententia in tribunatu tulerat, ruentes mores satis sustinebat, etiamsi servaretur: quia numero tantum convivarum coercito, ceteram epularum luxuriam sine freno reliquerat.

XXXVII. Crevit igitur, ut sæpe fit, irritatum remedio malum, passimque jam in pauciores convivas major impensa, quam in plures antea, fiebat. Adeoque in publicum damnum & dedecus væfana ingluvies iverat, ut vulgo jam in comitium ad consultationes de republica homines ebrii

§ XXXV. Joseph. 12, 17. Justin. 34, 3. Polyb. § XXXVI. Fasti Capitol. Macrob. Saturnal. 3, 17.

ventitarent : multique bonis suis evoluti per fœdam & abominandam turpitudinem prostituto corpore quærerent, quod mox haud multo minore infamia per gulam erant perdituri. Cum igitur hanc intemperiem ægerrime ferret, quidquid in urbe sanum erat, consensu bonorum sumtuarie leges expeti cœpere. Consulibus ea de re ad senatum referentibus, senatus in hæc verba censuit : *uti principes civitatis, qui ludis Megalensibus antiquo ritu mutitarent, jurarent apud consules verbis conceptis, non amplius in singulas cœnas sumtui esse facturos, quam centenos vicensque æris, præter holus & far & vinum, neque vino alienigena, sed patrio, usuros : neque argenti in convivio plus pondo, quam libras centum illaturos.*

XXXVIII. Ferre deinde consules ad populum placuit de modo sumtuum, qui in unumquemque diem fierent. ab altero consulum *Fannia lex* est appellata. Hæc ludis Romanis, item ludis plebejis, & Saturnalibus, & aliis quibusdam diebus centenos æris infumi concessit, decemque aliis diebus in singulis mensibus tricenos : ceteris autem omnibus diebus non amplius denos. Invitari vero præter domesticos convivæ ceteris diebus ternos, nundinis quinos. Eorum, qui legem suaserunt, C. Titii oratio exstat. qui, acriter invectus in vitia civitatis, *flare istam posse negavit, nisi illa tollerentur.* Ludos Megalenses Romanosque hoc anno L. Postumius Albinus, L. Cornelius Merula ædiles curules fecerunt.

XXXIX. Ita constitutis domi rebus, nihil æque, ac Syriaci motus, curam Patrum exercuit. Demetrius enim, postquam Lyciam fuga attigisset, scripserat senatui, *se ad pœnas ob Octavii necem a Lyfia repetendas, in Syriam festinare. Antiocho, quem populus Romanus regem appellasset, nihil nociturum.* Neque segnius, quam ostenderat, Tripolin pervectus, urbem voluntate oppidanorum recepit. Ibi cum magnus hominum ad eum concursus fieret, diademate sumto,

§ XXXVII. Sammonicus Serenus ap. Macrob. Att. Capitol. ap. Agell. 2, 24. § XXXVIII. Sammonicus. Lucillus ap. Agell. & Macrob. Athenæus l. 6. f. Titulus Comæd. Terentianar. Zonar.

Roma se ad repetendum senatus auctoritate regnum venire, mentiebatur. nihil enim aut sciebant aut suspicabantur de fuga ejus homines, cujus famam celeritate prævenerat. Igitur paulo post Apamea quoque potitus, cum valido jam exercitu contendit Antiochiam, regni caput. Lysias metu Romanorum opponere arma non ausus, in speciem pacis cum Antiocho procedit obviam. nec admissus in conspectum, cum pupillo a suis militibus interficitur. ita Demetrius regnum paternum citra laborem recuperat.

XL. Eodem anno senatum M. Pomponius prætor *de philosophis atque rhetoribus* consuluit: *quod sub his nominibus multi mercenarii sapientiæ facundiæque professores, juventutem Romanam contemptu patriorum institutorum, religionumque imbuiere dicebantur.* De his senatusconsultum factum est, *ut M. Pomponius prætor animadverteret, curaretque (si ei e republica fideque sua videretur) uti Romæ ne essent.* L. deinde Anicius L. F. L. N. Gallus, M. Cornelius C. F. C. N. Cethegus ineunt. His consulibus egregiæ vitæ L. Æmilius Paullus extremum diem clausit. Maximæ hominibus admirationi continentia viri fuit, quod cum liberaliter quidem, sed tamen citra luxuriam vixisset, unde dos uxori solveretur vix reliquerat: vendendisque mancipiis, & supellectile, & prædiis adhuc nonnullis, fuit opus, ut sexcenta nummorum millia conficerentur. Quibus detractis, in hereditate non amplius quindecies festerium remanebat. Nempe cum ditissimis populis regibusque bello congressus, & incredibili opum vi potitus, ærarium populi Romani pecunia, suam domum laude locupletare studuit. Plus auri ex Hispania, quam quisquam ante illum alius, advexerat in urbem: Macedonico triumpho bis millies centies in ærarium intulerat, tanto in populum Romanum beneficio, ut exinde tributum pendere desineret.

§ XXXIX. Joseph. 12, 16. Appian. Syriac. Zonar. Machab. 1, 7. Liv. Epit. 46. Eusebius. Agellius. 15, 11, § XL. Tit. Hecyræ Tæren. Liv. Epit. Plut. in Æmil. c. 5 & 42. Auctor de Vir. ill. Polyb. & Diod. ap. Valef. Valer. Max. 4, 3.

T. Liv. Vol. VII.

R

XLI. Neque male respondit ei benevolentia & honoribus civitas, quippe maximis condecoratum magistratibus, plus etiam impensi amoris testificatione ornavit. Sed & alia omnia, quæ homines faventi fortunæ acceptum ferunt, cumulatim ei obvenere. Sub finem vitæ, postquam Velia, quo se ex consilio medicorum contulerat, in secessu & otio diu fuerat versatus, desiderium non ferens populus, cum alias, tum in theatro, crebras edebat significationes, *ut se conspectui civium redderet*. His acclamationibus, & sacrificio quodam solemniter inductus est, ut Romam revertetur: idque sacrum cum collegis suis inter maximam gratulantis populi frequentiam peregit. Postridie rursus ipse pro sua incolumitate fecit: statimque, ut reversus est domum, delirio correptus, per quod ne sentire quidem morbum posset, tertia deinde luce exspiravit.

XLII. Tum vero patuit, quantus apud omnes amor ejus viri, quantaque veneratio esset. Nam ad deductionem funeris, non modo manuarii artifices, ceteraque vilis turba, suo quisque relicto opere, certatim concurrerunt; sed etiam magistratus atque senatus justitio sumto res protulere. Quin & ex circumjacentibus municipiis, quotquot occurrere in tempore potuerant, visendi simul honorandique funeris causa contuebant. Unde raro splendidiores cujusquam exsequiæ fuere; non tam auro aut ebore, ceterique apparatus nitore, quam insigni omnium benevolentia studioque, defunctum decorantibus. Præferebantur quidem, ut in funere nobilissimi viri, longa serie majorum imagines; sed majus ornamentum erat in ipsa hominum frequentia, cum non cives modo, sed ex infensissimis modo hostibus, quotquot aderant, erga memoriam tanta viri certarent studiis. Videres ex Liguribus, ex Hispanis, ex Macedonibus validiores quosque circa lectum funebrem ambitiose diligentes: sequebatur turba seniorum, & magno cum affectu *servatorem suæ quisque patriæ patronumque* appellabat. Quem enim armatum pugnantemque hostes ob virtutem timuerant, eundem

in pace victi ob justitiam gravitatemque haud minus amabant.

XLIII. Funebres parenti ludos Q. & P. Æmiliani fecere: quorum alterum in Fabiam, alterum in Corneliam gentem adoptandos dederat. Heredem utrumque reliquerat pater, sed P. Scipio jam tum in ea ætate generosum monstrans animum, cujus mox gloria præcelluit, semissem suum fratri C. Fabio adjecit, quod ipse in ditiores domum ascitus, cupiebat illum familiaris rei copiis sibi exæquari. Nec ideo minus in edendis gladiatoribus, ne funitu frater obrueretur, dimidiam ejus partem, ad millia nummum quadringenta, ex sua pecunia contulit.

XLIV. Hæc & alia liberalitatis specimina, quæ in affinis & matre ediderat, in urbe, ubi si nondum avaritia, jam parsimonia magna erat, laudibus & admiratione adolescentis omnia repleverunt. Qui constanter inhærens proposito suo, paulo post novis rumoribus priorem famam auxit, cum defuncta matre Papiria, non modo ex universo, quo eam donaverat, cultu recepit nihil; sed, quanquam ipse solus heres erat, omnia bona materna concessit fororibus, ad quas nulla pars hereditatis recepto jure pertinebat. Sub ea tempora magni laboris magnæque famæ opus consul M. Cethegus perfecit, paludes Pomptinas exsiccando. Locus ille olim trium & viginti urbium fuisse creditur. ubi tum animoso conatu consulis factus est ager, læto magis præsentibus, quam in longam posteritatem durabili, beneficio.

§ XLII. Diod. ap. Vales. Plut. in Æmil. c. 67. Diod. 31, 4.

§ XLIII. Titul. Adelphor. Terent. Diod. & Polyb. ap. Vales. Plut. in Æmil. c. 6. § XLIV. Diod. Polyb. Liv. Epit. 46. Mucianus ap. Plinium 3, 9.

JOANNIS FREINSHEMII
SUPPLEMENTORUM
LIVIANORUM
LIBER XII.

IN LOCUM LIB. XLVII LIVIANI.

E P I T O M E

LIBRI QUADRAGESIMI SEPTIMI.

Cn. Tremellio tribuno plebis multa dicta est, quod cum M. Æmilio Lepido pontifice maximo injuriose contenderat: sacerorumque, quam magistratuum, jus potentius fuit. Lex de ambitu lata. Lusitum a censoribus conditum est. censa sunt civium capita trecenta viginti octo millia, trecenta quatuordecim. Princeps senatus lectus Æmilius Lepidus. Inter Ptolemæos fratres, qui dissidebant, fœdus ictum, ut alter in Ægypto, alter Cyrenis regnaret. Ariarathes Cappadociæ rex, consilio Demetrii, regis Syriæ, & viribus pulsus regno, a senatu restitutus est. Missi a senatu, qui inter Masinissam & Carthaginenses de agro judicarent. C. Marcius consul adversus Dalmatas parum prospere primum, postea feliciter pugnavit; cum quibus bello confligendi causa fuit, quod Illyrios, populi Romani socios, vastaverant; eandemque gentem Cornelius Nasica consul domuit. Q. Opimius consul Transalpinos Ligures, qui Massiliensiunt oppida, Antipolim & Nicæam, vastabant, subegit. Præ-

terea res in Hispania a compluribus parum prospere gestas continet. Consules anno quingentesimo nonagesimo octavo ab urbe condita magistratum, peractis comitiis, insequentisque anni consulibus creatis, inire cœperunt. Mutandi comitia causa fuit, quod Hispani rebellabant. Legati, ad disceptandum inter Masinissam & Carthaginienses missi, renuntiaverunt, vim navalis materiæ se Carthagineprehendisse. Aliquot prætores, & provinciis avaritiæ nomine accusati, damnati sunt.

I. **M**EMORABILIS hoc anno contentio fuit inter Cn. Tremellium tribunum plebis, & M. Æmilium Lepidum, qui pontifex maximus erat. Itaque tribuno plebis, qui cum Lepido injuriose jurgatus fuerat, multa dicta; sacrosancti magistratus majestatem sacrorum vincente reverentia. Ludi hoc tempore Romani a Q. Fulvio, L. Marcio ædilibus curulibus editi sunt. Legem de ambitu, quæ circa hunc annum lata fertur, quis tulerit, adhuc quæro. Cn. Cornelium Cn. F. Cn. N. Dolabellam, aut M. Fulvium M. F. M. N. Nobiliorem legis auctorem exstitisse non absurdum est, qui proximi consules fuere. Sed quia postmodum, credo, de eodem crimine plenius diligentiusque cautum est, memoria vetustioris legis exolevit.

II. Celebrior multo censura est, quam his consulibus gessere duo clarissimi viri P. Cornelius P. F. Cn. N. Scipio Nasica, M. Popillius P. F. P. N. Lænas. Ii lustrum fecerunt. quartum atque quinquagesimum. censa sunt civium capita trecenta viginti octo millia, trecenta quatuordecim. Ab his quoque princeps senatus, M. Ænilius pontifex maximus lectus est quintum. Censuræ severiter actæ hoc quoque monumentum est, quod sequitur. Eques Romanus cum equum strigosum & male habitum, ipse pinguis & bene curata cute, adduxisset, interrogatus est a censoribus, qui fieret, ut dominus equo tantum esset habitior? Atque ille, *quoniam*, inquit, *ego me curo, equum Staius meus.* Id responsum cum

parum reverens videretur, notatus ille est a censoribus, æra-
riusque factus.

III. Horologium novum in superiore censura locatum fuerat : id quoniam usui non erat tempore nubilo, P. Scipio, divilis æqualiter noctis ac diei horis, horologium sub tecto dedicavit, quod fluentis aquæ indicio temporum intervalla metiretur. Græci clepsydram appellarunt. Res in speciem haud magnifica, ob ingentem utilitatem lætis animis accepta est. Nam apud prudentes pleraque vitæ officia temporibus distribuuntur : quorum negligi rationem qui parum referre putant, utilissimæ rei pretium non intelligunt. Iidem censores, ut ambitioni, vires quotidie summenti, sic quoque iretur obviam, cum multæ passim circa forum statuæ essent positæ, sustulerunt omnes, exceptis quæ de senatus aut populi sententia statutæ essent : in his, quam apud ædem Telluris Sp. Cassius, qui regnum affectavit, posuerat ; etiam conflare. Operum, quæ in censura hac locata sunt, nobilissimum porticus in Capitolio fuere. locavit P. Cornelius. Lustrum hî fecerunt sub exitum magistratus sui, consulatum jam gerentibus M. Æmilio M. F. M. N. Lepido, C. Popillio P. F. P. N. Lænate iterum.

IV. Hic etiam annus pluribus regum negotiis, quam propriis, occupatos Patres habuit. Ptolemæus enim Physcon, magno cum favore dimissus ab senatu, in Græcia validas mercenariorum copias conduxit. Recepit & Damasippum, genere Macedonem, qui proximas inter turbas publico consilio, quod Phaci fuerat, interemto, cum uxore liberisque ex Macedonia profugerat. Cum his in oppositam Rhodo continentem transgressus, & hospitaliter exceptus a Rhodiis, navigare Cyprum statuerat : nisi T. Manlius Torquatus, qui legatione ab senatuungebatur, monuisset, *contra sententiam Patrum facturum videri, qui eum citra vim jussissent*

§ II. Fasti Capitol. Liv. Epit. Masurius Sabinus ap. Agell. 4, 20 & Nonius voce Strigofus. § III. Plin. 7, 60. Censorinus de die Natali. L. Piso ap. Plin. 34, 6. Auctor de Vir. ill. c. 44. Vell. 2, 1, & 3.

reduci. Unde postremo consensit, ut, dimisso circa Sidam milite, Cypro abstineret, & in finibus Cyrenes Torquatum opperiretur, qui, *se recta profecturum Alexandriam*, dicebat, *ut adducto in suam sententiam rege, una cum ipso eosdem ad fines occurreret.*

V. Ita cum altero legatorum Cn. Merula, & Damasippo Macedone, in Cretam se contulit; conductisque mille ferme Cretensibus, navigavit in Libyam Ægypto conterminam, ibique exscensione facta, castra ad Apin posuit. Hic cum ad aliquot dies Torquatum frustra expectasset, Cn. quoque Merulæ persuasit, *ut Alexandriam pergeret*, animum fratris citius expugnari posse auctoritate duorum arbitratus. Sed hoc quoque consilium frustra fuit, retentis Alexandriæ legatis, quos major Ptolemæus omni arte versabat, ne vel perficere, quod instituerant, vel prius regredi, quam ex utilitate regis, possent. Ita cum Physcon ad Apin diebus quadraginta nequidquam hæssisset, alio præterea majoris tædii nuntio perculsus est.

VI. Quippe deficientes Cyrenæ alias quoque civitates ad consensum traxerant, aderatque iis socius consiliorum & adjutor Ptolemæus, cui rex, Romam proficiscens, summam rerum mandaverat. Hoc nuntio vix peracto, supervenit aliud, *jam in armis defectores esse, constoque exercitu castræ locis apertis metari.* Quapropter amittere Cyrenen timens, dum Cyprum studet adjicere, dilato hoc consilio Cyrenem versus iter instituit. Ceterum neque minis, neque precibus, adduci potuere Cyrenenses, ut arma ponerent, & immitis domini jugum sponte subirent, cujus crudelitatem Alexandriæ malis abunde testatam noverant, horrebantque. Itaque post leves aliquot velitationes signis collatis certatum est: victumque regem Cyrenenses repulerunt.

VII. Rediit tum ad eum Cn. Merula, negans, *a Philometore quidquam impetrari potuisse, asseverante, pacta inter fratres olim inita; neque esse, cur mutari ea, vel aboleri oporteat.* Igitur ex suis Comanum & Ptolemæum fratres adjun-

git Merulæ, ut de regis Alexandrini iniquitate apud senatum querantur. Introductorum in curiam hæc oratio fuit: *Gratias senatui populoque Romano regem, gratias legatis agere: neque enim per hos stetiſſe, quo minus alterorum auctoritate curaque, alterorum labore ac opera finem votorum ſuorum obtinuiffet; niſi fratris iniqui dolo circumventi omnes forent. Neque mirandum, ſi ſenatum contemtui, ſi legatos ludibrio habuiſſet, homo præter profundam dominandi cupiditatem non rationi ulli, non affectui penetrabilis: apud quem jam olim & artiſſimæ neceſſitudinis jura, & fœderum paſtorumque fides, quo uno firmiſſimo vinculo generis humani ſocietas continetur, eviſerunt.*

VIII. *Sed antiqua non repetimus. utinam tam facile novis injuriis ille abſtineret, quam nos priorum obliviſcimur? Quinquennio ante, cum juſta civium indignatione pulſus veſtram ad opem perſugiſſet, vos pro ſolita bonitate veſtra, & quia æquum eſſe putabatis, quos natura tam arcta cognatione junxiſſet, eos animis non diſſidere, veſtram auctoritatem interpoſuiſtis: ibi rex noſter, quanquam cauſa viribuſque ſuperior, tamen quid vobis deberet, quam quid ille meruiſſet, cogitare maluit: in poteſtate legatorum veſtrorum fuit, illis agentibus eas conditiones viſto dedit, quas in pari jure fortunaque petere non eſſet auſus, ſperare nequiviſſet. An non igitur tantæ ſociorum curæ favorique, tantæ fratris indulgentiæ vicem referri oportuerat? Ille autem quid fecerit, videre: Modestas fratris querelas non ſine contumelia ejus inſuper habuit: novis etiam additis injuriis, cumulatique.*

IX. *Quas ubi ille ferre diutius non potuit, ad vos, tanquam deorum vicem regibus populisque jura reddentes, ſe contulit: vobiſque, ut in tam evidenti negotio facillimum factu fuit, cauſam ita probavit, ut ex ampliſſimo ordine viros clariſſimos legatos Alexandriam mitteretis, qui voluntatem veſtram, de Cypro inſula fratri reſtituenda, ſignificarent. Te nunc, T. Torquate, appello, teque, Cn. Merula, veneritiſue Alexandriam, mandata ſenatus expoſueritis, pro fide, pro prudentia veſtra prætermiſeritis nihil, quo animum intractabilem docendo, monendo, hortando, ad meliora conſilia ſteſceretis? Ita certe a vobis abunde*

factum ; nequè quidquam , quod ab hominibus vestri loci animique expectari fas est , defuit.

X. At quo successu eventumque ista factitata sint , jam olim , opinor , Patres conscripti , his ipsis referentibus , cognovistis. Ita sunt circumducti fraudibus , ut constaret , eludendi eos consilium ceptum esse : ita , cum eludi non possent , per varias & absurdas causas retenti , ut appareret , si manere decepti nollent , manendum coactis fore. Post multas demum dilationes re infecta dimissi sunt. dimissi sunt , inquam , vacui irritique legati , neque apud eum regem majestas populi Romani valuit , pro quo apud hostem Antiochum , totam Ægyptum armis obtinentem , valuerat. Neque hic finis impietatis & contumaciæ fuit : sed Cyrenaica seditio , quibus aliis facibus , quam regis Alexandrini nuntiis atque consiliis , exarsit ? Neque enim satis aut in fratrem acerbis , aut adversum vos contumeliosus , sibi videbatur , nisi Cypro , quam restitui jubebatis , retenta , etiam Cyrenen extorqueret.

XI. Verum enimvero fructu improbitatis suæ haudquaquam diu gloriabitur , sat scio , Romani : neque enim animos viresque vestras eodem , quo ille , judicio atque æstimatione metimur. Ille , ut hominibus improbis mentem vitia hebetant , neque consilia vestra supra artes suas , neque arma supra potentiam æstimat : nos neque senatui huic ullum in orbe terrarum par sapientia concilium esse novimus ; neque legionibus Romanis aliud militum genus fortitudine conferendum. Itaque magna cum spe non irritarum precum , vos rogamus obtestamurque , Patres conscripti , ne regem , quem ipsi fovistis , texistis , ornastis , quique invicem vos perpetua fide observavit atque coluit , eo maxime tempore , quo vestro munere florentissimus esse debuerat , inopem , extorrem , deceptum a fratre , proditum ab amicis , contemptum a popularibus , consilium auxiliumque vestrum frustra implorare sinatis : quandoquidem ita cum vestra gloria ac utilitate causa illius conjuncta est , ut , quantum ille aut existimationis , aut opum amiserit , tantundem vestræ quoque famæ , vestrisque obsequiis decessurum esse videatur.

XII. Adversus hæc iterum Menithyllus a majore Ptolemæo affuit. Sed in minoris causam inclinatis Patrum ani-

mis, Torquatoque & Merula, qui a legatione interim redierant, eandem enixe juvantibus, senatus *intra diem quintum Italia excedere Menithyllum* iussit, decreto, *uti fœdus, quod populus Romanus cum majore Ptolemæo habuerat, tolleretur: legatique mitterentur ad juniorem, hujus senatusconsulti ad eum perferendi gratia.* Missi P. Apustius, C. Lentulus Cyprenis, jam receptum, reperere. Quare nova spe animatus, tota mente de Cypro recuperanda cœpit cogitare, militemque & alia bello necessaria summa ope colligere.

XIII. Novorum interea motuum causæ cum Dalmatis exortæ. Populus iste sub Pleurato nuper fuerat: eo defuncto, deficiens a Gentio, non usurpabat modo libertatem, sed jam vicinos incipiebat ad servitium cogere. tributoque pecorum & frumenti nonnullis imposito, alii, qui id dedecus abnuebant, perpetuis illorum latrociniiis vastabantur. Lissii præcipue Daorsique fiducia Romanæ societatis resistebant: frequentesque ab ipsis querelæ delatæ erant: Lissiis *agros & oppida sua (Tragyrum & Epetium habebant) infestari* nuntiantibus, nec absimilia Daorsi afferebant. Placuit igitur legationem ad Dalmatas mitti, eadem opera res Illyricas inspecturam. Ejus legationis princeps C. Fannius fuit. At Romæ M. Fulvius Nobilior proconsule ex Liguria de Elcatum populo triumphavit a. d. XII Kal. Septembres. De quo equidem, quas res, aut quomodo gesserit, nihil præterea inveni. Certe per ea tempora cum graviorum bellorum materia deficeret, non ideo deficiebat ambitio: sed quia soli propemodum Ligures, magis loco, quam viribus, freti, arma retinebant, in horum expugnandis castellis captandæ laudis occasio quærebat.

XIV. Sex. deinde Julio Sex. F. Sex. N. Cæsare, L. Aurelio L. F. L. N. Oreste consulibus, Romam Ariarathes venit, vi Orophernis, qui se fratrem ejus ferebat, Cappadocia expulsus. Cujus rei originem paulo supra repetendam

§ XII. Polyb. excerpt. Legat. 117. Diod. ap. Fulvium. Polyb.
§ XIII. Liv. Epit. 47. Zonar. Polyb. excerpt. Leg. 124. Fasti Capitol. Cic. in Bruto c. 73.

arbitror. Ariarathes, qui proxime regnaverat, Antiochidem in matrimonio habuit, Antiochi Magni filiam. quæ cum, prioribus aliquot conjugii annis sobole nulla genita, timeret, ne vilior viro & Cappadocum genti fieret, callidissima mulier semel atque iterum fœcunditatem mentita, primum sub Ariarathis nomine puerum, deinde alium, Orophernen, educavit. Postea vero cum, ut fit, natura aut remediis vitium vincentibus, voti se compotem factam videret, duas filias unumque mox filium enixa, rem totam marito patefecit. Ille, ne subdititii liberi vero & naturali filio obstarent, alterum quidem Romam mediocri instructum censu, alterum in Joniam ablegavit. Mithridatem autem (id nomen nato ex se fecerat) mutato vocabulo Ariarathen & ipsum appellavit: unice dilectum parenti, neque male respondentem in amore. Denique pulcherrimum certamen inter eos exortum est, ut, quo tempore alibi locorum regna parricidiis aut adepti, aut servari in morem venerat, in Cappadocia pater Ariarathes cedere filio contenderet, filius quilibet passurum potius, quam ut patrem privatum videret, pervicacissime testaretur. Unde non immerito Philopatoris ei cognomen inditum est a Græcis, qui tum primum (nam & studiorum amore peritiaque adolescens iste celebratus est) in Cappadocia literarum & cultioris sapientiæ sedem posuerunt.

XV. Hic igitur Philopator, post obitum senis hereditate adita, nihil antiquius habuit, quam ut patrem omni honoris & magnificentiae genere contumularet: deinde amicos, præfectosque, & populum universum, digna quemque cura profecutus, maximam apud omnes benevolentiam sibi comparavit. Unde prospera ei regni initia fuerunt: magnusque jam vulgo & clarus, ob amorem suorum, & justitiæ fideique gloriam, habebatur. Cujus egregium specimen in casu Mithrobuzanis Zaicadre geniti demonstravit. Is de Sophenes regno cum fratre certans, ab illo, qui viribus Artaxiæ prævaluerat, fusus est. Pulso apud Cappadoces perfugium fuit, & mox auxilium ab Ariarathe; qui supplicem suum valido

§ XIV. Polyb. excerpt. Leg. 126. Diod. 31, 3. Diod. ap. Vales.

cum exercitu in regnum paternum reducebat. Sed Artaxias moris sui tenax, cum Armeniæ, parum laudabiliter occupatæ, Sophenen adjicere cuperet, legatione missa conditionem Ariarathi obtulit, *ut ille Mithrobuzanem occideret; se pariter fratrem illius interfectorum: ita dividi inter ipsos regnum Sophenes posse.* Hoc scelus averfatus Cappadox, non modo, legatis increpitis, Artaxiam monuit, *ab ejusmodi cogitatione desisteret;* verum etiam Mithrobuzanem non deseruit, priusquam in res amissas eum restitueret.

XVI. Hac fama & societate Romana conspicuus, sine metu regnabat, donec rex Syriæ Demetrius adversarium ei Orophernem excitavit: offensus, quod in gratiam Romanorum, qui Demetrio succensebant, Ariarathes, fœdere inter Syriæ Cappadociæque reges abolito, sorori quoque ejus nuntium remisserat. His incensus, & mille talentorum pretio, quæ Orophernes ei promittebat, impetere consiliis & viribus Ariarathen non ante destitit, quam regno illum cogeret excedere. Neque pulsum, & Cappadocia profugum, seignius Romæ per legatos urgebat, quorum princeps Miltiades fuit. Aderant & ab Oropherne legati Timotheus & Diogenes, donum populo Romano coronam auream ferentes, *amicitiamque renovari cum rege petebant, quæ populo Romano cum patre ejus Ariarathe fuisset.*

XVII. Hi consensu oppugnabant Ariarathen, & quoniam despectum & inopem ipsi florentes opibus & gratia premebant, apud plerosque divitum & largitorum calumniæ plus poterant, quam unius miseri vera defensio. Hactenus tamen causa ejus, & meliorum ex fenatu contentio, profecit, *ut in regnum recipi juberetur, sed cum Oropherne fratre dividendum.* Neque enim eo tempore quidquam aut gratius Romanis, aut usitatius erat, quam dare operam, ut regnorum potentia, partitis in plures opibus, divideretur. Sed non diuturnum ob vitia novi regis incommodum prioris fuit.

§ XV. Strab. l. II. § XVI. Diod. ap. Fulvium Ursinum. Justin. 35, 1. Appian. Syriac. Liv. Epit. 46. Polyb. 3, 5. Ejusd. excerpta. Legat. 126.

Orophernes enim, cum in recenti possessione firmare sibi favorem hominum prudentia beneficiisque deberet, pari intemperie in luxum & avaritiam provolutus est. Nam & vino deditissimus, præter instituta patria, Bacchicorum artificum introduxit insaniam: & pecunia undiquaque corrasa, Timotheum quidem, quo præcipue auctore ad regnum pervenerat, talentis quadraginta, Demetrium regem septuaginta, coronavit: præter sexcenta talenta, quæ paulo post numeraturum eidem recepit, & alio die residua quadringenta. Quibus rebus cum alienatos a se popularium animos animadverteret, jam velut ab inimicis vindictæ causa extorquebat pecunias, quando in suorum animis non posset, in his spem præsentium rerum collocaturus. eo consilio & apud Prienenses pecuniam, talenta quadringenta, deposuit, ut subsidio hoc in omnem fortunam uteretur.

XVIII. Nihil horum Ariarathen fallebat, qui, cum se plerisque Cappadocum gratum esse, contra Orophernem omnibus exosum, sciret, colligere copias cœpit, & regni partem, unde vi extrusus fuerat, vi repetere. Neque leve adjumentum erat Attalus, qui nuper defuncto Eumene, pro filio ejus Philometore Attalo regnum administrans, enise ferebat auxilium: plus tamen ipse sibi contulit, prudentia & labore dignum se loco, quem reposcebat, ostendens. Unde res suas quætidie deteriores fieri videns Orophernes, & hoc quoque metu, ne ad hostem deficeret, ob stipendiorum solvendorum moram, exercitus, quem per injustitiam occupaverat statum, sacrilegio tueri instituit. Celebre gentibus illis sub monte, quem Ariadnes vocant, templum est, Jovi sacrum: id veteri opulentia dives spoliavit ille, militibusque stipendium ex ea pecunia dissolvit. Neque tamen (ut breve plerumque ævum est potentiae pravis artibus fultæ) diu resistere vel hostium viribus, vel civium odiis, potuit: relictoque regno, ad Demetrium, unde venerat, Antiochiam

§ XVII. Liv. Epit. Appian. Diod. ap. Vales. Ælian. hist. var. 2, 31. Polyb. ap. Athen. 10, 11.

se recepit. Hic eo tempore finis motuum in Cappadocia fuit.

XIX. At in Africa perpetuis Masinissæ adversus Pœnos odiis injuriisque res inquietæ erant. Circa minorem Syrtin ager amplius colitur, quem uberem gleba, oppidis quinquaginta frequentatum, & per hæc locuplete reditu Carthaginienſes obtinebant: ipsi Tyſcam vocant regionem; Græci dixerunt Emporia. Eum cum cœpiſſet concupiſcere Maſiniſſa, ob potentiam ſuam, & favorem apud Romanos, ſeu vi, ſeu jure agendum foret, potiorẽ ſe futurum ratus, armata manu occupare non diſtulit. Et agrum quidem facile receperat, Pœnis cum alias ad terreſtria bella minus aptis, & tum ex diuturna pace languidioribus: oppida tamen illi retinebant. Hic rerum ſtatus utroſque impulit, ut iis de litibus frequenter legatos mitterent Romani: deteriori ſemper Pœnorum conditione. Neque dubium erat, quin cauſa vincerent. nam & Maſiniſſa, cum annis aliquot antea perſequeretur Aphtheratum quendam, qui a rege deſciverat, tranſitu per regionem iſtam, ut alienam, precario poſtulato, deinde, quia negabatur, omiſſo, Carthaginienſium jus affirmaverat.

XX. Sed ſenatorum plerique magis ad utilia, quam ad juſta reſpicientes, regi gratificabantur, adeo cum aperta Pœnorum injuria, ut non modo urbibus, de quibus controverſiam Maſiniſſa moverat, exigi, ſed & quingenta inſuper talenta, fructuum perceptorum nomine, quaſi malæ fidei poſſeſſores, pendere paterentur. Quippe decretam a ſe legationem tamdiu diſtulerant, donec adigi a rege ad iniquas pactiones poſſent: tum denum a Roma legati, & in his M. Cato, venerunt. his Maſiniſſa quidem arbitrium totius negotii facile permittere: Pœni, quod deſperabant æquo ſe jure uſuiros, negare, *ullo novo arbitrio opus eſſe: fœdus ſibi cum rege multos ante annos auctore Scipione percuſſum: id potius pudore & fide contrahentium, quam correptione ulla, indigere.* Legati, quod *altera partium invita nihil ſe ſtatueri poſſe cau-*

¹ § XVIII. Strab. l. 13. Polyb. ap. Valeſ. Pol. 3, 5. Diod. Juſt. 35, 1.
§ XIX. Polyb. exc. Legat. 118. App. Punic. Polyb. Liv. 34, 61.

fabantur, rebus uti erant relictis, redierunt. Neque in præfens modo iniqua hæc legatio Pœnis, sed etiam paulo post exitiosa fuit: hinc orto Catonis metu, ob quem deinceps continuo ad Carthaginis delendæ consilia Patres stimulabat.

XXI. Sed prior bellandi cum Dalmatis occasio venit. C. Fannius, ex ista legatione reversus, renuntiaverat, *ne proferri quidem apud Dalmatas mandata potuisse, sibi nihil cum Romanis esse negotii ferentes. sed neque quidquam in se hospitaliter, aut etiam humaniter, Dalmatis factum. neque locum & laetitia data, quin equos aliunde ab se adductos prædæ barbaris fuisse, adeo procaciter inveltis, ut haud procul exitio absuerint legati, nisi contumelias istas injuriasque patientia & silentio perulissent.* Movit hominum arrogantia Patres, eamque gentem bello persequendam haud dubitabant: sed plus adhuc stimulorum subiciebant aliæ causæ, quod bellum sibi necessarium iis locis putabant; tum quia multo jam tempore, ex quo Demetrius Pharius debellatus fuerat, partem illam Illyrici, quæ ad mare Adriaticum vergit, non inspexerant: tum quia nolebant Italicorum populorum animos diuturniori otio marcescere. Annum enim jam duodecimum, reducta in potestatem Macedonia, quieverant.

XXII. Hæc eo ferme anno gesta, & in Piceno agro Auximum coloniam deductam, reperio. Sed ubi L. Cornelius Cn. F. L. N. Lentulus Lupus, C. Marcius C. F. Q. N. Figulus iterum, magistratum inierunt, prodigia quædam nuntiata. quibus rite procuratis in provincias profecti sunt consules. Bellum Dalmaticum C. Marcio evenerat: cum eo iussi proficisci legati ad res Epiri ordinandas. nuper enim a Phœnica, quæ maxima Epiroticarum urbium est, legati venerant, postulantes, ne recipere exsules cogerentur, qui Charopo auctore pulsi urbe fuerant, & tum missis ex suo ordine nonnullis, *a senatu restitui* orabant. Ceterum C. Marcius consul cum exercitu in fines Dalmatarum irruptionem fecit. Sed, occurrentibus strenue Dalmatis, ignominia & pæne clades accepta est, turbato Romanorum agmine, & ad flu-

vium usque Naronem retroacta. Quapropter emendaturus, quod acciderat, consul, hostem hieme jam appetente recedentem infecutus est. spes erat, quod evenit, ex anni tempore, & re commode gesta, negligentiores ad custodiam regionis Dalmatas fore.

XXIII. Illi, jam in sua oppida dilapsi, ad famam venientis exercitus Romani, propere congregantur. Sed prius ab intento hoste disjecti sunt, quam contrahere vires suas & ordinare possent. Delminium plerique fuga contenderunt: robustissimum illis locis oppidum, & gentis caput. Id ex itinere oppugnare aggressus, cum primo impetu nihil egisset, admoverique machinas loci, ubi sita urbs erat, altitudo vetaret, ad alia minora oppida exercitum circumduxit. Quæ ubi metu hostium deserta & vacua videt, Delminium revertitur. Urbs erat loco & opere munita, sed inerant ædificia multa ex arida materie. id postquam animadversum est, fudes bicubitales parari consul jubet, quas pice ac sulphure illitas, stuppaque multa obligatas, catapultis in urbem mitterent: & successit dolus: leviter incensæ, dum per aerem feruntur, ingentem vim concipiebant flammarum, quæ, ubi ædificiis incidissent, vicinis quibusque facile comprehensis, tantum excitarunt incendium, ut, eo multis hostium confumtis, ceteri venire in potestatem cogerentur.

XXIV. Nescio, an hoc anno, circa hoc tempus certe, Ælia & Fusia leges, a duobus tribunis plebis perlatæ, comitiorum vitia, quoad occurri potuit, pleramque partem sustulerunt. Ælia cavebatur, *uti comitiis legum haud minus, quam magistratum, de cælo servandi, obnuntiandi, intercedendique jus esset.* Fusia *fastis diebus legum ferendarum causâ cum populo agi* vetabat. Exceperunt deinde P. Cornelius P. F. Cn. N. Scipio Nasicus, M. Claudius M. F. M. N. Marcellus, uterque iterum consules. Horum Scipioni Dalmatæ, Marcello Ligures & Gallicæ provinciæ evenerunt. Ex præ-

§ XXII. Vell. 1, 15. Jul. Obseq. Polyb. excerpt. Legat. 117. Polyb. ap. Valer. Appian. Liv. Epit. 47. § XXIII. Liv. Epit. Appian. Florus. 4.

toribus unius A. Postumii Albini maxime nota fors est, quem ex legationibus in senatum introductis prætorem urbanum fuisse, indubitatum est. nam & ille annus celebres Græcorum legationes habuit. Athenienses delectos studiorum & philosophiæ fama Carneadem Academicum, & Diogenem Stoicum, & Critolaum Peripateticum misere: qui *judicium rescindi postularent, quo, ad multam Oropiis luendam, talenta quingenta erant condemnati.* Namque populus Atheniensis necessitate potius, ut creditur, stimulante, quam avaritia, sociam atque fœderatam urbem Oropum diriperat. Oropii, apud senatum questi, obtinuerunt, *ut de suis injuriis Sicyonii cognoscere juberentur, & quanti eas fecissent, illis tanti Atheniensibus lis æstimeretur.* Sicyonii talentis quingentis æstimarunt.

XXV. Sparsa per urbem fama, viros sapientiæ & eloquentiæ celebratissimos venisse, statim accendit juventutem, ut ad visendos audiendosque concurrerent; præcipua Carneadis admiratione, cujus ad persuadendum quidlibet incredibiliter apta erat oratio. Is enim violenta & rapida dicebat, scita & teretia Critolaus, modesta Diogenes & sobria; tanquam omnia facundiæ genera, diversis formis, pari excellentiæ laude complexi. Quibus rebus tantum æstimationis pepererunt, ut C. Acilius senator pro magno munere petierit, *mandari sibi ad orationes illorum exponendas interpretis vices.* Hæc equidem ceteris Patrum non ægre ferentibus, (neque enim absurdum videbatur, Romana ingenia etiam studeorum cultu nitescere,) M. Cato severitate solita stomachabatur, veritus, ne gustata harum artium dulcedine, studium armorum Romana juvenus amitteret. Igitur cum primum in senatu verba fecissent, *omnes philosophos per honestam aliquam causam ex urbe ablegandos censuit;* atque alio tempore in senatum ingressus, objurgavit magistratus, *quod homines persuadendi qualibet artifices tam diu non absolverent; quo ad Græculos suos regressi, Romanam urbem, nullis argu-*

§ XXIV. Aurel. 7, 14. Petavii Rationar. p. 128. Cic. Orat. 2, 37. Euseb. Pausan.

rationibus corruptam, ad majorum exemplar legibus atque magistratibus obedire sinerent. Itaque dimissi deinde sunt, mulctæ maxima parte remissa, ut de quingentis centum tantummodo talenta penderent.

XXVI. Interim in Asia bellum inter Attalum & Prusiam reges exarserat. quo inferior Attalus, cum ab hoste urgere-tur, P. Lentulo, qui tum ex Asia revertebatur, Athenæum fratrem adjunxit, ut senatum de rebus omnibus certiore faceret, ac ad opem sibi serio ferendam hortaretur. Miserat antea quidem Andronicum, qui doceret Patres, a Prusia se infestari: sed hi potius arbitrati, Attalum Bithyno imminentem parare sibi probabilem causæ speciem, rem insuper habuerunt; eo magis, quod & Nicomedes, filius Prusiæ, & legatus Antiphilus negabant, quidquam eorum factum, quæ Andronicus diceret. Paulo autem post, cum, ipso rumore res perferente, viderent Patres, non esse nihili, quod accidisset, neque tamen, quale esset, liquido possent intelligere, jusserunt L. Apulejum & C. Petronium ad res regum introspectiundas proficisci. Venerunt deinde L. Lentulus, & regis frater Athenæus. Lentulus cum Asiaticarum rerum statum, qualem ipse viderat, exposuisset Patribus: confestim vocari Athenæum in curiam placuit, & pro benevolentia senatus in regem Attalum legatio decreta, quæ Prusiam bello juberet abstinere.

XXVII. Profecti sunt cum Athenæo C. Claudius Centho, L. Hortensius, L. Aurunculejus legati. Tum iterum causa Achaicorum exsulum tractata est in senatu, cum de iis Xenon Ægientis, & Telecles Tegeates, verba fecissent, nihilque propius factum, quam ut dimitterentur: nisi A. Postumius prætor (is per absentiam consulum senatum habebat) astu rem intervertisset. cum enim tres essent sententiæ: una, absolvi homines placere, dimittique: altera, non absolvi, & retineri: tertia, retineri quidem adhuc, sed absolvi tamen: prætor rogatione sua duas complexus, tertiam dissimulavit, discedere

§ XXV. Plut. in Catone maj. c. 44. Cic. de Orat. 2, 38. Rutilius & Polyb. ap. Agellium. Macrobian. Saturnal. 1, 5. Ælian. hist. var. 3, 17. XXVI. Pausan. Polyb. excerpt. Legat. 128 & 129.

in unam partem jubens, qui dimittendos censerent; in diversam, qui alia omnia. Sic ad eos, qui absolvendos negaverant, iis quoque se adjungentibus, qui dixerant, in præsentia retinendos, illa sententia numero vincere visa est. Judicium eo tempore L. Lentuli actum, qui consul anno superiore fuerat. Isque damnatus repetundarum lege Cæcilia, postmodum tamen ad supremos in republica honores admissus est.

XXVIII. Dum hæc Romæ aguntur, in Hispania cum Lusitanis, duce Punico quodam, agros sociorum nostrorum incurfantibus, improspere dimicatum est. Manilius, qui Romanum exercitum ducebat, multis amissis retrocessit. Melioribus auspiciis consules in Liguribus & Dalmatis gesto bello, triumphum meruerunt. Clariora tamen P. Scipionis acta sunt, qui, confecto bello Dalmatico, provinciam novam adjecit imperio. Maximus hæc agenti labor circa Delminium fuit, quam relictam a C. Marcio gens Dalmatarum instauraverat, contractoque ex omni regione flore juventutis, acerrime pro ea propugnabat. Unde consul, difficultate rei percepta, exercitum aliis eorum oppidis admoveere cœpit. at ii, quorum ea oppida erant, omisso Delminii præsidio, ad sua quisque tutanda accurrerunt. Ibi tum Romanus, protinus ad Delminium raptis copiis, urbem inopia propugnatorum laborantem facili negotio redegit in potestatem. Imperatoris nomen, cum de more a militibus acclamatum esset, recusavit: parique deinde modestia triumphum, a senatu oblatum, vix accepit. Multi eo bello Dalmatarum capti sunt, quos in servitutem consul vendidit. Delminium, quæ prius urbs ampla fuerat, exiguam, solumque pecori pascuum redegit.

XXIX. Venerunt deinde rursus ab Achæis legati, animatis priorum relatione, qui proxime optatum finem adductum fuisse negotium narrabant. Telecles Megapolitanus & Anaxidamus missi. sed & istorum diligentia nihilo feli-

§ XXVII. Val. Max. 6, 9. § XXVIII. Appian. Hispanic. Diod. Ecl. 31, 5. Fasti Capitol. Polyb. 12, 3. Front. Strat. 36. Auctor de Vir. ill. c. 44. Zonar. Strab. l. 7. Polyb. exc. Legat. 130.

cior, quam superiorum omnium, fuit. Massiliensium vero preces benigne sunt auditaе, *auxilium adversus Ligures petentium, qui, obsessis Nicæa & Antipoli, Massiliensium oppidis, urbem ipsam magnas in angustias coegerant.* Decretum est, *ut legati ad res Massiliensium inspiciundas mittrentur; iique darent operam, uti Massiliensibus satisfaceret, ne quod bellum ea de causa suscipi opus esset.* Neque tamen declinari necessitatem eam barbarorum feritas passa est; quia sequenti anno, quo Q. Opimius Q. F. Q. N. L. Postumius Sp. F. L. N. Albinus consules fuere, cum Oxybiis atque Deceatibus Liguriæ populis bellaretur. At L. Postumius cum iturus in provinciam immolasset, in plurimis victimis caput jocinori defuit. Profectus nihilominus, post diem septimum æger relatus est Romam, ibique exspiravit. Ista res perculit hominum animos: maxime quia &, Consæ arma in cœlo volare visa, nuntiatum, & multa illustria loca fulminibus tacta fuerant. In mortui locum consul factus est M. Acilius M. F. C. N. Glabrio.

XXX. Cum interea novi a Massilia legati, *nihil pro se populi Romani auctoritatem valuisse*, afferrent, statim a senatu missi sunt Flamininus, Popillius Lænas, L. Pupius, qui, conscenso navigio, Ægitnam, quod Oxybiorum oppidum est, appulerunt. At Ligures, audito, *venire Roma legatos, qui solvi obsidionem imperarent*, procurrunr in portum: alios, qui adhuc in navi erant, exscensionem facere vetant, Flamininum jam egressum agro suo jubent *excedere*. quod cum ille facere recusaret, manus injiciunt sarcinis: vim prohibentes servulos, duobus occisis, repellunt, ipsumque adeo legatum convulnerant, haud dubie interfecturi, ni subito receptus in navim, præcisus funibus, imminente exitio se eripuisset, Massiliam ad curanda vulnera contendens. His rebus Romæ auditis, maturare profectionem Q. Opimius consul iussus, in agro Placentino diem edicit militibus. inde per Apenninum ducit in Oxybios, castrisque ad amnem Apro-

§ XXIX. Polyb. excerpt. Legat. 113 & 132. Liv. Epit. 47. Polyb. Julius Obsequ. c. 76. Fasti Capitol.

nem positis, adventum hostium expectat. Concurren enim illos, & obviam Romanis ituros, fama tulerat. Deinde, ubi rem diutius trahi videt, motis ab Aprone castris, Ægittam contendit, & urbe per vim potitus, homines in servitutem redigit, *auctores violandæ legationis vinulos duci Romanam jubet.*

XXXI. His ita gestis, hosti procedit obviam, ubi Oxybiorum juventutem confedisse acceperat. Illi jam ad hominum millia quatuor convenerant, nondum adjunctis Deceatibus, numerus ad sustinendum consularem exercitum perquam exiguus. sed desperatio placari Romanos post commissum in legatos facinus posse, in eam amentiam adegerat efferatos, ut, non expectato sociorum auxilio, ad pugnam contra Romanos egrederentur. Commovebat consulem hostium audacia: sed nulla omnino ratione temeritatem istam niti videns, ut erat vir militaris rei peritus, & ingenio mirifice sagax, certa cum spe victoriæ contra educit aciem: cohortatusque pro tempore militem, *lento passu in hostem iri; deinde, ubi cominus ventum esset, acerrima impressione turbari hostium antesignanos,* jubet. Salutaris hæc admonitio fuit. vix primum impetum tulere hostes; inde effusa fuga cesserunt, jamque Deceates, ut serum post cladem auxilium, ita fugientibus non inutile præsidium, aderant. Cum his quoque prælium aliquanto pertinacius, sed eventu simile, fuit. Victi seque & civitatem fidei Romanorum permisere. Consul ex agro capto deditoque quam potuit plurimum Massiliensi populo dedit: utque securitati eorum etiam in posterum consuleret, *obsides Ligurum ire Massiliam, stasisque temporibus permutari a suis,* imperavit.

XXXII. Jussis deinde tradi armis omnibus, & sic confecto bello, exercitum hibernandi causa per oppida Oxybiorum Deceatumque divisit. Q. Opimio ad bellum profecto, Romam iterum Ptolemæus Philometoris frater venit: offensisque cicatricibus, dolo fratris se petitum arguit, multa arte Patres ad commiserationem suæ fortis, & odium fra-

ternæ crudelitatis illiciens. Neque apud occupatos animos Neolaidæ & Andromachi (hi ab majore Ptolemæo legati aderant) defensio valebat: quorum senatus ne verba quidem ad aures sustinebat admittere. *His igitur continuo ex urbe jussis discedere, legati quinque* decreti sunt, quorum principes Cn. Merula, L. Thermus fuere: totidem iis decretæ quinque-remes, dataque mandata, *uti Ptolemaum in Cypri regnum deducerent.* Scriptum etiam Græcis & Asiaticis fociis, *nihil contra voluntatem senatus facturos, si eo in negotio minorem Ptolemaum adjuvissent.* Ceterum eventus belli pro majore Ptolemæo fuit. qui in Cyprum magno cum exercitu veniens, primo Archiam, præfectum suum, qui Demetrio insulam prodere voluerat, honores apud ipsum eximios, & quingenta insuper talenta pactus, amovit. deinde cum fratre, qui multorum instructus auxiliis occurrerat, prælio congressus, victum in urbem Lapitham compulit: necessitate deinde ad deditionem coactum, non modo dimisit incolumem, sed etiam Libyen Cyrenesque regnum reddidit ei: pro Cypro urbes quasdam, & frumenti annui certum assignavit modum; etiam filiæ suæ matrimonium pollicitus. Quæ partim ingenii mansuetudine fecisse creditus, laudem invenit apud scriptores; partim, ut putant, quia Romanos metuebat, si quid in fratrem, quem protegebant illi, severius statueret. Ita compositis Ægyptiacorum regum controversiis, *Asiam adhuc ardere bello, Prusiæque injuriis Attali regnum devastari,* reversi Pergamo legati renuntiabant. Quippe Prusias, parum eo territus, quod res Attali senatui populoque Romano cordi esse audiebat, nihil ad evertendum eum violentiæ fraudisque, nihil ad despiciendam senatus auctoritatem contumeliarum reliqui fecerat.

XXXIII. Cum enim a L. Hortensio ceterisque legatis nostris, bellum cum Attalo, populi Romani socio atque amico, gerere vetaretur, parere gravatus, ad disceptationem

§ XXXII. Athenæus l. 12. Polyb. excerpt. Legat. 132 & 133. Polyb. ap. Valef. Suidas in Ptol. Euseb. Diod. ap. Valef. Liv. Epit. Zonar. Just. Prob. 30. c. 33.

controversiarum vocantibus obsecuturum simulavit. Constitutum erat, ut ad fines regnorum cum millenis equitibus invicem occurrerent. Id Prusias opportunum perfidiæ tempus esse judicans, legatos præmittit ad Attalum, qui, *affuturum paulo post cum numero definito*, nuntient. Ipse interea ad opprimendum inimicum universas copias concitat: parumque abfuit, quin sceleris præmio potiretur, nisi Attalus, legatique Romani, qui cum illo erant, de dolo admoniti, celerrima fuga præparatum discrimen evassissent. Prusias, direptis etiam legatorum impedimentis, Pergamum, quo illi cum Attalo confugerant, adducit exercitum. Erat ante urbem Æsculapii celebre fanum, ubi re divina facta, cum litavisset, honore ad superstitionem usque profuso numen veneratus, in castra rediit. Postridie vero admotis ad Nicephorium copiis, quem lucum rex Eumenes fanis & omni donariorum genere perornaverat, cuncta fœda ruina pervastat, delubra incendit, statuas sedibus suis avellit, ne Deorum quidem simulacris parcens. inter quæ sustulit & Æsculapii signum, Phyromachî nobilis artificis opus, id ipsum, quod pridie tanta cum religione adoraverat. is turbatæ menti error inerat, quam nulla veri justique scientia stabilitam abripiebant affectus; modo ad muliebris superstitionis ineptias cogente metu, modo ira stimulante ad violanda per contumeliam, quæ paulo ante supra modum decorumque coluerat.

XXXIV. Neque melior ipsi deinde rerum eventus, quam pro tanta protervia fuit. Nullo apud Pergamum virili opere edito, Elæam, quod Attali regis emporium & navale erat, a Pergamo tria distans passuum millia, obsedit. Qua nequidquam tentata, (nam Sofander, collactaneus regis, cum præsidio ingressus oppidum fuerat) exercitu cetero terrestri itinere domum reverti jussu, ipse navibus contendit Thyatira: ne in reditu quidem ad violanda Deorum templa segnior. Nam ad Hieran Comen Dianæ spoliavit fa-

§ XXXIII. Appian. Mithridatic. Polyb. Diod. Suidas in *Περσίαις*. Strab. l. 13. Polyb. ap. Vales. Plin. 34, 8.

num: Apollinis autem Cynei ædem, quæ in Temno fuit, non spoliavit modo, verum etiam incendio consumpsit. Atque huc deinde relatum est, quod & pedestres copię profluvio alvi pleramque partem interierunt, & classis partem subita tempestas in Propontide cum ipsis hominibus merfit, aliam, in loca importuosa compulsam, tabulis armentisque confractis, reddidit inutilem. Hæc ubi Patres acceperunt, ob absurdum & infestum Prusiæ facinus ira accensi, continuo legatos decem decrevere, qui finire bellum, & Attalo pro illatis injuriis satisfacere eum cogerent.

XXXV. In his L. Anicius, & C. Fannius, & Q. Fabius Maximus fuerunt. Censores hoc anno creati sunt M. Valerius M. F. M. N. Messalla, C. Cassius C. F. C. N. Longinus: quorum Valerius ipse aliquando censoria nota perstrictus fuerat. Atque ut hic priorem ignominiam novis honoribus delevit: ita L. Cotta tribunus plebis magistratus sacrosancti dignitatem vili animo factoque polluit; ne creditoribus suis satisfaceret, tribunatus præscriptione turpiter abusus. Sed non mens eadem reliquo collegio fuit. decreveruntque consensu, *ni L. Cotta æs alienum dissolveret, aut sponsores daret, appellantibus se creditoribus auxilio futuros.* Hæc Romæ gesta. Ceterum in Hispania res parum prosperæ fuerunt. Calpurnius Piso prætor, a Lusitanis duce Punico victus, aliquot millia militum cum Terentio Varrone quæstore amisit. Victor Punicus ad Oceanum usque promovit signa, concitatisque in arma Vettonibus, agrum Blastophœnicum (sic appellant progeniem ex Africa per Hannibalem transductorum) omni clade belli vastavit, quod ii fidem Romanis datam constanter tuebantur.

XXXVI. Successus iste multis & aliis Hispaniæ populis animos ad rebellandum fecit. Unde, quia majores jam motus timebantur, comitia consularia citius haberi, consulesque designatos (Q. Fulvius M. F. M. N. Nobilior, T.

§ XXXIV. Polyb. ap. Steph. Strabo. l. 13. Polyb. ap. Valsc. Diod. Polyb. exc. Legat. 133. § XXXV. Fasti Capitol. Val. Max. 2, 9. & 6, 7. Liv. Epit. Jul. Obseq. App. Hispan.

Annius T. F. T. N. Luscus erant) ante diem Kalendas Januarias inire magistratum placuit : cum eatenus Idus Martiæ solemnibus ei negotio dies fuissent. T. Annius Gallos (nam & ii in armis erant) provinciam habuisse videtur : Nobilior in Celtiberos, qui Belli cognominantur, est profectus. Ilii tumultuum per Hispaniam auctores Segedam incolebant, urbem magnam & opulentam, quam fœderi suo Ti. Gracchus, cum Hispaniam ordinaret, adscripserat. Eam tum, coactis deferere minora oppida incolis, augebant barbari, murumque stadiorum quadraginta circum exstruebant : etiam Titthis, vicina gente, in eandem compulsi. Neque parere senatui voluerant, vetanti novari quidquam, tributaque & auxiliares copias imperanti. Quippe fœdere Gracchano perscriptum quidem asserebant, ne urbes novas conderent : veteres quin instaurarent munirentque, nihil exceptum ; tributorum vero & militiæ vacationem ab ipso senatu, post Gracchi fœdus, datam : neque aberat hoc a vero, sed immunitas ista cum a senatu conceditur, addi semper solet, mansuram, donec senatui populoque Romano videatur.

XXXVII. Et Segidenfes quidem, cognito consulis adventu copiisque, nam ad triginta hominum millia adducebat, quia nondum permunita urbs erat, ad Arvaccos cum uxoribus & liberis perfugerunt. Arvacci, protinus consociatis viribus, Caro Segedenfi summam rerum deferunt, viro bellicis certaminibus exercitato : qui proximo statim triduo, cum iter facere præter loca insidiis opportuna Romanos comperisset, captata occasione, cum peditum viginti millibus, equitum quinque impetum fecit. Post acrem & diurnam pugnam vertuntur in fugam Romani : deletusque foret occidione exercitus, ni equites, ad custodiam impedimentorum relictæ, pugnam redintegrassent, postquam inter insequendum Celtiberorum quoque turbatos esse ordines animadverterunt. Nocte demum incumbente prælium direntum est, haud levi utrinque damno. Quippe Carus,

§ XXXVI. Liv. Epit. Cassiod. Chron. Marianus Scot. Appian. Hispan.

imperator hostium, & cum eo sex millia ceciderunt, & par numerus civium Romanorum desideratus est. Dies etiam ipsa (Vulcanalibus pugnatum fuerat) ex eo tempore inter atras habetur. Arvacci Numantiam ea nocte digressi, novos imperatores Ambonem & Leuconem constituunt.

XXXVIII. Consul, relictis suorum animis, tertio post die iterum ad hostem ducit, & ad tria millia passuum ab urbe ponit castra. Quo cum opportune auxilia Masinissæ regis, Numidæ trecenti, cum decem elephantis advenissent, copiam pugnandi hostibus facit. Qui cum & ipsi ferociter procurissent, subito diductis suorum ordinibus, collocatas ad hoc a tergo belluas ostendit nec opinantibus. Hostes, equi virique, novo spectaculo conterriti, effusa fuga urbem repetunt. instat fugientibus consul, jamque sub ipsos muros pertinaciter certabatur; cum unus ex elephantis saxo caput faucius, ingenti barritu, & mox tumultu ac strage complevit omnia. nam & ceteri voce hujus excitati, eodem furore suorum per rumpebant sternebantque manipulos. Numantini, contuiti hæc ex mœnibus, ubi Romanos impetum belluarum solutis ordinibus declinare vident, erumpunt portis, palatosque assecuti, ad quatuor hominum millia, & elephantos tres interficiunt: multisque armis signisque militariibus potiti, cum tripudio sui moris in oppidum revertantur; cum ipsorum quoque duo ferme millia periissent.

XXXIX. Hac fortuna non insolenter usi hostes, misere legatos ad pacem æquis conditionibus petendam. responsum est ex dignitate Romani nominis, *pacem nisi deditis dari non posse*. At consul, ut primum confirmare suos ex adverso casu potuit, Axenium urbem petivit, ubi Celtiberi comæcatuum vim magnam comportaverant. Ne hujus quidem loci felix oppugnatio fuit, desideratisque haud paucis, ceteri noctu se in castra receperunt. Ex castris deinde præfectum equitum Bietium milit, ut a vicina quadam gente

auxiliarios equites adduceret. Excepere Celtiberi redeuntem: insidiisque eorum conspectis, sociorum equitatus fugit; Biesius, multique cum eo Romani, fortiter pugnantes occubuere. Tam crebris bellorum offensionibus sollicitati sociorum sunt animi: & Ocilis urbs gentibus illis clara, ubi annona & pecuniæ Romanorum servabantur, ad Celtiberos defecit. Consul, etiã ceteris idem animi esse suspicatus, sub pellibus hiemavit. ibi multi militum penuria aut frigore, sæviebat enim acris hiems, extincti sunt. Hoc initium fuit Numantini belli, quod magna cum clade ac ignominia populi Romani, vicesimum ad annum productum est: tanta plerumque violentia, ut non tam de eo, uter populus imperaret, quam uter esset, susceptum videretur.

XL. At in ulteriore Hispania L. Mummius prætor cum Cæsare, quem in occisi ducis Punici locum suffecerant hostes, collatis signis dimicavit. Pulsus cum clade Hispanus, ubi victorem exercitum temere insequi neglectis ordinibus videt, cohortatur suos, convertit agmen, occisisque de Mummi exercitu novem millibus, prædam castraque jam amissa non modo recuperat, verum etiam castris Romanis potitur. Mummius, cui quinque circiter millia militum supererant, non ausus præterea copiam pugnandi facere, tutis locis castra ponens, intra vallum studiose exercebat suos, donec parumper animos territorum confirmaret. Tum in prætervehentes prædæ partem barbaros eruptione facta, disjecit hostem, prædamque & signa, quæ amiserat, militaria recuperavit. Iisdem diebus colentes cis Tagum amnem Lusitanorum civitates, Caucæno duce, Cuneos invasere socios populi Romani, urbeque ampla ac potenti (Conistorgin vocabant) expugnata, trajecerunt oceanum: inde divisissimis copiis, pars adversam continentem populabatur; alii urbem Ocilen obsidione cinxerant. Ibi vero L. Mummi par industria & felicitas fuit. Contractis suis & sociorum viribus, (in universum equites quingenti, cum novem peditum mil-

§ XXXIX. Diod. ap. Fulv. Ursinum. Appian. Hispan. Strab. l. 3.

libus, erant) primo populos aggreſſus, quindecim eorum millia interfecit : inde ad Ocilen tranſduxit exercitum, magnæque & ibi ſtrage Luſitanorum edita, obſidionem ſolvit. Poſtremo agmen adortus, quod prædam ex agris raptam avehebat, occidione occidit : ut ne nuntius quidem cladis ſuper'eſſet. Ex præda, quantum ferri poterat, militibus datum : cetera omnia præſidiis bellorum Diis incendi prætor exurique juſſit.

XLI. Interim in Aſia rex Attalus, magno per hiemem exercitu coacto, ad bellum Pruſiæ inferendum ſe parabat, adjutus etiam auxiliariis Cappadociæ Pontique regum copiis, quas Demetrius Ariarathis F. adduxerat. Cadis tum erat, ita ſita oppido, ut inter Phrygas Myſosque ambigui ſoli habeatur, cum decem, quos ſenatus miſerat, legati ad eum venire. ii deinde, colloquio cum rege de communibus rebus habito, recta perrexerunt ad Pruſiam. Pruſias, auditis ſenatus mandatis, cavillando tempus trahere niſus eſt ; alia quidem ſe facturum aſſerens, alia minime. Unde offenſi decem legati, renuntiata illi ſocietate, continuo ad Attalum ſe receperunt : quos aliquantiſper proſecutus Pruſias, multiſque blanditiis placare conatus, poſtquam fruſtra ſe eſſe videt, anxius jam, & magnitudinem periculi ſerio reputans, in regnum rediit. Legati, monito Attalo, *ut, ſua defendere contentus, bello ſponte inferendo abſtineret*, inter ſe conſtituerunt, ut pars ad hæc omnia renuntianda ſenatui Romanæ reverteretur ; ceteri, per Joniam Hellespontumque & vicinos Byzantio populos diſcurrentes, abſtraherent a Pruſia hominum animos, Attaloque conciliarent.

XLII. Ita non multo poſt tempore frater regis Athenæus cum claſſe navium tectarum octoginta navigare in Hellespontum potuit. Ex his quinque triremes Rhodiorum erant : Cyzicenorum viginti ; quibus ſuarum ſeptem & viginti Attalus addiderat ; reliquæ ab aliis ſociis ſubmiſſæ fuerant. Cum his Athenæus, ut quamque urbium Pruſiæ præterve-

§ XL. Cic. offic. 1, 2. Appian. Diod. 31, 5. Eutrop. § XLI. Polyb. exc. Legat. 135. Strab. l. 12.

hebatur, exscensione facta, magnam ubique vastitatem terroremque faciebat. Unde summas in angustias reductus Prusias, gratanter accepit, quod Ap. Claudius, L. Oppius, A. Postumius, legati ab senatu, ad finem bello imponendum venerunt. Patres enim, edocti a prioribus, quo loco res Asiæ essent, confestim hos jusserant proficisci. Horum opera convenit, *ut Prusias Attalo regi naves testas viginti statim; deinde intra proximos annos viginti, talenta quingenta daret: ager utriusque iis finibus esset, quibus ante bellum fuisset: Methymnæis, Ægiensibus, Cumæis, Heracleotis, damni, quod a Prusia passi essent, nomine, talenta centum penderentur.* Hoc fœdere perfecto, Attalus cum pedestribus simul equestribusque copiis domum est regressus.

XLIII. At in urbe cum iterum de iis, qui ex Græcia fuerant evocati, verba a legatis Achæorum in senatu facta essent, senatus nihil mutandum censuit. Quo quidem tempore, cum multi de ea re sermones fierent, M. Cato, perpetuus Carthaginis hostis, dixisse fertur: *tanquam deesset, quod ageremus, sedemus hic, de senibus Græculis deliberantes, a nostrisne, an ipsorum, sandapilariis sint efferendi.* Solebat enim omnibus sententiis, quas dicebat in senatu, subungere: *hoc cenfeo, & Carthaginem delendam.* Tunc autem recenti metu providentiam viri stimulabat reversa ex Africa legatio, quæ nuper, specie disceptandarum cum Masinissa controversiarum, magnam vim navalis materiæ Carthagineprehenderat. Inter hæc, durantibus Hispaniæ bellis, & a Poenis impendente metu, necessarium visum, indulgeri justis provinciarum querelis, quas de magistratuum Romanorum avaritia ad senatum detulerant. Itaque severe exercitæ sunt leges, damnatique aliquot prætores, qui in extorquenda capiendaque pecunia egressi modum fuerant.

§ LXII. Polyb. excerpt. Legat. 136. Appian. Mithridat. Polyb. § XLIII. Polyb. excerpt. Legat. 137. Lucan. 6, 788. Plut. Apoph. Rom. c. 19. Appian. Punic. Flor. 2, 15. Diod. ap. Vales. Plin. 16, 18. Liv. Epit. 47. Plut. in Catone c. 50.

JOANNIS FREINSHEMII
SUPPLEMENTORUM
LIVIANORUM

LIBER XIII.

IN LOCUM LIB. XLVIII LIVIANI.

E P I T O M E

LIBRI QUADRAGESIMI OCTAVI.

Lustrum a censoribus conditum est. censa sunt civium capita trecenta viginti quatuor millia. Semina tertii belli Punici referuntur. Cum in finibus Carthaginiensium ingens Numidarum exercitus, duce Ariobarzane, Syphacis nepote, diceretur esse, M. Porcius Cato suavit, ut Carthaginiensibus, qui exercitum, specie contra Masinissam regem, sed re vera contra Romanos, accitum in finibus haberent, bellum indiceretur. Contradicente P. Cornelio Nasica, placuit, legatos mitti Carthaginem, qui specularentur, quid ageretur. Castigato senatu Carthaginiensium, quod contra fœdus & exercitum & navales materias haberent, pacem inter eos & Masinissam facere voverunt, Masinissa agro, de quo lis erat, cedente. sed Gisgo, Hamilcaris filius, homo seditiosus, qui tunc in magistratu erat, cum senatus pariturum se iudicio legatorum dixisset, ita bellum adversus Romanos suadendo concitavit, ut legatos, quo minus violarentur, fuga explicuerit. Id nuntiantes, in-

festum jam senatum Carthaginiensibus, infestiores fecerunt. M. Porcius Cato filii, in prætura mortui, funus tenuissimum, ut valuit, (nam pauper erat) sumtu fecit. Andrisæus, qui se Persei filium, regis quondam Macedoniæ, ingenti asseveratione mentiretur, Romam missus. M. Æmilius Lepidus, qui princeps senatus ab sextis jam censoribus erat lectus, antequam exspiraret, præcepit filiis, lecto se strato sine linteis, sine purpura efferrent; in reliquum funus ne plus, quam æris denos, consumerent: imaginum specie, non sumtibus, nobilitari magnorum virorum funera solere. De veneficiis quæsitum. Publicia & Licinia, nobiles feminae, quæ viros suos consulares necasse insimulabantur, cognita causa, cum prætori pro se vades dedissent, cognatorum decreto necatæ sunt. Gulussa, Masinissæ filius, denunciavit, Carthagine delectus agi, classem comparari, & haud dubium bellum strui. Cum Cato suaderet, ut iis bellum indiceretur, P. Cornelio Nasica dicente, nihil temere faciendum; placuit, decem mitti legatos exploratum. L. Licinius Lucullus, A. Postumius Albinus consules, cum delectum severe agerent, nec quemquam gratia dimitterent, ab tribunis plebis, qui pro amicis suis vacationem impetrare non poterant, in carcerem conjecti sunt. Cum Hispaniense bellum, parum prospere aliquoties gestum, ita confudisset civitatem Romanam, ut ne ii quidem invenirentur, qui aut tribunatum exciperent, aut legati ire vellent, P. Cornelius Æmilianus processit, & excepturum se militiæ genus, quodcunque imperatum esset, professus est. quo exemplo omnes ad studium militandi concitavit. L. Lucullus consul, qui M. Claudio Marcello successerat, cum laceffere omnes Celtiberiæ populi viderentur, Vaccæos, & Cantabros, & alias adhuc incognitas nationes in Hispania subegit. Ibi P. Cornelius Africanus Scipio Æmilianus, L. Paulli filius, Africani nepos, sed adoptivus, provocatorem barbarum tribunus militum occidit: & in oppugnatione Intercatiæ urbis, majus multo etiam periculum adiit. nam murum primus transcendit. Ser. Sulpicius Galba prætor male adversus Lusitanos pugnavit. Cum legati ex Africa cum oratoribus Carthaginiensium, & Gulussa Masinissæ filio, redissent, dicerentque, & exercitum

se & classẽ Carthagineprehendisse, perrogari sententias placuit. Catone & aliis principibus senatui suadentibus, ut in Africam confestim transportaretur exercitus, quod P. Cornelius Nasica dicebat, nondum sibi justam causam belli videri, placuit, ut bello abstinerent, si Carthaginenses classẽ exussissent, & exercitum dimississent: si minus, proximi consules de Punico bello referrent. Cum locatum a censoribus theatrum exstrueretur; P. Cornelio Nasica auctore, tanquam inutile & nociturum publicis moribus, ex senatusconsulto destructum est, populusque aliquamdiu stans ludos spectavit. Carthaginenses cum adversus fœdus bellum Masinissæ intulissent, victi ab eo, annos habente nonaginta duos, & sine pulamine mandere & gustare panem tantum solito, insuper Romanum bellum nesciverunt.

I. **L**USTRUM deinde quintum & quinquagesimum conditum est a M. Valerio, C. Cassio censoribus. censa sunt civium capita trecenta viginti quatuor millia. Hoc lustro, cum in Capitolio, postrata tempestatibus palma, quæ aliquot ante annis eodem in loco surrexerat, ficus enata esset; prodigii loco res est habita, & ex eo tempore subversam in urbe pudicitiam, L. Piso, non spernendus auctor, tradidit. Certe moribus, ad omnem turpitudinem ruentibus, legum auxilio fuit opus, ut detestabili flagitio iretur obviam. Lata est Scatinia, quæ perversæ Veneris fœditatem, in eum, qui fecisset, quive passus esse videretur, multa decem millium nummum vindicaret. Ceterum plerisque, ut assolet, morum dehonestamenta strenue negligentibus, ea sola cura erat, ne bella, & ab hostibus discrimen, imperio portenderentur. Huc trahabant, quod & Ariciæ lapidibus pluerat, & Romæ multis locis vanæ togatorum species, accedentium visentiumque manus & oculos eluserant.

II. Senatui majus certiusque portentum videbatur, quod

§ I. Fasti Capitol. Liv. Epit. 48. Plin. 17, 25. Jul. Obseq. c. 69. Quintil. Inst. Orat. 4, 3 & 7, 4.

super omnes bellorum apparatus, qui contra foedus a Carthaginienſibus fieri dicebantur, exercitum illi grandem coegerant. Igitur M. Claudius M. F. M. N. Marcellus, L. Valerius L. F. P. N. Flaccus, conſulatu inito, ad Patres retulerunt, *magnas Numidarum copias, duce Ariobarxane, Syphacis nepote, in Carthaginienſium finibus eſſe. prætexi a Maſiniſſa metum: ſed conſiderandum, ne imperium populi Romani his apparatibus peti poſſit.* Plerisque ad hanc ſuſpicionem inclinantibus, præcipuus M. Catonis ardor fuit. tum multa vi orationis bellum ſuadentem P. Scipio Naſica, contrariæ ſententiæ auctor, excepit, movitque Patres, ut lenioribus remediis ageretur. Ita legatio Carthaginem miſſa, cujus princeps idem fuit, qui mittendam pervicerat, ſenatum Pœnorum caſtigavit, *quod materiam navalem exercitumque contra foedus haberent. illiſque neceſſitatem, quæ leges neſciret, & Maſiniſſæ injurias obtendentibus, obtulerunt legati, cum rege acturos, ut æquiſſimis conditionibus armæ poneret: tantumque induſtria eorum & auctoritas apud Maſiniſſam valuit, ut agro controverſo honoris Romanorum gratia ceſſurum polliceretur.*

III. Præclare conſectum negotium erat, ſenatu quoque Carthaginienſi legatorum judicio rem permittente, niſi fortuna urbis perituræ unius hominis temeritatem ad excitandum id incendium perpuliſſet, quo paulo poſt tantæ antiquitatis potentiæque reſpublica conſagravit. Agebat in magiſtratu Giſgo Hamilcaris filius, homo ſeditioſus. is pro concione non in Romanos magis, quam ſenatum urbis ſuæ, invectus, imbellem eundem & ferocem populum adeo incitavit, ut *adverſus Romanam verſutiam, qua toties rebus Punicis amplius, quam bello, nocuiſſent, armis agendum* conclamaret, ac, velut inde rectiſſime inciperetur, legatos ipſos ad exitium quæreret. Sed illos quidem, licet ægre, tamen explicuit fuga. Principes civitatis, quia Romanorum & Maſiniſſæ rebus ſtudere arguebantur, quadraginta ferme in exilium pulſi; obſtrictuſque jurejurando populus, *ne aut*

§ II. Zonar. Liv. Epit.

T. Liv. Vol. VII.

T

reciperet exsules unquam, aut etiam de recipiendis verba fieri & quoquam pateretur.

IV. Atque hi quidem, ad Masinissam pergentes, illum ad bellum patriæ suæ inferendum stimulabant. Neque minores iras excitabant, reversi Romam, legati; certumque jam habebatur, insolentiam Carthaginienſis populi ſeverioribus minis retundi oportere. quo minus bellum ſtatim juberetur, nihil tam obſtiſſe, atque Celtiberiæ motus, credi poteſt, qui tum maximis cum terroribus efferveſcebant. Nam in Gallia proſperæ res erant; &, *ea in provincia hoc anno bene pugnatum*, tradunt. At M. Marcello conſuli, & M. Atilio prætori, quorum ille citeriorem Hiſpaniam, hic ulteriorem obtinebat, ut ad extremum felix expeditio, ita multis emenda periculis, fuit. Jam primum Marcello, adveniēti cum legionibus duabus, in quibus quaterna millia peditum, equites duceni quinquageni fuere, ſtructæ ſunt ab Hiſpanis inſidiæ; quibus ille ſapienter evitatis, ad Ocilin, quæ nuper ab Romanis deſecerat, penetravit: quam ipſo adventus ſui terrore percuſſam extemplo accepit in fidem, obſidibus, & argenti talentis triginta imperatis.

V. Aſperiores adverſum deſertores futuram crediderant victoriam Celtiberi: ergo clementiam imperatoris Romani admirata Nergobrigum civitas miſit quæſituros, *quo fidei & obſequii pignore in gratiam recipi poſſet*. Petiit conſul equites auxiliares centum: & accepta eſt conditio. Verum donec legati Nergobrigum pacis vias legesque cum Romano tractant; alia manus, partem exercitus iter facientem adorta, turbavit poſtremos, impedimentorumque nonnihil abripuit. Redierunt nihilominus cum promiſſis equitibus legati: veniamque delicti petentes, excuſabant *ab ignavis initæ paſſionis commiſſum*. At Marcellus equites in vincula conjici, equos vendi juſſit: & mox vaſtatis Nergobrigum agris, prædaque militibus diviſa, oppidum obſidione cinxit. Conſpicati periculum hoſtes (ſtrui enim Marcellus aggeres,

admoverique machinas jusserat) caduceatorem misere, pacem orantes. Amictus ille fuit pelle lupi, quod iis gentibus pro caduceo pacifici nuntii signum est. Consul, *nihil iis expectandum pacati*, respondit, *nisi Arvacci omnes, Bello- rumque & Titthorum populi una rogarent*. Neque mora in illis fuit. venere trium civitatum legati, rogitantes, *ut, tolerabilij multa imperata, reciperet omnes in Gracchani fœderis leges*.

VI. Contradicebant his aliarum gentium oratores, qui, ab Arvaccis fociisque bello vexati, quod Romanarum partium essent, obtestabantur consulem, *ut suæ vindictæ simul securitatisque rationem ageret*. Consul, non minus belli adversus duram gentem finiendi cupidus, quam voluntatem suam callide tegens, utrosque rejecit ad senatum, induciasque cum hostibus, donec legati reverterentur, pactus, hibernatum abiit Cordubam, eumque locum abundantibus circa agris alendæ hominum multitudini non incommodum videns, in urbis speciem atque magnitudinem exædificavit. Sed in Lusitania, postquam L. Mummius ad triumphum decessisset, M. Atilius prætor provinciam accepit. ubi cum, septingentis hostium interfectis, urbem Oxthracas, iis locis maximam, occupasset; eoque metu vicina oppida Romanis adjunxisset (inter quæ pars aliqua Vettonum fuit, vicinæ Lusitanis nationis) in hiberna abduxit exercitum. Tum vero subita defectione omnium de integro turbatæ res, & quædam urbium, cum Romanis sentientium, circumfessæ.

VII. Dum in eo statu Hispaniense bellum est, Romæ senatus Astymedi datur Rhodiorum legato, quem præfectum simul classis creaverant. Erat his bellum cum Cretenfibus, adversus quos sociorum opes sollicitabant. Decrevit extemplo legatos senatus, qui bello finem imponerent. Idem negotium Achæorum erga Romanos detexit obsequium, libertati gentis haud sane conveniens, sed pro tempore necessarium. Rhodiis, auxilium petentibus, plerique mittendum censuerant. Sed Callicrates Leontesius negavit,

fas Achæis esse vel indicendi cuiquam belli, vel ferendi auxilii; Romanis inconsultis. Hac oratione tanquam fulmine percussus, qui diversum censuerant, quiescere. Multæ deinceps legationes Romam cum venissent, præ reliquis auditus Attalus est, Eumenis filius. Venerat is in urbem admodum puer, ut se commendaret Patribus, amicitiamque & hospitii paterni jus cum populo Romano recoleret. Hic igitur perbenigne comiterque tum ab senatu, tum a paternis amicis, exceptus, cum responso, quale optaverat, honoribus ætati convenientibus, domum rediit: insigni favore Græcarum urbium, per quas iter ipsi erat, profusæ benevolentiae signis venientem abeuntemque prosequentium. Nam pater pueri Eumenes unus omnium sua ætate regum, plurima in Græcos publice privatinque beneficia contulerat. Venit similiter discessitque Roma Demetrius puer, mediocribus, ut anni ejus erant, affectus honoribus.

VIII. Hoc digresso, Heraclides, qui cum Laodice & Alexandro dudum in urbe commorabatur, postquam ad causam suam fulciendam nihil calliditatis & præstigiarum prætermisisset, quos facillimos fraudi putabat Patres ambiendo, tandem in curiam est introductus. Prior Alexander oravit senatum, ut *amicitiæ, quæ cum patre suo Antiocho fuisset, memor, maxime quidem regnum Syriæ sibi restitui juberet; sin vero, at certe permitteret eum suis factis, neque aut abeuntem moraretur, aut volentibus juvare paternas opes repetentem impedimento esset.* Excipiens deinde Heraclides, multis collaudata regis Epiphanis memoria, multis inculcato Demetrio, sermonem eo deduxit, ut, *quando res & tempus ita se daret, justum esse diceret, adolescentes, veram Antiochi stirpem, modis omnibus adjuvari.* Diversæ super his sententiæ senatorum fuere. Optimus quisque atque sapientissimus commentum improbum, & actorem fabulæ Heraclidem, abominabantur: at plures, quos aut mendaciis suis demontaverat, aut promissis corruerat, senatusconsulti in hæc

verba scribendi auctores fuerunt: *Quod Alexander & Laodice regis socii amicique liberi in senatu verba fecerunt: senatus censuit, dimittendos in paternum regnum, atque, uti petierunt, auxiliis adjuvandos videri.*

IX. Hoc armatus senatusconsulto Heraclides non distulit extemplo conducere militem, &, quos ex illustribus viris ei consilio opportunos noverat, arcessere. Quibuscum Ephesum delatus, totis viribus ad bellum, quod parabat, se cœpit accingere. Demetrius, ut adversus hunc terrorem se Romanorum benevolentia tueretur, cum alia ipsis officia attente præstitit; tum Adramyttenum quendam, Andrisco nomen erat, sub custodia Romani misit, quia Persei se filium is ferebat, qui postremo rex Macedoniæ fuerat. Neque parvi æstimandum hoc officium Demetrii fuisse, mox eventus docuit, cum ille veterator, clam elapsus, Macedoniam Thraciamque ingenti motu concitaret, ut in loco referemus. Cum hæc diversis terrarum partibus agerentur, Romæ insignes aliquot viri obierunt: M. Æmilius Lepidus pontifex maximus, & M. Porcius prætor: alter quoque consul L. Flaccus in magistratu mortuus est. M. Porcius Cato pater pro modo facultatum, quas habebat non amplissimas, honore ac affectu, quam impensa, majore extulit. & cum quidem carissimum habuisse, ipse sibi testimonio est, qui tanquam præstantissimi animi virum passim in scriptis suis prædicat: mortem tamen ejus, cum pro cetera morum constantia fortiter tulit; tum, quia philosophiæ studiis eruditus, negabat *interire, qui mori dicantur*; sperabatque, *se filium meliore in vita, cœtibusque piorum esse reperturum.*

X. Memorabile etiam in M. Lepido fuit, quod, priusquam moreretur, præcepit filiis, *lecto se strato sine linteis, sine purpura, efferrent: in reliquum funus etiam modicam consumi pecuniam jussit, dictitans, imaginum specie, non suntibus, nobilitari magnorum virorum funera solere.* Hujus in locum P. Cor-

§ VIII. Polyb. excerpt. Legat. 140. Sulpicius Severus. Polyb.
§ IX. Liv. Epit. L. Ampelius, Fasti Capitol. Cic. in Catone. Plut. in Catone major. c. 48.

nelius Scipio Nasica pontifex maximus lectus est. Aliorum deinde complurium obitus admonebant homines, quo l initio anni, cum ante ædem Jovis in campo columna cum signo aurato decussa esset, haruspices *interitum magistratum & sacerdotum fore* responderant. Sed & in suspicionem venisse matronas crediderim, antiquum eas scelus retulisse: nam & olim *fiat de muliebri magnus principum Romanorum numerus eodem anno interceptus* ferebatur. Certe Publicia & Licinia, nobiles feminæ, quarum hæc Claudium Afellum, illa L. Postumium, qui tertio ante anno consul obiverat, viros suos veneno necavisse arguebantur, cognita causa, cum vades prætori dedissent, ad cognatorum judicium remissæ, horumque decreto strangulatæ sunt. Ne sic quidem satis expiatæ prodigiorum minæ videbantur; nisi removerentur, in quos intentatæ illæ fuissent: ita monitis haruspicum magistratus omnes abdicarunt.

XI. Comitia per interregem habita. L. Licinius L. F. Lucullus, A. Postumius A. F. Sp. N. Albinus consules facti. Animos deinde, his eventibus tristes, aliæ aliæque perturbationum causæ concussere. maxima fuit omnium, quod in Africa simul Hispaniaque res parum pro voluntate fenatus successerant. Ex Africa filius Masinissæ nuntiabat, *se per causam deprecandi pro exsulibus cum fratre Micipsa, parentis missu, Carthaginem venisse. ceterum in urbem non esse admissos: & sibi, cum reverteretur, ab Hannibale Samnite, qui caput factionis popularis esset, insidias structas, & ex comitatu suo quosdam interemptos; se fuga salutem quæsisse. Ceterum pro comperto se afferre, Carthagine delectus agi, parari classem, neque dissimulanter jam aut obscure bellum contra Romanos strui.* Non erat ita prostratus domestico vulnere Catonis animus, ut aut publicis consultationibus abstinendum, aut de solito rigore quidquam remittendum esset, duceret. Itaque tum quoque, ut semper, *bellum indici Panis oportere*, magna asseveratione tendebat. neque segnius opinionem suam P.

§ X. Liv. Epit. Cic. in Caton. Appian. 64. Julius Obsequens c. 77. Liv. 8. 18. Val. Max. 6, 3.

Scipio Nasica tuebatur, *omnia prius experiunda*. Sic iterum in hanc sententiam discessum, facto senatuscōsulto, *uti decem legati quamprimum mitterentur, speculaturi, quid Carthaginensibus animi consiliive esset*.

XII. Interim Celtiberorum legati, cum Romam pervenissent, diversimode excepti sunt. nam qui a sociis civitatibus venerant, iis in urbe hospitium præbitum: reliqui trans Tiberim manere iussi. Die senatus, priores vocati sociorum oratores, civitatis cujusque separatim, eandem in sententiam verba fecerunt: *Eam esse conditionem Hispaniæ, ut aliis nihil carius Romano imperio, aliis nihil intolerabilius videatur. has inter factiones necessario intuta inimicæque omnia esse: nec alteram posse stabili in fortuna consistere, nisi depressis partis alterius viribus. Quod si igitur, agebant, duces vestros exercitusque bello nondum confecto revocatis, nihil futurum est certius, quam ut in nos, tanquam proditores patriæ, omnis communium hostium coorietur impetus. Nam si hoc consliterit, arma vobis impune inferri posse, neque aliud inde timendum, nisi ut vindictam minitemini, deinde omittatis, non erit tam imbecillis animi quisquam, ut vim Romanam sibi magnopere formidandam esse putet. Eorum deinceps exemplo & successu sollicitabuntur ceterarum nationum animi: quando inter feroces & periculis lætos haud difficulter imitatores invenit felix temeritas. Nos igitur, ut in certo & propinquo timore, merito fidem vestram invocamus, Patres conscripti, ne deserti & proditi præda nostris vestrisque inimicis relinquamur. Arvaccorum magna potentia & in nos inexpiabile odium est. neque nobis ullum sollicitudine ac periculo vacuum tempus erit, nisi aut perpetuo consularis exercitus in Hispania sit; aut, priusquam decedat, ita castigentur hostes, ne aut ipsi possint ultra nocere sociis Romanorum, aut alii audeant*.

XIII. Secundum hos placuit Arvaccorum legatos audiri. his sermo, quam animus, modestior demissiorque fuisse dicitur. Pacem orabant: sed ut ne bellum quidem recusaturi

§ XI. Liv. Epit. Appian. Punic. Florus 2, 15. Plat. in Caton. c. 48. § XII. Polyb. excerpt. Legat. 141. Appian. Hispanic. Polyb.

viderentur, nisi, quod petebant, fieret. petebant autem, ut certa sibi multa indiceretur; quam ubi luissent, iterum fruerentur fœderis ejus legibus, quod olim cum iis Ti. Gracchus icisset: ad hoc, ut reputatione fortis humanæ inclinarent animos, inter loquendum sæpe ambiguos fortunæ lusus commemorabant, pugnarumque cum Romanis ducibus ita faciebant mentionem, ut, quanquam gloria belli cederent, plus tamen successuum aliquanto habuisse intelligerentur. Post omnes introducti in senatum sunt, quos proconsul miserat. Ii literas M. Marcelli attulerunt, quibus pacem suadebat: & epistolis consentientia ipsi loquebantur. Patres, re expensa, focciis consulendum esse, spiritusque Arvaccorum deprimendos, non dubitabant: quibus id potissimum rationibus fieret, ambigebatur. responderi tandem in præsentia placuit, *M. Marcellum proconsulem senatus voluntatem utrisque significaturum esse*. Legatis Marcelli clam mandatum, ut ad bellum ex dignitate populi Romani gerendum, proconsulem hortarentur.

XIV. Metu enim cunctari illum plerique interpretabantur, dabantque operam, ut quamprimum successor ei mitteretur. Sed studium senatus, haudquaquam pari ardore juventutis, aliquamdiu vanum & inefficax fuit. Cum enim Q. Fulvius, quique cum eo ex Hispania decesserant, *Celtiberici belli difficultatem, continuæ cum hoste certamina, numerum occisorum, virtutem hostium*, assiduis sermonibus ferrent; jamque etiam Marcellum detrectare id bellum formidine appareret: is pavor invalit civitatem, ut neque tribuni militum ad numerum reperirentur, neque legatus ire quicumque vellet; & quod importunissimum erat, citati juniores vel ad nomina non responderent, vel eas causas committerentur, quas neque cognosci pudor sinebat, neque puniri delinquentium multitudo. Rem per se tædii ac difficultatis plenissimam difficiliorem reddebat tribunorum plebis intemperies, qui delectum recusantibus auxilio erant,

consulumque conatum & industriam intempestiva contentione morabantur. Ergo, ad præcidendam omnem non iniquæ querelæ speciem, instituerunt, munia militaria, non, ut semper moris fuerat, sui beneficii arbitrii facere, sed inter æquales forte distinguere præfecturarum ac ordinum gradus. Quamquam ne sic quidem petulantia tribunorum composita usque eo prorupit, ut consules ambos, quoniam gratiæ nihil dabant, nec pro amicis suis deprecantibus militiam tribunis obsequebantur, in carcerem conjicerent. In hac rerum perturbatione, cum neque senatui, neque magistratibus, quidquam consilii potestatisve reliquum esset, scribique nequiret, quem ad finem juniorum abitura esset *impudentia* (nam hoc nomen inauditæ antea consternationi senatus fecerat) P. Cornelius Scipio Æmilianus peropportunam orationem habuit, juvenis adhuc, nec nisi togatis virtutibus notus.

XV. Is, graviter increpita civium formidine, *Sæpe*, inquit, *hoc loco interfui, Patres conscripti, cum de republica sententiæ dicerentur: neque verba sum facere conatus, quod malebam eorum auscultare dictis, quibus venerationem ætas, & longus rerum usus prudentiam conciliaisset. Nunc autem, quia præsens consultatio magis animos & exemplum, quam auctoritatem & consilium, desiderat, nihil aut annis meis alienum, aut proposito discors facturum arbitror, si præsentem, ignaviamne dicam, an consternationem nostræ juventutis, juvenis ipse coarguam, aliorumque mentes ab hoc tanto dedecore ad pristinam virtutem verbis factisque, quantum quidem in me erit, revocem. Igitur, quod felix faustumque sit, jamprimum legationem Macedonicam abdicō, deponoque: deinde ad bellum Hispaniense operam meam, quacunque in re consul utendum ea judicabit, reipublicæ offero. Conflare autem puto, si quidem bellum defugerem, nemini meorum æqualium honestiorem & speciosiores vacationis causam esse, nominatim a paternis clientibus postulatus; si nobilissimæ provinciæ dissidia, fortassis ad*

imperii nostri periculum eruptura, componerem, & obtentum timor, & ambitio cupiditasque occasionem haberent. Sed ego, in domibus Æmiliorum atque Scipionum genitus ac educatus, neque metuere pericula, neque mirari pecuniam debeo: gloriam autem veram inde demum sperandam existimo, si rationes meas omnes ad patriæ salutem retulero, idque potissimum quoquo tempore peragendum putaro, quod ipsius necessitates aut commoda præcipue postulaverint.

XVI. *Neque vero domesticum mihi exemplum deest. nam & avus meus P. Africanus, quo tempore in Italia Hannibal erat, in eandem istam Hispaniam, aliis itidem, ut nunc fit, provinciam istam metu detrectantibus, profectus est, atque illa populo Romano asserta, sibi etiam in Africam iter ad belli omnium gravissimi plenam victoriam patefecit. Quamquam profecto longe majoris tum periculi res fuit: non modo pluribus populis, rebusque suis multo florentioribus, in odium Romani nominis accensis; sed etiam Carthagine ipsa, aliis super alios mittendis ducibus exercitibusque, ad retinendam Hispaniam omnes opes effundente. Nunc vero paucis neque maximis nationibus tumultuantibus, cum neque diuturnum æque bellum, neque clade aliqua magna insigne geramus, juventutis nostræ animi ceciderunt, & pristinus ille bellatoris populi ardor sic emarcuit, ut vix mihi ipsi credam, aut eosdem nos esse, qui esse solebamus, aut iis prognatos, quorum virtutem & constantiam nulla vis lassare potuit, nullum discrimen frangere. Verum enimvero pro se quisque viderit, quid vel sibi, vel majoribus posterisque suis, approbet: ego, quod unum possum, neque cuiquam exemplum inertiae ero, & primo quoque tempore ad exercitum proficiscar.*

XVII. *Adolescentis orationem admirati Patres, quibus in tanto omnium timore nihil ab his annis speratum præsidii fuerat, certatim in complexum ejus ruebant; dignum familia, & in qua genitus, & in quam adoptatus esset, prædicantes. pergeret bonis avibus implere datum fato sortem, & clarissimam majorum famam, suis virtutibus gloriaque & felici-*

tate renovaret. Majores natu referebant *factum senioris Africani*, qui, cum eandem in Hispaniam ire auderet nemo, patriæ suam operam ultro obtulisset. nunc ab alio P. Scipione idem prorsus exemplum relatum, in quo cum cetera essent omnia, qualia & avus habuisset, jam se eandem in illo factorum nominisque amplitudinem aiebant augurari. Productus deinde in concionem populi, cum eadem differuisset, pudore & æmulatione sic permovit non vulgus modo, sed etiam primarios cives, ut & legatorum tribunorumque numerus, sponte se multis offerentibus, expleretur; & legiones, agminatim jam nomina dantibus, qui antea tergiversati fuerant, citra longiorem moram conscribi possent.

XVIII. Dum his impedimentis delectus Romæ trahitur, M. Marcellus proconsul, cupidus belli ante successoris adventum quoquo modo finiendi, ut pacatæ Hispaniæ titulum aucuparetur, quantum ipsis immineret periculi, admonere Celtiberos non destitit: &, ut humanitate quoque ad pacis amorem eos illiceret, obsides reddidit petentibus. Cum principe autem legationis, quæ missa Romam fuerat, diu secreto collocutus, suspicionem propositi ejus auxit; ceteris etiam, quæ mox evenere, non obscura rei ejusdem indicia præferentibus. statim enim & Nergobrigas quinque Arvaccorum millia occuparunt: & proconsul, ad Numantiam exercitu ducto, ante urbem posuit castra, egressosque obviam levi certamine intra muros compulit. Ibi Litenno, hostium ductor, pede firmato exclamavit, *se colloqui cum proconsole cupere.* Accepta haud gravate petitio est: convenitque, ut, *obsidibus & pecunia data, Celtiberi suis legibus viverent, sociique & amici populi Romani haberentur.* Summam pecuniæ talenta sexcenta fuisse Posidonius, Hispanicarum rerum peritus auctor, tradidit.

XIX. Cum hoc modo pacati omnes Celtiberiæ populi viderentur, novum subinde bellum L. Luculli consulis cupiditate excitatum est. Is, cum Hispaniam forte accepisset,

idque sibi putaret agendum, ut locupletis provinciæ copiis rei familiaris anhelantem inopiam refocillaret, occasionem manubiarum cœpit quærere. Novam pacem, cum re acta supervenisset, turbare periculosum rebatur. in Turdulos, Cantabros, aliasque nationes, Romanis adhuc armis incognitas, impressionem facere statuit. ad hos iter per Vaccæos erat. Huc igitur signa protinus infert, cum neque mandatum belli cum his gerundi ab senatu, neque causam ab ipsis ullam accepisset. Cauca trans Tagum urbs erat, ad quam, transmissa amne, cum castra posuisset, mirantibus oppidanis, *qua in Romanos offensa obsidionem meruissent; Carpeanorum injurias ultum se venire*, professus est. Caucæi, ad sua tuenda conversi, postquam hostem frumentari lignarique audacius animadvertunt, eruptione in palantes facta, multos interficiunt, reliquos ad ipsa usque castra repellunt. Primis conatibus cum ita successisset, facti animosiores, signis collatis dimicare sunt ausi: &, donec eminus certabatur, levibus assueto præliis, & ad velitationem meliore Hispano, consulis exercitus laborabat. ubi, missilibus exhaustis, ad manus & gladios ventum, hostis, ut in nulla re pari, continuo terga vertit, urbem haud longe distantem concitato cursu petens. Aderat Lucullus, haud segniter perculsis instans: ita, dum pro se quisque inter primos nititur irrumperere, constipati in angustiis portarum impune se cædendos victori præbuere. tria millia eo casu sunt desiderata.

XX. Quo cum cecidissent animi, postridie ejus pugnae cum coronis & supplicum velamentis seniores Lucillum adeunt, *quibus obsequiis placari pateretur*, rogantes. Ille primum *obsides, & argenti talenta centum*, postulavit; *equitibus etiam eorum inter sua auxilia militare* jussis. Hoc ubi promte a barbaris factum: adjecit, *præsidio in urbem introducto sibi opus esse*. Annuentibus & hoc Caucæis, delectorum ex toto exercitu duo millia per hanc speciem introiverunt. Sed fœda consulis avaritia mœnibus hi, ut mandatum erat, occu-

patis, omni reliquo exercitui patefecerunt aditum; signoque tuba dato, omnes Cauçæorum puberes ad millia hominum viginti interficiuntur, imbellis ætas sexusque præmium perfidiæ in captivitatem abstrahitur: tantaque ex multitudine oppido pauci, per prærupta quædam, eoque neglecta custodibus, loca, jactis in præceps corporibus, evasere. Urbe direpta, cum facinoris ejus fama omnes juxta populos velociter percurrisset, qui apertis locis habitabant, in præaltos montes, aut munita oppida se contulerunt, corruptis, quæ avehi non potuerant, rebus suis, ne quid hosti tam crudeli, tamque perfidioso relinqueretur.

XXI. Sic aliquamdiu plus exercitui laboris, per desertam regionem eunti, quam ab hostilibus armis periculi fuit: donec Intercatiam perventum, Vaccæorum & ipsam. ubi Hispanorum copiæ, pedites viginti millia, duo equitum confederant. Hi cum a consule ad conditiones invitarentur, illudentes interrogarunt, *eidemne fidei credituri essent, cui Cauçæi credidissent?* Erat omnino eorum hominum Lucullus, qui, quoties aliquid exprobrari sentiunt, aliorum potius libertati, quam suis delictis, irascuntur. Itaque, velut gravi injuria læsus, agrum pervastat. oppidum circumvallare aggreditur, & sæpe, instructa acie progressus, potestatem æquis locis pugnandi hostium ducibus facit. Verum illi, levibus præliis vires experiri contenti, ad periculum de summa rerum adduci non patiebantur. Ea cum sæpe fierent, Intercatiensis quidam, splendidis armis ornatus, sæpe Romanos provocabat, si quis singulari certamine vellet congredi: &, nemine contra exeunte, discedebat, irrifu & ludibriis ignaviam hostium exagitans.

XXII. Non tulit indignitatem rei P. Scipio, qui tum sub Lucullo tribunus, cum ea magnitudine animi, quam haud multo post amplissimis gestis orbi testatissimam reddidit, corporis etiam insigne robur, rara felicitate conjunxerat. Is igitur, pugna cum provocatore conferta, prostravit hostem,

§ XXI. Polyb. ap. Strab. l. 3. Appian. Plin. 37, 1. Val. Max. 3, 2. Liv. Epit,

pari Romanorum lætitia, & hostium terrore, quod ingentis corporis virum, modicus ipse staturæ dejecisset. Proxima nox vanam in castris trepidationem movit errore incerti clamoris, qui pariter ex urbe campisque accidebat. Equitatus enim Vaccæorum, qui, sub adventum Luculli pabulatum egressus, deinde hostilium copiarum objectu exclusus urbe fuerat, passim obequitans altissimis vocibus strepebat. cui cum ex urbe par clamor redderetur, percellebatur Romanus incerta æstimatione, quidnam sibi periculi tumultu isto, & unde portenderetur. Augebant metum invalidæ stationes, quod ad obeunda militiæ munia, præter damna præliorum, etiam morbis imminutus exercitus erat. Carnibus enim cervorum leporumque sine sale vescerantur (sal omnino vinumque, cum aceto, & oleo defecerat) & his alimentis coëperat tentari militum valetudo, multique passim profluvio alvi moriebantur. Ergo, postquam tumultus iste cessavit, tanto intentius operibus institit consul, machinisque admotis muri perfregit partem.

XXIII. Ibi denuo Scipionis Æmiliani magnifica virtus enituit. nam irrumpentibus in urbem militibus, ipse, primus omnium conscensis mœnibus, aperuit viam: neque tamen obtineri urbs potuit, prævalidis numero hostibus, & pro salute sua suorumque fortissime propugnantibus: repulsique sunt cum aliquo detrimento Romani, cum super eos, quos hostile ferrum absumserat, etiam multi locorum ignorantia in subterranea quædam aquarum receptacula illapsi periissent. Nocte sublapsam muri partem refecit hostis: pluresque deinde per dies, expertis utrinque cum damno viribus, segnis obfidio fuit. Ea res inopiam simul in castris, & in urbe auxit. quod quia neutris ignotum erat, inde colloquio initium, & mox deditioni fuit. Et quando suspecta barbaris Luculli fides erat, Scipio spondit, *nihil contra pactu factum iri*: moxque patuit, quanti sit usus etiam in bellis opinio iustitiæ, quæ probitate constantiaque morum comparatur. Adolescentis privati dexteræ inermi permiscere barbari urbem,

quam consul exercitusque Romanus armati, nec auctoritate sua, neque forte vi extorquere potuissent. Agnovit beneficium Lucullus, juvenemque pro concione meritis cumulatū laudibus, murali corona donavit. Intercatienses consuli sex millia sagorum dedere, cum obsidibus quinquaginta (sic enim convenerat) & certo armentorum pecorumque numero. Hæ solæ divitiæ fuere; auri & argenti, qua maxime gratia Lucullus eas regiones scrutatus fuerat, nihil reperi-
tum. Dum istæ res in Hispania citeriore geruntur; ulterior, infestis Lusitanorum armis, luctuosa populo Romano fuit.

XXIV. Ser. Sulpicius Galba prætor, cum a M. Atilio provinciam eo in statu accepisset, ut ad eximendos obsidioni-focios festinatione opus videretur, incredibili celeritate supra sexaginta millia passuum una die ac nocte per-
mensus, ex itinere instruxit ad prælium copias, ut hostibus improvisus incumberet. Neque fefellerat fortuna consilium, nisi fortunam ipse alio consilio fefellisset. Prima impressio-
ne pepulit imparatum hostem: poteratque velocitatis suæ fructu gaudere, si ad vires reparandas defatigato militi spa-
tium concessisset. dum fugientes languide persequendo infirmitatis suæ admonet, corrupta & prodita victoria est. Cum enim continuatū itineris & pugnandi labor, ad recipiendum spiritum nunc hos, nunc illos, interquiescere co-
geret; in dissipatos & defessos impetu reversus hostis, ad septem millia militum obtrivit. Prætor, assumtis, quos cir-
cum se habebat, equitibus, fugæ beneficio evasit Carmelin: ubi collectis, qui eodem ex fuga convenerant, cum etiam de fociorum auxiliis hominum millia viginti effecisset, in Cuneorum gentem se recepit, nihilque præterea tentare au-
sus, exercitum in hiberna distribuit; donec ex citeriore Hispania L. Lucullus adveniret.

XXV. Lucullo enim, sicut fortuna prosperior, ita plus ad reliquos conatus audaciæ, fuit. Ab Intercatia digresso ten-

§ XXIII. Val. Max. 3, 2. Auct. de Vir. ill. Strab. c. 58. Appian, Vell. 1, 12. § XXIV. Liv. Epit. Appian. Oros. 4, 20.

tare Pallantiam placuit, Tarraconensis Hispaniæ clarissimam civitatem : cujus, ob magnitudinem oppidi, & virtutem civium, insignis fama, plurimos accolentium barbarorum, ut ibi perfugium salutis suæ quærent, attraxerat. Quare neque decrant, qui suaderent in consilio, *potius omittendam firmissimæ urbis oppugnationem, quam eo anni tempore cum evidenti periculo cladis & ignominie suscipiendam esse*. Putant, avaritiam obstitisse consulis, ne sententiam istam sequeretur : urbem enim opulentam esse audiverat. Non igitur prius abcessit, quam in magnas redactus angustias, quod ob Pallantinorum equitum frequentes excursiones tenui re frumentaria utebatur, non modo spem capiendæ urbis, sed etiam quieti reditus, amisisset. Quadrato agmine abeuntem carpere Pallantini, donec ad Durium amnem perventum est. inde, digressis noctu Hispanis, consul in Turdetaniam hiematum abiit.

XXVI. Interea Romæ suspensi omnium animi rerum Africanarum expectatione erant. Decem enim legati, quos ad speculanda Pœnorum consilia senatus Carthaginem miserat, & exercitum & classem ibi seprehendisse, referebant. revertērat una Masinissæ filius Gulussa, paternis & propriis odiis infensus Carthagini : neque quidquam, quod ad exacerbandos Patrum animos pertineret, docendo, rogando, querendo, prætermittebat. Miserant & Pœni suos oratores : sed apud averfas aures etiam vera & æqua pro fictis indignisque accipiebantur. Auditis omnium orationibus, perrogari sententias placuit. ibi plerique principes, *bellum indicendum esse*, fremebant, & ante omnes implacabilis Cato : sed hujus violentiam, & illorum numerum, & ceteri senatus inclinationem, unus maxime P. Cornelius Nasica facundia & auctoritate sustinuit ; pervicitque, *ut, nunc quoque dilato ultimæ indignationis impetu, tempus Carthaginensibus ad penitentiam daretur, intra quod si classem exussissent, dimississentque copias, amico populo Romano uterentur : ni facerent, futuri con-*

scilicet de bello iis inferendo referrent. Neque sine causa temporibus illis tantum ei viro deferebatur; quippe sanctissimis moribus, & inviolabili mentis rectitudine præditus, ætatem procul iis ineptiis habuerat, quibus vis ingenii animique inanum aut noxiarum rerum admiratione vilescit. Sapientiæ artibus, publici privatique juris peritiæ, & utrisque studium eloquentiæ conjunxerat: illis opus habere iudicans, ut vir civisque bonus esse posset; hoc, ut alios efficere. Quibus de causis in admiratione hominum cum esset, communi faventium usu *Corculum* est appellatus. Idem iisdem temporibus documentum illustre dedit, cum efficaci facundia summæ auctoritatis:

XXVII. Inter alia quædam opera publicæ theatrum proximi censores, a Lupercali in Palatium versus locaverant. id tum struebatur, neque procul perfectione aberat; cum P. Cornelius, exitiosum civitatis moribus institutum esse docens, si vanæ voluptatis illecebris mansura sedes poneretur, *neque ædificari porro, & quod ædificatum esset dirui oportere*, censuit. Multum prospexisse sapientissimi viri animum sequentis ævi vecordia demonstravit, cum ingeni civitatis dedecore ac damno, theatralibus ludis, quidquid enervare virilem indolem, quidquid imbuere flagitiis, impudentia, seditionibus homines potest, spectandum publice, atque per hoc imitandum proponeretur. Tum autem, necdum adeo degenerantibus a pristina integritate mentibus, persuasum est, ut senatusconsulto *destrui affectum opus, subhastarique omnia, quæ comparata theatro fuerant*; juberentur: addito; *ne quis in urbe propiusve passus mille subsellia posuisse, ludosve sedens spectare vellet*: digno utique senatusconsulto, quod inter nobilissima Romanæ gravitatis argumenta notaretur.

XXVIII. Nequaquam eadem innocentia res in Hispania gerebantur. ubi Lucullus, bello cum Vaccæis injussu senatus populique gesto, in Turdetania hiemabat. Ibi cum animum

§ XXVI. Liv. Epit. Vell. 1, 12. Auctor de Vir. ill. c. 44. Cic. Bruto c. 20 & Caton. c. 14. § XXVII. Auctor de Vir. ill. Liv. Epit. Vell. 1, 15. Appian. Civil. lib. 1. August. de Civitate Dei.

advertisset, Lusitanorum copias in propinquo negligentius agere, dimissa cum legatorum tribunorumque acerrimis expedita manu, circumvenit incautos, & ad millia quatuor interfecit. Iterum deinde circa Gades magnum eorundem hostium exercitum adeptus, occisis mille quingentis, ceteros, in edita loca compulso, cum rerum necessariorum inopia premerentur, in deditionem accepit. Post hos successus perterritis hostium animis, per Lusitaniam populabundus incedebat, nemine obsistere auso. quæ res etiam Ser. Galbæ fecit audaciam, ut & ipse ad vastandas hostium regiones liberius procurreret. Unde correpti pœnitentia, qui defecerant, miserunt ad Galbam, petunt, *ut iisdem legibus, quibus anno præterito cum M. Atilio pacti fuerant, in amicitiam reciperentur.*

XXIX. Galba, minime laudabili arte, perfidia in perfidos uti cogitans, simulata comitate excipit legatos: *compertum sibi, non pravitate ingenii a prioribus passis resiliisse Lusitanos, sed inopia coactos, ob sterilitatem suæ regionis, alienos agros incurrisse. Id ne deinceps quoque facere necessum haberent, terram ait daturum bonam atque commodam: non quidem, quæ tantam multitudinem continenti spatio aleret: sed si tres in partes dividi paterentur, idoneas singulis sedes assignari posse.* Credunt promissis prætoris, accepta in id fide, barbari: desertisque domibus, ad eum locum, quem Romanus indicaverat, maximo numero confluunt. Eos in tria partitus agmina in lata planicie, satis magno alios ab aliis intervallo, confidere jubet: ibique reditum suum præstolari. Tum proximos benigna oratione compellans, quando jam amici sociique essent, deponere arma jubet. barbari sine metu parere. at ille vallo circumdari universos imperat, mox immixtis armatis cædi. Eadem deinde fraude alteros opprefsit; eadem tertios. nec ex tanta vi hominum evadere crudelem ejus perfidiam, nisi perpauca, potuerunt. quos inter Viriatus fuit, quem fortuna vindictæ, secutæque vindictam

§ XXVIII. Liv. Epit. Orof. 4, 21. Val. Max. 2, 4. Tacit. 14, 4. Vell. 1. Appian. Hispan.

celeberrimi nominis nobilitati servaverat. ceteros aut ferum statim hausit, aut captos in servitutem Galba vendidit; incertum avarior, an crudelior, quibus rebus Luculum, cum perfidia æquaret, superabat.

XXX. Tum quoque prædæ minima parte militi amicisque distributa, ceteram servavit sibi: inter immensas opes, quibus nemo tum Romæ instructior fuit, sēper egenus, & in pace quoque non mendacio, non perjuriis parcens, quoties ex his lucrum speraret. De numero Lusitanorum, qui Galbæ dolo perierint, dissentitur: aliis novem fuisse millia, quibusdam, aucto vehementer numero, triginta millia affirmantibus. Simillimum vero est, hunc universæ multitudinis numerum fuisse: ex eo interfectos novem millia, ceteros sub corona venisse. Et hæc quidem in annum sequentem egressa sunt, qui T. Quinctium T. F. T. N. Flaminium, M'. Acilium L. F. C. N. Balbum consules, idemque initium tertii cum Pœnis belli habuit; quod ut certius cognoscatur, quædam illorum adversus Masinissam referenda gesta sunt, quando illa, si non causam Romanis armis, occasionem certe præbuerunt.

XXXI. Oroscopa vocatur oppidum, quod, Pœnorum cum esset, a Numida obsidebatur. Mittitur ab urbe quinque & viginti peditum millibus, equitibus urbanis quadringentis stipatus Hasdrubal: adeo felici expeditionis principio, ut adveniēti statim sex millia regionum equitum a præfectis Anasi Jubaque adducerentur, qui ob contentiones quasdam cum Masinissæ liberis fidem mutaverant. Unde plenus animorum Hasdrubal, castris propius hostem motis, premebat Masinissam, omnibus ferme levibus præliis, quæ ut inter vicinos exercitus crebra fiebant, superior. At rex, inveteratus belli artibus, ex ipso incommodo suo victoriam moliebatur. tanquam igitur hostilibus armis resistere non posset, cedere paulatim, simulare metum, castrisque sæpe mutatis, aliis atque aliis locis confidere: donec in aridam

planitiem pertraxit hostes, præruptisque collibus undique cinctam. hic locus cum prælio placuisset, castra in eadem planitie posuit rex: Hasdrubal in tumulos, ut tutiores, subduxit copias.

XXXII. Pridie quam pugnaretur, missu L. Luculli ad Masinissam P. Scipio Æmilianus accessit, elephantos ad bellum Celtibericum ab eo petiturus. Rex, missis cum omni equitatu filiis, excipi venientem jubet: quo minus ipse obviam proficisceretur, non tam ætate, quam imminente mox prælio, præpeditus, cui vires integras reservabat. Is enim adhuc vigor duodenonaginta annos agenti aderat, ut nihil in eo ad ducis pariter militisque obeunda officia desideraretur. Neque labore ullo, neque victu duriori frangebatur: panem sine pulpamine mandere, iisdem in vestigiis, quoties opus videretur, totos dies persistere, itinera longa pedibus aut equo continenter, utro cœpisset modo, peragere, neque insolitum ipsi neque molestum habebatur. senem se esse sola præteritarum rerum recordatione sentiebat. Tum quoque summo mane, more Numidarum nudo insidens equo, copias eduxit, acieque instructa provocavit hostem. Neque moram pugnandi Hasdrubal fecit, aucto ex novis auxiliis animo, quæ magno numero ad eum ex tota Carthaginienfium ditione confluerant.

XXXIII. Id prælium P. Scipio ex locis editis velut in theatro spectavit: sæpe postea professus, nullum aliud tanta cum voluptate vidisse, quia cura omni exsolutus (tanquam amicus & hospes utrorumque) tantum vacaret notandis, quæ a centenis denis hominum millibus facinora ederentur. *Neque ante se, nisi duobus, simili spectaculo frui licuisse*, prædicabat: *Jovi ab Ida, Neptuno e Samothracia*. Pugnatum est acerrimis animis ab orto sole ad occasum, magna utrinque cæde, sed melioribus ad extremum Masinissæ rebus. Cui a pugna redeunti Scipio se obtulit, ab eoque maxima cum amoris lætitiæque demonstratione est exceptus. Etiam

§ XXXI. Appian. Punic. § XXXII. Liv. Epit. 48 & 50. Polyb. ap. Vales. Appian.

- Carthaginienſes, audito Scipionis adventu, gaviſi ſunt, ſperantes, per illum ſe pacem impetrare poſſe. Ceterum cum agro circum Emporium cederent Pœni, prætereaque præſentis pecuniæ talenta ducenta daturos pollicerentur, & octingenta alia in certum tempus; rex ante omnia transfugas reſtitui poſtulabat. cujus rei mentionem cum nec ad aures admitteret Pœnus, colloquium re infecta diremtum eſt. Scipio, acceptis elephantis, in Hiſpaniam renavigavit.

XXXIV. At Maſiniſſa, commeatum ademturus hoſti, collem, in quo Punica erant caſtra, foſſa circumdedit: quanquam ea etiam locorum natura eſſet, ut quantumvis libera frumentatione, parum reperiri copiarum potuiſſet: adeoque ipſi quoque vix in longinquis locis neceſſaria parce afferebantur. Unde ſpes Haſdrubali fuit (nam inſtructior ipſe videbatur) priorem Numidam inopiæ ſuccubiturum eſſe: accedebat, quod ab Roma legati adventare dicebantur, quorum imperio ſolutum iri bellum putabat. Verum illi cum hiſ mandatis advenerant, *ut, ſicubi laborare viderent Maſiniſſam, tollere controverſias ſtuderent, ſuperiorem uti fortuna hortarentur.* Ita fruſtratus exſpectatione ſua Haſdrubal, cum etiam erumpendi occaſionem, attritis interim corporibus amiſiſſet, in maximam calamitatem incidit. Jam jumentis, omnibus equiſque in cibum abſumtis, etiam amenta telorum coxerant. ita fame afflictis, ut ſolet, morbi non perſpicere, maxime cum irgens hominum vi anguſto loco clauſa, præter ceteras miſerias, æſtatis, quæ per Africam ardentiffima eſt, incommodis urgeretur. Eſurientibus cibis, ægrotis fomenta, etiam ſepultura morientibus deerat: cum neque cremari corpora lignorum penuria, (jam enim & ſcuta combuſſerant) neque efferri caſtris intentæ hoſtium cuſtodix paterentur. ita languentes, ſemivivi, mortui, cum permixti jacerent, adeo totis caſtris increbuit peſtilentiæ malum, ut tolerari ultra nequiret. Maſiniſſa conditiones impoſuit, quales inſenſus & ſuperbus victor poteſt. Transſugis redditis, vectigal talenta centena in annos quinquaginta

§. XXXIII. Homer. Iliad. 1, 11 & 183.

ginta pendere, exsulesque suos, contra jusjurandum, recipere promiserunt. Ita cum singulis tunicis ignominiose dimissos Gulussa, periculi sic memor, & velut in auctores perfidiæ ipsorum exemplo juste usus, interfici a Numidis equitibus jussit: incertum an inscio Masinissa. illi, cum neque ad resistendum arma, nec ad fugiendum vires haberent, præter paucos, qui cum ipso duce evaserunt, sunt interfecti. Hoc bellum exitio Carthagini fuit. nam & prætextum dedit Romanis, ut eos armis peterent, & victoriæ fiduciam: cum excindere attritas a Masinissa opes (hominum ad millia duodesexaginta perierant) neque periculosa admodum, neque diuturnæ luctæ videretur.

§ XXXIV. Zonar. Polyb. ap. Suidam. Appian.

JOANNIS FREINSHEMII SUPPLEMENTORUM LIVIANORUM

LIBER XIV.

IN LOCUM LIB. XLIX LIVIANI.

E P I T O M E

LIBRI QUADRAGESIMI NONI.

Tertii Punici belli initium altero & sexcentesimo anno ab urbe condita, intra quintum annum, quam erat cæptum, consummatur. Inter M. Porcium Catonem & Scipionem Nasicam, quorum alter sapientissimus vir in civitate habebatur, alter etiam vir optimus a senatu judicatus erat, diversis certatum sententiis est; Catone suadente bellum, & ut tolleretur deletereturque Carthago; Nasicæ dissuadente. Placuit tamen, quod contra fœdus naves haberent, quod exercitum extra fines duxissent, quod socio populi Romani & amico Masinissæ arma inzulissent, quod filium ejus Guluffam, qui cum legatis Romanis erat, in oppidum non recepissent, bellum iis indici. Priusquam ullæ copiæ in naves imponerentur, Uticenses legati Romam venerunt, se suaque omnia dedentes. Ea legatio, veluti omen, grata Patribus, acerba Carthaginensibus fuit. Diti patri ludi ad Terentum, ex præcepto librorum Sibyllinorum, facti: qui anno centesimo, primo Punico bello, quingentesimo

& altero anno ab urbe condita, facti erant. Legati triginta
 Romam venerunt, per quos se Carthaginienſes dedebant. Ca-
 tonis ſententia pervicit, ut in decreto perſtaretur, & ut con-
 ſules quam primum ad bellum proficiſcerentur. Qui ubi in Afri-
 cam transferunt, acceptis, quos imperaverant, trecentis obſi-
 dibus, & armis, omnibuſque instrumentis bellicis, ſi qua Car-
 thagine erant; tunc, cum ex auctoritate Patrum juberent, ut
 in altum locum, dum a mari decem millia paſſuum, ne mi-
 nus, remotum, oppidum facerent, indignitate rei ad bellan-
 dum Carthaginienſes compulerunt. Obſideri oppugnarique cœpta
 eſt Carthago ab L. Marcio, M'. Manilio conſulibus. In qua
 oppugnatione cum neglectos ab una parte muros duo tribuni
 temere cum cohortibus ſuis irrupiſſent, & ab oppidanis gravi-
 ter caderentur, a Scipione Africano expliciti ſunt: per quem
 & caſtellum Romanorum, quod nocte expugnabant, paucis
 equitibus juvantibus, liberatum eſt: caſtrorumque, quæ Car-
 thaginienſes, omnibus copiis ab urbe pariter egreſſi, oppugna-
 bant, liberatorum iſ ipſe præcipuam gloriam tulit. Præterea,
 cum ab irrita oppugnatione Carthaginis conſul (alter enim
 Romam ad comitia ierat) exercitum duceret adverſus Haſ-
 drubalem, qui cum altera manu iniquum ſaltum inſederat,
 ſuaſit primo conſuli, ne tam iniquo loco conſligeret. viſtus
 deinde complurium, qui & prudentiæ ejus & virtuti invide-
 bant, ſententiis, & ipſe ſaltum ingreſſus eſt. cumque, ſicut præ-
 dixerat, ſuſus fugitusque eſſet Romanus exercitus, & duæ
 cohortes ab hoſte obſiderentur, cum exiguis equitum turmis in
 ſaltum reverſus, liberavit eas, & incolumes reduxit. Quam
 virtutem ejus & Cato, vir promtioris ad vituperandum lin-
 guæ, in ſenatu ſic proſecutus eſt, ut diceret, reliquos, qui in
 Africa militarent, umbras militare, Scipionem vigere; &
 populus Romanus eo favore complexus, ut comitiis plurimæ
 eum tribus conſulem ſcriberent, cum hoc per ætatem non lice-
 ret. Cum L. Scribonius tribunus plebis rogationem promulgaſ-
 ſet, ut Luſitani, qui, in fidem populi Romani dediti, a Ser.
 Galba in Galliam veniſſent, in libertatem reſtituerentur, M.
 Cato æerrime ſuaſit. exſtat oratio in Annalibus ejus inclu-
 ſa. Q. Fulvius Nobilior, & ſæpe ab eo in ſenatu laceratus,

respondit pro Galba : ipse quoque Galba , cum se damnari videret , complexus duos filios prætexitatos , & Sulpicii Galli filium , cujus tutor erat , ita miserabiliter pro se locutus est , ut rogatio antiquaretur. exstant tres orationes ejus : duæ adversus Libonem tribunum plebis rogationemque ejus , habitæ de Lusitanis : una contra L. Cornelium Cethegum , in qua Lusitanos propter sese castra habentes cæsos fatetur , quod compertum habuerit , equo atque homine suo ritu immolatis , per speciem pacis adoriri exercitum suum in animo habuisse. Andriscus quidam , ultimæ sortis homo , Persei regis se filium ferens , & mutato nomine Philippus vocatus , cum ab urbe Romana , quo illum Demetrius Syriæ rex ob hoc ipsum mendacium miserat , clam profugisset , multis ad falsam ejus fabulam , velut ad veram , cœuntibus , contracto exercitu , totam Macedoniam aut voluntate incolentium , aut armis occupavit. Fabulam autem talem finxerat. Ex pellice se & Perseo rege ortum , traditum educandum Cretensi cuidam esse , ut in belli casus , quod ille cum Romanis gereret , aliquod velut semen regie stirpis exstaret. Perseo demortuo , Adramyttei se educatum usque ad duodecimum annum ætatis , patrem eum esse credentem , a quo educaretur , ignarum generis fuisse sui. affecto deinde eo , cum prope ad vitæ finem ultimum esset , detectam tandem sibi originem suam , falsæque matri libellum datum , signo Persei regis signatum , quem sibi traderet , cum ad pubertem ætatem venisset : obtestationesque ultimas adjectas , ut res in occulto ad id tempus servaretur. pubescenti libellum traditum : in quo relictæ sibi duo thesauri a patre dicerentur. tum scientem mulierem subditum se esse , veram stirpem ignoranti edidisse genus : atque obtestatam , ut prius , quam manaret ad Eumenem res , Perseo inimicum , excederet iis locis , ne interficeretur. eo se exterritum , simul sperantem aliquod a Demetrio auxilium , in Syriam se contulisse : atque ibi primum , quis esset , palam expromere ausum.

I. TERTIUM Carthaginienſe bellum , ſicut diuturnitate temporis , & magnitudine præliorum prioribus impar ,

ita longe maximum eventu, nobilissimumque fuit. Siquidem hoc quintem intra annum cœpto finitoque, non modo gloria roburque Punici imperii, sed ipsa quoque sedes civitatis funditus excisa est. Post malam adversus Numidas pugnam, haud magis præsentium tædio, quam expectatione futuri sollicita, consilii que incerta Carthago, jam tum imminentis exitii sensum desperatione & luctu præsunebat. Rex vicinus & victor ipsis urbis faucibus cum validis copiis instabat: & graviore adhuc metu senatus Romani nunquam æquus Punicæ genti animus, & præsentium rerum facie ad vindictam odio speque irritatus, timebatur. Atqui non alia Romæ consilia, quam pro suspicione Pœnorum, agitabantur. Quamprimum enim de rebus Africanis auditum fuerat, senatus decrevit, ut per universam Italiam, quæ quisque populus auxilia consueffet mittere, ea in parato haberet: non addito, quem ad usum imperarentur. Itaque Carthaginieneses, ne tam publico consilio, quam instinctu paucorum bellasse viderentur, Hasdrubalem ducem, & ex magistratibus Carthalonem, aliosque nonnullos, perduellionis reos publico præconio pronuntiarunt: missisque Romam legatis, in hos & Masinissam omnem actorum culpam conferentes, non minus de temeritate suorum, quam de injuriis Masinissæ, querebantur. *hunc improbe laceffendo, illos præpropere vindicando, res in eum statum adduxisse.*

II. Antiquas referre artes videbantur, ut prospera publice agnitori, quia fortuna contra dederat, privato ducum consilio cœptum gestumque bellum videri cuperent. Igitur a senatore quodam interrogati: *quid ita damnandis ducibus belli eventum expectassent, nullo eorumque signo edito, sibi consilia eorum displicere?* cum parum expedirent responsum, audivere: *populum Carthaginensem ob illatum contra fœdus socio amicoque regi bellum, satis purgatum senatui populoque Romano non videri.* His perturbati oratores rogabant, *si quidem peccavisse respublica sua judicaretur, qua ratione corrigi delictum*

huique posset ? neque aliud responsum auferre potuerunt, nisi dandum esse operam, uti senatui populoque Romano fiat satis. Torsit ea res senatum Carthaginiis, quid ea formula Romani præcepissent plerisque ambigentibus. alii, *pecuniam adjiciendam videri*, dicebant, *summæ, quam P. Cornelius Scipio suo fœdere imperasset* : alii, *Masiniissæ relinquendam esse regionem, de cujus jure pugnatum esset.* postremo satius visum, de novo mitti cum precibus exploraturos, *quemadmodum senatus satisferi vellet.* Nihil responsum, nisi *rem ipsis minime ignotam Carthaginienfes frustra querere.* Quod ubi Carthaginem relatum, major in urbe consternatio pavorque esse cœpit : cum perplexis omnium animis, nihil jam, nisi bellum, & hostis, & captarum urbium species, & extrema omnia obversarentur.

III. At eodem tempore, quemadmodum rigide cum Carthaginienfibus, ita cum Achæis clementius actum : principesque eorum longo exilio absoluti, post septimum decimum, quam evocati fuerant, annum, minus trecenti redire. ceteros (supra mille initio fuerant) partim morbus, alios, cum evadere ex custodia tentavissent, pœna absumferat. Dimissos in Polybii maxime gratiam, annitente P. Scipione, constat, cui & antea & postea vir ille ob virtutem & egregias artes fuit gratissimus. Tum quoque Pietatis ædes in circo Flaminio exstructa est, memorabili de causa. Mulier ingenua ob delictum tradita triumviro capitali fuerat, ut in carcere necaretur. Eam cum fame constituisset occideré, mulieris filia puerpera obtinuit a præfecto custodiæ, ut ad matrem visendam admitteretur. Hoc cum factum aliquoties esset, morsque mulieris ultra, quam humana natura pati inedia possit, protraheretur, admiratus rem præfectus, quamvis puerperam minime suspectam haberet, quam semper diligentissime, ne quid ciborum inferret, excusserat ; tamen attentius observare illam statuit : deprehenditque exserta mamma lactis alimenta reddentem anui, cujus ipsa lac aliquando juvenculæ infans suxerat. Dignum erat spectaculum, quod ad triumvirum, & ab hoc ad prætorem

referretur. Prætor ipse quoque re ad consilium judicium relata, ut pœna mulieri condonaretur, impetravit. Addidit senatus utrique perpetua de publico alimenta: locumque carceris mutari jussit in sedem Pietatis, velut ab ipso numine delectam.

IV. At in curia per eos dies sententiis de Punici belli fine certabatur, nobili jam inter duos civitatis principes controversia, cum M. Cato, *salvam esse rempublicam posse, stante urbe Punica*, negaret; P. Nasica, *ne Carthaginis excidium Romanis quoque rebus perniciem afferret, relinqui illam oportere* testaretur. Quod enim videbat, antiquos mores non jam paulatim exolescere, sed amore peregrinæ luxuriæ abjici expellique: verebatur, quod evenit, ne, remoto urbis æmulæ timore, veluti vinclis exsoluta improbitas in omnia magnorum imperiorum vitia, & ex his in calamitates præceps rueret. Carthaginis autem opes minores esse judicabat, quam ut Romanis nocere possent; ampliores, quam ut deberent contemni. Atqui hoc ipsum Cato anceps esse reputabat, si morbis intestinis laboranti reipublicæ, urbs antiquitus nobilis potensque, & rebus adversis non tam fracta, quam ad prudentiam & severitatem erudita, immineret. Senatui nequaquam facile erat statuere, utrius sententiæ standum esset. Nam & majorem imperii gloriam majoremque fructum inde redire videbant, si maximarum urbium domini, quam si everfores esse dicerentur: satisque prospiciebant, crebriora deinceps pertinacioraque domi futura certamina: neque socios magistratuum Romanorum avaritiam superbiamque pari patientia perluros.

V. Vicit ad extremum propior metus, adjutus insuper invidia, quod, post duo gravissima bella, non modo stabat adhuc Carthago, sed valebat. Irritatos etiam maximopere Catonis artificio Patres ferunt, qui præcocem aliquando

§ III. Pausan. l. 7. Plut. in Cat. Maj. c. 16. Jul. Obseq. c. 114. Val. Máx. 5, 4. Solin. c. 7. Plin. 7, 36. § IV. Festus. Florus 2, 15. Cic. Caton. c. 6. Polyb. ap. Valef. Plin. 33, 11. Sallust. Hist. l. 1. Plut. in Cat. major. c. 51.

ficum in curiam intulit, cūque senatores magnitudinem pomi pulchritudinemque mirarentur, interrogavit eos, *quando dentum ex arbore putarent?* illis, *recens videri*, affirmantibus, *Atqui*, inquit, *tertium ante diem scitote decerptum Carthagine: tam prope ab hoste absumus*. His machinis expugnati Patres, quibus moris erat non nisi iusta bella suscipere, diuque ac multum considerare, ne quid temere decerneretur, cū in Capitolio coactus senatus esset, *bellum Pœnis indicendum censuere, quod contra fœdus naves haberent: quod extra fines exercitum duxissent: quod socio & amico populi Romani arma intulissent: quod filium ejus Gulussam, qui cum legatis Romanis fuerat, non recepissent*. Hæ inferendi belli causæ in publicum sunt editæ.

VI. Ad senatusconsultum faciendum cum ultro senatus inclinaret, magnopere quoque impulsū ferunt ab Uticēnsibus legatis, qui, non exspectato adventu consulum, (L. Marcius C. F. C. N. Censorinus, M'. Manilius P. F. P. N. jam inierant) se suæque omnia in populi Romani fidem potestatenique dederunt. Peracerbum id Pœnis accidit, urbium Libycarum post Carthaginem maximam, portu idoneo, passuum sex millibus paulo amplius distantem, odio superbæ dominationis in tempore detegendo, rerum Punicarum imbecillitatem desperatione sua prodidisse. Romæ etiam, tanquam certe & facilis victoriæ omen, accepta editio est. Neque diutius moramnectere consules jussī, præparatis omnibus Lilybæum transjecerunt. L. Marcio classis evenerat: pedestrem exercitum M'. Manilius fortitus equitum quatuor erant millia, peditum octoginta, lecta juvenis, quod ad uberem claramque militiam civium sociorumque maximæ copię concurrerant: plerisque ultro nomina dantibus. Hic exercitus quinquaginta, hemioliis centum, vehebatur; aphractis præterea, & cercuris, & onerariis permultis. Consulibus secreto mandatum, *ne quem bello finem, nisi diruta Carthagine, facerent*.

§ V. Diod. ap. Vales. Vellejus 1, 12. Plut. in Caton. c. 51 & 16. Plin. 5, 18. Appian. Liv. Epit. § VI. Appian. Liv. Epit. Polyb. excerpt. Leg. 142. Strab. l. 17. Diod. ap. Fulv. Ursinum.

VII. Interea domi animis, ut in magnarum rerum exordiis consueverunt, ad religionum curam versis, decemviri jussu senatus libris Sibyllinis aditis, ex iis ediderunt, *Diti Patri ludos faciendos ad Terentum* (loci ad Tiberim, haud procul urbe, nomen est) *quales ante centesimum annum, flagrans primo bello Punico celebrati fuerant.* Hæc omnia cum Carthaginienfes idem nuntius docuisset, qui & senatusconsultum belli indicendi, & classẽ jam profectam attulerat; maximis in angustiis constituti, quomodo præsentibus uterentur, deliberabant. ad bellum erant imparatissimi: æquas conditiones pacis omnes desperabant: ne iniquas quidem Uticensium factum reliquerat, a quibus præventi, etiam si urbem dederent, parum habituri gratiæ ad promerendam misericordiam videbantur. Post multas secretas consultationes, consilium, quod ipsa necessitas suggerebat, tenuit: delectique sunt ex primoribus triginta, quibuslibet conditionibus pacem impetraturi: quem ad finem liberam eis agendi, quæ ex usu publico viderentur, potestatem concedebant. Horum principes Gisgo, cognomento Strytanus, tum Hamilcar, & Misdas, & cum Magone Gillicas fuere.

VIII. De hac quoque legatione inter se commissi sunt consuetum his certaminibus par, P. Nasica, & M. Cato. Cato, *neque revocari decretum de bello, neque admitti legatos,* volebat: Nasica obtinente admissi sunt, & miserabili oratione, *urbem Carthaginem, agrumque, & omnia sua populo Romano permittere* dixerunt. Non improbabile est, quod quidam sentiunt, minime hanc sententiam legatis aut populo Carthaginienfi fuisse (neque enim prioribus bellis, quanquam ad extrema redacti, mentionem deditiois aut facere aut accipere sustinuerant) sed quia parum referre putabant, quantum promitterent, resilire a pactis, quamprimum occasio fuisset, atque interim præsens periculum quoquo modo avertere, certi. Revocatis in curiam oratoribus, senatus sententiam prætor exposuit: *quando ad optimum tandem consilium*

adjecissent animos Pœni, Patres ipsis libertatem, leges suas, agrum omnem, sacra, sepulcra, quidquid denique publice privatimve possiderent, concedere. Quæ cum legati, ut in ejusmodi rebus satis optabilia, læti audivissent, adjecit prætor, ita compotes horum fore, si, antequam in Africam consules proficiscerentur (triginta dierum spatio id tempus definitum est) obsides trecentos ex senatorum aut seniorum liberis Lilybæum mississent, & consulibus dicto audientes fuissent. Quod postremum quamvis angebat homines, quam habiturum interpretationem esset nescios, tamen, quia potius sperari nihil poterat, confestim ad renuntianda acta in patriam renavigarunt.

IX. Senatus, auctore Catone, *insistendum proposito nihilominus*, censuit, militque ad consules, *ut profectiorem maturarent; neque aliter facerent, quam in urbe præsentibus senatus præcepisset.* Pœnos tamen celeriores ad redeundum timor, quam Romanos ad solvendum cupiditas, effecerat: itaque, non expectato die præstituto, cum obsidibus affuerunt. Nam Carthaginienfes, cognito senatus responso, cetera quidem haud male per legatos peracta credebant; uno mirifice affligebantur, quod inter multa, quæ Romani concessuros dixerant, omiffa fuisset urbium mentio, cum alia nominatim referrentur. Ibi quidam inter eos Mago, cui Brutio cognomen erat, prudenter & animose monuisse fertur: *ex duobus temporibus deliberandi, alterum jam cessisse, alterum nondum venisse. nam & priusquam se suæque in jus & ditionem Romanorum dederent, quærendum fuisset, quid imperaturi consules, quove consilio prætermiffa urbium mentio esset: nunc nihil restare, nisi ut patienter ferant, quidquid imperatum fuerit, donec alterum illud tempus advenerit, ubi plura sibi sentientes injungi, quam tolerare possint, iterum consultant, habere tale bellum, an facere imperata, malint.*

X. Ita non dubitatum est diutius, quin mitti obsides oporteret: conquistique trecenti ex principibus juventutis, qui Lilybæum aveherentur. Eos magna omnium tristi-

§ VIII. Liv. Epit. Diodor. ap. Fulv. Ursinum. Polyb. Zonar. Appian. Diodor. § IX. Liv. Epit. Appian. Polyb. Diodorus.

tia dimissos referunt, prosequentibus propinquis necessariisque, miserabili præcipue matrum ejulatu, quæ, matronalis decori parum inter hanc calamitatem memores, tanquam lymphatæ discurrebant. modo liberos amplexu, modo naves, adhærendo ancoris, præcidendo funiculos, retinentes. fuerunt, quas ipsas in aquas adigeret dolor, ut, quoad possent, natatu insequentes, velut postremo suorum adspectu potirentur. omnes profuso fletu, evulsis comis, percussis pectoribus suam pariter publicamque vicem miserabantur. nam & inter promiscuas querentium voces non defuere, quæ prædicerent, *liberorum se suorum jacturam gratis facere, nullo inde ad patriam redituro emolumento*. Ut Lilybæum venerunt, acceptos a legatis obsides Q. Fabio Maximo, qui prætor Siciliam regebat, tradidere consules; Pœnisque dixerunt, *cetera, quæ ad pacem pertinerent, Uticæ se imperaturos*. Q. Fabius obsides in urbem misit: consules navigarunt in Africam, exercituque iis in locis constituto, ubi olim P. Scipio castra habuerat, classis portum Uticensium ingressa est.

XI. Ejus rei nuntio Carthaginem perlato, plena erant omnia luctus & timoris ob mala, quæque passi, quæque passuri erant; nec quidquam fatis expediebatur, nisi quod legendos constabat, qui a consulibus, *quid juberetur*, exquirerent; *civitatem promte facturam imperata*, pollicentes. Apud Romanos omnia consulto ad terrorem augendum præparata erant. Tuba signo dato cum silentium factum esset, voce præconis legati Carthaginensium ad consulum tribunal jussi sunt accedere. Illi media per castra & dispositos utrinque cum erectis contisque signis ordines, ut multitudo nosceretur, adducti, consules in suggestu excelso sedentes repererunt, legatis tribunisque circumstantibus. Ibi intervallo, quod in morem Atticorum judiciorum prætenlis funiculis effectum erat, disclusi, silentium tenuere: donec a consulibus, *si quid vellent dicere*, jussi, de antiquis populi utriusque fœderibus cœperunt commemorare, deductaque per Car-

thaginis ipsius antiquitatem, frequentiam, opes, & amplissimum terra marique imperium oratione, subjecerunt, non jaſtantiæ cauſa hæc referri (neque enim ſuis temporibus eam convenire) ſed ut noſtris, aiebant, calamitatibus edoſſi, præſenti fortuna ſapienter atque moderate utamini.

XII. Nam, ut quiſque melior atque temperantior eſt, ita rebus aliorum afflictiſ celerius movetur ad miſericordiam: ſibiſque propitiâ ſemper fortunam fore confidit, ſciens, in adverſam aliorum nihil ſe per inhumanitatem peccaviſſe. Et hæc quidem vobis maxime digna ſunt, veſtraque religione, quam uni omnium hominum ſanctiſſime vos colere proſitemini. Quod ſi tamen mala quadam ſorte noſtra in hoſtes inexorabiles incidimus; ſic quoque ſatietas aliqua noſtrarum miſeriarum eſſe deberet. imperium terræ mariſque ereptum eſt, ademtæ naves, ſerarum uſu & venatione interdictum, obſides nobiliſſimi & olim, & nuper dati, veſtigalia, quæ ab aliis conſueti eramus accipere, juſto tempore ſoluta. Et hiſ quidem contenti patres veſtri fuere, quibuſcum noſtri bellaverant: fœduſque in haſ leges factum, ut inter ſocios amicoſque, pari utrinque religione firmatum. Atque illi, cum bello poſitiſ inimiciſ, placitaſ ſemel conditioneſ bona fide ſervavere: vos vero, quibuſ nec oppoſita unquam arma ſunt, quam quaſo temporum horum noxam poteſtiſ coarguere?

XIII. Ideone bellum & priuſquam audiremur decernendum, & priuſquam indiceretur inferendum fuit, quiâ tributa ex fide ſolvimus? elephantoſ non domamus? nihil contra fœduſ antiquum facimus? an quia modo ſupra quinquaginta hominum milia fame nobiſ perierunt? At geſſiſtiſ contra Maſiniſſam bellum. geſſimus enim, ſed laceſſitiſ, ſed coactiſ. diu enim patientiſſime quidlibet pertuliſmus, voſ reveritiſ: donec ille contra noſ, ſolumque, ubi educatuſ, ubi inſtitutuſ eſt, nullum injuriarum finem facientiſ, regionem circa Emporium, & hæc potiſ, aliaſ ſubinde aliaſque invaderet, ac ad hoc fœderiſ veſtri caput negligendum vi ac neceſſitate noſ jubigeret. Hæc igitur neceſſitaſ ſi apud voſ vel in cauſam armorum, vel in prætextum invaluit; noſ certe & publico præconio condemnaviſmus eoſ, qui Numidæ

§ XI. Polyb. Appian. Liv. 45, 29. Meurſiuſ Lect. Attic. 60, 14.

T. Livii Vol. VII.

X

vim repulerant, & Romam oratores ad factum purgandum misimus; postque paulo alios, quibus omnis potestas accipiendi leges, quas imponeretis, commissa fuit. Quorsum igitur classis tam instructa, quorsum tantus exercitus adductus est, si, & quod commisimus, Pœni fatemur, & luere commissum arbitrio vestro parati sumus? Nihil a nobis fingi, rebus ipsis apparuit, cum obsides ejus nobilitatis, tanto numero, etiam ante diem dictam, cum frumentum, a vobis his diebus imperatum, summo studio misimus. Quæ cum ita sint, nosque ejusdem senatusconsulii partem alteram mittendis in tempore obsidibus expleverimus, alteram ut vos expleatis superest; quæ, datis obsidibus, libertatem nobis resque nostras reliquit.

XIV. Hæc locuti conticuerunt. Tum L. Marcius, causas, inquit, belli, Carthaginienses, cum legati vestri ab senatu intellexerint, quid opus est exponere? Quod autem senatusconsulto satis a vobis factum prædicatis, id vero argui jure debet. Nam & senatusconsulto comprehensum, & a nobis in Sicilia prædictum est, cetera mandata senatus Uticæ nos edituros esse. De obsidibus quidem, cum delectu & diligentia adductis, consilium vestrum laudamus; sed, si nihil præterea præstari creditis oportere, fallimini. Equidem si fraudulenter pacem petitis, per occasionem rebellaturi, non est nobis animus, calliditati vestræ arma, per quæ nocere possitis, relinquere: sin bellandi cogitationem omnem vere deponitis, jam æquis animis bellorum instrumento carebitis. Afferte igitur, quidquid vobis publice privatimque armorum est, telaque & catapultas; naves etiam, quas habetis, tradite.

XV. Non ausi repugnare Carthaginienses, tantum oraverunt, cogitarent consules, quid futurum urbi suæ esset, si, exsulibus castræ in propinquo habentibus, inermis ipsa relinqueretur. Nam Hasdrubal, qui post infelix cum Masinissa bellum capitis fuerat damnatus, collectis hominum viginti ferme milibus, bellum patriæ intulerat. Responsum est, securitatem gentis Punicæ senatui populoque Romano curæ fore. missique ad exurendam classem, & accipienda arma, quæstores con-

fulum P. Cornelius Scipio Nasica, Cn. Cornelius Hispallus: *Tantam armorum vim fuisse traditam*, auctores quidam sunt, *quanta toti armandæ Africæ suffecisset*. illud relatione multorum constat, *gravis armaturæ millia ducenta, telorum innumerabilem copiam fuisse: catapultarum* apud alios scriptores *duo millia*, apud alios *tria* inveni. Consulto fecerant consules, ut singula imperia seorsim ederent: ne, si tot res tamque graves simul juberentur, Carthaginieneses ad bellum præoptandum adigi desperatione possent. Exarmatis quidlibet tuto injunctum iri putantes, misere Carthaginem, qui delectos ex senatu arcefferent: iis se postremum eorum, quæ faciunda essent, denuntiatiuros. Venerunt triginta ex illustribus, quos ultro comitata est alia principum & sacerdotum manus, patriæ discrimine anxia, & consules aspectu suo reverentiaque permotura ad misericordiam.

XVI. Hi omnes eodem, quo accesserant, cultu ad consules introducti, cum taciti adstarent; iterum consurgens L. Marcius (nam hujus facundiæ senior collega concedebat) *Quod obsidibus armisque tradendis voluntati senatus celeriter & cum cura estis obsecuti, recte & ordine a vobis factum est, Carthaginieneses. nunc, quia necessitatis minime verbosa est oratio, unum, quod restat, senatus mandatum, magno animo capeffite. Urbem aliam, ubicunque videbitur, sed decem minimum millia passuum a mari distantem, & sine muris, condite. nam hanc quidem Carthaginem solo æquare jussi sumus.* Interrupit postrema consulis verba sublatus a Pœnis ululatus, clamorque, qualis in gravissima eadem & inexpectata calamitate esse debuit: cum modo, nranibus in cœlum extentis, invocarent Deos, doli, quo appetiti essent, ultores; modo, conversâ in Romanos voce, multa & acerba increparent: sive exitium tædio vitæ provocantes, sive mentem dolor eripuerat. nam & multa faciebant insanientibus solita: abjicere se in humum, pugnis atque caputibus verberare terram, lacerare amictus,

§ XV. Appian. Punic. Diod. ap. Fulv. Ursinum. Florus 2, 15. Pighii Annal. Oros. 4, 22. Strab. l. 17. Zonar. Diodor.

ne ipsis quidem corporibus abstinere infestas manus : potestremo, ubi jam fatigatus remiserat dolor, mortuorum instar sine voce, sine motu jacebant.

XVII. Attoniti ad hæc Romani stabant, commiseratione & exemplo fortis humanæ stupentibus animis: ipsi quoque consules indulgebant hominibus, in subita consternatione primum animi impetum male sustinentibus; gnari, hoc habere magnas calamitates, ut statim quidem audaciam injiciant mentibus, mox necessitate, & assuetudine ferendi, audacia in humilitatem vertatur. Quod etiam Carthaginensibus tum contigit. cum enim aliquamdiu taciti mala sua considerassent, indignatione deposita, cum ploratu & lacrimis vicem suam liberorumque & conjugum deflebant, ipsiusque patriæ; & hanc, quasi audientem, nomine invocabant. At vero sacerdotes vocabula sacrorum numinumque ciere, ipsis quoque, tanquam præsentibus, communem interitum exprobrare; mixtusque & miserabilis luctus nunc privatas calamitates, nunc publicas, deplorantium, ipsos quoque Romanos hostium infortunio illacrimari coegerat. Consules, & ipsi rerum humanarum instabile fatum gementes, severo tamen vultu finem & horum questuum expectabant.

XVIII. Pœnos ubi, lamentis paulisper cessantibus, res ipsa suæ fortis admonuit: urbem exarmatam, copias domesticas exiles, fociales nullas, ne tempus quidem aut spem parandarum esse; contra liberos suos, arma, agrum in potestate hostium, Romanorum navalem pedestremque exercitum in oculis, Masinissam in lateribus, reputantes; omissa invidia tumultuque, infirmis adverforum solatiis, iterum ad preces confugerunt; &, qui præsentium nobilissimus erat, Hanno cognomento Gillas, impetrata dicendi venia, ita coepit: *Siquidem iisdem de rebus iterare sermonem fas est, non ego de jure vobiscum contendam, Romani; nam id quidem intempestivum est miseris: sed tantum ostendam, si misericordia velitis uti, nihil præter rationem atque decorum facturos esse. Nos enim*

§ XVI. Liv. Epit. Zonar. Appian. Diodor. § XVII. Diodor. Appian.

Africa quondam marisque domini, cum vobiscum de imperio diu certassemus, a Scipione victi, classē, elephantos, tributa dedimus. per Deos igitur, qui tum jurati sunt, parcite nobis, parcite famæ Scipionis, ne, socios & amicos Romanis Carthaginienses fore, falso juraverit. Neque enim est, quod contra fœdus istud peccaverimus. tulimus, dedimus, fecimus, omisimus, quidquid illo comprehensum fuit. præterea adversus tres reges, duos Macedonia, unum Syria, vobis auxilia misimus. neque reprehendatis, si repete, quæ nuper etiam dicta sunt, cum a nobis arma postularentur.

XIX. Loquaces miseriæ faciunt: & in ore supplicum quid validius esse commemoratione fœderum potest? aut ad quæ potius argumenta confugere nos æquum est, qui horum intuitu vobis potentiæ nostræ viriumque instrumenta tradidimus? Et sic quidem vetera habent, quorum nobis sponsor Scipio fuit: horum vero recentium paëtorum auctores iidemque testes ipsi estis, consules. Petiistis obsides; tradidimus lectissimos: petiistis arma; tradidimus omnia: quod ne in captis quidem urbibus, nisi ultima necessitate metuque, obtinetur. Moribus porro consuetudinique Romanæ credidimus. nam & senatus literis, & vos sermone confirmabatis, suis legibus usuram Carthaginem, si obsides traderentur.

XX. Dicetis, adjectum fuisse, ut, obsidibus traditis, & alia, quæ imperaturi essetis, præstarentur. certe. sed unde rem tam incredibilem conjiceremus, ut, quam Carthaginem in petendis obsidibus liberam fore dixissetis, ejus excidium accessionem acceptorum obsidum velletis facere? præsertim cum ex eo tempore tot alia, frumentum, naves, arma accepissetis. quibus omnibus promte exhibitis, cum jam sive delicto nostro, sive infortunio, satisfactum esse putaremus, hoc adeo acerbum & triste imperium additis, ut Carthago diruatur. Quam profecto si vobis evertere fas est, qui poteritis libertati legibusque suis relinquere, quemadmodum facturos affirmatis? Et hæc quidem erant, quæ tum de priori fœdere, tum de præsentī, diceremus. quod si vero ne hæc quidem audire sustinetis, omittimus, omittimus omnia; quodque unum re-

lictum est infelicibus, lamentis, precibusque rem gerimus. Et horum quidem amplissimam materiem tanta nobis malorum vis supeditat. Sunt enim eæ res in periculo, quarum nuda enumeratio humanum pectus possit ad misericordiam flectere: urbs pervetusta, Deorum imperio condita, potens, nobilissima: templa, quotquot in ea sunt, (sunt autem permulta & ornatissima) dicata numinibus, quæ nihil utique adversum vos deliquerunt; quibusque ideo solemnia sua religionesque non voletis adimere: quemadmodum nec sepulcra parentationesque mortuis invidēbitis, quando neque ad hos odia vestra, aut supplicia, cupietis extendere.

XXI. Quod si nostri quoque vos miseret (qui enim alibi quietam liberamque sedem conceditis, videmini misereri) parcite, quæsumus, iis, sine quibus vivere non possumus. nec enim aris focusque nostris, & foro, & Deæ, quæ curiæ præsidet, denique omnibus, quæ homini grata & veneranda habentur, superfluit esse sustinebimus. Adde, quod nullus jam vobis a Carthagine metus superesse potest, ademptis navibus, elephantis, armis. Si quis autem est, qui abunde tributum misericordiæ putet, quod alio loco, sed a mari remotius, exstruere urbem sinimur, is non satis æstimat, quam exiguum hoc esse possit solatium populo nautico, maximam partem constanti ex infinito mortalium numero, non aliunde, quam ex re maritima, viventium. Quapropter aliam vobis conditionem referimus, optabiliorem nobis, & vestro imperio minus invidiosam: ut hanc quidem urbem, nullius ream maleficii, sinatis intactam; nos vero, quibus alias conceditis sedes, jubeatis interfici. sic enim fiet, ut hominibus succensuisse videamini; non autem in fana, & Deos, & sepulcra, & innocentis urbis ædificia, improbabilem iram effudisse.

XXII. Quam equidem sævitiam ultro deprecatur fama pietatis & virtutis, quam omnibus in operibus vestris quæritis, Romani: eoque semper, ut quosque populos armis superastis, (superastis autem quam plurimos) studium vobis fuit, ut mansuetudinem vestram moderationemque orbi terrarum approbaretis. Ne igitur, per Jovem ceterosque Deorum, cum alios, tum qui Carthaginem adhuc habitant, ne, inquam, odiorum erga nos liberosve nostros memineritis: neve vestram ipsi gloriam in nobis primum

finatis interciderere, si partem tot monumentis clementiæ existimationem tali facinore polluat, quod & factu fuerit scævum, & auditu horrendum, cujusque ne quidem exemplum hætenus ullum humana vita iulerit. Cum enim & Græci & barbari bella multa gesserint, multa vero & vos, Romani; nemo tamen unquam urbem excidisse memoratur, quæ & ante pugnam submiserit manus, & arma, obsidesque principum liberos tradiderit, & quamcunque multam aliam mortalitas invenire aut pati potest, subire parata fuerit.

XXIII. *Per igitur vos jurata fœderibus numina, per conditionem humanitatis, & formidandam felicibus Nemese obtestamur, ut & vestram fortunam habeatis reverenter, & nostram supra modum ne oneratis. Quod si vobis certum est lacrimis pro urbe deprecantium non moveri, at, ut Romam legatos mittamus, concedite. nihil hic puto petitur, quod ullo pacto vobis molestum esse queat. quidquid in eo negotio grave incommodumque erit, id totum nostrum erit. temporis haud magna mora postulatur: intra quod nostros quidem animos incerti eventus torquebit acris expectatio; vobis autem patrandi, quæ voletis, tum quoque manebit eadem facilitas, sed accrescet interim pietatis & clementiæ fama.*

XXIV. *Hæc prolocutus Hanno finem dicendi fecit. Consoles totum hominis sermonem immoto vultu exceperant, ut appareret, nihil eorum, quæ peterentur, concessuros. Tum L. Marcius, de senatus quidem voluntate, inquit, quid opus est sæpius loqui? illius arbitrium fuit, nostrum obsequium est. neque differre ulterius possumus, quod jam factum oportuit. Et quidem si hæc tanquam hostibus imperarentur, nihil, nisi jussæ & parendi necessitatem, adhiberi decuit. nunc, quia communis utilitatis habita est ratio, & magis etiam vestra, non me pigebit rationes adducere, ut persuasi potius eadem, quam coacti, malitis. Istud mare conspectu suo pristinae potentiæ admonens, ad delinquendum, & ex hoc ad pœnam delictorum, vos præcipitat. Per hoc & invasisis Siciliam, & perdidistis: navigastis in Hispaniam, & eandem amisistis: inter fœdera negotiatoribus insidiati estis, civibus Romanis maxime, quos etiam, ne deprehenderemini, demersistis; donec, patefacto scelere, multati a nobis Sardinia possessione estis. ita per hoc idem mare & Sardinia vobis periit. Ejus enim hæc na-*

tura est, ut, quoniam ad opes celeriter adaugendas nihil est quæstuosius, quibus plurimum lucri contulit, plus semper desiderare cogat.

XXV. Atque hoc & Atheniensibus accidit, donec classibus studuerunt, ut parvo temporis spatio tollerentur, caderentque. Similes sunt enim mercatoriis maritimi quæstus, in quibus neque lucro ferme, neque detrimento, mediocri locus est. Illos equidem, ut scitis, imperio adblandiente, in Siciliam usque pertraxit cupiditas; neque prius missos fecit, quam omni potentia exuti, navæque & portus victoribus tradere, præsidium in urbem accipere, muros longos suis manibus diruere coacti, quasi mediterranei victu moribusque esse cœperunt. per quam deinde mutati status tranquillitatem diutissime servata est civitas. Constantior enim, Carthaginienses, in continenti hominibus vita est, quæ, per agriculturæ labores silentio traducta, minorem forte quæstum, sed certiorum atque securiorem, exhibet. Mihi quidem civitas maritima similis omnino navigio videtur, quod non minus exposita periculis & mutationibus, quam istud ventis fluctibusque, sit: urbes autem mediterraneæ, quemadmodum ipsa terra, rariore motu & clementiore conquassantur. Hanc ob causam veteres quoque regię omnes mediterraneæ erant: & ob hanc maxime creverunt opibus, ut Medorum¹, Assyriorumque & Persarum, aliarumque gentium historiæ testantur.

XXVI. Sed regia quidem exempla, quæ parum ad vos hoc tempore attinent, præmitto: vos autem Africam vestram intuemini, ubi vobis licebit deligere vicinos, quos optaveritis; simul aberitis a conspectu eorum, quæ animos vestros recordatione prætorum excruciant. nunc enim, quoties vacuum navibus mare aspicitis, navalium, quas habuistis, copiarum magnitudinem cogitatis, & reportatas ex longinquis regionibus manubias, & portuum, navalium, armamentariorum magnificentiam: jam vero, quæ sunt in manibus vestris, receptacula exercituum, equorumque & elephantorum stabula, quæque juxta exædificata sunt horrea, quarum vobis rerum monumenta sunt, quidve aliud possunt, quam ut dolorem in mentibus vestris excitent, desideriumque, si qua pos-

fuit, eandem potentiam gloriamque recuperandi? Remedium vero amissorum nullum est oblivione certius. at hæc contingere vobis nequit, nisi oculos ab eorum conspectu abstraxeritis. Hoc autem a me verissime dici, argumento est ipsa experientia. nam sapius veniæ pacisque facti compotes, his neglectis, priorem fortunam repetivistis. Quo animo si adhuc estis, imperiumque affectare pergitis, temporibus insidiantes; certum est, indigere vos hujusmodi urbe, tutuque portibus, & navalibus, & mœnibus castrorum in formam dispositis: sed haud minus certum est, nos hominibus hoc modo affectis parcere non debere. Sin vero cupiditatem imperii bona fide ponitis, & retenta, quæ vestri juris est, Africa, cetera populo Romano vere permittitis; agite, omisso, quod alienæ jam ditionis est, mari, vestra in terra statuite urbem, ut, quam verbis præferitis, obedientiam ipso etiam opere factoque demonstratis.

XXVII. *Neque enim est, ut sacrorum, & penatium, & fori, & sepulcrorum vicem deslere fingatis: nam delubra quidem & sepulcra non movemus; licebitque sacrorum & parentandi causa co accedere; cetera vero diruamus. neque enim navalibus immolatis, neque parentatis mœnibus. domos autem & alia sacra, promptum erit vobis, ubicunque eritis, condere. quod ubi factum fuerit, parvo post tempore & hæc vobis erunt patria: plane ut olim iis, quæ Tyri erant, relictis, hic in Africa alia insitivistis, eademque nunc patria vocatis, quæ tum recens comparata fuerunt. Sed, ut compendio dicam, vel hinc cognoscetis, nullo nos odio, sed quia concordie securitatisque communi consultum cupimus, hæc præcipere: quod Albam quoque, minime hostilem urbem, immo antiquam patriam, communis utilitatis gratia diruimus, civesque Romam transtulimus. cujus rei neutrum populum pœnituit.*

XXVIII. *Id quoque vanum fuit, quod turbam hominum victum ex mari quærentium allegastis: nam & his prospectum satis est, poteruntque facili negotio ad exportandos importandosque fructus opportunitate maris uti, non ultra ab eo, quam ad decimum lapidem, remoti; cum nos ipsi, qui hæc præcipimus, passuum duodecim millibus quingentis absimus. Locum autem vobis indulge-*

mus, quem legeritis, ubi libertate legibusque salvis habitetis. Hoc enim est, quod ante quoque diximus, civitatem vobis liberam mansuram, si imperata fecissetis. Vos enim, non solum atque ædificia, Carthaginem esse arbitramur. Cum, verbis hæcenus factis, consul obticuiisset, videretque sibi nihil a Pœnis metu exsternatis responderi, adjecit, quæ ad persuadendum consolandumque facerent a se dicta esse: ceterum senatus imperio, & quidem sine mora, parendum. abirent igitur, & hæc renuntiarent suis civibus: adhuc enim legatos videri.

XXIX. His dictis, cum a lictoribus submoverentur, prospicerentque animis tumultum, qui renuntiata hac legatione Carthagini esset futurus, rursus dicendi veniam petiverunt; introductique dixerunt, *videre se mentem consulum inexorabilem, neque potestatem sibi concedi Romam mittendi oratores: ne ad vos quidem, inquebant, licebit per nostrum populum reverti, qui tristissimæ rei nuntios, priusquam sermonem absolverimus, discerpit. Rogamus autem, non nostram vicem solliciti, quos paratos ad perferenda omnia videtis, sed ipsius patriæ cura, si forte cominus admoto armorum terrore cogi ad obsequium possit: ut interea, dum proficiscimur domum, classem in conspectum urbis adducatis; ut simul a nobis audiens imperia vestra, simul vos ad exsequendum instructos conspiciens civitas, ad subeundam hanc necessitatem animum, si potest, inducat. Huc enim calamitates nostræ nos propulerunt, ut ipsi adversus patriam classes vestras advocemus. Id quoque gratificati sunt consules, & L. Marcius quinquereimis viginti adnavigans, haud procul urbe oberrabat. Legatorum autem pars, quo cuique melius visum, desperatis patriæ rebus, diffugerunt: alii manserunt in Romanis castris: plures domum silentio regrediebantur.*

XXX. At in urbe magna hominum multitudo muros compleverat, cunctationem eorum increpantium, comasque præ dolore vellentium: alia manus impatiens moræ extra urbem procurrerat; quæ ubi in legatos incidit, avida no-

scendi quæ afferrentur, postquam mœsto vultu incedentes vidit, frontem manibus pulsans, modo ab universis, modo a singulis, ut quibusque familiaritas, aut notitia erat, quod actum esset, requirebant. Ut vero respondit nemo, ipsum hoc silentium pro dirissimo nuntio accipientes, ut certo in exitio complorabant: quorum audito genitu, qui in mœnibus constiterant, quidquid afferretur, acerbum esse interpretati, pari & ipsi luctu insonuerunt. Jam vero postquam ad portam ventum, adeo densa incubuit turba, ut pæne conculcati lacera-
tisque inter diripientium percontantiumque manus legati fuerint: donec, *senatui prius indicanda, quæ ferrent*, exclamarunt. Statim discedere via plerique: pars ultro submovere resistentes, ut eo celerius desiderio suo satisfaceret. Ibant legati modo capita ferientes, modo sublati in cœlum manibus invocantes quidquid Deorum in mentem venerat: donec in senatum introgressis, illoque confidente, submota turba curiam circumstetit.

XXXI. Tum, legati ut primum exposuerunt consulum iussa, clamor ortus est in curia, qui statim foris a populo exceptus auctusque. illis deinde narrare pergentibus, quid ipsi pro jure Carthaginis, aut misericordiæ movendæ respondissent, quibusque verbis veniam mittendæ Romam legationis orassent; iterum altum in curia silentium erat, universis exitum rei anxia quiete opperientibus. ad hoc exemplum & consistens in foro plebs tacebat. Ut vero cognitum est, ne legationis quidem impetratam potestatem esse, denovo ingenti ejulatu curia personuit; quo excitata plebs, non ultra dilationem ferens, irrupit & ipsa, impetuque & furorẽ, qualis bacchantium mulierum esse solet, cuncta permiscuit.

XXXII. Non enim jam ullo dignitatis aut meritorum respectu reliquo, quidam invadebant auctores sententiæ, qua obsides erant dati: *primosque hostilis doli architectos* increpantes excruciabant, lacerabantque. alii pari crudelitate vexabant eos, qui arma tradenda censuerant. nec deerant,

qui legatos lapidarent, ut ferales nuntios, raptarentque per urbem corpora. statimque furentis vulgi impetus in Italici generis homines incubuit: (erant autem adhuc ibi, ut in subito improvifoque malo, plures:) in quos varia immunitate favientes, *pœnam se ab his obsidum, & armorum, & totius Romanæ fraudis repetere*, dictitabant.

XXXIII. Ita commota urbe, plena omnia luctus simul, & iræ, & timoris, & minarum erant: strepebant viæ clamoribus carissima quæque nominibus cientium: in templa, tanquam aſyla, confugiebatur: ibidem convicia ingerebantur numinibus, *quibus ne ad ſui quidem deſenſionem ullæ vires eſſent*: multi, cum in armamentaria ſe intuliſſent, vacua viſdentes, ploratum edebant. alii, ad navalia decurrentes, abſentiam navium querebantur, quas hominibus perfidis tradidiſſent. erant, qui nomina elephantorum, tanquam adhuc præſentium, inclamarent. inter hæc majores ſuos ſequē ipſos exſecrabantur, *quod elephantos, naves, tributa, arma dediſſent, quos una cum patria armata potius extrema quæque pati decuiſſet*. Inflammabant amentium iras matronæ, quarum liberi traditi Romanis obſides fuerant, tragicarum Erinnyum inſtar crinibus paſſis urbem cum ululatu pervagantes, ut in quemque incurrerant, *liberos ab amplexu matrum raptos, ſpretaſque miſerarum preces*, exprobrabant. tum inſanos in cachinnos effuſæ, ita meritis vindictam hanc Deorum gratulabantur.

XXXIV. Non multos, ut ex tanto numero, vidiffes, qui mentis adhuc compotes crederentur: iis tamen claudere portas urbis curæ fuit, &, quia catapultæ deerant, ad ar-cendos aggreſſores vim lapidum in mœnia comportare. Eodem die, ut primum aliqua ſenatus eſſe forma potuit, decretum de gerendo bello factum eſt. ad quod quia præſidia omnia deerant, uno præconio ſervos omnes ad libertatem & militiam vocari placuit. proxima de exſulibus cura fuit. quorum dux Haſdrubal, exercitu viginti millium ſtipatus, haud procul urbe confederat. ad hunc miſſus eſt, qui ro-

garet, ut injuriarum, quas necessitate coacta patria intulisset; oblitus, Carthaginiensium imperator rebus foris gerendis esse vellet. In urbe cum imperio esse iussus alius Hasdrubal, Masinissæ filia genitus.

XXXV. His ita constitutis, iterum legarunt ad consules, petitem, ut induciæ triginta dierum mittendis Romam oratoribus concederentur. Qua re tum quoque denegata, prorsus inaudita audacia infremuit civitas; adeoque sunt accensi omnium animi, ut vel in defensa patria victuros sese dicerent, vel in defendenda morituros. Itaque statim delubris omnibus aliisque amplioribus ædificiis in officinas publicas versis, viri, feminae, pueri, senes, non die, non noctu intermisso labore, armis fabricandis insudabant. & ne quod tempus ab opere vacaret, dimensum non simul, sed per partes, suo quisque tempore accipiebat. Hoc studio quotidie scuta efficiebantur centena quadragera, gladii treceni: tela, quæ machinis mittuntur, millena: tragulae & lanceae quingenae, tum catapultarum quantum poterat. ad quas tendendas quia funicularum erat inopia, primum ancillas raserunt, ut ex earum capillis torquerentur; mox etiam matronae crines suos hunc ad usum contulere. ferro deinde & ære, cujus antiquitus vis magna in thesauris publicis superfuera, deficiente, statuas conflatas, & pro viliori metallo aurum & argentum adhibitum, reperio.

XXXVI. At ex diversa parte consules, sive ut poenitentiae spatium furentibus darent, sive urbem inermem, quancumque libuisset, capi posse existimantes, adhuc cunctabantur. quod enim notae erant necessitates Carthaginiensium, eventurum credebant, quod solet, ut qui pro atrocitate rei plurimum indignationis statim conceperant, re diligentius expensa ad obsequium timore descenderent: praesertim cum etiam Carthagine quendam, ut de alia re dicturum, surrexisse comperissent, qui, ad praesentem civitatis fortunam ora-

§ XXXIV. Liv. Epit. Flor. 2, 15. Zonar. Appian. § XXXV. Zonar. Oros. 4, 22. Strab. l. 17. Front. Strat. 1, 8. Florus. Plut. de v. ære alieno cap. 3. Appian.

tione defleſcens, *inermi populo, quod ex malis minimum foret*, dixiſſet *eligendum*. Veruntamen ſpe ſua falſos, etiam Maſiniſſæ ſuperbia tædio & dolore affecit. Ferebat enim iniquo animo, quod, vincendæ Carthaginiſ cum ipſe cauſa fuiſſet, victæ titulum Romani occupatum ibant; ne quidem, ut antea facere conſueverant, re cum ipſo communicata. poſtremo, cum ſibi debellandum Haſdrubalem popoſciſſet, non fuerat auditus. Quapropter conſulibus ad pertentandum ejus animum auxilia poſtulantibus, *miſſurum ait, ubi vidiffet opus eſſe*. neque multo poſt miſit quæſitum, *an aliqua re indigerent*. Conſules, elato regis animo offenſi, præterea diffiſi, tanquam irato, nihil reſponderunt, niſi *petituros, cum eguiſſent*.

XXXVII. Et tamen commeatu non admodum amplo utebantur, cum tantum Adrumeto, & Lepti, & Utica ſubveheretur, duobuſque obſcuri nominis oppidis, Saxo & Acholla. nam cetera quidem Africa tota Haſdrubaliſ erat: iſque res neceſſarias inde mittebat Carthaginem. Cum hæc paucos intra dies ſic geſta fuiſſent, ambo conſules ad urbem Punicam adduxerunt copias, oppugnandique fecerunt initium. Sed antequam obſidionis ejus acta narrem, ſitum antiquæ Carthaginiſ, qualis, quo tempore oppugnabatur, fuit, partesque urbis præcipuas, operæ pretium eſt, eorum, qui hanc hiftoriam legent, oculis ſpectanda proponere.

XXXVIII. Igitur Magna Carthago ſita fuit in ſpatioſi ſinus intimo reſeſſu, in peninſulæ figuram annexa continenti. cervix, quæ inter duo maria protenditur, non ultra trium millium paſſuum latitudinem patet. ipſa peninſula quinque & quadraginta millia in circumitu habet, quod totum ſpatium muro erat permunitum. A cervice lingua paſſus circiter ſexaginta lata in longitudinem haud exiguam occaſum verſus procurrat, quæ inter mare & paludem rupibus præaltis cinctæ non niſi ſimplici lorica ad tutelam ſui egere viſa fuerat, ſed quæ meridiem terramque ſpectabat locus, ubi

§ XXXVI. Zonar. Appian. § XXXVII. Strab. l. 17. Appian. Liv. Epit.

Byrsa quoque fuit, arx Carthagini, triplex fuit murus circumdatus, in altitudinem triginta cubitorum, qua propugnacula & turres non erant additæ: his enim ad alios quoque cubitos decem crescebant mœnia: quorum turres binum maxime jugerum spatio inter se distabant, ad contignationes quatuor eductæ, pedum triginta altitudinem habentibus fundamentis.

XXXIX. Ipsa mœnia binis distincta tabulatis: interius cava recipiendis elephantis stabula erant structa, adjectis etiam horreis ad pabula ipsorum asservanda. Similiter in superiore spatio stabulare poterant equorum millia quatuor, cum suo & ipsi penu. Præterea militum ibidem erant cubilia, quæ peditum viginti millia caperent, equitum quatuor. Tantus hic apparatus solo mœnium spatio continebatur. Sic tota eorum latitudo ad duos & viginti cubitos pertinebat. In tam accurata munitione urbis unus tantum angulus, qui ex muro præter linguam, de qua dixi, ad portus deflectebat, infirmus erat, & jam inde ab initio neglectus.

XL. Portuum autem hic erat situs, ut ex altero in alterum navigari posset, & a mari venientibus aditus esset passuum septuaginta, qui catenis ferreis claudebatur. Prior horum portuum negotiatoribus patebat, multisque & variis usus tabernis erat instructus. in interiore jacebat insula rotunda, cui *Cothon* erat nomen, (quasi parvam diceres) crepidinibus magnis & ipsam & portum continentibus. in his crepidinibus loca erant manu facta recipiendis navibus, quarum ibi stare ad ducentas viginti poterant: & supra ipsa navium receptacula structæ erant cellæ, quibus armanenta & supellex nautica clauderetur. ab uniuscujusque stationis lateribus prominebant columnæ operis Jonici, speciem porticus undique reddentes visentibus. In ipsa insula tabernaculum erat præfecto classis, unde signum tuba dabatur, & præco edicebat, & præfectus ipse prospiciebat. nam in primo portus ore cum posita esset insula, sic ea præ-

§ XXXVIII. Strab. l. 17. Appian. Orof. 4, 22. Justin. 18, 7. Diod. l. 32. § XXXIX. Strab. Appian. Diodor.

tendebatur, ut in mare prospectus præfecto late pateret, & contra adnavigantibus interiora portus visu impenetrabilia essent. ne intransitibus quidem negotiatoribus statim in conspectu erant navalia: duplici enim muro cingebantur: & in urbem accedere ex suo portu mercatores per aliam viam poterant, quam quæ per navalia ducebat. Hæc antiquæ Carthaginis forma fuit: qua in urbe tum temporis hominum ad septingenta millia numerabantur: cujus adhuc imperium trecentæ per Africam urbes agnoscebant.

XL. Sed Romani consules nihil aliud, quam exarmatam esse, cogitantes, minimi laboris expugnationem eam futuram arbitrabantur. ideoque nulla de re, nisi scalis comparandis, solliciti, his effectis ad oppugnandam urbem proficiscebantur: partibusque inter se divisis, Manilio quidem a continente per cervicem fossa implenda, loricaque super fossam, & deinde murus sublimior superandus evenerat. L. Marcius ad infirmum muri angulum ex terra simul navibusque scalas admovebat. Nihil tam contra opinionem evenire cuiquam potest, quam quod eo tempore consulibus Romanis evenit, cum muro tantum & inermibus perculsisque defensoribus negotium sibi futurum ratis. ergo ubi novis armis instructa manus ubique se objecit, fortissime pro mœnibus propugnans, inopinata re perterriti retrocesserunt. renovata deinde impressione, cum nihilo magis profecissent, Carthaginienfes quidem confirmati sunt animis, consules autem metu Hasdrubalis, qui a tergo ipsorum supra paludem, haud longe a Romanis, cum exercitu confederat, bina & ipsi castra munire sunt aggressi; L. Marcio supra paludem sub mœnibus urbis, Manio in ipsa cervice ducentis ad continentem viæ, vallum jacentibus.

XLII. Per eos dies L. Marcius, machinis opus esse videns, materiæ cædendæ causa paludem trajecit. Sed immissus ab Hasdrubale præfectus equitum Himilco, cui Phameas cognomen, acer juvenis, ad quingentos eorum, qui

in opere erant, occidit, armaque multa (cujus rei penuria maxima tum laborabant Pœni) cepit. Asportata tamen materiæ vis est, quanta parandis, quæ desiderabantur, machinis sufficiebat. quibuscum iterum adorti sunt urbem ambo consules, iterumque re infecta discesserunt. quippe Manilius, qui a terra oppugnabat, cum magno labore vix loricæ oppositæ partem dejecisset, nihil ultra tentare ausus, abscessit. L. Marcius, aggerato margine paludis juxta linguam, quo plus ad machinas admovendas esset spatii, duos adhibuit vastæ molis arietes, quorum alter a sex millibus peditum impellebatur, alter a navalibus sociis: his præfecti triremium, militibus tribuni præerant. Sic inter diversa genera oppugnantium, æmulatione virtutem stimulante, pars aliqua muri cessit, ut jam interiora urbis conspicerentur. Sed plus auxilii Carthaginienfibus in animorum firmitudine, quam in mœnibus fuit.

XLIII. Repulsis ergo, qui conati fuerant irrumpere, collapsam muri partem noctu instaurare cœperunt: deinde considerato, neque noctem operi sufficere, neque recentes & udos adhuc muros Romanorum machinis resistere posse, ad has corrumpendas eruptionem per ruinas fecerunt, aliis arma, aliis nihil præter faces accensas ferentibus. & incendi quidem machinæ non potuere, accurrentibus ad arcendum hostem Romanis: inutiles tamen sunt redditæ; & militum aliquis numerus desideratus. Orta luce, Romanos impetus cepit in urbem perrumpendi, qua nondum commissâ murorum latera ostentabant iter. nam aream quandam intus videbant, in qua explicari acies posset: ibi Carthaginienfes instructi stabant, armatis in fronte, post hos inermibus collocatis, qui fustes & saxa portabant: circum ædes quoque vicinas magnum disposuerunt numerum, qui a lateribus irrumpentes inceslerent. At Romani magis etiam hoc spectaculo animabantur, pudore quoque incitante, ne ab inermibus contemni paterentur. Itaque duo tribuni militum cum

cohortibus alacriter intulerunt signa. Sed P. Scipio Æmilianus, quem in quarta legione tribunum consul Manilius adduxerat, altiore consilio rei difficultatem mensus, introire suos vetuit; & plures in partes divisos circa murum constituit: cumque pellerentur, ut præviderat, Romani, recipiebant eos, hostemque cupide incumbentem, objecta recenti armatorum manu, a persequendo deterrebat. Ista res Scipioni prima earum, quas ad Carthaginem gessit, patefecit ad gloriam iter, quod eventura certius acutiusque, quam ipse consul, providisset.

XLIV. At Romanos angebat tum irriti incepti pudor, tum alia non pauca incommoda. neque enim longius a castris ad varios usus Hasdrubalis & Phamææ metus sinebat digredi: nec auxiliis Masinissæ sublevabantur: & Marciana castra, stantibus & graveolentibus aquis imposita, morbo tentabantur: neque liberum ex mari cursum imminetia urbis mœnia permittebant. Hæc L. Marcium ex loco, quem castris ceperat, in mare transferre classem coegerunt. Carthaginienfes, observato, qui mare versus ferebat, vehementi vento, scaphas, sarmentis stuppisque repletas, sub muris, donec videri ab hostibus non poterant, rudentibus protrahabant: deinde ubi flexere sinus, & jam in conspectu Romanorum erant, sulfure ac pice perfusas, igne injecto ventis permiserunt. Atque illæ velorum & flammæ impetu in classem Romanam momento delatæ, non ita multis effugientibus navibus, ceteras exusserunt. Jamque comitorum tempus instabat: quorum causa profecturus domum consul Marcius, cum obiter maritima loca vastare vellet, nullum memoria dignum eventum habuit; nisi quod Æmigurum (inter Siciliam & Africam insula est) prætervectus, deinde subito reversus, in potestatem redegit.

XLV. Sed Carthaginienfes, discessu alterius consulis dimidiato timore, Manilium acrius audaciusque infestabant.

§ XLIII. Appian. Zonar. c. 47. Liv. Epit. Oros. 4, 22. § XLIV. Appian. Liv. Epit. Zonar. Strab. l. 17.

Semel noctu facta eruptione, fossam adversus se ductam, per tabulas, quas eum ad usum portaverant, superarunt; vallumque aggressi sunt convellere. Jamque in magna consternatione res exercitus erant, nocte tumultum augente, & morante consilia ac imperia; cum P. Scipio cum equitibus per averfam ab hoste portam egressus, terrorem iniecit Pœnis: quorum cum hæud pauci, maxime ex inermibus, cecidissent, reliqui recessissent intra muros, P. Scipio fervatorum eo tempore castrorum præcipuam gloriam tulit. Ab hoc prælio timidior factus consul, majori diligentia castra communiit, loco valli muro circumducto, & ad mare castello excitato, quod appellantibus cum annona onerariis præsidium esset.

XLVI. Inde in mediterranea loca suscepit expeditionem, lectis ad hoc decem peditum, duobus equitum millibus, ibatque per agros hostium populabundus: hoc instituto, ut quoties lignatum, aut pabulatum, frumentatumve pars copiarum emitteretur, tribuni militum, sua quisque vice præessent. Id quoque Scipionis famam comparatione ceterorum illustravit. Cum Phamæa negotium erat, viro perstrenuo, qui ætate & audacia promptus, cum equis parvis & celeribus, ad famem sitimque ferendam assuefactis, si modico interim gramine reficerentur, omnia quotidie intuta infestaque Romanis efficiebat. Sæpe longissime abesse creditus, in propinquis arbuftis, valliumve contractibus latitabat: unde simul alicubi remissum aliquid neglectumve senserat, in morem aquilæ provolabat; damnoque, quanto poterat, dato, priusquam circumveniri posset, iterum dilabebatur. Sed idem, quoties Scipionis esse vices senserat, nusquam comparebat. Is enim nunquam aliter, nisi instructa velut ad prælium acie, iter faciebat: deinde cum ad campum, quem demessurus venerat, accessisset, ante omnia equitum & gravis armaturæ firmis stationibus cingebat locum: cum reliquo equitatu ipse continuo obibat messores, & si quis se-

cretus ab aliis, aut extra præsidia vagatus deprehenderetur, eum severe castigabat.

XLVII. Horum cum Phamæas nesciret nihil, hunc solum ex omnibus timebat aggredi. quod ubi in morem, & ex more in famam vertit, invidia correpti ceteri tribunorum, *Phamæam, ob avitum hospitium, quod ei cum Scipionibus esset, a laceffendo Æmiliano abstinere*, comminifcebantur. Sed nimirum frustra premit virtutem invidia; quod illa semper sui similis, & in quasvis occasiones prompta, sæpe invenit gloriæ locum, ubi hæc nullum invenit calumniæ. Igitur nequidquam oppugnata Scipionis fama apud militem, apud hostem quotidie fiebat clarior, cum non modo suis laudibus, sed etiam vitiis inimicorum, commendaretur. Afris enim in castella turrefque, quarum ea in regione magnus erat numerus, confugientibus, reliqui tribuni fidem dabant se deditibus, fallebantque. at Scipio magna salutis eorum cura domum illæfos deducebat; unde postea nemo se Romano cuiquam, nisi præsentem Scipione, dedere voluit. tantum brevi tempore tam apud cives, quam apud hostes, virtus ejus fidesque incrementum gloriæ habuit.

XLVIII. Post hanc expeditionem cum Carthaginem ad castra revertisset consul, castellum Romanorum, quod ad tutelam navium exædificatum erat, noctu a Pœnis oppugnatum est cum maximo clamore, quem non pugnantem modo, sed etiam qui relictus in urbe fuerant, ad distrahendum hostem tollebant. processeratque ipsis inventum suum, ni Scipio in exercitu fuisset. Quippe consul ancipiti tumultu, quod periculum & ubi esset dubitans, ne hostilibus insidiis daret locum, suos in castris continebat. Scipio autem, assumtis equitum haud amplius duabus alis, cum accensis facibus accurrit, edicto suis, ne quis per tenebras cum hoste concurreret, sed tantummodo cum facibus obe-

§ XLVI. Zonar. Appian. § XLVII. Suidas in *διαζηλετυπούμενοι*. Appian. Diodor. apud Valesium c. 48. Zonar. Liv. Epit.

quantantes, multitudinis speciem Pœnis, & tanquam aggressuri metum facerent. hoc commento perturbatis hostibus, & in oppidum refugientibus, castellum periculo liberatum est.

XLIX. Consul, cum hinc frequentibus Pœnorum eruptionibus, inde incurfu Hasdrubalis nocte dieque fatigaretur, in hunc convertere impetum statuit; eo devicto, cetera sibi ad victoriam proclivia fore arbitratus. Nepheris erat castellum, situ & opere permunitum, ad quod castra habebat Hasdrubal. dissuadebat expeditionem Scipio, quod per iniquum saltum, superioribus ab hoste locis occupatis, eundum esset. verum victus diversa per invidiam suadentium consiliis, ipse quoque iter est ingressus. minus jam passibus quadringentis ab hoste aberant, cum amnis se objecit, qui castra Hasdrubalis petentibus transeundus erat.

L. Ibi cum agmen necessario constitisset, iterum institit Scipio, ut reverterentur, *alia occasione aliisque artibus adversus Hasdrubalem opus esse*, dictitans. reliquis autem tribunis magno studio repugnantibus, *timiditatique rem similiorē, quam consilio, futuram* dicentibus, *si conspecto hoste retrocederent, idque nec impune facturos, illo terga tanquam fugientium contemptim invasuro*: iterum petiit, ut *saltem castra citra amnem ponerent, quo si pellerentur, quod omnino futurum affirmabat, receptus tamen esset, sic quidem nec fugæ locum habituris*. At illi hanc quoque sententiam irridebant. fuitque, qui minaretur, *abjecturum se gladium, si quidem non consuli Manilio, sed tribuno Scipioni, parendum esset*. Manilius igitur, vir nec alias multæ in bello experientiæ, confirmatus plurium sententiis, transcendit flumen. Cui cum occurrisset Hasdrubal, magna utrinque cædes facta est, donec Hasdrubal omissa pugna in castellum se recepit, ubi ex tuto tempus observabat turbandi regredientes.

LI. Romani, quos jam consilii sui pigebat, donec impedimentum itineri nullum occurrit, servatis ordinibus dis-

§ XLVIII. Liv. Epit. Appian. Zonar. c. 49. § XLIX. Liv. Epit. Appian. § L. Liv. Epit. Zonar. Appian. c. 41.

cessere. ubi ad annum ventum, isque paucis locis vadari & difficulter poterat, necessario distractum turbatumque agmen est. quod simul intentus hostis vidit, tum primum totis viribus incubuit, paucosque pugnantes, plures fuga palatos interfecit. sed & tribuni tres cecidere, ii ipsi, qui malæ pugnae præcipui auctores fuerant. At Scipio cum trecentis, quos secum habebat, equitibus, aliisque, quotquot colligi celeriter potuerant, cursu duxit in hostem, duas in turmas divisos, præmonitosque, *ut alternatim capefferent pugnam, emissisque jaculis se reciperent*: sic enim fiebat, ut, uno recedente globo, alter extemplo succederet; neque hosti quies ulla daretur; multique Afrorum continuo telorum jactu convulnerarentur. Ita, dum in se plurimos hostium abstrahunt Scipionis equites, exercitus minore cum impedimento cis fluvium se recepit: tum demum concitatis equis vadum petiit Scipio, & quanquam densus in eum telorum imber mitteretur, incolumis in citeriorem ripam penetravit.

LII. Acciderat autem, ut in primo ingruentium hostium tumultu, cohortes quatuor, a ceteris divulsæ, in quendam tumulum confugerent: hæ ab Hasdrubale circumsidebantur, ignaris adhuc Romanis, donec in stativa perventum est. Tum, consilio advocato, plerisque rectius visum, *urgeri captum iter, neque causa paucorum cunctos in perniciem conjici*. donec Scipio dixit, *hunc sibi semper animum fuisse, ut, antequam discrimen subiretur, etiam atque etiam cogitandum existimaret, non magis quemadmodum lædi hostis posset, quam sui quomodo minimum ab hoste læderentur. Sed rebus eo deductis, ut tot cohortes signaque periclitentur, optimum consilium putare, non consulere, sed, quæ res atque tempus postulet, celeriter ac strenue peragere. Ergo, si me paucas equitum alas legere sinitis, aut hos, inquit, mecum incolumes adducam, aut ego cum illis lætus lubensque mortem oppetam*. Accepto deinde bidui com-meatu, statim se commisit itineri, maximo cum metu universi exercitus, ne & ipse amitteretur.

§ LI. Zonar. Appian. § LII. Liv. Epit. Appian. Diodor. apud Valesium.

LIII. Ut vero ad obsessum ab hoste collem ventum est, oppositum illi tumulum cursu cepit, ut inter utrosque tantum vallis interesset. Tum vero Afri omni conatu expugnare collem sunt aggressi, priusquam, resumptis ex itinere viribus, succurrere Scipionis equites possent. At ille, qui per radices tumulorum circumiri posse vallem interjectam animadvertenterat, nihil cunctatus, qua patere viam videbat, strenue in hostes incurrit. illi, ne inter duo Romana agmina medii clauderentur, veriti, non solum cessere loco, sed effusa fuga dilapsi sunt. Scipio, servasse suos contentus, neque Afros, numero longe superiores, persequi curæ habuit, & cum liberatis obsidione cohortibus ad exercitum reversus est. ubi cum præter spem omnium non modo salvus ipse, verum etiam servator aliorum conspiceretur, maximus præ gaudio sublatus est clamor, virtutem ejus fortunamque cunctis admirantibus, tanquam exemplo superioris Africani (de quo creditum idem fuerat) divino quodam instinctu futura præsentificeret, omnibusque in conatibus suis præsentem numinis favorem experiretur. obsidionali corona donatum observatas cohortes Scipionem, Varro tradidit: statuæque Scipionis in foro suo postea adscripsit Augustus.

LIV. Uni inter hæc tam læta querelæ causam præbebant insepulta militum interfectorum corpora, præsertim tribunorum, qui occubuerant, vicem miserrantibus. & hinc quoque Scipioni laudis materies fuit: qui permissu consulis per captivum vinculis solutum Hasdrubali scripsit, ut tribunos sepeliret. Atque ille requisitos inter cadavera, & agnitos ex annulis aureis (nam vulgus militum ferreos gestabat) tumuli honore affecit, lectaque eorum ossa reniisit ad consulem; sive humanitate quadam, sive, quod moribus hominis proximius est, surgentem Scipionis magnitudinem jam tum incipiens adulari. Magnam haud dubie res hæc estimationem Scipioni circumdedit, quem unum præ omnibus Romanis etiam apud hostes in honore esse videbant.

§ LIV. Plin. 22, 6. Auctor de Vir. ill. Diodor. ap. Vales. Ap-
pian. Diodor.

LV. Consul ad castra, quæ sub Carthagine habebat, re-duxit exercitum, multa passus ob errorem, quo consilia Scipionis neglexerat. nam, super priora incommoda, recedentibus ab Hasdrubale Phamæas molestus fuit: & Carthaginienſes in postremum castra intrantium agmen eruperunt, impedimentorumque pars ante ipsa munimenta amissa est. Dum ista maxime aguntur, ab senatu legati ad inspiciendas res Africæ venerunt: citoque cognitis omnibus, in urbem reverterunt laudibus Scipionis onusti. Nam & consul, & consilium, & tribunorum superstites, cedente jam meritæ felicitati invidia, & universus denique exercitus testimonium ei verum præclarumque dabant, & rerum ipsarum præsens fides id honoris dignissimo haberi ostendebat. Lætus favensque accepit ista senatus, & ipse Cato, vir promptioris ad vituperandum linguæ, Græci poetæ verbis, *reliquos velut umbras oberrare*, dixit; *Scipionem solum sapere, ac vigere*. unde tantum ei nomen tantusque favor apud populum Romanum esse cœpit, ut comitiis multæ tribus consulem eum facerent, cum ab ætate consulari, quam leges postulabant, plurimum abesset.

LVI. Ne legum quidem auctoritas plus, quam in unius anni moram, valuit: in quem Sp. Postumius Albinus Magnus, L. Calpurnius C. F. C. N. Piso Cæsonius, sunt designati. Clarum hoc tempore iudicium in urbe Ser. Sulpicii Galbæ fuit, qui nuper in Hispania pro prætore Lusitanos diripuerat. ei L. Scribonius Libo tribunus plebis diem dixit: idemque rogationem privilegio similem promulgavit, *ut Lusitani, qui in fidem populi Romani dediti, a Ser. Galba in Gallia venissent, in libertatem restituerentur*. Eam M. Cato, qui a tempore consulatus, in Hispania exacti, patrociniū ejus provinciæ susceperat, acerrime suavit, nonaginta circiter annos natus, sed corpore adhuc sufficiens, animo accensus, *quod tantam rem publicam ager arbitretur*. Hæc enim verba sunt orationis, quam paucis ante mor-

§ LV. Liv. Epir. Plut. in Caton. c. 52. & Apophtheg. Hom. c. 20. Polyb. ap. Suidam.

tem diebus an mensibus habitam, septimo Originum suarum libro inclusit. Reum defendebat Q. Fulvius Nobilior, qui & ipse ob res, in eadem provincia perperam administratas, sæpe laceratus in senatu a Catone fuerat.

LVII. Sed ipse maxime Galba, cum se damnari videret, flexit populum & facundia, qua ut inter illius ætatis oratores excelluit; & magis artificio concitandæ misericordiæ, cum duos filios prætextatos, & filium C. Sulpicii Galli, cujus tutor erat, complexus, *nihil pro se recusare diceret, sed suos liberos, sed propinquum suum, memoria clarissimi patris favorabilem, populo Romano commendare, ac, tanquam in procinctu testamentum faceret, sine libra atque tabulis populum Romanum tutorem instituere eorum orbitati*. Sic mitigata concione, petentibus inimicis, & incumbenti ad perniciem ejus Catoni a populo ereptus est, cum pæne nullum triste suffragium habuisset, qui paulo ante consensu omnium periturus videbatur. Ferunt, divitias ei auxilio fuisse, ne damnaretur: sed ipse Cato scribit, *nisi pueris & lacrimis usus esset, pœnas ei daturum fuisse*.

LVIII. Galbæ de hac causâ orationes tres sunt editæ: duæ adversus Libonem, tribunum plebis, rogationemque ejus: una contra L. Cornelium Cethegum (qui & ipse in Galbam subscripserat) in qua *Lusitanos, prope sese castra habentes, cæsos fatetur; quod compertum habuerit, equo atque homine suo ritu immolatis, per speciem pacis adoriri exercitum suum in animo habuisse*. Infamia magistratuum, nam ab aliquot annis multi, ob provincias avare administratas, accusati fuerant, cum optimi cujusque sermonibus traduceretur, occasionem legi dedit, per quam fociis ereptas sibi pecunias recuperare liceret. Tulit L. Calpurnius Piso tribunus plebis, qui, nescio an ob hoc factum, primus Frugi cognominatus est. Hæc rogatio diutissime servata est ob sum-

§ LVI. Appian. Hispan. Corn. Nepos in Caton. Val. Max. 8, 1. Cic. de Divin. c. 20. Idem in Brut. c. 23. Tac. 3, 66. Agellius 13, 23. Liv. Epit. § LVII. Quintil. de corrupt. eloquent. c. 25. Liv. Epit. Cic. Brut. c. 23. Idem de Orat. 1, 53. Val. Max. Cic. pro Murena c. 21. Appian.

niam utilitatem. fuerunt certe paucae leges æquiores, quando etiam bonae pleraque ita comparatae sunt, ut nocentes puniant, non ut laetis opitulentur.

LIX. Sub idem tempus Macedonia atque Thracia magno rerum novarum motu concussae sunt ex levibus principiis. Andriscus, qui se Philippum, Persei filium, vocabat, exinde *Pseudophilippi* nomine notior, cum in custodia Romae haberetur, clam elapsus, & in Macedoniam profugus, apud homines regio imperio afluens, & post illud eversum perpetuis seditionibus agitato, facile fidem favoremque invenit. Fabulam autem hujusmodi finxerat: *Ex pellice se & Perseo rege ortum, traditum educandum Cretensi cuidam esse, ut in belli casus, quod ille cum Romanis gereret, aliquod semen stirpis regiae exstaret. Perseo demortuo, Adramytti se educatum usque ad duodecimum annum ætatis, patrem eum esse credentem, a quo educaretur, ignarum generis fuisse sui. affecto deinde eo, cum prope ultimum finem vitæ esset, detectam sibi tandem originem suam, falsæque matri libellum datum, signo Persei regis signatum, quem sibi traderet, cum ad puberem ætatem venisset: obtestationesque ultimas adjectas, ut res in occulto ad id tempus servaretur. pubescenti libellum traditum: in quo relictæ sibi duo thesauri a patre dicerentur. tum scientem mulierem, subdititium se esse, veram stirpem ignoranti edidisse genus; atque obtestatam, ut, priusquam ad Eumenem manaret res, Perseo inimicum, excederet iis locis, ne interficeretur. eo se exterritum, simul sperantem aliquod auxilium a Demetrio, in Syriam se contulisse: atque ibi primum, quis ipse omnino esset, palam exponere ausum.*

LX. Aderat juveni forma, quæ Persei filium non dederet, si ex similitudine liberi æstimarentur. His confusus, antea quoque, sed clanculum, sollicitaverat Macedonum animos: neque motus est quisquam, sive quod fidem fabulae haberet nemo, sive Romani metuebantur. Tum autem ipso liberationis suæ miraculo, deinde opportunitate temporum,

§ LVIII. Cic. de Divinat. c. 5. Idem in Bruto c. 27. Idem pro Font. c. 13. § LIX. Porph. ap. Euseb. L. Ampelius. Liv. Epit.

quia belli Punici gravia Romanis initia fuerant, primo credulos, mox dubitantes impulit: postremo, quidquid factionibus corruptum erat, confluit ad eum, multæque jam urbes, tanquam servato divinitus regi parebant. itaque contrafacto exercitu, regium assumpsit habitum, & in arce regni paludatus jus dixit. Inde profectus in Thraciam, multos ex liberis populis, quosdam etiam regulos, imperium Romanum gravatos, in commilitium traxit; horumque ingentibus auxiliis validus totam Macedoniam, aut voluntate incolentium, aut armis, occupavit.

§ LX. Flor. 2, 14. Zonar. Vell. 1, 2. Liv. Epit.

JOANNIS FREINSHEMII
SUPPLEMENTORUM
LIVIANORUM

LIBER XV.

IN LOCUM LIB. L. LIVIANI.

E P I T O M E

LIBRI QUINQUAGESIMI.

Theſſalia, cum & illam invadere armis atque occupare Pſeudophilippus vellet, per legatos Romanorum auxiliis Achæorum deſenſa eſt. Pruſias, rex Bithyniæ, omniumque humillimorum vitiorum, a Nicomede filio, adjuvante Attalo, rege Pergami, occiſus eſt. Habebat alium filium, qui, pro ſuperiore ordine dentium, enatum habuiſſe unum os continens dicitur. Cum legatos ad pacem inter Nicomedem & Pruſiam faciendam Romani miſiſſent, & unus ex iis multis cicatricibus ſparſum caput haberet, alter pedibus æger eſſet, tertius ingenio ſocors haberetur; dixit Cato, eam legationem nec caput, nec pedes, nec cor habere. In Syria, quæ eo tempore ex ſtirpe generis Perſei, regis Macedonum, inertia ſocordiaque ſimilem Pruſiæ regem habebat, jacente eo in ganea & luſtris, Ammonius regnabat; per quem & amici omnes regis, & Laodice regina, & Antigonus, Demetrii filius, occiſi. Maſiniſſa, Numidiæ rex, major nonaginta annis deceſſit, vir inſignis. Inter cetera

opera juvenilia, quæ ad ultimum edidit, adeo, etiam versus in senectam, vixit, ut post sextum & octogesimum annum filium genuerit. Inter tres liberos ejus, maximum natu Micipsam, Gulussam, Mastanabalem, qui etiam Græcis literis eruditus erat, P. Scipio Æmilianus (cum commune eis pater regnum reliquisset, & dividere eos arbitro Scipione jussisset) partes administrandi regni divisit. Item Phamææ Himilconi, præfecto equitum Carthaginiensium, viro forti, & cujus præcipua opera Pæni utebantur, persuasit, ut ad Romanos cum equitatu suo transiret. Ex tribus legatis, qui ad Masinissam missi fuerant, Claudius Marcellus, coorta tempestate, fluctibus obrutus est. Carthaginienses Hasdrubalem, Masinissæ nepotem, quem prætorem habebant, proditoris suspectum, in curia occiderunt: quæ suspicio inde emanavit, quod propinquus esset Gulussæ, Romanorum auxilia juvantis. P. Scipio Æmilianus, cum ædilitatem peteret, consul a populo dictus, quoniam per annos consulem fieri non licebat, cum magno certamine suffragantis plebis, & repugnantibus aliquamdiu Patribus, legibus solutus, & consul creatus est. M. Manilius aliquot urbes circumpositas Carthagini expugnavit. Pseudophilippus in Macedonia, cæso cum exercitu P. Juventio prætore, a Q. Cæcilio victus captusque est, & recepta Macedonia.

I. SP. Postumio Albino, L. Calpurnio Pisone Consulibus, tantum animorum novo Macedonia regi accefferat, ut ad vicinas quoque regiones extenderet manus; magnitudinem imperii, quibus finibus nuper Philippus ante bellum Romanum tenuisset, cupiditate speque complexus. Ille modo mercenarius, incertæ libertatis, qui nihil ab infantia, nisi sordidum & humile, viderat, anguste sibi dominari videbatur, si intra Macedonia terminos potentiam coerceret. adeo nimirum amplas opes ex nullis, & ingentes ex mediocribus, non tam appetere magni animi, quam omittere moderati & sapientis est. Thessalia, proxima Macedonia, & diu ditionis ejusdem, cum ad commoditatem invadendi, tum

ad juris speciem, omnibus aliis Græciæ regionibus visa est opportunior. In hanc transgressus, haud exiguam ejus portionem in fidem receperat: neque dubitabatur, quin secutura cetera essent, ni legati Romanorum ruinæ in modum præcipitanti defectioni consiliis & armis occurrissent.

II. Nam Romæ, ubi certis nuntiis de progressibus Andrisci auditum, contempta eousque res, diligentiore cura tractari cœpit: placuitque senatui, *legationem mitti, quæ in nascente adhuc & nondum confirmato malo daret operam, ut motus iste lenibus remediis, docendo meliora, spemque veniæ deceptis ostendendo, consideret.* Nemo visus ad hæc P. Scipione Nasica melior, neque cui ad homines blande cogendos, plus existimationis, & facundiæ, & dexteritatis esset. Idem neque bellicæ laudis inops, si res armis eguissent, hæc quoque paraturus auctoritate, rectorus prudentia credebatur. Scipio, simulatque Græciam attigit, & quo in statu res Macedonum Thessalorumque forent, certis auctoribus cognovit, perscriptis his omnibus diligenter ad senatum, ipse sociorum adiit concilia, copias, quibus Thessaliam tutaretur, contrahens. Promptissima & maxima ab Achæis auxilia venire, qui tum adhuc plurimum inter Græcos viribus valebant.

III. Cum his ingressus Thessaliam, præsidia Andrisci passim exturbavit, & receptis, quæ tenuerat, omnibus, ad fines usque Macedoniae signa promovit. Romæ interea, perlatis lectisque Nasicæ literis, compertoque, majores opinione tumultus in Macedonia esse, P. Juventio Thalnæ prætori negotium a senatu datum est, *ut, primo quoque tempore conscripto exercitu, ad liberandam Macedoniam proficisceretur.* Moram neque ipsum hoc negotium pati videbatur, & periculum erat, ne alibi quoque turbatis sociorum regnis, rerum novarum exordia, nunquam negligenda præpotentibus, nascerentur. Apud Bithynos maxime Syrosque bellum, aut bello non melior pax erat: magis ob culpam regnantium, quam

ullas externas causas, statu regnorum vacillante. Bithyniam adhuc minime laudato regimine Prusias obtinebat. Multa eum vitia corporis morumque dehonestabant, illiberalis facies, statura enormiter brevis, membra muliebri cultu indecora. nam pudendo luxu dies noctesque continuans, animumque & corpus sic effeminaverat, ut nec ad pericula bellorum quidquam ei constantiæ, neque ad ferendos labores roboris superesset. Venationis tamen studiosus, unde & nomen Cynego fuit, sic quoque insuavis popularibus, cum voluptatem virtuti simillimam per luxuriam & sumtus ignavia sua mollitieque infamaret.

IV. Tales autem reges nulla ferme gens æquo animo patitur: Bithyni ceteris etiam minus, durum genus, & remisso imperio haudquaquam tractatu facile. Sed & in libidines præceps, omni genere foeditatis corpus commaculabat. Summa inter hæc bonarum artium imperitia, neque sapientiæ studiis ullus apud ipsum honos, neque sermonum ejusmodi patientia aut intellectus erat. Quapropter quotidie in pejus mutatus, omniumque, etiam humillimorum, vitiorum infamia obrutus, in tanto jam suorum odio & contemptu esse cœperat, ut, parva occasione oblata, non ad regnum ei modo, sed etiam ad vitam eripiendam concurreteretur. Filium habebat Nicomedem, gratum vulgo, vel ideo, quia mali regis filius: ipse nondum imperaverat. Prusiæ crudelitatem (nam & hoc inter cetera vitio laborabat) ea quoque stimulabat cura, ne Bithyni novum imperium, morefque filii nondum cognitos experiri, quam sævi luxuriosi-que senis immedicabilem pravitatem diutius tolerare, mal-
lent. Accedebat & studium consulendi alterius uxoris liberis, quorum ætati Nicomedes, firma ipse juvenia, gravis imminebat.

V. Igitur, quamquam pridem, ut ab oculis hominum amoveret juvenem, in urbem Romam eum miserat, ne sic qui-

§ III. Zonar. Appian. Syriac. Diod. ap. Vales. Polyb. ap. Valesium & Suidam. Polyb. § IV. Liv. Epit. Polyb. Appian. Zonar. Justin. 34, 4.

dem tranquillo erat animo, maxime cum ibi quoque valere eum gratia & amicitii principum intellexisset. Itaque varie versans animo, utrum ex vita filii potius, an ex morte, fructum perciperet (erat enim ad callida consilia minime hebes) Menam quendam ex amicis Romam mittit, datis ad Nicomedem mandatis, ut ipse & Menas, tanquam legati patris, adito senatu, *remitti pecuniam* postularent, *quæ ex postremæ pacis legibus Attalo debebatur*. Id si esset effectum, parci filio jubebat: sin vero nil obtinuisset, ne dubitaret eum Romæ interficere. hunc in usum, & quo minore periculo facinus perageret, circuros aliquot Menæ, militesque ad millia duo attribuit. Missus & ab Attalo est Andronicus, eoque docente, *minorem imperatam esse pecuniam Prusiæ, quam ipse ex agro Pergameno rapuisset, nihil esse remittendum* senatus censuit.

VI. Menas, cum acceptum Romanis Nicomedem de medio tollere periculosum esset, neque tutius ad regem, mandato ejus posthabito, reverti, per aliquot dies incertus consilii in urbe substitit. Subodoratus causam Nicomedes, colloquium expetivit hominis, id ipsum cupide amplexi, convenitque, *ut impiarum insidiarum fraudes in caput ejus, qui struxisset, converterentur*. Assumitur in conscientiam Andronicus, ut per eum Attalus, re cognita, juveni Bithyniæ regnum invasuro arma viresque præpararet. Priores illi discesserunt: ita composita re, ut ad Bernicen (Epiri oppidulum est) appellenti occurrerent. Ibi egredientem ex navi, cum quingentis, quos habebat, militibus, Andronicus excepit, regisque appellatum nomine, cujus & habitum assumerat, honorifico cum suis comitatu deducebat.

VII. Menas, ignorantiam anteaكتورum, & tum, ut in re subita, perturbationem simulans, accurrit ad suos, & multis quasi per indignationis æstum temere effusis, *porro quid agendum*, inquit, *milites? neque enim levis est deliberatio; sed*

ex cuius eventu salus nostra nostrorumque & fortunæ omnes pendeant. Inter duos reges iudicamus, utrius deinde iudicio vitæ necisque nostræ potestatem permissura fortuna sit. Nam in hoc uno omnis consilii nostri prudentia vertitur, ut illius in partibus inveniamur, cuius imperium approbaturi Dii sunt. Sane quis eventus negotii sit futurus, non aliunde rectius, quam ex utriusque comparatione intelligitur. In itinere nostro juvenis est; domi sedet senex: ille carus Bithynis; hic exosus: carus & externis ille, de Romanis scitis; Attali legatum Andronicum jam etiam satellitem Nicomedis videtis, non obscuro argumento, quidquid hoc est, consiliis Attali geri, gerundumque mox viribus, quas & magnas habet, late imperans; & opportunas, Bithyniæ imminens; & promptas, ex veteri contra Prusiam ob superiora bella odio.

VIII. Unde mihi, fateor enim, valde inclinatus animus, ut eum potius iudicemus, qui & propior nobis, & ætate amicitiusque firmior est: præsertim ubi Prusæ crudelitatem recogito. neque de quotidiana illa pervulgataque loquor, milites: scelus est, quod neque nunc suspicamini, neque, ubi dixissem, de alio possetis, quam de Prusia, credere. Nicomedem Romæ interfici voluit: hoc erat præcipue, cur ego mitterer. ad hoc & naves istas, & hanc militum manum accepi. Quæ & ipsa non ultima reputandi causa est, quanto cum periculo sumus ad tam inimicum dominum reversuri, & an nobis parsurus videatur, qui filio non pepercerit? Quod si quo casu patris crudelitatem effugerimus, non minus timenda erit filii severitas, ne tanquam spretus a nobis pœnas exigat. at demus, eum oblivisci injuriam, quam vindicare, malle: tamen sine notitia, sine gratia vulgus erimus. at nunc beneficio dando recipiendoque locus est: & vacuam adhuc novi principis gratiam occupamus, cuius liberalitatem præ omnibus sensuri sunt, qui ante omnes accesserunt. Velimus, nolimus, Nicomedis auso, Bithyniæ votis, Andronici consilio subscribendum erit, milites, nisi potius videtur, deterrimo regi cum certo exitio, quam innocentem cum salute & præmio accedere. Hac oratione cum permotos omnium animos sensisset, priusquam mutari pœni-

tentia possent, ad Nicomedem universos adduxit, proficiscentemque in Attali regnum comitatus est.

IX. Attalus juvenem comiter exceptum *confidere* jussit: *debitumque sibi Deum hominumque voluntate Bithynia regnum magno animo capeffere*. Nam & Sibyllæ quædam carmina ferebantur, per quæ Attalus fato destinatam Nicomedi Bithyniani interpretatus, cupiditatem hominis fiducia inflammabat. Missis deinde ad Prusiam legatis postulavit, *urbes quasdam concedi filio & agros, quorum redditibus aleretur*. ille, paulo post totum Attali regnum ei daturum, neque alia mente nuper in Asiam se irrupisse, respondit. Certos deinde homines Romanam misit, de Nicomedis pariter Attalique injuriis questum, contra quos auxilium fidemque populi Romani invocabat. Neque illi segnius in Bithyniam invasere: subinde deficientibus ad eos multis. Unde Prusias universis diffusus, & Romanorum ope insidias evasurum sperans, exercitum opponere superfedit: tantum a Diegyllide focero petitis acceptisque Thracibus quingentis, eorum præsidio, & arcis Nicææ munimentis salutem tutabatur.

X. Non fuit id consilium felix Prusiæ. nocuit præter alia prætoris urbani factum, qui per absentiam consulum de legatione Bithynica referre cum debuisset, quo gratum Attalo faceret, per quam multos dies neglexit: deinde cum fenatus decrevisset, *ut ab ipso prætore legati tres nominarentur ad res Bithyniæ componendas*, tales delegit, ut causam præberet M. Catoni dicendi, *legationem a populo Romano mitti, quæ nec caput, nec pedes, nec cor haberet*. unius enim legatorum caput cicatricibus deforme erat: alter laborabat ex pedibus: tertius ad stultitiam usque simplex habebatur. Nec meliorem igitur eventum hæc legatio, quam pro hominum opinione, habuit. Cum enim ex compacto Nicomedes Attalusque, *se in potestate senatus fore*, respondissent; Bithynorum principes prius edocti negaverunt, *se prodi discessu eorum debere, quorum fidem secuti, bellum adversus Prusiam sumsisent*.

Neque enim post professa odia, detectumque animum suum, sub ditionem crudelissimi regis redituros. Ita legati, ut qui ad Bithynorum istas querelas nullum a senatu mandatum attulerant, rebus eodem in statu, quo repererant, relictis, discesserunt.

XI. Destitutus unica spe Prusias, cujus fiducia nihil aliunde præsidii paraverat, Nicomediam perfugit, munire urbem, & si venisset hostis, ferre obsidionem paratus. Tum vero vices suas plane peregit publicum odium; apertæque ab oppidanis portæ Nicomedem cum exercitu admiserunt. Prusiæ ab omnibus, etiam servis, deserto perfugium in ædem Jovis fuit: ubi religione se tutantem, quam sæpe violaverat, immissi a filio percussores interemerunt. Ambiguæ æstimationis scelus, ut nescias, uter fuerit deterior, qui filium interficere voluit, an qui patris parricidium alio parricidio ultus est. cum enim cujuslibet hominis sanguinem haurire, nisi iustissime fiat, inhumanum sit; etiam ferarum immanitatem superat, eripere vitam, cui dederis, aut a quo acceperis. Neque mitior deinde in fratres fuit. quorum unus cognominis patri, raro naturæ lusu pro superiore dentium ordine, os unum continuum ita habuisse dicitur, ut neque aspectu deformior inde, neque ad usum ineptior fieret.

XII. Cum hic Bithynicarum rerum status esset, in Syria nihilo mitiora tempora fuere, cum regem inertia fœcordiaque Prusiæ simillimum haberet. Alexander is fuit, quem pro filio Antiochi se gerentem, ad regnum Demetrio extorquendum, Ephesi se paravisse diximus. Quæ ab illo tempore secuta sunt, donec vita regnoque Demetrius exutus, ab instituto minime alienum est exponere. Demetrium luxus & ebrietas, qua majore diei parte laborabat, neque minus vitium superbia, invisum suis reddiderant. Nam & conspectum sui populo denegans, vitam agebat in regia, quam

§ X. Liv. Epit. Plut. in Catone major. c. 16. Appian. § XI. Justin. 34, 4. Diod. l. 32. Appian. Val. Max. 1, 8. Plin. 7, 16. Liv. Epit.

sibi prope Antiochiam struxerat, turribus quatuor munitam, sine cura negotiorum regni, suis tantum voluptatibus intentus. Unde non materia magis odii hominibus, quam occasio prodicionis fuit. Qua usus Alexander Ptolemaida, tradentibus, qui in praesidio erant, militibus, occupavit. Hæc audita veternum Demetrio excussere: collectoque ingenti exercitu, ad confligendum cum hoste properavit. Judæorum eo tempore gens ducum suorum victoriis ex magno contemtu, in famam virtutis & fidei se vindicaverat. ergo Jonathanem (is tum præerat genti) amicis literis Demetrius ad auxilium vocat: & oblivisci acceptarum a Syris injuriarum jubet. Prævaluere Alexandri promissa, qui, nullis exofus malis, proniores ad credendum sibi animos invenerat.

XIII. Tandem cum summis uterque viribus sese armavissent, prælio commisso, anceps primum victoria, deinde, cadente Demetrio, tota in parte Alexandri fuit. Nam dextrum Demetrii cornu ita splendide vicerat, ut oppositos sibi hostes non modo averteret, ac diu persequeretur, sed etiam castra capta spoliaret. at in læva acie Demetrius superabatur, suorum ignavia: nam ipsi ad extremum virtus & robur animi superfuit. Diffugientibus enim, qui cum ipso fuerant, fortissime pugnans haud paucos interfecit: donec alios impetum ejus declinantes infecutus, equo in paludosum locum adacto, explicare se non potuit. Tum reversi, qui cesserant, regemque jam peditem circumstantes, conjectis undique telis non segniter se defendentem obruerunt. Hic exitus Demetrio fuit, undecimum annum Syris imperanti.

XIV. Alexander, ducta in uxorem Ptolemæi Philometoris filia, fortunam faventem ignavo animo tulit. Tanquam enim voluptatum, non virtutis & gloriæ officina regnum esse deberet, segnis & excors, inter scortorum greges, in ganeo & lustris, Ammonio cuidam, crudeli & perfido homini, permissa regni administratione, infamem vitam transi-

§ XII. Polyb. ap. Athen. 10, 12. Joseph. 13, 3. § XIII. Joseph. 13, 4 & 5.

gebat. Unde non per civitates modo atrocia multa gerebantur, venali ad omnium facinorum auxilium veniamque Ammonio; sed ipsam quoque regiam omnia sævæ absurdæque dominationis mala circumvenerant: donec præter alios innumeros, amicis regis omnibus, & regina Laodice, & Antigono, Demetrii filio, interfectis, spoliatus consilio, privatus amore Syrorum, Alexander externis simul armis domesticæque proditori objiceretur.

XV. Haudquaquam pari vita famaque per idem tempus in Africa Numidiæ rex Masinissa decessit: vir non tantum armis, quibus nobilissimus fuit, sed etiam ingenio & artibus regnandi maximus. Ergo moriens quoque rebus filiorum & regni optime providit, donis luculentis inter naturales liberos, quos habebat multos, distributis; *legitimisque*, quorum ingenia moresque valde diversi erant, *P. Scipionis arbitrium expectare* iussis, *ut id unusquisque eorum haberet, quod ipse tribuisset*. Et hunc quidem vivus adhuc arcessiverat, avita propriaque amicitia cognitum, ut eo in hereditate filiis distribuenda consultore uteretur. Prævenit fatum: sed tamen rata sanctaque liberis etiam morientis voluntas fuit.

XVI. Hic non modo a Pœnis & Syphace regnum paternum armis receperat, sed etiam multiplicaverat; hinc ad vicinam Oceano Mauritaniam, inde usque ad Cyrenaici agri terminos ditione prolata. Sed & mores gentis, quod maxime regium opus est, humaniores, quam invenerat, reddidit; pro vagis & latronibus, civilis atque militaris disciplinæ capaces, & urbium agrorumque bonos cultores efficiendo. Superioribus enim annis per ignaviam incolarum tellus, suo ingenio ferax, sterilitatis opprobrium immerito tulerat; cum homines, otiandi & prædandi dulcedine agriculturam negligentes, agrum feris relinquerent, ipsi herbis & lacte vescentes, inter sese potius de vili & aspero victu, quam adversum feras de optimi agri possessione, dimicarent. Horum desidiam & imperitiam Masinissa ipso opere arguit,

ingentes diversis locis agros conferendo, qui omnis generis frugibus fructibusque, haud minus, quam ulla felicissimarum toto orbe regionum, abundarent. Unicuique filiorum agros ejusmodi reliquisse dicitur, denum millium jugerum singulos.

XVII. Vitam ad hæc & valetudinem, necessaria rebus magnis instrumenta, supra nonagesimum ætaris annum, temperantia & labore propagaverat: ex quibus sexaginta regnavit. Argumentum haud vulgarium in fene virium fuit, semper plena liberis regia, quorum numerus postquam primum superare denarium cepit, nunquam postea fuit minor; cum in deficientium locum plerumque plures subnascerentur: in quibus annotatus est robusto corporis habitu puer, quadrimus admodum, cum vita pater excederet. *Sthemba* ei nomen fuit, quem post communis parentis obitum Micipsa frater adoptavit. Sic tradidit Polybius; alii *Methymnæum* appellarunt: de re non dubitatur. Præter hunc filios reliquit ex iusto matrimonio quatuor, ut idem Polybius scripsit: sed trium modo nomina & gesta noscuntur. His omnibus, ceterisque, quos ex concubinis susceperat, adeo semper venerabilis ejus majestas fuit, ut domus illa nullo unquam motu, quales in regiis familiis ciere juvenum cupiditas, aut suspicio fenum solet, concuteretur: cum & pecuniarum vim maximam, & egregios haberet exercitus; majorem interdum novandis, quam continendis rebus, materiam, nisi magna dominorum auctoritate custodiantur. Scipio, dimissus a Manilio proconsule, post tertium diem, quam exspiraverat rex, Cirtam pervenit.

XVIII. Ibi cognito Masinissæ testamento, cui & filiorum unanimis consensus acquiescebat, ceteræ quidem liberorum turbæ (quatuor & quadraginta relictos quidam numerant) præter accepta a parente dona adjecit oppida quædam agros-

§ XVI. Strab. l. 17. Val. Max. 11, 8. Polyb. ap. Valef. Diod. 32, 2. Appian. § XVII. Lucian. Macrobius. Polyb. Appian. Liv. Erit. Polyb. ap. Valef. & Suidam. Val. Max. Plin. 7, 14. Zonar. Eutrop.

que; penes legitimos vero thesauros, & vectigalia, & regium nomen communiter esse voluit: seorsim autem, uti cujusque moribus congruum videbatur, Micipsæ, cui annulum pater moriens dederat (maximus is natu, & pacis erat amans) Cirtam cum regia, vectigaliumque tractationem; Gulussæ, viro militari, pacis & belli arbitrium; Manastabili, ob Græcarum artium & justitiæ studium, judicia dedit.

XIX. Revertentem ad castra Scipionem statim Gulussa cum equitatu Numidico secutus est: jam enim hiems remissa, quæ neque longissima isti cælo, neque acerrima esse solet, rebus gerendis opportunitatem aperuerat. Præsertim adversus Phamææ incursiones magnum auxilium in Gulussa fuit: cujus equites equique nec audacia, nec patientia hostilibus inferiores, non minus apti ad disturbandas insidias, quam ad struendas illi erant. Ita multa, quæ in parte Carthaginensium fuerant, oppida expugnata; multa voluntate incolentium, maxime per Scipionem, recepta sunt. Sed aliorum obscura est memoria; Tezagæ urbis expugnationem occisorum captorumque numerus illustrem fecit. Duodecim enim Afrorum interfecta ibi millia, sex capta referuntur. Urbs in navatæ operæ præmium diripienda militi data.

XX. Maximum deinde Carthagini præsidium, Himilco Phamæas, consilio Scipionis ademptum. Sub idem tempus, cum forte ingens tempestas oborta esset, hinc Scipio, inde Phamæas, suis quisque castris egressi, ita sibi mutuo occurrerant, ut invia vallis interjecta conspectum non adimeret, facultate invicem lædendi minime permessa. tum Scipio solita providentia, ne quid insidiarum porro absconditum esset, tribus omnino comitatus speculatum processit. Hoc animadverso Phamæas cum fidissimo amicorum contra se tulit obvium. unde Scipio in colloquium venire velle virum suspicatus, & ipse, relictis duobus, cum uno comite ad-equitavit. Ex intervallo deinde, unde percipi vox poterat,

§ XVIII. Liv. Epit. Zonar. § XIX, Appian. Liv. Epit. Zonar. Oros. 4, 22.

te vero imprudentem, ait Scipio, qui salute publica desperata, saltem de tua non cogitas! tum ille: ecquid, inquit, salutis esse reliquum potest, siquidem Carthaginis hæc fortuna salvum ne præstare nequit, vos a me tot affecti detrimentis non voleteis? At ego, excipit Scipio, si meam fidem sequeris, non modo salutem & veniam, sed etiam gratiam a Romanis spondeo. Ad hæc Phamæas, te quidem Romanorum omnium fidei tenacissimum esse prædicant. sed tamen considerabo, &, cum fieri posse putavero, faxy scias. Sic in præsentia quidem discessum.

XXI. At Manilius, ut prioris expeditionis dedecus novo successu dispungeret, iterum ad Nepherrin castraque Hafdrubalis signa movit, quindecim dierum commeatum portare iussis militibus. adveniens deinde, castris cis amnem, uti Scipio nuper suaserat, communitis, cum oppugnando hostium munitiones nihil promoveret, magnum in metum conjectus est, ne iterum recedentem Hafdrubal, sicut prius, adoriretur. Interim ab auxiliari Numida literæ ad Scipionem deferuntur: quas, ut erant obsignatæ, cum ad proconsulem pertulissent, in hanc sententiam scriptas invenere. *Illa die, illum locum (utroque definito) sum occupaturus. tu vero, cum quo voles numero tuorum, adesto, vigilibusque præcipito, ut venientem noctu recipiant.* Quanquam nullum erat adscriptum epistolæ nomen, Scipionem non fallebat, a Phamæa illam proficisci. Timebat callidum Phamææ ingenium & sape expertas fraudes proconsul: sed fidenti animo Scipionem esse videns, ire iussit, *fidemque dare se dedenti, præmia ad senatus voluntatem rejicere.* Neque aliud Phamæas postulabat; sed, *quantum ad salutem pertineret, satis sibi pignoris in dextera Scipionis esse, cetera senatui se permittere, fatus, recessit.*

XXII. Postero die cum suorum equitum aciem, tanquam ad pugnam, instruxisset, priusquam ad teli jactum ventum esset, ante agmen suorum constitit, evocatisque, velut ad subitum consilium, turmarum præfectis, *si quidem adhuc aliqua in nobis patria spes esse potest, ultima experiri*

paratum videtis, inquit. *Sin vero res ad eum statum, quem novistis, adducta est, mihi tempus esse videtur de salute singulorum consulendi. Et ego quidem fidem jam accepi, me cum omnibus, quos adduxero, salvum fore: vos autem quid vobis faciendum esse putetis, exponendi brevis est occasio.* Hæc dicenti quidam præfectorum cum equitibus bis mille ducentis se applicuerunt: reliquos Hanno, cui cognomen Albus erat, transfugere vultuit. Reducem cum Phamæa Scipionem obviam profectus exercitus laudibus & lætitia, veluti triumphantem, in castra deduxit.

XXIII. Proconsul, eo successu gavisus, maxime quod inter perturbationem perculsi hoc casu Hasdrubalis, receptum habiturus tutum atque honestum videbatur; nec enim diutius morari commeatum inopia sinebat; septemdecim diebus in ea expeditione jam transactis, statim castris motis profectionem orsus est. Sic quoque fatigabat haud mollis cura, quia tridui itinere per exhaustam inopemque regionem repetenda priora castra erant. At Scipio, assumpto Phamææ Gulustæque equitatu, & paucis Italicorum alis, in campos quosdam (*Magnum Barathrum* vocant) incursione facta, exercitus inopiam sufficienti annona refecit.

XXIV. Jam adventu successoris cognito, Manilius Scipionem cum Phamæa Romam dimisit, datis ad senatum literis, quibus, *ejus juvenis toto tempore belli præcipuam operam fuisse*, fatebatur: additis etiam, *quæ circum Masinissam illi, circum Phamæam, eximia & gloriosa contigissent.* Navem ingresso accurrens exercitus maximo cum affectu læta omnia precabatur: nominatim rogitans Deos, *uti Scipionem reverti in Africam consulem capiendæ Carthaginis causa facerent.* Universis enim hæc persuasio, veluti cœlitus illapsa mentibus, aderat, *non ab alio, nisi Scipione, capi Carthaginem posse.* idque ipsum multorum literis in urbem perscribebatur. Senatus Scipionem magno favore excepit. Phamææ quoque, cum in curiam esset introductus, honorem habuit, ut confidere eum

juberet. dona deinde data prætecta bullaque aurea, & cum phaleris aureis equus, armaturaque integra, & pecuniæ signatæ festertia quadraginta data, & vasorum argenteorum pondo centum, tentoriumque cum omni instrumento. Laudatum deinde, majorumque spe repletum, *si bonam ad cetera belli operam* præstitisset, in Africam ad exercitum remiserunt.

XXV. Inter hæc de Claudii Marcelli fine cognitum, qui cum duobus aliis senatoribus ad Masinissam legatus fuerat. Indigere bellum majoribus ab eo rege subsidii senatus crediderat, & ad ea comparanda legatione tali opus esse. Sed inutilis ea opera fuit: neque præverti fatum regis Marcellus, neque vitare suum potuit, per tempestatem fracto navigio fluctibus haustus. Interea L. Calpurnius Piso consul, primo vere ex Sicilia profectus, in Africam appulit; unaque L. Mancinus prætor, cui classis evenerat. His ea ratio belli placuit, ut Carthagine & castris Hasdrubalis abstinerent: socias tantum illorum urbes obirent avellerentque. Prima, nec satis felici auspicio, tentata Clupea fuit: quam terra marique frustra oppugnatam omiserunt. Novam tamen urbem, propinquam Clupeæ cepit Piso, diripiendamque militi dedit: quamquam violari in se belli jura, fidemque a consule datam insuper haberi Neapolitani testarentur. Nihil exinde prosperum Pisoni fuit, sive læsæ fidei pœnam reposcente numine; sive adversus fallaces hoc acerrimum laborantibus telum est, nihil in promissis certum fidumque esse credere, nec alibi, nisi in semetipsis, spem habere.

XXVI. Unde cum ad Hippagreta adductus exercitus esset, urbem magnam, mœnibus, & arce, & portibus, & navalibus ab Agathocle Syracusio pulchre communitam, in obsidione vana tota æstas contrita est. Inter Uticam & Carthaginem erant Hippagreta, diripiendoque naves, quibus ab Utica commeatus in castra consulum portabatur, copia

§ XXIV. Zonar. Appian. Liv. Epit. § XXV. Liv. Epit. Zonar. Appian. Diodor. ap. Vales.

rerum & divitiis inter bellum creverant. Unde non magis vindicta consuli ob injurias, quam compendium ex præda petebatur. Sed neque oppidum expugnari, neque adversus erumpentes (bis enim eruptione pugnatum) defendi machinæ potuere; cum obsessis etiam a Carthagine subven- tum esset. Consul ab irritō incepto, cum jam tempus hibernorum appeteret, Uticam exercitum reduxit. Mirifice confirmavit ea res Carthaginienſes, aliunde quoque prosperis eventibus in spem erectos melioris fortunæ. præterquam enim, quod incolumes erant Hasdrubalis copiæ, Phamææ defectionem solabantur Bithyæ ad ipsos transfugio, qui cum octingentis Numidicis equitibus a Gulussa disceſſerat: Micipsæ & Manastabalis promissa, nam Romanis arma & pecunias erant polliciti, differri videbant, haud dubie futuri cura regulis rem extrahentibus.

XXVII. Ergo regionem sine metu peragrantes, opportuna loca communiebant: & passim in concionibus apud urbes Romanorum famam lacerabant: *castra ad Nepherinbis infelicitè tentata, & vanam modo ad Hippagreta obsidionem, Carthaginemque ipsam, licet inermem, frustra oppugnatam exprobrantes.* Simul & ad Numidiæ reges, & ad Mauro- rum liberas civitates dimissæ legationes, *ad externum hostem Africa depellendum hortabantur, docentes, ipsis quoque imminere servitium a Romanis, si Carthaginem exscindi quieti paterentur.* Etiam Andriscum adiri placuit, bellum cum Romanis de Macedonia gerentem, & nuper magno prælio victorem. cum hoc a legatis in hanc sententiam actum:

XXVIII. Quo tempore primum ad nos fama pervenit, Philippe rex, antiquum Macedonia regum sanguinem, instar excisæ arboris subnato a stirpe surculo reflorescere, erigere animos cœpimus, certi, non ad exiguum aliquod opus, sed plane clarum & admirabile, tam singulari Deum consilio te servatum esse. Ceterum, qualia mox a te perfecta sunt, ne divinare quidem, aut si quorum in mentem venisset, credere potuissimus. adeo spes

quoque faventium, qua nihil solet esse in promittendo liberalius, merita felicitate antevenisti. Vix in lucem te prodixisse audivimus, cum te Romam in vinculis duci nuntiatum est: vix rescivimus captum, cum te non modo liberatum injusto carcere, sed etiam recuperata Macedonia paterni regni compotem intelleximus. atque hæc (quis credit?) ab uno & juvene, tantillo tempore, patrata sunt: ut callidissimorum hominum astum ingenio, potentissimorum vires virtute superares; neque ex tanti regni possessione quidquam, præter admirationem tam cito deperditæ relinqueres. Quid deinde, cum prætorem exercitumque Romanum tanta cum ignominia & clade repulisti?

XXIX. Sed hæc ut tibi præcipue gloriosa & utilia sunt, ita non possunt non læta esse omnibus, qui sub tristi communium dominorum iugo, nihil aliud, quam diem pristinae recuperandæ libertatis, circumspiciunt. Nam & exemplo plurimum eriguntur, quod vinci Romanos posse, neque necessum esse servire, si animus sit libertatis capax, docuit: & vident occasionem sibi patefactam, qua tutius quisque adversus distractos distentosque pluribus bellis jus suum vindicet. Atque hæc senatum populumque Carthaginensium moverunt, ut ad te gratulatum, & societatem amicitiamque petiitum mitteret; spe minime dubia, te quoque paribus causis eadem consilia secuturum, eamque rem utrisque salutis & gloriæ fore: velut divina quadam sorte ita temperatis omnibus, ut magnum mutuum usum adversus communem hostem præbitura fœdera, nihil habere inter nos aut metus, aut etiam suspitionis possint. Romanis provinciis utrinque proximi, tanto maris interjecto spatio sic inter nos disjungimur, ut nocere invicem, si hostili animo simus, nequeamus: sin amico, non prohibeamur auxilia mutuo mittere.

XXX. Præterea fœdus illud stabile perpetuumque fore spondet, satis magno fidei pignore, quod ita se gesserunt Romani, ut neque nos Macedoniam, neque tu Carthaginem, unquam ad amicitiam illorum redituram suspicari debeamus; nisi rem omnium carissimam pulcherrimamque, libertatem, ultro proiecuros opine-

mur, qualibus in se concedant dominationem immemores. Nam, ut nostra taceamus, quæ passi ab injustissimo populo gravia & intoleranda olim & recens sumus; quomodo Romanis quisquam deinceps credere Macedonum poterit, qui bella cum Philippo, bella cum Perseo gesta; regnum, ne se respicere, & pristinam gloriam repetere posset, ita dissectum, ut etiam connubiorum jure gentis ejusdem hominibus interdiceretur; alia, quorum neque obscura notitia, neque sensus esse parum acerbis potest, meminerit.

XXXI. Nam te quod attinet, præter communes omnibus causas, domesticæ propriæque injuriæ perpetuum Romanis hostem auclorantur, ut avum tuum taceam, ita contumeliose tractatum, ut deliberatum seni quoque fuerit, non ulterius ista pati: quam indignis modis patrem tuum habuerunt miserum, quem post varia & atrocia ludibria contra fidem datam occiderunt? quid de fratribus tuis dicam, quorum sanguini pepercerunt, ut ambigere liceat, crudeliusne servaverint filios, an interfecerint patrem. Quam immanis, Dii boni, factus? quanta superbissimi populi insolentia? quid aliud ea clementia quæsitum est, quam ut per summam impudentiam, dum regii juvenes aut fabrilis opere sortidantur, aut scriptum faciunt, & magistratibus apparent, quotidiè de Macedonia triumpharet?

XXXII. Hæc quidem novi cujusdam & inauditi exempli sunt; adeoque, priusquam fierent, cogitare de iis nemo potuisset; jam tamen avorum nostrorum providentia satis deprehendit, quam acerbis utrique populo futurus Romanus esset, nisi juncta ope sociatisque viribus coereretur. Et profectum aliquid esset, nisi captivitate legatorum, qui inter Hannibalem & Philipbum commineabant, communionem consiliorum, & opportunitatem temporum, quæ duo plurimum valent in bello, fortuna sustulisset. Sed forte Diis ita visum, ut, quid inter gloriosam libertatem, & humile servitium interesset, experti, constantiore proposito cæptis insisteremus. Quod igitur felix faustumque sit, his legibus amicitiam ineamus, ut commune nobis contra Romanos bellum sit, nec nisi communi consilio ponatur. nec in præsens a te aliud, quam quod ultro facturus eras, petimus, ut, quam jure cepisti Macedonia possessionem, armis usquequaque tuearis.

XXXIII. *Egregium exercitum habes; Thracum fortissima auxilia: nec tam longinqua est Italia, & iter, de quo jam avus tuus deliberaverat, nostri. non aliter quietæ tibi domi res erunt, quam uti, ne illis in Italia sint, effeceris. Navibus & pecunia te præ magnitudine belli parum instructum esse scimus: hæc per nos tibi populus Carthaginiensis offert. a te, si quid auxilii poteris mittere, cum opus erit, sperat. hætenus quidem ita sustinuit bellum, ut vi amiserit haud multa. nam arma, elephantos, & cetera decepti ultro tradidimus. neque, quid secutum sit, ignoras. Perfidum hostem a mœnibus patriæ, cum arma deessent, corporum objectu arcuimus. deinde raptim armati, ut præsens necessitas suggererat, magnas hostium copias, & consularem exercitum, semel atque iterum ad Nepherin, semel atque iterum ad Hippagreta, cecidimus. præsidia locis opportunis imposuimus. denique bellum ea spe sustinemus, ut prospere cessura putemus, quæ agimus; iis animis, ut quamlibet potius sortem subituri, quam Romanis nos dedituri simus. Quid ad has legationes responsum a regibus civitatibusque fuerit, non traditur: quamquam id etiam ex cujusque fortuna statuque, qualis eo tempore fuit, propemodum conjicere integrum est.*

XXXIV. *Iisdem causis, quibus Carthaginienses sustulerant animos, sed propria quoque gloria elatus Hasdrubal, jam etiam ad urbanæ militiæ præfecturam adspirabat. sed longum per bonas artes iter videbatur. quod proclivius erat, criminari Hasdrubalem urbi præfectum instituit, suspicionemque, tanquam avunculo Gulussæ urbem proderet, apud quosdam principum movit: a quibus cum in senatu crimen acerbe objectum esset, isque, improvise periculo percussus, obmutuisset, in ipsa statim curia pro confesso subselliorum fragmentis est obrutus.*

XXXV. *Inter hæc cum tempus comitiorum in propinquo esset Romæ, intenta civitatis in novos magistratus cura erat, quisnam adversus tanti belli molem idoneus imperator legeretur. Cognitis enim Pœnorum apparatibus, & Pisonis consulis ignavia, haudquaquam securis mentibus res in Macedonia adversas, in aliis regnis turbatas, odia Pœnorum necessitate ir-*

ritata, nullamque in tantis acerbitatibus spem pacis & conditio-
num, reputabant. cum subito, veluti numine quodam obje-
 ctus, Scipio Æmilianus, omnium animos mœrore cura-
 que exsolvit. Ædilitatem cum maxime petebat; nam a majori-
 bus magistratibus ætas eum & annales leges arcebant. At ubi
 primum oculis populi se dedit, resque ab illo nuper ea-
 dem in Africa gestæ, & favor exercitus, & nomen Scipio-
 num, animis occurrerunt, vulgo homines exclamare, hunc
 non modo dignum consulatu, sed unum esse, a quo sperari
 optatus belli finis posset.

XXXVI. Urbanæ multitudinis desiderium non jam te-
 stimonia modo Africani exercitus, sed scriptæ ad senatum
 literæ adjuvabant, quibus diserte Scipio ad Carthaginien-
 se bellum consul poscebatur. Obstabant tamen haud infirma
 tendentibus impedimenta: majestas legum, dignitas can-
 didatorum, & communis seniorum injuria, si præter mo-
 rem & contra jus in civitate receptum universis unus ado-
 lescens præferretur. Hæc qui comitia habebat consul Albi-
 nus, hæc alii Patrum inculcantes, negabant, *salvis legibus,*
salvaque dignitate civitatis, rationem Scipionis haberi posse.
 Neque segnius niti populus, ut Scipionem utique consulem
 haberet. Post multa non leviora, quam pro magnitudine rei,
 certamina, cum ad Romuli Tullique leges provocaret po-
 pulus, *sibi comitiorum potestatem iis datam* clamitans, unus de
 collegio tribunorum minatus est consuli, *se jus comitiorum*
ademturum, nisi voluntati populi cessisset. Ita postremo privi-
 legium ferri placuit, quo legibus annalibus Scipio solveret-
 ur, accommodato magis ad præsentia consilio, quam in se-
 quentem ætatem exemplo salutari. Adeo nunquam legibus
 sine aliquo reipublicæ detrimento sua vis adimitur, etiam
 ubi mutari eas honestæ justæque causæ coegerunt.

XXXVII. Datus Scipioni collega C. Livius Mamiliani

§ XXXV. Zonar. Appian. Auctor de Vir. ill. c. 58. Plut. Apophth.
 Rom. c. 20. Vell. 1, 12. § XXXVI. Val. Max. 8, 13. Appian.
 Diod. ap. Vales. Liy. Epit. Cic. in Lælio c. 3.

F. M. N. Drusus, inito consulatu, intempestiva ambitione certamen de provinciis movit; victam semel *consuetudinem* frustra in partes advocans, *qua de provinciis sortiri consules aut comparare solabant*. Difficile erat eripere provinciam consuli Scipioni, cum hujus ipsius provinciæ causa contra leges consul factus esset. Itaque ex auctoritate senatus latum ad populum est, *uter consulum in Africa cum imperio esse deberet?* consensu Scipionem jusserunt. Hinc decretum, *uti delectum haberet ad exercitus Africani supplementum, donec eo numero militum is esset, quo a principio fuisset*. Præterea si qui ex sociis militare sponte vellent, recipere eos permissum: *literisque populi Romani nomine auxilia regum populorumque excire*. Missaque sunt a diversis: & rebus omnibus ad profectiorem apparatus, in Siciliam consul, & inde in Africam trajecit.

XXXVIII. Quæ inter hæc in Macedonia per P. Juventium primum, deinde Q. Metellum prætores, ad ipsum belli finem gesta sint, tempus est referre. Juventius Andrisci, tanquam imaginarii scenicique regis, arma despectui habens, quasi in bellis fortuna semper causam sequeretur, temere in Macedoniam irruptione facta, exercitum vitamque eadem clade amiserat, vix noctis superventu servatis copiarum reliquiis. Eo successu sublatus victor, nec enim inter fortunæ blandimenta tegere se degener animus poterat, de cetero, velut auctoritate regnandi satis stabilita, sine pudore, sine metu ad crudelitatem injustitiamque, tyrannici spiritus opera, prorumpebat. occidere, rapere, fictis criminibus ditissimum quemque tollere; postremo ne amicis quidem parcere, quorum haud pauci de medio sublati. Erat enim ingenio ferox avidusque cædium, in sermonibus arrogans, avaritiæ ceterisque vitiis fere omnibus deditus, ut satis pœnarum sub eo rege populo Romano datura fuerit Macedonia, si diutius vitam imperiumque prorogare potuisset. Ceterum post Juventii prætoris cædem iterum signa Thessaliæ

intulit, multaque ejus loca depopulatus, Thracum, ut ad fortunatam militiam, plures attraxit.

XXXIX. Hæc ut Romæ sunt audita, Q. Cæcilium Metellum festinare ad tutelam sociorum senatus jussit. Advenienti huic in Macedoniam Andriscus cum exercitu statuerat occurrere: sed distractus Attali regis opera, qui cum classe in auxilium Romanis venerat, sollicitusque de ora maritima, non est ausus longius procurrare; sed modico a Pydna intervallo castra communiit. Inter hæc cum propius suggestus esset Romanus, equestre prælium ortum. quo superior Andriscus, metu tamen pedestris exercitus, de summa rerum dimicare noluit. Sæpe modica victoria magnæ cladis initium fuit: adeo interdum humanæ mentes nesciunt, quibus rebus dolere lætarive oporteat. Crevit animus equestris pugnae eventu, crediditque, se parem Metello nihilominus fore, tametsi partem copiarum ad vastandam Thessaliam dimisisset. Metellus, tempore usus, stultitiam hostis in suam occasionem vertit; copiisque, quæ Macedonia præsidebant, facili negotio fuis, ceteros, ultro pœnitentes commissorum, in deditionem accepit.

XL. Andriscus in Thraciam profugerat, viribusque ibi reparatis, denuo cum Metello, qui, victoriæ beneficio aperta Macedonia, defectionis auctorem, quocunque se reciperet, persequabatur, configere est ausus. Par priori hujus quoque prælii eventus, splendidaque Metelli victoria fuit. quinque & viginti millia hostium duabus pugnis occisa, provinciam Romanis, Metello cognomen Macedonici reddidere. neque minor capti Andrisce, quam ipsius victoriæ lætitia fuit. Ad Byram Thraciæ regulum confugerat, qui stultum esse ratus fidem fervare post fortunam ei, quem unius fortunæ causa coluerat, hospitem & supplicem suum Romanis dedit. Idem fere fatum & alterius mox impostoris fuit. qui & ipse Perseum patrem mentitus, & Alexandri nomine tumens, re-

XXXVIII. Liv. Epit. Vell. 1, 11. Eutrop. Flor. 1, 2. Oros. 4, 22. Zonar. Diodor. § XXXIX. Eutropius. Pausanias in Achæis. Zonar. Strabo.

gionem, quam Nestus fluvius alluit, contracta perditorum hominum manu, occupaverat. Metellus locis, quæ tenuerat ille, nullo negotio receptis, ipsum comprehendere non potuit, cum celeri fuga ereptus in Dardanium sese penitus abscondisset.

§ XL. Vellejus. Eutrop. Auctor de Vir. ill. Liv. Epit. Zonar. Flor. 2, 14.

JOANNIS FREINSHEMII
SUPPLEMENTORUM
LIVIANORUM

LIBER XVI.

IN LOCUM LIB. LI. LIVIANI.

E P I T O M E

LIBRI QUINQUAGESIMI PRIMI.

Carthago, in circuitu viginti tria millia passuum patens, magno labore obsessa, & per partes capta est; primum a Mancino legato, deinde a Scipione consule, cui extra sortem provincia Africa data erat. Carthaginenses, portu novo (quia vetus obstructus a Scipione erat) facto, & contracta clam exiguuo tempore ampla classe, infeliciter navali prælio pugnaverunt. Hasdrubalis quoque ducis eorum castra, ad Nepherim oppidum loco difficili sita, cum exercitu deleta sunt a Scipione; qui tandem urbem expugnavit septingentesimo anno, quam erat condita. spoliiorum major pars Siculis, quibus ablata erant, reddita. Ultimo urbis excidio, cum se Hasdrubal Scipioni dedidisset, uxor ejus, quæ paucis ante diebus de mariño impetrare non potuerat, ut ad victorem transfugerent, in medium se flagrantis urbis incendium, duobus cum liberis, ex arce præcipitavit. Scipio exemplo patris sui naturalis Æmiliï Paulli, qui Macedoniam vicerat, ludos fecit, transfugasque

ac fugitivos bestiis objecit. Belli Achaici semina referuntur hæc : quod legati populi Romani ab Achaicis pulsati sint, Corinthi, missi, ut eas civitates, quæ sub ditioe Philippi fuerant, ab Achaico concilio secernerent.

I. P. SCIPIO primo statim in Africam adventu haud parva aut dubia documenta dedit, quantum Romanis bonorum imperio suo, quantum calamitatis allaturus Carthagini esset. Nam appulsum ejus extemplo memorabilis casus illustravit, non minus in præsentia utilitatis, quam ad summam rerum ominis præbens. Sero diei Uticensem portum attigerat classis, & vixdum expositæ copiae erant, cum sub mediam noctem a Mancino literæ venere, celerem opem maxima cum obtestatione flagitantes. Non ille quidem ad Scipionem scripserat, quem adesse nesciebat; sed Pisoni proconsuli Uticensibusque significabat, *se in capta parte Carthaginis obsideri, certo cum exitio, nisi ante lucem succurreretur.* Mancinus enim, animadverso urbem amplissimis spatiis diffusam (ad tria & viginti millia passuum occupabat) non eadem sollicitudine omni ex parte custodiri posse, ad Megara (regio Carthaginis ista fuit) subito admoveri depromtas ex navibus scalas jussit.

II. Quanquam enim remotior a cetera urbe pars ista erat, tamen, quia situ circum aspero & aditu difficili satis munitam putabant, non magno præsidio tenebatur. Scalas admotis pauci adhuc murum conscenderant: cum Carthaginenses portam, quæ proxima erat, aperiunt, magnoque cum clamore ad dejiciendos loco hostes feruntur. Resistentibus fortiter, terga vertunt Pœni, refugientesque per eandem portam insecuti, qui pepulerant, eodem impetu perrupere. Alacris exinde, tanquam in certa victoria, clamor, plures ex navalibus focis (nec enim procul classis aberat) excivit: & ad ferendam suis opem, pauci armati, plerique præ studio & festinatione semiermes accurrerunt. Erat in hoc agmi-

ne dux ipse, non ut rector ceterorum, sed velut unus e turba, lætarum rerum imagine captus, adversus ambiguas providere neglexerat. Tarde agnito periculo, quia neque relinqui locus tuto, neque defendi sine armis & commeatu poterat, a Pifone milites, ab Uticensibus cibaria petiit.

III. At frustra ad Pisonem respexerat, qui procul in mediterranea loca abduxerat copias: neque Uticensibus animus aut vires erant, sine majoris exercitus præsidio ad mœnia Carthaginis adeundi: eratque in ea conditione Mancinus, ut exemplis illorum ducum accessurus videretur, qui, nulla receptus habita ratione, cum in loca periculosa se conjecissent, tristi temeritatis exitu, monumentum posteris reliquerunt, *bono duci* (quod aliquanto post Sertorius dixisse dicitur) *non respiciendum minus, quam prospiciendum esse*. Periclitantem, ne simul cum luce Carthaginienses præcipitem per rupes ad mare agerent, fortuna explicuit, in idem illud tempus Scipione adducto. Qui, ut erat ad omnia subita consilio & audacia promptus, mora nulla interposita, classicum ad revocandos, qui exscenderant, milites cani, pubem Uticensium cum armis sequi, a senioribus commeatum in naves comportari iussit. Ad terrorem deinde hostium ex captivis aliquot solvit, nuntiaturos, adesse Scipionem. Ad Pisonem etiam alios super alios cum citis equis nuntios misit, ut quam celerrime ad Carthaginem occurreret.

IV. Ipse deinde quarta vigilia solvens, ut majoris exercitus speciem eminus præberet, milites, *ubi appropinquassent urbi, stare in tabulatis navium erectos*, iussit. Adeoque fuit opportunus consulis, & ad salutem Mancini, quique cum eo erant, necessarius adventus, ut si tantillum adhuc moræ interposuisset, serum post acceptam cladem auxilium accessurus videretur. In orbem pugnabant Romani, receptis in medium inermium tribus ferme millibus, qui ab armatis admodum quingentis tegebantur. Jamque crebris vulneribus, & numero hostium fatigati, ad ipsa mœnia se receperant,

unde si deturbarentur, per abrupta & præcipitia fugientes, etiam sine hostili ferro, suus timor, & in abscissis locis facilis lapsus, velut ruina affligeret. Ad conspectam Scipionis classem animi ceciderunt Pœnis: pugnaque intermissa, spatium dedere consuli Mancinum ceterosque in naves recipiendi. Mancinum e vestigio Romam ire iussit; nam & successor ei Serranus ad classem venerat: ipse, loco castris haud procul Carthagine capto, majore vi bellum urbi inferre instituit, quam a prioribus consulibus factitatum fuerat. Carthaginienses quoque, extra urbem progressi, castra pro muris opposuerunt: in quæ paulo post etiam Hasdrubal imperator, & præfectus equitum Bithyas, cum peditum sex millibus, equitibus mille, veteri & exercitato milite, sunt ingressi.

V. Cum interea Piso, ex mediterraneis reversus, exercitum Scipioni tradidisset, isque milites, ambitioso imperio habitos, pro labore & disciplina otium, avaritiamque, & rapinas sectari animadverteret: nihil antiquius habuit, quam ut hoc tantum flagitium primo quoque tempore tolleretur. Erat & aliud haud minus militiæ dedecus, quod ex forensi plebe magnus numerus exercitum sequebatur, prædæ causa cum audacissimis quibusque militibus injussu ducis excurrentium. unde, siue felix iis, siue improspere temeritas fuisset, exercitus ignominia incommodoque gravabatur, & clades eorum, aut fuga, famam Romanarum copiarum minuebat; & præda, si quam retulerant, disciplinæ erat inimica, cum passim in castris, & in iisdem sæpe contuberniis cupiditas de lucro disceptantium in jurgia & rixas, & nonnunquam in vulnera ac cædes exiret. His armorum dehonestamenti offensum Scipio, vereque secum reputans, difficile esse imperatori, ut hostibus evadat superior, donec suis militibus impar est, ad concionem vocatos tali oratione castigavit:

VI. *Si quidem quæ facitis, milites, (nam qualia sint & ipsi vestris, & me referre pudet,) ea vestra magis, quam aliorum culpa fieri arbitrarer, non essem peccantibus facilis, neque ad repræsentanda supplicia piger. nunc autem, quia nuper, cum adhuc*

vobiscum militarem, meliores fuistis, spes est, futurum, ut quas laxata disciplina corrumpit, eadem adstricta & redintegrata corrigat. Quæ a vobis postulato, eadem omnia ipse feci, facturisque sum. Bellum severa lege, & ut nomine Romano dignum, animus est gerere: non in modum lurocinii globos armatorum sponte procurrentium evagari sinere: neque lixarum magis, quam militum, officia facientes pati; neque deliciis & molliiiei locum in castris relinquere. Quæ omnia cum faceretur, nunquam vobis in mentem venit majorum vestrorum, & antiquæ severitatis, & his tantum artibus proventi ad summa imperii? Ne castrensium quidem legum usquam occurrit recordatio, in quas adæli sacramento estis? Si quis sine commeatu longius a castris discedat, quam unde tubæ cantum audire possit, eum pro desertore habendum scitis: frumentum publice datum vendi, prædas pecorum aut mancipiorum vino permutari, & alia, quibus segnior ad imperia molliorque miles redditur, vetita esse, non ignoratis.

VII. Ad hanc igitur formam vos componite, si effugere indignationem meam, & militarium legum vindictam vultis. Et vos quidem, quotquot milites non estis, ante noctem facessere e castris jubeo: nisi cui nominatim manendi a me venia fuerit. Neque reverti quisquam vestrum ausit, nisi ex causa commeatus in castra importandi, sed simplicis & militaris. Sed & his certum tempus constituam, intra quod res suas vendant, cujus rei curam ego quæstorque agemus. Et hoc sacramento non obligatis dictum esto. vobis autem, milites, unum ad omnia præceptum suffecerit, si meos mores industriamque imitemini. nam, ad hoc exemplum si vos composueritis, neque sine successu labor vester, neque sine gratia & fructu erit. nunc igitur intendite animum nervosque. belli tempus contentionem strenuitatemque postulat; otio & deliciis si quis locus est, post victoriam erit. Atque hæc a vobis ego legesque exigunt: vestrum est dare operam, ut potius præmia per obsequium, quam animadversionem ob delicta, mereatis.

VIII. Repurgato ad hunc modum exercitu, cum jam satis attentos ad imperia haberet milites, audendum ali-

quid adversus hostem statuit, &, nocte ad hoc consilium exsequendum delecta, regionem Carthaginis, quæ Megara vocabatur, est adortus. Diversa hinc apud scriptores traditio est: alii, *Pisonem, qui modo consul fuerat, cum parte copiarum ad unam portarum constitisse, narrant: ad aliam deinde longe distantem validam item manum objectam: ipsum Scipionem intra mœnia transfugarum ductu penetrasse, eosque, qui ante portas opperiebantur, effractis claustris admisisse.* Ceterum, qui ad Carthaginem gesta prolixius sunt executi, de Pifone nihil, sed duabus a partibus oppugnata Megara, neque tamen licet maximo conatu transcendendi mœnia potuisse, tradunt: donec Scipio, conspectu privati cujusdam turricula, quæ haud procul muris parâ altitudine aberat, juvenum promissimos ascendere jussisset, & inde aditum in urbem moliri. Per hos primo missilibus deturbatos propugnatores, deinde tignis tabulisque ponticulum effectum, per quem ex turricula in muros transcendensum. Inde, ad portam impetu facto, consulem cum quatuor hominum millibus intromissum, Pœnos, tanquam ea parte urbis capta, in Byrsam compulisse, tanto terrore, ut etiam, qui ante urbem habuerant castra, relictis iis, eandem ad arcem confugerent.

IX. Utcunque gesta res est, penetratum in urbem eo die, ipsiusque consulis magnam etiam in pugnando virtutem fuisse constat: ipsum quoque, *Polybio tantum & milibus viginti comitatum, suffodisse portam, qua acceptus est exercitus, non contemnendi auctores prodiderunt; adversus superstantium hostium ictus testudine lapidea, qua fornicata porta erat, tectum.* Occupatis Megaris, consul, loci naturam intuens, quod horti magno numero ibi erant, maceris suis sepibusque distincti, rivis quoque multis & sinuosis interfluentibus, ne per tenebras & locorum imperitiam detrimentum acciperetur, militem inhærere tergis fugientium non est passus; receptuique signo dato, in castra sua rediit. Insequenti die, tanquam in vindictam illatæ cladis, fœdum atque crudele Hasdrubal facinus facit. captivos enim Ro-

manorum, quotquot in potestate habebat, in mœnia, unde conspici a suis possent, adductos, partim oculis, aut lingua, aut pudendis privat, unco divellens corpora: aliorum amputat plantas, aut digitos. quibusdam detrahi cutem jubet, atque ita vivos adhuc spirantesque per rupes barbara feritate præcipitat.

X. Eadem opera cautum sibi rebatur adversus mobilitatem vulgi, tædio periculorum pacem quibuslibet conditionibus accepturi, ni magnitudine facinoris omnem spem a Romanis veniæ desperasset. At illi res adeo in contrarium vertit, ut ex eo non vulgus modo timidius ad defendendam urbem fieret, sed etiam odio haberet Hasdrubalem, qui factio immanissimo invisos Diis hominibusque Pœnos reddidisset. Quibus ille opprobriis & suis sceleribus vecors, atque in dies crudelior, aperte tyrannidem usurpare cœpit, nihil sibi ad salutem reliquum fingens, nisi metu & terrore res suas stabiliret: donec eo profectus est, ut in civitate, tot a seculis libera, impetu etiam in senatores facto, quosdam audacius præsentia increpantes, crimine prodicionis de medio tolleret.

XI. Scipio, crematis hostium castris, fauces inter paludem & mare transversa fossa occludere cœpit, non ultra teli jactum ab urbe divisus. Spatium permuniendum erat amplius trium millium passuum, simul ad pugnam & opus intento. Nam Carthaginienses, ut ex propinquo, continuis fere assultibus perrumpere stationem, inferre se munitioribus, disturbare opera nitebantur. Sed providentia Scipionis superior fuit: perfectaque, quam instituerat, fossa, jam minore periculo, quia munimentum hoc adversus hostem objecerat, aliam haud magno a priori intervallo duxit, in continentem versus: deinde aliis duabus additis, ut totum opus quadrata forma constaret, vallis præacutis undiquaque munivit: præter hæc a tergo & lateribus aggerem, a fronte in urbem versus murum opposuit, sex pedum crassitie, altum

¶ IX. Marcellinus. Polyb. ap. Valef. Appian. Jul. Obsequens.
§ X. Zonar. Appian. Polyb.

duodecim, propugnaculis atque turribus per legitima intervalla prominentibus: una, quæ in medio erat, celsissima, cui insuper ex materia aliam tabulatis quatuor surgentem imposuerat, unde quidquid in urbe rerum ageretur, oculis subjici posset.

XII. His intra diem vicesimum effectis (summa enim contentione militum, alternatim opus & arma capebant, supra ipsorum hostiumque expectationem res processerat) exercitum induxit consul, duplex ab eodem labore commodum assecutus. Nam & castris opportunam fedem eadem munimenta præbebant; & vice circumvallationis omni a terra aditu occluso, arcebant commeatus, qui hætenus ea parte inferri in urbem consueverant. Magnæ tamen adhuc molis erat obsidio: cum mœnium inexpugnabilis firmitudo etiam a maximo propugnatorum numero defenderetur; quos adhuc a Bithya submissi commeatus sustentabant. Redigebatur tamen quotidie annona in urbe gravior, cum, præter oppidanorum turbam, maxima hominum multitudo ex agris eo confluxisset, quæ, neque per hostium metum extra mœnia audebat progredi; neque subvectione peregrinæ annonæ, mercatoribus periculum vitantibus, sublevabatur. tantum ex vicina Africa res necessariæ terrestri maritimoque itinere veniebant, parcius a mari, modo tempestatibus, modo per classem hostium parum tuta navigatione.

XIII. Tunc autem intersepta penitus via, qua per terram erat aditus, forum rerum venalium maxima sui parte deficiens, Carthaginienses metu famis & jam incommodis angebat. Neque Bithyas, qui cum equitatu ante clausam urbem emissus ad comparandam annonam fuerat, per castra Scipionis perrumpere, aut omnino propius succedere, audebat; sed longo circumitu devectum ad mare frumentum committebat navibus, quæ, observato vehementiore vento, per classem Romanorum, ante urbem exultantem, illaberentur. Nam, ut in vadosis importuosisque locis, sparsæ, & longius

a mœnibus, metu tormentorum, & ibi maxime tumultuantium fluctuum, stantes, facilem præbebant onerariis transitum; neque persequi transgressas usus erat, cum vento a mari fortiter flante (hoc enim solo tempore utebantur) fugientia vela nullo remigio consequi triremes possent. Sic Bithyæ naves, sic & aliæ mercatorum, qui lucri causa quilibet audendum crediderant, aliquem frumenti modum Carthaginem convehebant. Sed neque sæpe ejus rei obveniebat commoditas: &, quidquid advectum fuerat, vix delectis ad militiam sufficiebat. triginta hi millia implebant, quibus Hasdrubal commeatum omnem solebat dividere, ceteræ multitudinis nihil misertus.

XIV. Sed neque hoc obsessis diuturnum esse solatium Scipio passus, considerato loci ingenio, portus ostium, quod ad occidentem vergebat, obstruere instituit. Spem dabat haud irriti laboris os ipsum non amplo aditu patens, vicinumque ei litus, unde ducto in undas aggere sperabat prohiberi naves introitu posse. itaque ab ea lingua, quæ paludem a mari distinguit, orsus, molem in undas agere versus ingressum portus cœpit, prægrandium saxorum magna copia crepidinem fulciens, ne vi fluctuum fatisceret. totum opus ita surgebat ab imo, minori subinde latitudine, ut in fundo duos & nonaginta pedes crassum, in summo quatuor & viginti esset. Carthaginensibus quanquam certum videbatur, improbæ spei opus ultro cariturum successu esse, tamen nihil ad arcendos incepto Romanos prætermisum est: sed frustra omnis eorum & vis, & dolus fuit.

XV. Unde gravissimo terrore perculsi, cum nihil solitorum remediorum procederet, ad inusitati exempli consilium se contulerunt. Novum enim effodere ostium aggressi, qua medium in mare portus prospectabat, ubi major altitudo maris & vis ventorum impetuosior omnem obstruenti spem Romanis ademtura esset, opus tanto silentio perfecerunt, ut ne captivi quidem aliud indicare Scipioni

possent, quam dies noctesque continuum strepitum audiri; quid autem fieret, ipsi consulque juxta sciebant. Sed intus conclusi, quibus locatum opus fuerat, cum uxoribus & liberis, alii effodiebant terram, alii naves longas (superabat enim ex veteri copia materies) fabricabant: donec, perfectis omnibus, circa primam lucem aperto portu, subita classis emicuit triremium quinquaginta, cum cercuris & paronibus, aliisque levioribus navigiis haud paucis, ad omnem usum belli terroremque hostium instructissimis. Constat, si statim adnavigatum esset Romanæ classi, totam in hostium potestatem fuisse futuram: adeo ipso novi portus & classis hætenus ignoratæ miraculo attoniti obsessores erant: accedebat, quod nautica turba fere omnis ad urbis oppugnandæ varias partes abducta, vacuas defensoribus naves reliquerat. Maluerunt Pœni ostentatione virium ac industriæ, inanem lætitiâ pascere, quam solidum aliquem fructum ferre tanti laboris. neque enim ad magnas occasiones semper gnara utendi mēns hominibus datur: multique citius abstrusa penetrare, quam quæ ante pedes erant posita, prospicere potuere; dum istis acriter intenti, ad propiora, tanquam nihil habitura magni, quodam fastidio negligentiaque caligant.

XVI. Tertiô post die denuo egressis instructa jam Romana classis se objecit. pugnatum est summa utrinque animorum, corporumque contentione; cum in hoc certamine totam, alii salutis, alii victoriæ spem consistere haud immerito existimarent. Punicæ naves ut magnitudine hostilium urgebantur, ita nauticis artibus & levitate subducebant se periculis, neque mediocriter incommodabant hostibus, cum celeri appulsu naves inter & remorum palmulas subintrarent: & alibi terebrata puppe, alibi gubernaculis aut remis deterfis, aut alio per occasionem dato damno, priusquam prohiberi, aut plecti possent, eadem celeritate refugerent. Hunc ad modum cum ad feram usque vesperam

Incerta victoria pugnatum esset, Punicarum navium gubernatoribus recedere visum, non quasi vim hostium male sustinentibus, sed quia cum luce redintegrare pugnam malebant. Ibi parva navigia cum introire portum occupassent, singulis pro se festinantibus, incursum aliorum in alia ita constipatus est aditus, ut majores deinde naves, introitu desperato, ad aggerem applicare se cogerentur, quem haud procul moenibus olim, ad exponenda mercatorum onera, instructum, nuper, ne ab hostibus occupatus periculum urbi crearet, lorica præmuniverant.

XVII. Ad hunc igitur aggerem, prorsus in hostem obversis, exclusæ portu naves constiterant, & sugredientes non ex tabulatis tantum propulsabant, sed etiam ab aggere & lorica superne jaculantium ope defendebantur. Ita nova pugnae forma erat, Romanis quidem æquior ob liberum adversus stantia navigia impetum; sed quoties retrocedere volebant, molestæque ista longarum navium circumagenda erat, vicissim haud minora ab hostilibus damna patiebantur, quam rectis prorsus intulerant: donec peregrinis artibus Romanæ virtuti subventum. Sidenis quinque naves inter auxilia Scipionis erant, quæ, animadverso incommodo, hoc remedium excogitarunt. ancoras rudentibus alligatas jecerunt eo a Carthaginensium navibus intervallo, quod & ad impetum rostrorum sufficeret, & longitudinem funium, ex quibus religatæ erant ancoræ, non excederet. Ita concitato remigio in hostem invectæ, ubi ictum intulerant, continuo attractis ancoralibus ad locum, unde evectæ fuerant, ita revertebantur, ut prora hostibus obversa, nihil inde accipere incommodi possent. ea ratione repetitis sæpe vicibus immissæ retractæque, hostibus detrimentum sine periculo suo inferebant. Secuta est exemplum cetera classis, &, in noctem usque protracto certamine, in urbem Pœni recessere, depressa aut capta relinquentes navigia, quotquot fugam suorum sequi nequiverant.

XVIII. Postero die Scipio aggerem illum (erat enim ad postum occludendum vehementer opportunus) capere conatus, arietibus machinisque ad lorica adductis, vim inferre jubet. jamque magna pars corruebat, sperabaturque locus expugnari die sequenti posse: cum, nocte interjecta, Pœni, licet fame multisque præterea calamitatibus premerentur, perditorum hominum emittunt manum: non terra, quoniam aditus ibi non erat; neque navibus, quibus in mari vadoso incertum iter; sed globus nudorum hominum, neque aliud, præter faces, ne has quidem incensas, ferentium, ne luce conatus proderetur, mare ingressi, qua nemo quemquam penetraturum esse crediderat, ut quisque in altiora aut depressiora loca incidisset, pedibus aut nando transmittabant; donec ad locum, ubi machinæ stabant, ventum. ibi suscitato igne, accensisque facibus, ad machinas incendendas impetu provolant. eadem opera conspici hostibus facti, multis vulneribus excipiuntur, cum vix ullum, ut in nuda corpora, irritum telum caderet. Sed ipsi, sola desperatione armati, ferarumque more in ferrum & mortem ruentes, non minora mala, quam patiebantur, inferebant. neque discessere, donec machinis concrematis, tantum præterea terrorem Romanis injecerunt, ut multi, tanquam amissis rebus, fugam inirent.

XIX. Scipio, metu majoris incommodi, cum delectis obsequitans, quia fugam aliter sistere non poterat, fugientes pro hostibus cædi jussit. ita, paucis interfectis, reliqua turba in castra redacta, totam deinde noctem (tanta erat trepidatio) in armis exegit, nulla unquam fiducia hostium, quantum nunc desperatione omnibus exterritis. At illi successu læti, machinis corruptis, eadem, qua venerant, via domos repetiverunt. Affirmavit is casus Polybii prudentiam, qui, animadverso, locis iis vadofum mare esse, *ut tribuli aut asseres ferreis clavis horrentes, ad prohibendum hostilem incursum injicerentur*, suaserat. Id consilium non vecordia asper-

natus est consul; sed quod *absurdum esse* diceret, *si, jam muro urbis superato, formidare congressum hostium viderentur.*

XX. Prima deinde luce Carthaginienses, metu hostilium machinarum soluti, ruinas muri refecerunt, turribus etiam in eo multis per intervalla excitatis. Adversus quas Romani, simul atque novas machinas fabricaverant, aggeribus structis, faces inde & plena pice ac sulphure vascula in tabulata turrium jaculabantur. ita multis partibus materia concepit ignem: Romanisque inter flammās irrupentibus, superata gemino periculo propugnatorum constantia cessit. fuga tamen securior fuit; quod victoribus per loca, quæ, iisdem diebus sæpius cruore perfusa, lubricitate fallebant gradum, minor currendi facilitas fuit. Consul, toto aggere potitus, murum ex adverso mœniorum urbis, non longo ab illis intervallo, neque breviorē, quam illa erant, lateribus struxit, fossamque ante murum objecit. Ibi præsidium imposuit, quatuor jaculatorum atque velitum millia: qui continuo mœnia hostium observantes, simul apparere quemquam in illis viderant, ut ab æquali altitudine, non frustra petebant. Atque inter hæc ferme opera, hæcque pugnas, illa ætas præterit.

XXI. Consul, compulsis intra munitiones Carthaginiensibus, cum eruptiones illorum minus jam frequentes, minusque timendas operibus & armis effecisset, ne otiosum in castris militem pateretur, donec tempus anni sinebat, præsidia Punica, quæ passim adhuc per Africam erant, expugnare, omnemque spem auxiliorum obsessis adimere statuit. Dimissis igitur varia in loca, cum idonea manu, legatis tribunisque, ipse Nopherim, celebre irritō priorum ducum conatu oppidum, proficiscitur, cui per absentiam Hasdrubalis Bithyas præerat. in quibusdam præfuisse Diogenem invenio: quod quia ignotum aliunde nomen est eo bello, inclinare cogor, ut hoc alterum nomen Bithyæ fuerit, quemadmodum per ea tempora duplici nomine celebratus Himilco Phamæas

fuit. Iluc ipse navibus per stagnum, C. Lælio terrestri itinere circummisso, cum advenisset, castra ad centum quinquaginta passus ab hoste metatus, relictoque, ad Afros continenter infestandos, Gulussa, propere Carthaginem rediit, ne spatium temeritati suorum, aut hostium ingeniis desperationique, ad mutandam belli fortunam daret. Atque ita sapius ultro citroque commeando (abest autem Carthagine Nepheris tribus ferme & viginti passuum millibus) necubires suæ detrimentum caperent, strenue providebat.

XXII. Inter hæc oppugnata machinis Romanorum Punica castra, collapsa, quod inter tres turres fuerat, murorum spatio, aditum patefecerunt; cum superveniens Scipio tria delectorum millia facere impetum jubet, ordinibus in altum ita densatis, ut, etiamsi urgerentur primi, incumbente tamen suorum pondere, pedem quo referrent non habentes, vi ac necessitate perrumpere cogerentur. Dum ab ea parte magno clamore magnisque viribus certatur, a mille ad hoc a consule delectis castra capta sunt: qui neglectum a diverso latere vallum, omnibus in eventum periculi, quod ante oculos habebant, intentis, transcenderunt. Afri, conspectos intra vallum hostes numerare non permitte metu, tanquam totus Romanorum exercitus irrupisset, effusa fuga se castris ejecerunt. Ibi patentibus in locis palantes adeptus Gulussa cum elephantis Numidisque suis, ingentem cædem fecit. interfecti dicuntur eo die milites agrestesque, cujus generis ad commeatus vehendos magna in castris multitudo fuerat, ad septuaginta millia, capta decem; ferme quatuor millia effugisse.

XXIII. Nec tamen statim recipi Nepheris potuit, quæ petrae præaltæ imposita, adhuc duos & viginti dies exercitum occupatum tenuit, tanto difficiliore oppugnatione, quanto in locis asperis hiberna frigora vehementius sentiuntur. Sed magnum operæ pretium ab hac expugnatione consuli fuit. eodem enim fato Carthaginis vires cecidere.

§ XXI. Zonar. Appian. Strab. l. 17. § XXII. Liv. Epit. Appian.

His enim e castris commeatus mittebatur obsessæ urbi; hæc altera spes Punicum imperium amantibus, hoc unicum ad retinendos ambiguos vinculum erat. neque distulerunt cetera deinceps præsidia Romanorum fidei se permittere. unde, clausis in unam urbem Pœnis, omnis in posterum accipiendi ulla ex parte commeatus facultas intercidit.

XXIV. Capto castello, universas iterum copias ad Carthaginis obsidium reduxit Scipio: inter quas cum Hasdrubal, Numidarum conspectis equitibus, Gulusiam revertisse conjecisset, colloquium ejus expetivit. Tum maxime conspecta hominis vanitas, fortunæque suæ perabsurde ignarus animus fuit. Accinctus enim, armisque toto corpore tectus, quibus chlamydem ex Tyria purpura injecerat, cum decem custodibus corporis machæras ferentibus processit. deinde, relictis his, ad spatium ferme pedum viginti progressus, innuit regi, ut ad se accederet, cum contra fieri oportuisset. At Numida pro simplicitate gentis talia pro inanibus spernens, solus accessit: & cum ita sollicitè perarmatum vidisset, quanquam fossa valloque interjecto tegeretur, interrogavit, cujus metu arma induisset? Illo, Romanos metuere, dicente, *Non igitur, excipit Numida, sine causa, aut præter necessitatem urbi te inclusisti. ceterum, quid est, quod petas?*

XXV. Tum Hasdrubal postulare, ut ad Romanum imperatorem legatione fungeretur, sponderetque, Carthaginenses imperata obedienter facturos, modo urbi parceretur. Cum ad hæc Numida, puerilem esse petitionem, quodque rebus integris & sedentibus Uticæ Romanis impetrari non potuerat, nunc terra marique circumvallatis, omni ferme spe salutis amissa, frustra sperari, diceret: Hasdrubal, & sociorum opibus confidere, respondit (nondum enim, quæ ad Nepherim erant gesta, audiverat) neque de urbe desperare: summam autem habere spem in Deorum immortalium commilitio. non enim neglecturos injuriam per fœderis simulationem deceptorum: sed multipliciter expedituros salutis viam. quapropter jubebat orari consulem, ut & Deorum metu, & fortunæ reverentia infelicitis urbis misereretur: sciretque,

§ XXIII. Strab. Appian. § XXIV. Zonar. Polyb. ap. Valesian.

T. Liv. Vol. VII.

B b

Carthaginienses, ni postulata impetrassent, extrema potius omnia, quam deditionem subituros. His ultro citroque jactatis, condictoque, ut ante diem tertium eodem in loco colloquerentur, discesserunt.

XXVI. Hæc ubi Scipioni sunt a rege renuntiata, ille ridens, hæc igitur cum esses postulaturus, inquit, *Hasdrubal, tam impium & inhumanum facinus in captivos nostros designasti? nunc scilicet in Diis habenda tibi spes est, postquam omnia & divina, & humana jura violasti?* subjiciente tamen Gulussa, *studendum esse consuli, ut celerem rebus finem imponeret, priusquam alii exercitum, & cum eo suorum laborum operumque fructum, cogeretur tradere; jussit Hasdrubali renuntiari, se incolunitatem ipsi & uxori, & liberis, & propinquorum amicorumve familiis decem, dare, cum talentis decem & servis sex, quos optavisset.* Stato tempore item processit Pœnus cum solito fastu purpuræ & armorum, cultu incessuque, ut tyrannos, qui in scenam producuntur, ineptiis longe vinceret. Nam natura corpulentus erat, & tum etiam fagina aqualiculum auxerat: colore præter solitum adusto: ita ut potius bovis referret speciem in mercatu aliquo faginati, quam principis in ea civitate, cujus mala calamitatesque vel enumerare laboriosum esset.

XXVII. Ille tamen, auditis, quæ ab Romano consule Gulussa referebat, percusso identidem femore, *Ne vero, inquit, tantum hoc facinus Dii & fortuna sint, ut ulla dies simul saluum Hasdrubalem, & eversam Carthaginem videat!* adjecit, *nusquam honestius magnorum virorum busta, quam in patriæ ad extremum defensæ incendio, collucere.* Talis ea tempestate Pœnorum imperator fuit: cujus si orationem spectes, merito spiritus hominis & magnificas illius voces admireris: operibus deinde consideratis, convenientem sermonibus istis virum requiras. Nam inter publicæ famis horribilia mala, ipse, funestius omnibus spectaculum, convivia agitans, & secundas mensas ambiciose instruens, obesitate sua maciem

inopiamque miserorum traducebat. Neque transfugiis suorum, neque mortibus mutabatur, cum utroque modo magnum quotidie numerum amitteret: tanta jam vi necessitatis, ut etiam cadavera quidam in cibum converterent. At ille querelas aliorum irrisu, aliorum contumeliis aut nece profectus, in miserrima civitate potentiam iis artibus retinebat, quibus vix quisquam tyrannorum in beatissima uteretur.

XXVIII. Sed talibus nimirum opus est, cum populos diu felices ad interitum vocat humana omnia rotans rerum instabilitas. Itaque ne Græcis quidem (nam & horum maturescebat exitium) meliores aut sapientiores eodem tempore principes fuere. Nam & ab his bellum Achaicum hoc anno accensus est, quo totius Græciæ libertas deflagavit. Causæ illius ab injuriis & avaritia Atheniensium ortæ; quas deinde civitatum aliarum variis ambagibus implicati principes majore vecordia exceperunt, auxeruntque. Oropiis, ut supra diximus, multa debebatur, quem ab Atheniensibus Achaicum concilium ex mandato senatus Romani debebat exigere. At Oropios Atheniensis populus etiam pluribus injuriis affectos, Achæorum implorare fidem coegit. qui, ubi amicitia & reverentia nobilissimæ civitatis cunctabantur, Menalcidam Lacedæmonium, qui tum prætor Achæorum erat, promisso decem talentorum, in sententiam suam adducunt. Ille socium operæ mercedisque Calicratem, notum potentemque amicitia Romana, adsciscit. hi perficiunt, ut Oropiis auxilium promittatur. Quod ubi ad summam inutile fuit, nihilominus pecuniam ab Oropiis exegit Menalcidas, sibi que retinuit.

XXIX. Unde ulturus hominem Callicrates, abeuntem magistratu legibus reum facit, quod *Lacedæmoniorum Roman legatus, ut Achaico fœderi civitas illa eximeretur, summo studio contenderat.* Hoc periculum ut avertat Menalcidas, Diaeo Megalopolitano, successori suo, tria dat ex Oropico illa la-

§ XXVII. Zonar. Polyb. ap. Valef. § XXVIII. Pausanias in Achaiciis.

trocinio talenta, & ab eo, licet invitis Achæis, eripitur. Magna inde in invidia Diæus esse: ad quam excutiendam dum aliis occupare curis Achæos quærit, commode Spartana se negotia obtulere. Spartani ad senatum Romanum confugerant, orta de finibus controversia. senatus eos ad concilium Achæorum rejecerat, *ut omnibus in causis ipsius judicio uterentur, sola excepta capitalium rerum cognitione.* Id responsum mendacio Diæus corrumpit, *etiam de capite Lacedæmonii civis arbitrium Achæis permissum esse*, commentus. Quo cum uti Achæi velient, tanto acrius, quod controvertebatur; minæ primum, mox arma Lacedæmoni illata, profugere, qui jura civitatis tuebantur, Romam coegerunt.

XXX. Mittuntur eodem ab Achæis Diæus & Callicrates: sed, hoc Rhodi mortuo, solus Diæus pervenit. Hic ubi in curia multa indecora objecisset Menalcidæ, multa vicissim ab ipso audivisset, decretum ab senatu est, *ut ad judicandas eas controversias legati in Peloponnesum mitterentur.* Qui cum tardius proficiscerentur, spatium præbuere, quo Diæus Achæos, Menalcidas Spartanos decipere potuerunt: utroque plenissime, quod cupiebant, impetratum fingente. Hic error denuo in bellum populos illos egit, cum jam Damocritus prætura apud Achæos fungeretur. Hoc erat tempus, quo Q. Metellus, victo Andrisco, res Macedoniae componebat. Is missis forte ad res Asiæ introspectiundas persuadet, ut aditis Achæis *differendi belli, expectandique venientes Roma controversiarum arbitros, auctores sint.* Sed, sprete horum admonitione, Damocritus victos pugna Spartanos intra mœnia compellit, vastat uritque agrum: urbis capiundæ potius neglecta, quam non oblata occasione. quam ob noxam damnatus prodicionis, exilii causa solum vertit.

XXXI. Fit iterum Diæus prætor, Metelloque per legatos petenti promittit, *nihil adversum Spartam moturos Achæos, donec, qui Roma expectarentur, advenissent.* Interim vicos, Spartæ circumjectos, sponte incolentium præsidiiis firmat, toti-

dem ad bellum Lacedæmonium castella habiturus. Contra Menalcidas, creatus a Lacedæmoniis prætor, facinus infanum atque furiosum facit. Urbem omni genere cladum exhaustam, laceſſendis ultro adverſariis, novo bello implicat: oppidum Jaſon in agro Lacedæmonio, ſed Achaici tum juris, ex improviſo capit, captum diripit. unde, cum in ſummo omnium odio ſe eſſe intelligeret, ſalute ſua pariter & civitatis deſperata, veneno hauſto vita ſe educit.

XXXII. Inter hæc affuere Roma miſſi diſceptatores, quorum princeps Aurelius Oreſtes fuit. Hic magiſtratibus Achaicarum urbium, & prætore Diæo, Corinthum evocatis, ita locutus fertur: *Nihil antiquius ſenatus populiſque Romano & fuiſſe, & eſſe, quam ut ſociorum res, quas magnopere ad ſuam curam pertinere arbitratur, florentes quietæque ſint, ſi quis in dubium vocare vellet, vos ante omnes æquitatis humanitatiſque noſtræ teſtes producerem, Achæi. Vos enim Philippi Antiochique bellis, T. Quinſtio reliquiſque noſtris imperatoribus, quæ ea quæ ex voluntate populi Romani beneficia vobis tribuerunt, ſæpe & in ſenatu egiſtis gratias, & illorum pariter nominisſque Romani honoris cauſa plurima atque honeſtiſſima decreta feciſtis. Neque nos adhuc priſtini in vos animi propoſitiſque pœnitent, quin eadem illa, atque etiam, ſi ſit occaſio, majora lubentes volentesque concedamus: ſed a vobis interdum ea conſilia ſuſcipiuntur, quæ ad turbandam Græciæ pacem, & ſi verum auditis, ad periculum veſtrum pertinent.*

XXXIII. Fruſtra, regibus Macedoniæ Syriæque depulſis, Græciam liberavimus, ſi ſædius illam inteſtinis motibus opprimi patimur, quam ſi externa dominatione premeretur. Ecquando mutuorum inter conſanguineos populos certaminum odiorumque finis erit? Quanta cum Meſſeniis bella geſſiſtis, quanta cum Spartanis. Atque adeo nuper, cum Macedoniam Andriſcus rapuiſſet, & licet ſub falſo nomine vetus gentis potentia reſurgeret, vos neque veterum periculorum memores, nec adverſus futura providi, juventutem viresque finitimorum bellis atterebatis. Qui-

§ XXXII. Zonar. Polyb. excerpt. Legat. 143. Pauſanias.

bus ut tandem aliquis statuatur modus, neque nimia licentia in insanabile vulnus ruatis, senatui placet, neque Lacedæmonem Achaicæ formulæ censeret, neque ipsam Corinthum. Sed & Argos & Heracleam, quæ sub Œta est, item ex Arcadicis urbibus Orchomenum, & universim urbes, quæ sub Philippo fuissent, eximi oportere: neque enim has aut generis Achaici, aut antiquitus in eodem fœdere fuisse censet.

XXXIV. Hæc erant, quæ senatus verbis nuntiaremus. reliqua nostra erit benevolo magis consilio utilis, quam speciosa verbis, oratio. Senatui sic de vobis merito morem geri, non modo justum honestumque arbitramur; sed etiam utilitatis vestræ interesse. nam, ut suas quæque civitas leges suasque jura habeat, id non magis singulis, quam universæ genti expedire, neutiquam obscurum est. Tot diversas civitates, ut ad tempus certo fœdere coire posse non negaverim, sic in unum reipublicæ corpus cogi, ita temperatis legibus, ut in tam impari potentia par omnium jus sit, id vero nec evenire facile, nec, ubi evenierit, diuturnum esse potest. Citius inter flammam & aquas concordiam effeceris, quam ut pares æmulatione, potentiores cupidine, infirmi metu careant; neque adversus hæc consilium & ratio valet, & quæ sunt a natura humano generi insita, ea legibus frustra coerceas.

XXXV. Sed, ubi res ipsa clamat, supervacua omnis est oratio. si quidem ea formulæ vestræ vis esset, ut per hanc tranquilla beataque reipublica frui possitis; causam non dicerem, quam ut eo in statu maneretis, cujus adhuc vestrum poenituisse neminem: sed ubi alii cogunt invitos ad easdem leges, alii perire quam cogi malunt; quæ aut inter dissentientes societas, aut in commune felicitas esse potest? Nisi tanto jam tempore multis experimentis constitisset, non eadem omnibus Peloponnesi urbibus placere; rogari a reliquis urbibus debeat, ut reciperetis in formulam, non vero resistentes repugnantesque vi compellere. Quapropter, oro vos, Achæi, cum semper optastis quietem vobis, pacem Græciæ retinete. unaquæque civitas ex suo commodo rem suam publicam constituere optime novit.

§ XXXIII. *Pausan. in Achaic.*

XXXVI. *Multas inter sese ita convenire, ut loco, moribus, voluntate, &, qui subnasci quotidie possunt, necopinatis casibus, nunquam dissideant, optari potius, quam obtineri potest. si suis quique finibus contenti domi leges, foris pacem habeant; omnes ex aequo liberi, omnes beati agent. Quæ oborientur controversiæ, aut non exhibunt in arma, aut intra parva & prope-modum innoxia bella consistent: vicinorumque consiliis & auctoritate nostra facile tollentur. Quid porro vobis opus est jungendis per tot incommoda in unum opibus, quibus hoc rerum statu nulla potentia est opus? Neque enim vos crediderim, quamvis ea de re secretus sermo ortus est, adversus Romanos bellum meditari: jam intestina bella perniciosæ vobis sunt; adversus externa, quemadmodum contra Philippum Antiochumque defensi estis, virtute atque fide Romana defendemini.*

XXXVII. Hunc sermonem ne audire quidem sustinentes Achæorum principes, adhuc loquente Romano profiliunt, conciliumque ex præsentibus repente cogunt. Multitudo, cognitis, quæ senatus præcepisset, velut furore acta, quidquid Lacedæmonii nominis in urbe erat, partim trucidant; alios in vincula abripiunt: inter hos & aliis ex locis hospites, ut quisque tonsura, aut calceamentis, aut cetero vestitu, vel etiam ipsa appellatione ac nomine, Sparta-num referre videbatur. Neque legatorum reverentia (nam ad illorum hospitium multi concurrerant) præsidio miseris fuit, quo minus inde quoque per vim extraherentur: multum obtestante Oreste, ea facta ad injuriam senatus populi-que Romani pertinere. Sed parum apud tumultuantem multitudinem monita prudentium aut futuri cura valet: tantumque abfuerunt a defendendis aliis legati, ut ipsi quoque ad extremum fuga sibi consulere cogrentur.

XXXVIII. Qui ubi asperius omnia Romæ renuntiaverunt, tanquam non repentina populi consternatione, sed consulto injuriis affecti forent; senatus, maxima commotus indignatione, legatos e vestigio nominavit, inter quos præ-

cipuus dignitate Sex. Julius fuit. His mandatum, *ut leniter objugatis Achæis, de cetero accurate docerent, non esse præbendas pravis consultoribus aures, qui populum invitum ignarumque inimicitiis Romanis illigare molirentur: esse adhuc pœnitentiæ locum, si in auctores facti per imprudentiam commissæ vindicari sinerent.* Perspicuum ex his erat, ne prius quidem decretum, quod Orestes pertulerat, ad dissolvendum omnino concilium Achaicum spectavisse: sed hoc potius actum, ut terrore hoc injecto, frangeretur contumacia gentis, eaque ad colendam majori cum reverentia Romanam amicitiam transduceretur. Neque deerant, qui tempori tantum molliora mandata tribui putarent; quod adhuc Carthago resistebat. Sed nimirum is tum erat urbis Punicæ status, ut parvum omnino momentum in consiliis Romanorum facere posset: præsertim pacatis omnibus aliis, & magna civium Romanorum frequentia, quorum tum in tabulas publicas relata sunt trecenta viginti duo millia a L. Cornelio Lentulo Lupo, L. Marcio Cenforino cenforibus: quod lustrum sextum & quinquagesimum Romæ fuit.

XXXIX. Magistratum deinde Cn. Cornelius Lentulus, L. Mummius consules inivere. *Ludos seculares tum quantum factos* Cn. Piso, Cn. Gellius, & Cassius Hemina, qui eo tempore vivebat, auctores sunt. Provincias, Scipioni Africam, Metello Macedoniam, auferri non placuit. una consularis nova facta est Achaja, eamque Mummius sors attribuit: qui, licet maxima festinatione profectionem pararet, bellum tamen opera Metelli jam affectum reperit, ut postea memorabimus. Eadem enim hieme Scipio Carthaginem haud levius fame, quam per æstatem armis, premebat. unde mox facilior adversus invalidos & inedia exhaustos victoria fuit.

XL. Ergo vere incipiente Cothonem Byrsamque simul oppugnare instituit proconsul, quo magis etiam obsessos fatigaret. atque illi, desperata utriusque defensione, in Byr-

§ XXXVIII. Justin. Polyb. Eusebius. Fasti Capitol. § XXXIX. Cenforinus de die natal.

sam, ut munitiorem, cum rebus, quas auferre inter trepidationem potuerant, se contulerunt, incensis noctu navalibus, totaque ea regione Cothonis, quæ quadrata vocabatur, ne Romanis usui esset. At victores, occupato portu, protinus aditum ad arcem moliebantur. Ibi, dum Hasdrubal & Carthaginienses in Scipionem intenti, qua plurimum periculi apparebat, excubant, Lælius rotunda parte Cothonis, quam adhuc tenuerant hostes, superata, clamoribus & tumultu omnia implet. quo excitati, qui cum Scipione erant, vim & ipsi faciunt, viamque, qua cuique proximum est, aperiunt. In foro propinquo (nox enim superveniens tentari plura prohibebat) suos in armis continuit proconsul: donec orta dies reddidit prosequendæ victoriæ facultatem.

XLI. Itaque proconsul *ipsam*, quæ sola restabat, *arcem invadere*, dum, *amissa reliqua urbe*, *hostes trepidant*, quatuor millia recentium militum jubet. illi prius in templum Apollinis, quod in Cothone fuit, irrumpunt: Apollinisque vestem auream, & fastigium auro bracteatum pondo mille talentorum in prædam vertunt: neque prius inde a præfectis abstrahi possunt, quam gladiis concisas opes inter se dividant. ea militum aviditas, cum, aliis rapientibus aurum, aliis cædentibus, & manus amputatæ quorundam essent, effecit, ut miraculo & Apollinis iræ res adscriberetur. At illi, præda ablata, tum demum ad Byrsam oppugnandam convertuntur. Jam & Scipio ibi erat: magnoque certamine viam sibi aperiebat.

XLII. Ferebant autem in arcem a foro viæ tres, densis utrinque ædificiis præaltisque comprehensæ. ex quibus cum in Romanos tela conjicerentur, proxima quæque primum, deinde contigua expugnare. ut enim aliqua occupata domus erat, in vicinam aggeris præbebat vicem: semotisque propugnatoribus jungebantur tabularum injectione,

§ XL. Appian. Punic. Zonar. Florus. 2, 15. § XLI. Hist. miscell. 4, 12. Val. Max. 1, 18. Appian.

velut ponticulis angiportus, & ex domo in domum victor miles transcedebat. & hic quidem in tectis ædium, neque secius infra, ut forte invicem occurrerant, ad angiportus certabatur. plenaque erant omnia gemitu, & dissonis clamoribus, vulnorumque ac mortis varia imagine: dum alii ferro, alii ruina intereunt præcipitati ex solariis, afflicti humi, quidam etiam in erectas aliorum hastas gladiosque casu delati.

XLIII. Solum adhuc incendium aberat; non misericordia, sed quia partis utriusque magno numero repletæ domus erant: donec ad muros Byrsæ a Scipione penetratum. ad quos suffodiendos, quia propter vim propugnatorum valido robore erat opus, incendi tres inter forum arcemque vias iussit: statimque ruinas, ut quæ ab igne factæ essent, repurgari, quo posset ad arcem exercitus citra impedimentum accedere. Hinc vero multiplicata malorum facie, flammarum crepitus, procumbentiumque sonitus ædificiorum longe lateque horrendum fragorem edebant. Sed & inter cæmenta materiamque domorum, quas ignis aut nifus diruentium disjecerat, multa cadavera provolvebantur: multi etiam vivorum, quibus præcipue sexus aut ætas infirmior latebras suaserat, alii semiustulati, quidam laceratis ferro corporibus, miserabili cum ejulatu præcipientes cadebant. ne sic quidem finis malorum erat. sed quibus muniendæ viæ datum negotium fuerat, quidquid ante pedes erat, lapides, ligna, cadavera, vivos atque femineces, furcis ferramentisve correptos, in foveas & loca cava protrahebant. ibi quidam, capitibus alii alia parte corporis exstantes, diu cum anima luctabantur, amissa omni vivendi spe ac voto, ne mortis quidem extremo solatio compotes: donec eorum ungulis obtriti, miserrimum spiritum acerbissimo fine expellerent, tam sine culpa facientium, quam sine misericordia.

XLIV. Nec enim data opera hæc tam crudelia gereban-

tur, sed festinatione: quemadmodum & a munitoribus nihil proposito, sed per festinationem omnia fiebant. quippe contentio certaminis, & propinqua spes victoriæ, & his stimulis properans exercitus, præterea præconum voces, & tubarum cantus, tum tribunorum centurionumque cum cohortibus aut manipulis discurrentium strepitus, omnium sensus hebetaverant; ut veluti lymphati quantalibet objectorum spectaculorum fœditate parum moverentur. Duravit hæc oppugnatio dies noctesque sex continuas, in locum fessorum succedentibus subinde recentibus, priusquam labore tam improbo proconsul vinceretur. qui, ceteris per vices quiescentibus, solus omnium perdius & pernox, somnique & cibi, nisi inter ipsum opus rapti, expers, vigiliis, labores, aspectum ipsum tot tristissimarum rerum eadem patientia pertulerat. Tum vero lassitudini cedens, in excelso quodam loco, unde inspicere, quæ agerentur, & moderari posset, confedit.

XLV. Septimo demum die quidam supplices cum infulis Æsculapii venerunt (hujus enim Dei ædes religiose apud ipsos colebatur) precati, *ut vita dedituris sese salva esset.* Annuente Scipione, nisi quod transfugas exceperat, primo mulierum millia quinque & viginti, mox triginta millia virorum egressa potestati se victoris permiserunt. alii *virorum quadraginta millia*, quidam *hominum quinquaginta millia*, non distincto sexu, tradiderunt. Hoc tempore accuratissimis precibus oratum ab uxore Hasdrubalem ferunt, *ut amissa omni spe defendendæ urbis, postremum suæ suorumque salutis præsidium in clementia Scipionis quæreret:* sed expugnari tum stolidi & vani hominis pertinacia non potuit. in Æsculapii templum, cum uxore & duobus filiis, transfugarumque reliquiis (ad nongentos supererant) se recipiens. inde adjutus altitudine loci, (nam sexaginta gradibus adibatur) & transfugis per extremam necessitatem nihil non audentibus, repugnabat.

§ XLIV. Orof. 4, 22. Appian. Punic. § XLV. Orof. Florus. 2, 15. Appian. Zonar.

XLVI. Ut autem fame, vigiliis, laboribus, & metu imminentium confecti, succumbere tot ærumnis cœpere; defertis, quæ circum erant, in ipsam ædem se includere: non quod spes ulla superesset, sed ipsa desperatione adhuc ex tecto ædis sese defensuri. At ille magniloquus & inconcussæ firmitudinis ostentator Hasdrubal, nullo conscio, ne uxore quidem aut liberis admonitis, ad genua Scipionis cum ramis oleæ supplex procubuit. Quem ubi pedes assidentem proconsul ostendit transfugis, silentio impetrato, convicia dirasque in illum jaculati, ædem incenderunt, ut eodem igne sepelirentur.

XLVII. Inter illam necessitatem uxor Hasdrubalis, quam potuerat pulcherrime ornata, fertur ex adverso Scipionis cum liberis suis, templo jam flagrante, constitisse; elataque voce hæc precata esse: *Tibi quidem, Romane, nihil eveniat ob ista mala, quæ contra hostilem urbem belli jure commisisti: at ab hoc Hasdrubale patriæ, sacrorum, meique & liberorum proditore, Dii Carthaginis, & tu cum Diis, promeritas pœnas expectatis! mox in virum sermone vultuque converso, Tu vero, facinorosissime, perfidissimeque & effeminatissime mortalium, inquit, jam quidem me cum liberis communibus hoc incendium tumultabit. at tu quale ad dedecus servaris, triumphum victoris ornaturus, dux magnæ Carthaginis? quas postea pœnas huic, cui nunc supplex assides, dabis?* Hæc ubi dixisset, filios jugulatos in ignem mittit; superque ipsos eodem se præcipitem infert. simili ferme fato defuncta novissima Carthaginis regina, atque quondam absunta prima fuerat. Hic exitus mulieris fuit. qualis potius virum decuisset.

XLVIII. Hoste non devicto tantum, sed etiam deleto, cum excussus inter bellicos tumultus humanitatis sensus libero jam curis pectore rediisset, *illacrimasse Carthaginis excidio Scipionem ferunt: & postquam diu tacitus atque meditabundus adsistisset, versus Græci poetæ subito pronuntiasse,*

§ XLVI. Zonar. Suidas. Appian. Florus. Orosius. § XLVII. Appian. Val. Max. 8, 2. Zonar. Hieron. advers. Jovin. l. 1. Florus. Tertul. ad Nationes 112, 9.

quibus impendens Iliacæ urbi fatum prædicitur: interrogantique Polybio, quem belli domique secum habere consueverat, quorsum ista diceret, aperte fassum, se reputatione sortis humanæ, summa quæque tam facile vertentis, etiam de sua patria mœstis cogitationibus fuisse perturbatum. atque hoc ipse Polybius in historiis suis exposuit. Erat sane haud vulgare ad redarguendam fortunæ suæ stolide confidentium vanitatem exemplum, tantæ urbis vix iis, per quos patratum erat, credibilis interitus; *cujus quæ magnitudo fuerit, ex ignium mora non inepte conjici quidam jubent, qui per continuos dies septemdecim exstingui nequiverunt.*

XLIX. Scipio prædam urbis militi concessit, præter aurum argentumve & donaria templorum, ad quæstorem deferri iussit. Ex his nonnulla ad fidem victoriæ, celerrimæ navium imposita, Romam misit; bellique fine nuntiato, quid porro fieri senatus vellet, consuluit. Præmia deinde donaque militaria, ut cujusque virtus enituerat, data: nisi qui templo Apollinis diripiendo noxam contraxissent. Inter ceteros insignis Ti. Gracchi fuit, cujus sororem in matrimonio imperator habebat; itemque C. Fannii: qui duo ante ceteros murum hostilem conscenderant. In recognitione prædæ cum plurima spolia Siciliæ, a Pœnis diutissime vexatæ, inter signa præsertim ac statuas rarioris artificii reperisset, convocatis, qui tum aderant, Siculorum legatis, *omnia se restitutum edixit civitatibus Siciliæ, quæ potuissent agnoscere.*

L. Erant multæ clarorum virorum pictæ imagines; multæ etiam ex auro argentoque statuæ, & donaria Deum: ex quibus, quæ Himera quondam sublata fuerant, Thermitanis sunt reddita: alia Gelenfis: Dianam suam Segestani receperunt: nobilem illum Phalaridis sævitia taurum Agrigentini; quem Agrigenti unquam fuisse, Timæus impudentius, quam cautius, negavit. Scipio certe, cum Agrigentinis eum

§ XLVIII. Oros. Appian. Vellejus. 1, 13. Florus. § XLIX. Zonar. Appian. Plutarch. in Graccho s. 6. Idem Apoph. Rom. 111. Liv. Epit. Diod. ap. Vales.

redderet, dixisse dicitur: *æquum esse illos cogitare, utrum esset Siculis utilius, suisne servire, an populo Romano obtemperare; cum idem monumentum, & domesticæ crudelitatis, & mansuetudinis Romanæ, sint habituri.* Sed & Africæ, deinde Italiæ civitates, quæ inde fuerant a Pœnis abrepta, beneficio Scipionis recepere.

LI. Magnum id quoque favorem ei apud omnes populos peperit, quod nullam cuique benefaciendi occasionem prætermitteret, non solum donis magnificus, sed etiam æstimandi, quibus quæ donari deceret, follers. At inter hæc, cum aliis tanta largiretur, adeo nihil quæsit sibi, ut, cum partem spoliolum divenderet, nemini familiarium suorum neque libero, neque servo, quidquam ex iis ne emtum quidem habere fineret. hæc illi viro ratio, hoc ad felicitatem & gloriam iter placuit: quod si nunc inire quisquam cuperet, ultro insanire putaretur; dum neque sine opibus quoquo modo partis constare dignitatem posse creditur; & tamen iisdem alii sine iudicio spargendis famam aucupantur: adeo hodie quam cujuslibet laudis avidi, tam ignari veræ sumus. Ceterum proconsul arma Punica machinasque, & quod navium maritimis usibus aptum esse desierat, Marti ac Minervæ donum Romano more concremavit.

LII. At Romæ, cum victoriæ nuntium & signa ferens navis appulisset, seroque jam vespere vulgata per universam urbem tantæ lætitiæ fama esset, procurrare in publicum præ gaudio homines, amplectique invicem & gratulari temporum felicitatem, quod *nunc demum vivere se ac valere, neque libertatem solum sine metu, sed etiam imperium sine æmulo tenere, deleta Carthagine*, autumabant. neque sane nulla aut levi de causa sic exultabant animis, gnari, quanquam ingentia & alias bella, contra Macedones, contra Hispanos, demum contra Magnum Antiochum ipsi patresve eorum bellavissent, nullum tamen aut magnitudine periculorum, aut acerbitate cladum, æquale Punicis fuisse, quibus in Si-

6 L. Cic. in Verrem 4, 33 & 5, 12. Polyb. ap. Vales. § LI. Eutrop. Appian. Cic. de Offic. Plut. Apoph. Rom.

cilia Hispaniaque, sed maxime in ipsa Italia, per sedecim annos immania damna pertulerant: cum unus Hannibal oppida quadringenta flammis, hominum trecenta millia ferro consumsisse dicatur; ne computatis quidem, quos extra pugnarum fortunam alii casus abstulerunt.

LIII. Hæc igitur, & ad ipsam urbem Romam admota Pœnorum signa reputantes, vix fidem rei gestæ capiebant animis: alius alium rogitanter, *ecquid certis omnino auctoribus hæc tanta victoria crederetur?* Deinde in admirationem urbis victæ, hominumque extrema omnia pro urbe ausorum, versi, *quantum illius robur, quanta hominum audacia, quam incredibilis durities, quam ingeniosa calliditas fuisset, repetebant: non sine ingenti gloria imperatoris, qui hæc omnia consilio, labore, ac virtute superavisset.* His sermonibus non ista exemta. simul autem illuxit, honores Diis sunt habiti, & spectacula varii generis per publicam lætitiā edita.

LIV. De reliquiis porro Carthaginis etiam dum deliberatio in curia tenuit: dicebatur enim, quod evenit, *urbem Punica excisa, liberatam externo metu civitatem procliviorē ad domestica certamina fore. At Catonem contra suavissem, quidam referunt, nunquam enim periculo vacuam fore Romam, donec aliquid Carthaginis superesset.* ceterum Catonis exitum plures & meliores auctores secutus, ad superiora tempora retuli. Constat tamen, senatui placuisse, *urbem solo æquari, neque habitari solum illud postea: additis etiam execrationibus, si quis eum locum, maxime ubi Byrsa & Megara fuerant, iterum ædificiis frequentasset. ita tamen, ne cui accessisset ad ea loca spectandi ergo fraudi esset.*

LV. Decem præterea legati more majorum ad Scipionem missi, quorum de sententia res ordinaret. Hi ubi venerunt, omnes reliquæ urbis funditus excisæ. eadem aliis omnibus oppidis illata vastitas, quæ in parte Pœnorum per id bellum fuerant. ager illarum fociis populi Romani dono datus: largissime Uticensibus, quibus, quidquid Carthaginem

& Hipponem regionis interjacet, contributum. Neque Numidiæ reges suo sunt præmio defraudati. Ceteris, quorum neque officium, neque injuria insignis fuerat, tributum est impositum, in agros, & capita: factaque provincia, quam missus quotannis ab urbe prætor obtineret. Hæc ubi mandata legati ediderunt, Romam sunt reversi. Scipio, perfectis, quæ senatus præceperat, exemplo patris Æmili, qui post Macedonicam victoriam eodem genere magnificentiæ Amphipoli fuerat usus, eximia spectacula, omnis elegantiae non modo judex idoneus, sed etiam sollertissimus auctor, edidit.

LVI. Hæc calamitas Carthaginem, post septingentos quam condita fuerat annos, delevit. Alterum mox imbecillitatis humanarum rerum in urbe minus potente, sed æque nobili, documentum fortuna dedit, evertenda per occasionem Achaicorum motuum Corintho. Ejus cladis præcipua culpa penes Critolaum fuit, pari imperitia & fastu Romana arma pertinacissime provocantem. Cum enim hinc Sex. Julius Roma, inde Peloponneso Thearidas egressi, mutuo sibi in itinere occurrissent, Romanusque, *se afferre senatus mandata*, diceret, ambo in Achajam sunt profecti. Ubi cum Ægii consilium datum esset Romanis, Sex. Julius, humana oratione præsentibus allocutus, crimen in legatos admissum etiam clementius, quam ipsi ferme Achæi, interpretabatur; ut appareret, haud magno negotio satisfieri sibi de eo senatum passurum: dum ne quid ulterius vel in ipsos Romanos, vel contra horum decreta in Lacedæmonios peccaretur.

LVII. Quare quidquid in concilio sanum erat, gratanter hunc sermonem exceperet, conscii commissorum, & quæ poena populi Romani hostes maneret, ante oculos versante Macedonum exemplo admoniti. Sed vulgus imperitum,

§ LV. Strab. l. 17. Appianus. Liv. Epit. Liv. 43, 32. § LVI. Appianus. Vellejus. Orosius. Cicero de Nat. Deor. 3, 38. Florus 2, 16. Polyb. excerpt. Legat. 154. Pausanias. l. 7. Polybius.

magis quia, quod orationi legatorum opponeret, non haberet, quam quod probaret dicta, silentio fauciam ægramque mentem protegebat. At vero Diæus & Critolaus, ille postremo prætura functus, hic tum quoque prætor, & quotquot consilia cum his sociaverant (erant autem tanquam de industria delecti ex unaquaque civitate pessimus quisque) cum ipsi per se existimabant, tum aliis persuadere studebant, *fictitiam eam & temporis causa assumptam Romanorum mansuetudinem esse, omnia facere paratorum, ne super Africæ & Hispania bella etiam Achæos concitarent.* Tamen in præsentia satis modeste respondent: *se nihilominus Thearidam ad senatum missuros, ut crimen de legatis dilueret: interea conventum indicturos Tegeam, ut ibi cum Lacedæmoniis de pace ageretur.*

LVIII. Ceterum hæc ad fraudem tantummodo comparata, longe dissimilem, quam pro specie, quæ præferebatur, eventum habuere. Cum enim Romani, adductis etiam Lacedæmoniis, Tegeam constituto tempore venissent, Achæorumque principes adeo exspectassent diu, ut eorum adventum jam ferme desperarent; solus postremo Critolaus venit, non ut ulla in re promissa præstarentur; sed, elusis, quæ fuerant postulata, negabat, *nisi de sententia populi quidquam iis de rebus consilui posse. exspectandum igitur proximum concilium:* (id secundum leges Achæorum post semestrem futurum erat:) *in eo se de præsentibus negotiis relaturum.* Ferunt, *ea quoque fraude Critolaum usum, ut palam quidem mitteret, ad arcessendos Tegeam Achæos: secreto autem moneret, ne vocati accederent.* Romani, aperte videntes, homini incredibiliter arroganti ludibrio se esse, dimissis domum Lacedæmoniis, in urbem redierunt.

LIX. His digressis, Critolaus tota deinde hieme ad obeundas civitates usus, specie narrandi, quæ Tegeæ forent acta, Romanos calumniando, leve vulgus odio, & cupiditate rerum novarum inflammabat. Idem mandabat magistratibus,

§ LVII. Pausan. Polyb. § LVIII. Polyb. Pausan.

T. Liv. Vol. VII.

C c

ne quem aris alieni causa excuti, aut in vincula duci pateretur: utque debitorum solutio differretur, donec appareret, quis eventus belli Lacedæmonii futurus esset. His blanditiis delinita plebs, & futuri improvida, quidquid illi placuisset, facile & credebat dicenti, & imperanti obsequabatur.

LX. Quod ubi Q. Metello Macedoniam administranti cognitum, legatos ad gentem Achæorum Cn. Papirium, & Ælium Lamiam juniorem, cumque his A. Gabinium & Fannium misit. Qui ubi ad eandem ferme formam, ut Sex. Julius nuper, humanissime placidissimeque monuissent, *carerent Achæi ullo modo tam necessariam genti cum Romanis amicitiam abrumpere*; non lenivit vulgi temeritatem, sed accendit legatorum modestia. paucis exceptis, qui, quid ageretur, intelligebant, cetera multitudo, & ante omnes Corinthii (concurrerat autem forensis turbæ numerus, quantus alias nunquam) tanto furore correpti sunt, ut non modo irriderent Romanos, sed etiam cum tumultu & clamoribus maximis concione ejicerent. pulsatos fuisse, aut hos, aut qui cum Oreste fuerant, neque affirmare possis, neque refellere, aliis auctorum aliter eandem rem referentibus: superbius appellatos, atque adeo a quibusdam, quorum ædes præteribant, sordibus conspersos, certior fama est.

LXI. Quidquid eorum fuerit, Critolaus, cum sibi destinata supra votum videret procedere, magistratus, maxime quos adversarios in republica habuerat, perstringere cœpit: non jam abstinens gravioribus & apertioris consilii etiam in Romanos verbis: *Quousque, inquit, verba nobis dari patiemur, Achæi? aut quem modum finemque impudentissimi mortales opprimendæ libertatis vestræ stituent? Proximis annis, cum rempublicam nostram contentui, sedera ludibrio haberi, principes nostros ad causam dicendam, quasi captivos in externas oras trahi, alia etiam relatu indigna pateremur; Callicrates & pauci alii incusabantur: hi in ore atque odio omnium erant: absque his si foret, retineri dignitatem publicam, vitari servitutem posse*

§ LX. Liv. Epit. Florus 2. 16. Cic. pro L. Manil. Strab. 1. §. 1. Polyb.

putabamus. Quid igitur factum est? quieverunt post illorum fata injuriæ, simulque cum illis pericula nostra exstincta sunt? an vero multos pro uno Callicrates nacti, postquam ille periit, perniciosius etiam, quam donec salvus esset, laboramus?

LXII. Scilicet hæc nostra culpa sunt, Achæi, qui juris, a majoribus traditi, parum memores, quos affici pœnis oportebat, honoribus atque magistratibus extollimus: eorumque in hominum manus tradimus rempublicam, in quibus illa si fuisset, modis omnibus ad recuperandam illam liberandamque erat conningendum. Sunt adhuc, Deorum beneficio, qui commune Achæorum justa cura prosequantur: qui antiquiorem divitiis fidem habeant, & patriæ caritatem obesse se periculis non dubitent: quorum equidem rationem haberi oportebat. sed si tantum a veteri virtute descivimus, ut vel nullos ejusmodi viros reperiamus, vel repertis nolimus uti; ponamus illos liberæ opulentaque gentis indebitos nobis spiritus, & saltem eorum, quibus servituri sumus, gratiam occupemus, sponte nos imperiis offerendo. nam si, quo capimus ire, pergitur, sub inani libertatis umbra, proditione paucorum ignari invitique vendimur; ut, vilissimorum mancipiorum instar, ne heris. quidem continuo, sed communium herorum servis famulemur.

LXIII. Lubenter equidem in hoc negotio mentione Romani nominis abstinerem. sed quia illud semper in ore habent, quorum opera libertas nostra perit; dissimulare non possum, jam olim cordatos apud nos viros mirari, cur hanc invidiam, aut immeriti ferant Romani, aut meriti ferantur a vobis? Etenim potentiam utrorumque justa æstimatione metior: sed ipsi quoque vidimus, non semper pro modo virium belli fata dispensari, & interdum magnis apparatibus plus valere modicos, ubi concordia adsit, & morti quam servituti promtior animus. Sed de futuris viderint Dii! ego quemadmodum minime lucessendos esse Romanos arbitror, ita (dicendum enim semel est) amicos pati possum, dominos non possum: vobis autem, siquidem viri futuri estis, socios non desore scitote; sin semiviri, dominos.

LXIV. His atque similibus multis stimulare Critolaus ferocitatem amentis plebeculæ non desinebat. Quoque for-

tius omnes permoveret, interjiciebat voces, quibus *non temere ad hæc consilia ferri, sed esse sibi regum, esse civitatum aliarum conscientiam, & fore auxilia*, significabat. Cum ad hæc seniores coercere hominis intemperantiam vellent, & ab hujusmodi deterrere sermonibus, ille armatis advocatis ultro minabatur *malum, si quis accedere ad sese, prehendere, aut omnino chlamydem attingere auderet*. Tandem, cum furcata mente regere se plane non posset, *Atqui, inquit, nimis jam diu filco, ne, quod in rem communem est, edam. neque enim vel Lacedæmonii nobis, vel Romani, æque cavendi sunt, quam ex nostris civibus, qui potius illorum voluntati, quam patriæ utilitatibus serviunt. quoque fidem dictis faceret, Evagoræ Ægiensem, & ex Tritææ Strategium, quidquid in consilio magistratuum secreto tractaretur, id eos infimulat Cn. Papiro prodere.*

LXV. Cum ad hæc Strategius, *sibi quidem cum Papiro aliisque Romanorum colloquia fuisse, & futura tanquam Achæorum sociis amicisque, diceret; quidquam autem arcani protulisse cum jurejurando infitiaretur: potior apud corruptam multitudinem criminantis auctoritas, quam defendentis innocentia, fuit. Qua inclinatione animorum abusus Critolaus perfecit, ut decretum fieret de bello cum Lacedæmoniis proseguendo: quo ipso arma adversum Romanos summi, quanquam dissimulata eorum mentione, obscurum nemini erat. Atque sic quidem ille modis omnibus, ut ingenti malo patriam mactaret, laborabat. Legati autem Romanorum Cn. Papirius Athenas, inde Spartam profectus est, ad observandas temporum opportunitates; Ælius Naupactum: dum reliqui duo Metellum, quem affuturum esse non dubitabant, Athenis præstolantur.*

§ LXV. Pausan. Polyb.

JOANNIS FREINSHEMII
SUPPLEMENTORUM
LIVIANORUM

LIBER XVII.

IN LOCUM LIB. LII. LIVIANI.

E P I T O M E

LIBRI QUINQUAGESIMI SECUNDI.

Cum Achæis, qui in auxilio Bæotos & Chalcidenses habebant, Q. Cæcilius Metellus ad Thermopylas bello confligit: quibus victis, dux eorum Critolaus veneno sibi mortem conscivit. in cujus locum Diæus, Achæici motus primus auctor, ab Achæis dux creatus, ad Isthmon a L. Mummius consule victus est. qui, omni Achaja in deditionem accepta, Corinthon ex senatusconsulto diruit, quia ibi legati Romani violati erant. Thebæ quoque & Chalcis, quæ auxilio fuerant, dirutæ. Ipse L. Mummius abstinentissimum virum egit: nec quidquam ex iis opibus ornamentisque, quæ prædives Corinthos habuit, in domum ejus pervenit. Q. Cæcilius Metellus de Andrisco triumphavit; P. Cornelius Scipio Africanus Æmilianus de Carthagine & de Hasdrubale. Viriathus in Hispania primum ex pastore venator, ex venatore latro, mox justus quoque exercitus dux factus, totam Lusitaniam occupavit; M. Vetilius prætorem, fuso ejus exercitu, cepit: post quem C. Plautius

prætor nihilo felicius rem gessit, tantumque terroris in hostes inulit, ut adversus eum consulari opus esset & duce, & exercitu. Præterea motus Syria, & bella inter reges gesta referuntur. Alexander; homo ignotus & incertæ stirpis, occiso (sicut ante dictum est) Demetrio rege, in Syria regnabat. hunc Demetrius, Demetrii filius, qui a patre quondam ob incertos belli casus ablegatus Gnidon fuerat, contempta socordia inertiaque ejus, adjuvante Ptolemæo Ægypti rege, cujus filiam Cleopatram in matrimonium acceperat, bello interemit. Ptolemæus, in caput graviter vulneratus, inter curationem, dum ossa medici terebrare contendunt, expiravit: atque in locum ejus frater minor Ptolemæus, qui Cyrenis regnabat, successit. Demetrius, ob crudelitatem, quam per tormenta in suos exercebat, a Diodoto quodam, uno ex subjeclis, qui Alexandri filio, bimulo admodum, regnum asserebat, bello superatus, Seleuciam confugit. L. Mummius de Achæis triumphavit. signa ærea, marmoreaque, & tabulæ pictas in triumpho tulit.

I. **D**UM Critolaus inter Achæos omnia turbat miscetque, Thebis altera fax rerum novarum Pytheas Bœotarchus haud remissiore impetu cives suos in bellum Romanum impellebat. Is adolescentia turpiter transducta, mox etiam in republica per audaciam atque avaritiam multa designabat in perniciem civitatis eruptura: sed ubi Metellus, cui negotium hoc senatus dederat, *multam pro illatis Phocensium populo, Amphissensibusque, & parti Eubææ injuriis solvere*, jussit; ibi Pytheas exulceratos molesto imperio animos adeptus, prius exstimulare non destitit, quam professis contra Romanos odiis, ad arma cum Achæis conjungenda, incitaret. Trahuntur in societatem Chalcidenses. tam infirmis subnifus amicitijis in Romanos sumere bellum Critolaus audet; ne ulla quidem in eventum sequiorem sibi excusatione relicta. Quippe impingere & vinci, etiam post consilia non inepte capta, humanum est, & fortunæ solet imputari: at-

audacia cum imbecillitate, non infortunium, sed amentia recte vocatur. Itaque non difficilior Romanis victoria fuit, quam in tanta hostium stultitia oportuit.

II. Metellus, ut pondus legatorum suorum verbis adderet, eodem fere tempore, quo profecti illi erant, & ipse exercitum per Thessaliam præter Lamiacum sinum instituit ducere. Jam Critolaus, adjutus etiam Bœoticis auxiliis, Heracleam obsidebat, in Thessaliæ finibus sitam urbem, & Achæis contribui recusantem. Sed adventu Metelli cognito, Sperchiumque fluvium ab eo superatum, ex insana illa ferocia subito in tantum pavorem incidit, ut neque eodem loco exspectare hostem, neque saltem in angustiis ad Thermopylas auderet consistere; unde contra ingentes Persarum Gallorumque copias Græci magnâ olim virtute, magnaque gloria dimicaverant.

III. Ad Scarphæam Locridis urbem itinere fugæ simillimo contendens, non tamen attingere illam potuit, quin a Metello, qui festinanter insecutus fuerat, pugnare cogetur. Magnam ibi cædem fuisse non ambigitur: circiter mille vivi capti. Critolaus post res perditas, iudicii sui errore primum agnito, ut se præsentibus malis exsolveret, venenum in fuga bibit. Apud alios *neque vivus, neque mortuus repertus esse post pugnam* traditur; cum ad montis Cætræ radices fugam urgeret, in locis paludosis & profundis subfuisse creditus. Ex cetera multitudine mille Arcades, delecta juvenum manus, Elateam Phocidis urbem concessit, & ab Elatenfibus pro veteris amicitiae jure hospitaliter excepta est. Sed fama proelii ad Scarphæam vulgata, metuentes iram Romanorum Phocenses excedere finibus suis Arcadas jubent.

IV. Hos reditum per Bœotiam tentantes, haud prociſ Chæronea Metellus delevit. Hæc rerum a Metello contra Achæos gestarum proxima vero videtur esse narratio: neque

§ I. Pausan. Polyb. ap. Vales. Liv. Epit. § II. Orof. 5, 3. Zonar. Pausan. § III. Vellejus 1, 11. Pausan. Liv. Epit.

enim aut de numero prœliorum, aut de loco, similia apud scriptores traduntur. *Achæorum ad Thermopylas viginti millia*, iterum in *Phocensibus septem occisa millia*, Claudius refert. In *Achaja* quidam & *Elidis campis pugnatum* produnt: etiam de duce hostium ambiguum Valerius Antias facit, qui cum *Diæo pugnasse Metellum* (si tamen fidi sunt codices) scripsit. At Polybius, qui res domesticas ignorare non potuit, cum plerisque omnibus, *Critolaum* nominat: neque dubium habetur, eo demum sublato, imperium ad *Diæum* revertisse. Hoc enim jure Achæi utebantur, ut, ubi prætor fatis concessisset, qui proxime prætor fuisset, is magistratum usque ad tempus comitiorum gereret.

V. Igitur *Diæus*, belli, cujus primus auctor ipse fuerat, administratione suscepta, præsidium *Megara* misit, ad hominum millia quatuor, *Alcamene* duce, qui videlicet irrumpentem *Metellum* repellerent, quem modo cum florentissimo exercitu prætor Achæorum *Critolaus* sustinere nequiverat. Ipse *Argos* profectus, inde literas ad omnes *Achajæ* civitates dedit, ut ex vernis ad millia duodecim manumissi cum armis *Corinthum* mitterentur. quibus vernæ ad numerum non essent, ex aliis mancipiis supplere permissum. Ea quoque descriptio inæqualiter, & magis, ut prætori placuerat, quam ex opibus civitatum, impetrata. Quod etiam ob bella *Lacedæmonia* in magna difficultate pecuniariæ rei versabatur respublica, opulentiores quoque viros matronasque privatim aurum argentumque conferre coegit. Simul omnes, qui ætate militari essent, ex *Achaja* *Arcadiaque* *Corinthum* armatos convenire, jussit.

VI. His omnibus de causis maxima per *Achajam* trepidatio, maximusque cum desperatione metus erat. neque tamen ad sana consilia poterant adjicere animos; sed, quod percussis semel mentibus evenit, principum suorum dementiam dampnabant simul, & sequebantur. Præ ceteris *Eleorum*,

§ IV. Orosius. Florus 2, 16. Auctor de Vir. ill. c. 60. Pausan. Polyb. Liv. Epit. § V. Polyb. Pausan.

Messeniorumque, & Patrensiū flebilis erat conditio. Illi metu torquebantur; ne, ad mare objectis regionibus, primum consulis Mummii cum classe venientis impetum excipere cogerentur. Patrenses, cum circumjectis oppidis, accepta clades fregerat, magna parte juventutis in proelio amissa. tantaque illis locis consternatio fuit, ut multi necem sibi consciscerent, in puteos, aut ex præcipitiis desilientes; plures deferrent patriam, non quia, ubi vitam acturi essent, scirent, sed quia scire videbantur, in patria se non posse vivere. Erant, qui ad Romanos proficiscebantur, alii alios, ut auctores novarum rerum, accusantes; ne propinquis quidem parcente metu: quanquam nemo erat, qui adhuc aut exigeret delationem, aut quæstionem exerceret.

VII. Neque alia rerum apud Thebanos facies erat; imo aliquanto fœdior, quia fugientibus universis vacua urbis ædificia relicta fuerant. Inter ceteros & Pytheas, cum uxore liberisque in exilium profectus, tota Peloponneso oberrabat. Metellus enim, cæsis apud Chæroneam Arcadibus, ad Thebas cum exercitu victore accedebat. Quo ubi pervenit, laudabili mansuetudine usus, non templis modo domibusque pepercit; sed etiam quemquam Thebanorum vel manentem occidi, vel fugientem capi vetuit, uno Pythea excepto, quem *ad se adduci iussit, ubicunque repertus esset*. captusque is post aliquod tempus, supplicio capitis scelerum suorum furorisque pœnas luit. Thebis receptis, ad Peloponnesum Romanus convertit iter. jamque Megaris appropinquabat, cum Alcamenes, ne tentata quidem urbis defensione, cum præsidio suo Corinthum in castra Achæorum se recepit. Megarenses urbem sine certamine dederunt.

VIII. Jam & Diæus Corinthum venerat: neque multo post accessere missi a Metello Andronidas & Lagius & Archippus, viri nobiles, ut ad pacem accipiundam Achæos hortarentur. Magno enim studio Metellus agebat, si qua ante consulis adventum componere res Achajæ posset. Ne-

que temere sumpta spes erat, quod post infelicem pugnam multis jam displicebat bellum, positisque armis, parati erant per conditiones transigere. Sed vicit Diæi factio, qui diu ante, quos venturos noverat, tanquam fautores hostium calumniatus, postquam accessere, multitudinis odio temeritatique objecit. comprehensi igitur statim, & cum omni genere contumeliarum in vincula rapti sunt.

IX. Sub idem ferme tempus etiam Philo Theffalus Corinthum se contulit, adeo manifesta salutis eorum cura, ut multos jam Achæorum flecteret. Ex quibus Stratius Tritæensis præter ceteram dignitatem ætate quoque reverendus, Diæum amplexu blanditiisque rogabat, *ut conditionibus a Romano propositis assentiretur*. At consilii principes neque rationibus, neque prece movebantur: desperata ab Romanis salute, quos atrocius offendisse rebantur, quam ut exspectari venia posset. neque tamen ad exitum viris dignum se parabant, aut quidquam moliebantur, quod hominibus gloriæ imperiique cupidis dignum esset. non tamen mirabitur vilitatem & amentiam hominum, quisquis meminerit, neque alia decreta fieri posse, quam velint consilii publici moderatores; neque alios tum fuisse principes, quam Diæum & Damocritum, nuper exfules, mox fatali temporum imprudentia in civitatem receptos, cumque his Alcamenem, & Theodectem, & Archicratem, prudentia ac probitate nihil iis, quos dixi, præstantiores.

X. Fit igitur decretum non de Andronida modo & ceteris; sed etiam Soficrates in carcerem compingitur, hoc crimine, *quod cum prætoris vicem consilio præesset, auctor legatos ad Metellum mittendi fuerit, omniumque causa malorum, quæ deinceps incidissent*: sed & constitutis postridie iudiciis, condemnatum vinctumque acerbo cum cruciatu interemerunt, nihil elocutum, quale ipsi voluissent. Lagium autem, & Archippum, & Andronidam missos fecere, quia supplicio Soficratis irritatam multitudinem fenserant: simul

favente Diaeo, qui talentum ab Andronida, ab Archippo quadraginta minas acceperat. adeo his fordibus ille assueverat, ut ne in tali quidem tempore posset a captandis undecunque muneribus desistere.

XI. Idem paulo ante hæc tempora crudele quoque in Philinum Corinthium facinus ediderat, *mittere illum nuntios ad Menalcidam, & Romanorum sectam sequi*, criminatus: verberibusque & tormentis ipsum & adolescentes filios, ut alios aliorum quoque dolore cruciaret, in mutuo conspectu occiderat. Unde cum tales haberet Achaja duces, qui & domi crudelitate avaritiaque omnia corrumpabant, neque militiæ cognitionem ullam, aut lectione, aut auditione, aut usu, (qui soli res eas discendi modi sunt) paraverant: nihil potuit accidere felicius, quam quod accidit, ut quam celerrime victi, neque sæviendi in Achæos causam darent Romanis, neque ipsi haberent facultatem: agnoveruntque hoc ipsi mox Achæi, apud quos per ea tempora Themistocleum illud proverbii vice usurpatum est, *perieramus, nisi perissemus*.

XII. Inter hæc L. Mummius summa contentione ad exercitum festinabat, audito jam prospero Metelli prælio, ne post confectum bellum exfors gloriæ imperium haberet, veritus. Nam rerum illarum non modo fama celeriter est evulgata, sed etiam nuntii literæque Romam venere: ante omnes A. Postumii, qui primus omnium de victoria Metelli ad senatum scripserat. Namque homo ingenio vanus, cum sub tempus conferendæ pugnæ per simulationem valetudinis Thebas Phthioticas concessisset, post eventum omnia perscripsit diligenter, eoque verborum genere, tanquam ipse interfuisset. Inde, quæ historiis ejus habenda sit fides, haud difficile arbitrato est, in quibus & ipsis quemadmodum a Catone sit illusa puerilis in viro consulari jactantia, multorum scriptis annotatum est.

§ X. Polyb. § XI. Polybii fragmenta in editione Casauboni p. 1014. Polyb. ap. Valef. Plut. in Themistocl. c. 41. § XII. Zonar. Polyb.

XIII. L. igitur Mummius, cum jam ad Isthmum castra Metellus admovisset, lictoribus tantum, & paucis equitum comitatus, non die, non noctu intermisso itinere, cum Aurelio Oreste, qui in Achaica legatione fuerat, in castra sub lucem venit. Inde Metello in Macedoniam dimisso, ipse in Isthmo substitit, donec universæ copiae convenissent. Summa exercitus fuit equitum tria millia quingenti, pedum tria & viginti millia. His accessit sagittariorum ex Creta manus: & duce Philopœmene, Attali regis auxilia. Ex his partem consul, adjunctis etiam nonnullis Italicis cohortibus, ad mille quingentos passus ante castra locum capere stationibus jussit. Hos, cum negligentius agere viderentur, subito effusa hostium manus turbat, occisisque nonnullis, ceteros usque ad castra persequitur. unde submota, & ad sua vicissim castra repulsa, tamen scuta circiter quingenta ex hostibus capta refert.

XIV. Post hæc Dieus, contracto quod ubivis habebat virium, potestatem pugnandi consuli facit: consul, ut hostium augeat vecordiam, in castris suos continet. crescit hinc Achæis animus, adeo intemperanti alacritate, ut non modo priores in vallem inter diversa castra mediam descenderent, sed etiam vehicula secum ducerent, ad hostium reportanda spolia; conjugesque suas cum liberis in vicinis montibus spectare dimicantes juberent, cito de spectatoriibus prædam hostium futuros. Apud Leucopetram, sub ipsis Isthmi faucibus, concursus est. Equitatus Achæorum statim fugit, vix prima expectata impressione Romanorum equitum, quos consul ex occultis latebris subito in latus hostium immiserat. pedes aliquanto constantius restitit; quam nudatus equitum fuga, minutoque animo, etiam multitudine hostium urgeretur. Tandem mille fortissimi viri conglobati, transversam aciem perrupere. Tum vero effusa fuga, ubi quisque potest, salutis præsidium quærunt. Ipse

§ XIII. Agellius 11, S. Plut. in Caton. major. c. 23. Flor. 1, 26. Orof. 5, 3. Pausanias.

Diaus recta Megalopolin, patriam suam, intendit cursum. qui si Corinthi munitionibus seque, & qui ex fuga potuissent colligi, esset tutatus, potuisset consulem tadio obsidionis ad conditiones non iniquissimas adducere. nunc vero statim atque inclinare suos sensit, tota spe abjecta, refugit domum; eaque incensa, conjugem, ne in hostium veniret potestatem, interfecit, ejusque corpus in incendium misit, ipse veneno epoto vitam posuit.

XV. At qui in urbem Corinthum confugerant, absentia ducis perterriti, nocte proxima omnes dilapsi sunt: exceperunt etiam Corinthiorum præ pavore plurimi, omnes, quos in urbe sua non videbant, captos cæsosve rati. neque tamen consul, licet vacuam apertisque portis indefensam, continuo ingredi voluit, insidiarum metu. Tertio demum die, omnibus exploratis, Corinthum Romana signa intraverunt. puberes reliqui a militibus interemti ferme sunt; mulieres puerique sub corona veniere. *multos etiam flammis consumtos esse*, traditur: dum urbs, crudeliter prius direpta, præcinnente tuba deletur. *Tantum enim fuisse incendium*, ferunt, *ut cum omni ex parte subjæctæ ædificiis faces essent, quidquid comprehensum intra mœnia fuit, eundem in apicem coeuntibus flammis, tanquam unus ignis arderet.* Atque is deinceps etiam, cum cineribus ruderibusque sopitus & oppressus videretur, diu retinuit fervorem; perieruntque eo fato multi Romanorum, quos, ad scrutandum aurum argentumve flammis liquefactum, avaritia in fumantes adhuc ruinas miserat.

XVI. Muri deinde, qui soli remanserant, funditus sunt diruti, etiam lapidibus in pulverem comminutis. Ita Corinthum L. Mummius evertit ex senatusconsulto, quod ibi violatum in legatis gentium jus fuerat; post annos nongentos quinquaginta, quam ab Alete, Hippotis filio, qui sextus ab Hercule numeratur, condita fuerat. Hac acerbitate pœnarum opus videbatur, ut, quod imperium hactenus cle-

§ XIV. Zonar. Pausan. Justin. 34, 2. Auctor de Vir. ill. c. 3 & 60. § XV. Pausan. Auctor de Vir. ill. Zonar. Florus 2, 16. Oros. 5, 3. Justin. Suidas in ΤΕΤΥΧΟ.

mentia commendasset populis, id etiam adversus mansuetudinis contemptum, terror severitatis defenderet. Atque hanc rationem augendi res suas, firmandique priscis etiam imperiis, placuisse credibile est; ut incipientem potentiam facilius lenitate putarent crescere, ad summa perductæ non esse firmiorem metu custodiam. Nam ad modicas opprimendas opes, si per sævitiam timeri meruerunt, haud difficulter concurritur: validioribus rebus majus a facilitate periculum est; virefque, non quasi infirmæ, sed quasi otiosæ, spernuntur.

XVII. Ceterum Mummius, reliquis Græcorum concessa libertate, Corinthios omnes, & ex servis, quos Diæus armaverat, quotquot superstites prælio erant, sub corona vendidit. Ad quos, sine ulla aliorum injuria, certo comprehendendos, hac arte dicitur usus. Convocatis promiscue omnibus, dissimulatoque interim proposito suo, armatos circumfudit: deinde edicere præconem jussit, *Corinthios, & qui manumissorum cum his militassent, in servitutem peti: ceteris periculum non esse. jubere autem consulem, ut quisque adstantem sibi teneat.* Ita cum effugium aut latebræ nullæ essent, facile, qui quærebantur, sunt agniti. Ceteræ quoque prædæ magnam partem vendidit. Vis erat incredibilis signorum, tabularum vestiumque pretiosarum, præter ea omnia, quæ incendio hausta, aut a diripientibus confracta conculcataque perierant.

XVIII. *Militaris insolentiæ cum imperitia conjunctum grande specimen vidisse*, Polybius refert, qui tum ad sublevandam, si qua posset, patriæ calamitatem, ex Africa recens advenerat. *Aristidis enim summi pictoris Liberum Patrem, qui, admiratione perfectissimi operis, proverbio, nihil ad Dionysum, dederit locum, humi jacentem, ludentibus aleam militibus alvei vicem præstitisse.* Eadem mox tabula, cum præda vendere-tur, Attalo regi sex millibus nummum emta est; cum pro-

§ XVI. Plin. 35, 12. Liv. Epit. Vell. 1, 3 & 13. Diodor. ap. Valef. § XVII. Pausan. Front. Strat. Flor. 2, 16.

consul, pretium admiratus, rescidit venditionem, ex alieno iudicio pulchritudinem tabulæ suspicatus: quam mox in templo Cereris posuit, ubi spectata fuit magno visentium studio, donec ædis ejus incendio, postquam annos centum quindecim ibi fuisset, periit. Et quoniam ad hoc genus elegantiae delapsi sumus, ex eo quoque tempore frequentatum æris Corinthii nomen est: magis quia fluentibus in unum auri, argenti, ærisque metallis, magna simul ejus materiae copia existit, quam quod tum primum ejus mixturæ reperta sit ratio. nam & multis ante ætatibus celebrata Corinthii operis nobilitas fuit.

XIX. Ad hunc modum excisa Corintho, ager publicatus est, cujus maximam mox partem Sicyonii obtinuerunt. Itum deinde ad aliarum urbium supplicia. Thebarum & Chalcidis everfis urbibus, Chalcidensium equitibus multis occisis, *Bæoti Eubæensesque centum talenta Heracleotis pendere jussi: Achæi ducenta Lacedæmoniis*. Sed horum deinde gratiam civitatibus senatus fecit. Ceterum aliarum quoque Græcarum urbium, quæ cum Achæis senferant, mœnia sunt dejecta, armis ademptis. Sed & donaria statuasque multis ex civitatibus sustulit consul, ut tamen consecratis ad cultum abstineret. ex his, quæque Corinthi fuerant capta, magnam partem Philopœmeni, qui Attali auxilia duxerat, dedit; quæ longa deinde ætate spectata Pergami fuerunt.

XX. Convenere deinceps decem legati, consilium a senatu imperatori additum, ad res Græciæ constituendas. In his A. Postumius, & C. Sempronius Tuditanus fuerunt. Patrem Mummii, quanquam sit, qui referat, fuisse non puto, cum etiam de Sp. Mummio fratre proconsulis M. Tullius dubitet, quem in Achaja tum fuisse constat, fratris potius legatum, quam in decem fuisse; quod non soliti essent majores legare in decem, qui imperatorum necessari

§ XVIII. Strab. 1. S. Plin. 35, 4 & 10. Diod. 1. 50. Oros. 5, 3. Flor. Plin. 54, 3. Athenæus 4, 1. § XIX. Zonar. Strab. Liv. Epit. Polyb. ap. Vales. Machab. 1, 8. Pausan. Corinthiac. & Achaic. Cic. in Verrem 4, 2.

essent. Hi ubi venerunt, popularis status ubique per Græciam sublatus est, magistratibus ex censu constitutis. Libertas tamen urbibus, & suæ de cetero leges relictæ. Vectigalia deinde imposita; possessionibusque, quas extra fines urbium suarum habere locupletes consueverunt, interdictum. Concilia nationum in Achaja, Bœotia, Phocensibus, & per universam Græciam abolita. quæ tamen & ipsa paulo post supplices clementia senatus recepere. Prætor sane quotannis in Græciam mittitur, sub nominis Achaici præscriptione, quia, cum in provinciæ formam redigeretur, penes Achæos principatus gentis fuerat.

XXI. Multum eo tempore Polybii virtus atque gratia, præcipue ex Africa in Scipionis amicitia, profuit Græciæ: nam & pro Philopœmenis honoribus, qui per Achajæ civitates clarissimo viro constituti fuerant, cum abolerentur, prospero successu egit: & statuas Achæi, unde genti nomen, Aratique & Philopœmenis, quæ jam in Acarnaniam erant translate, obtinuit, rem multitudini gratissimam; unde & ipsi statuam ex marmore candido mox posuere, cum insigni titulo: *neque offensuram fuisse Græciam, si Polybii consiliis paruisset; & post offensam illum unum afflictæ levamen extitisse.* Idem, cum quæstori bona Dîæi aliorumque damnatorum vendenti (bona enim eorum, qui conjuges aut liberos non habebant, vendi placuerat) a decem legatis præceptum fuisset, *ut, quæ ex illis Polybius postulavisset, gratis addicerentur*, non modo pro se petiit quidquam, sed etiam amicis auctor fuit, nihil ex spoliis istis attingendi. Hæc omnia cum intra semestrem tempus decem legati perfecissent, in Italiam redierunt. Polybius ex eorum mandato civitates obiit, respublicas ad formulam ab ipsis præscriptam composuit, lites sustulit, brevique perfecit, ut statu præsentis non acquiescerent modo Græci, verum etiam laterentur. Unde vicissim omnibus illum eximiis honoribus per singulas urbes colere instituerunt. Quos inter in foro Me-

galopolis statua fuit, cum inscriptione, quæ, *Polybium Lycortæ filium Romanorum in Græcos iram mitigasse*, testaretur.

XXII. At Romæ per idem tempus a duobus imperatoribus triumphatum est. Prior Q. Cæcilius Metellus de Macedonibus Achæisque speciosissimum triumphum in Capitolium duxit. Inter multos captivos, qui currum ejus præcesserunt, insignis maxime Andriscus fuit, qui se pro Philippo aliquamdiu & Macedoniae rege gesserat; magnum ad utramque sortem fortunæ mutabilis exemplum. Tertius hic de Macedonia triumphus fuit. in quo inter cetera spolia transvexit turmam, Alexandri Magni imperio a præstantissimo artificum Lysippo factam. Quinque & viginti ex amicorum ala in pugna ad Granicum ille rex amiserat; eorum equestres statuas expressa singulorum similitudine fieri jussit, suamque inter illas. Hæ omnes in urbe Macedoniae Dio locatæ fuerunt: inde Metellus Romam transtulit. Metello cognomen ex provincia debellata *Macedonici* hæsit: non quidem virtuti ejus indebitum: sed aliqua mutatio morum Romæ ex talibus quoque colligi potest, cum Q. Metellus cognomen assumeret, quod ex eadem Macedonia neque T. Quinctius primum, neque deinde L. Æmilius, majoribus aliquanto rebus, & contra veros reges gestis, assumerant.

XXIII. Justioribus aliquanto causis Æmilianus Scipio *Africani* cognomentum, quod hætenus hereditarium habuerat, suis meritis adscripsit; hostibus extinctis acerbissimis, excisa urbe æmula, amplissimisque regionibus in provinciæ formam redactis. De quibus rebus cum, reportato in Italiam exercitu, apud Patres disseruisset, *triumphus ei de Carthagine & Hasdrubale* magno cum honore decretus est, quem longe amplissimum duxit, translata statuarum & donariorum magna vi, omnique illo apparatu opum, quas tanto tempore multarum nationum regumque victrix Car-

§ XXI. Plut. Præcept. Politic. Polyh. Pausan. Zonar. § XXII. Liv. Epit. Val. Max. 7, 1 & 5. Eutrop. Flor. 2, 14. Appian. Punic. Vell. 1, 2. Plut. in Alex. c. 26. Arrian. 1, 5. Plin. 34, 5.

T. Livii Kol. VII.

D d

thago ex toto orbe congefferat. Argenti translatum reperio quater millena quadringenta septuaginta millia pondo. Duxit ante currum inter alios Hasdrubalem & Bithyam, qui mox cum nobilissimis deditorum per Italiae municipia distributi, vitam in libera custodia exegerunt. ceterorum pars in servitutem vendita: plures in carcere interierunt.

XXIV. Inter ista tot prospera (nec enim uti singulis hominibus, ita populis imperiisque ulla sine tristitiae temperamento solida felicitas est) res in Hispania non difficiles modo erant, sed etiam magis ac magis adversae duraeque. Praecipuus ibi Romanorum exercituum terror Viriathus erat, ex humilibus initiis ad ingentem potentiam famamque proventus. Nam ex pastore venator, ex venatore latro, cum & audacia patientiaque ad omnes belli labores duratus, & cum accuratissima notitia locorum, pernecitatem viresque corporis eximias consecutus esset, post Galbae in Lusitanos facinus, quod ipse periculum actu & robore effugerat, hominum, quibus neque res, neque spes certa usquam erat, manu collecta, multa feliciter audendo coepit inclarescere: donec, confluentibus ad eum quotidie plurimis, iusti jam exercitus ductor, castra in aperto ponere, & cum populi Romani praetoribus acie congregi ausus est.

XXV. Primus eorum C. Vetilius collatis signis victus, &, cum in potestatem hostium pervenisset, interfectus est. Res ad hunc modum gesta traditur. Turdetaniam vastabat Lusitanorum exercitus, ad hominum millia decem. In hos recens Roma egressus cum supplemento C. Vetilius, assumptis veteribus copiis, strenue movit: adeptusque pabulantes, magno interfecto numero, ceteros in locum adeo iniquum compulit, ut manentibus a fame, abeuntibus ab hoste certissima perniciēs imminere videretur. Ergo legatos cum velamentis supplicum mittunt. horum talis oratio fuit:

XXVI. *Non equidem eo proposito, Romani, bella nobiscum*

§ XXIII. Zonar. Eutrop. Liv. Epit. Appian. Plin. 33, 11.
 § XXIV. Silius 5, 354. Liv. Epit. Diod. 52, 5. Appian. Hispan. Flor. 2, 17. § XXV. Diodor. Appian. Orosius.

geritis, ut, innoxia gente deleta, solitudinem faciatis: aliter neque supplicatum venissemus, & si nihil potuisset melius, hoc certe egissemus, ne inulti occideremur; haud secus atque certamine cum feris inito, quod pacem ac fœdera nescit, nec nisi victoria aut morte terminatur. Vos autem late per omnes terras non modo rebelles populos victrici Marte domuistis, sed etiam plerisque, æquis conditionibus illigatos, de hostibus socios amicosque fecistis. Hi ipsi populi, pro quorum tuitione castra ista hoc loco posuistis, aliquando hostes vestri, neque minori vobis odio, quam hodie Lusitani, fuerunt.

XXVII. Igitur in causa haud multum dispari quid parem a vobis expectare humanitatem vetat? præsertim quia vobis notissimum est, non ingenii ferocia, aut odio imperii vestri, sed fame ac necessitate cogente, arma nos induisse; quo alimenta, quæ nobis a vicina & consanguinea gente denegantur, quando per amicitiam potiri non possumus, vi extorqueamus. Neque scè belli ulla justa causa est, aliis armis rectius ignoscas, quam quæ nulla imperii aut opum cupidine, tantummodo extremi exitii prohibendi gratia sumitur. Natura enim, quæ rerum omnium mater atque domina est, ideo nimirum tanta frugum copia terras aliquàs ditavit, ut exinde sterilitati aliarum solatium esset, & populi, quos ipsa genuisset, necessariorum rerum inopia interire ne cogerentur. Multiis jam ab annis, inopia commeatuum incursare provinciam vestram soliti, magnam agrorum partem vastavimus: magna pars, metu cultorum otiosa jacet, remotiora quoque, quo nos penetrare non possumus, a vestris & sociorum exercitibus exhauriuntur. Horum non maximam portionem si nobis incolendam dederitis, jam omnia hæc bella quiescent, pacata fidaque provincia vobis erit, & his apparatibus, ubi plus gloriæ præmiorumque apparebit, utemini.

XXVIII. Neque gratuitum id beneficium poscimus. quæ sola habemus corpora atque arma, offerimus invicem, omnibusque bellis vestris fortem fidemque operam navabimus. Id vobis utilius erit, quam per invios montes pecora nostra consequi, & aut difficili bello multos viros fortes amittere, aut, etiamsi victoria quæsitæ sit, nihil inde præter vanos titulos & inanem triumphum

reportare. Sexaginta amplius anni sunt, ex quo, pulsus Hispania Pœnis, nostris exercitibus ducibusque signa conferre cœpimus: quæ toto eo tempore casuum varietas fuerit, commemorare nihil attinet. hoc utique tanto temporis experimento cognosci potuit, gentem Lusitanam neque excindi facilem, neque servitii patientem esse. Denique sic habetote, libertatem nobis vita dulciorem, ad vitam porro ducendam, agro & frugibus opus esse. hæc si tribueritis, illam reliqueritis intactam, Diis bene juvantibus, efficiemus, ne quem sociorum vestrorum fide atque virtute ante Lusitanos esse opinemini.

XXIX. Non displicuit prætori conditio: jamque pacta fanciebantur, cum Viriathus, *Ecquæ hæc insania est*, exclamat, *viri? Quotquot hodie hic sumus, Romanæ perfidiæ, vitata Galbæ fraude, vitata Luculli, reliquiæ sumus: multiplicem nostrorum numerum idem ille, quo nunc petimur, dolus hausit. Nocentior Romani dextra est, cum posito ferro pacis & fidei ministram simulat. Neque adhuc eo devenit, ut, si deditione tuti esse possemus, tantum dedecoris sit subeundum. Si obsequi salutaribus imperiis potestis, parata mihi ratio est, qua incolumes simus. Omnibus promptissime operam obsequiumque pollicentibus, exercitum educitum velut ad pugnam instruit: mille ex his delectos manere secum, ceteros, ut primum vidissent equo insilientem, dispersos in omnem partem contente fugere, jubet, admonitos, ut ad urbem Tribolam se operirentur.*

XXX. Vetilius, abeuntes metu resistentium insequi non ausus, suosque pæne dedititios parato instructoque eripi dolens, tandem in Viriathum vertitur. At ille pernicipibus equis conatum hostis omnem eludens, modo fugienti similis, deinde resistans, nonnunquam ultro minatus impressionem, & eo die, & sequenti toto, Romanos iisdem in campis detinuit. Tum vero, suis abunde spatii ad securitatem fugæ fuisse conjectans, noctu per ignotas vias equorum celeritate ablatus, Romanos armis onustos, imperitiaque locorum & imparibus

equis tardatos, frustravit. Hoc tam callidum & felix consilium maximam apud barbaros admirationem Viriatho, maximamque auctoritatem peperit: magnaue deinde multitudo ad eum, tanquam unicum ducem, sese aggregavit.

XXXI. Ceterum Vetilius, Viriathum persequens, quem Tribolæ esse audiverat, eodem cum exercitu proficiscitur. Iter per saltus faciundum erat, in quibus Viriathus partem copiarum abscondiderat: ibi cum paucis conspectus, deinde velut pavore refugiens, Romanum pudore & ira incautius instantem in paludes & voraginosæ loca pertrahit: ipse solidis notisque semitis cum evasisset, repente conversus, simul a lateribus exsurgentes, qui occultati fuerant, Romanum agmen cœno impeditum adoriuntur, & in loca magis magisque difficilia detrusum fundunt fugantque. Vetilium qui ceperat barbarus, senem videns & obeso corpore, tanquam vile mancipium interfecit. Cæsi cum eo captive fuerunt millia quatuor: sex millia Carpestum (quæ celebris illa veterum carminibus Tartessus esse creditur) cum quæstore perfergere. Is trepido adhuc militi non injuria diffusus, a fociis tum nationibus Bellorum Tithorumque impetrato quinque millium auxilio, eam manum Viriatho opposuit. a quo sic internecone deleta est, ut ne nuntius quidem effugisse tradatur. Tanto major quæstori metus, majorque necessitas fuit, ut intra mœnia urbis, haud multum ab obsessi fortuna distans, copias contineret.

XXXII. Unde C. Plautio, qui provinciam eam fortitus fuerat, major exercitus, millia peditum decem, mille trecenti equites dati. Huic etiam infelix & multis præliis adversa expeditio fuit. Cum enim ad suas artes Viriathus sese retulisset, ex Carpetania, quam post Vetilii cladem impune vastaverat, velut terrore advenientis cum prætore exercitus, discessu facto; Plautius ad insequendum illum quatuor militum millia præmisit: quos ex inopinato conversus ille, paucis exceptis, occidione occidit. Inde Tago flumine su-

perato, castra in monte, quem Veneris vocant, oleis confecto, posuit. Ibi cupiditate ulciscendi cladem acceptam Plautius cum eo congressus, nihilo pugnavit felicius; amissaque magna parte copiarum, quod superfuerat, per oppida distribuit, media æstate in hiberna militibus deductis. Unde Viriathus sociorum populi Romani agros obibat, ne corrumpere messē, tributum exigens, & in renitentes ultione parata.

XXXIII. Tum etiam Segobrigenses afflicti, gemino Viriathi dolo. Cum enim locum insidiis opportunum haud procul mœnibus observasset, cohortibus in eo dispositis, paucos misit, qui pecora Segobrigensium abigerent. Quos illi fuga recedentes cum avide insequerentur, ad insidiarum locum deducti, cæsique sunt. Iterum, cum itinere tridui discessisset, omne illud spatium uno die remensus, securam urbem & sacrificio tum maxime intentam, improvius oppressit. Quæ res ubi Romæ sunt auditæ, consulari duce exercituque opus esse senatus censuit: quo utraque simul Hispania defenderetur. Q. Fabio Maximo Æmiliano ea fors evenit, qui L. Hostilium Mancinum collegam in consulatu habuit. Sed priusquam hic ire in provinciam posset, Claudii Unimani prætoris ductu denuo infelicitè cum Viriatho dimicatum. Exercitus Romanus propemodum occisione cæsus est. Viriathus tropæa in montibus suis posuit, trabeis & fascibus imperatorum, quos fuderat, ad ignominiam Romani nominis exornata.

XXXIV. *Etiam C. Nigidium a Viriatho victum reperio apud unum auctorem non ex optimis. ceterum neque quo omnino tempore, neque quo res gesta modo sit, additur. Quod magis constat, maximus ea tempestate terror ex Lusitanis fuit: cum dux callidus & audax genere hominum durissimo bellicosissimoque uteretur. Apud Claudium scriptum est, quodam in saltu per ea tempora mille Romanis Lusitanos*

§ XXXII. Orof. 5, 4. Appian. Liv. Epit. § XXXIII. Front. Strat. 3, 11. Liv. Epit. Appian. Auctor. de Vir. ill. c. 71. Flor. 2, 17. Orofius.

trecentos occurrisse. pugna commissa, ex his septuaginta, Romanorum trecentos & viginti cecidisse. deinde Lusitanis sparsim & secure abscedentibus, unum eorum peditem ab aliquot Romanis equitibus circumventum, unius equum lancea perfodisse, tum sessoris caput uno ictu gladii dissecuisse. ita factum, ut, ceteris attonitis & metu cunctantibus, ille ad suos otiose & contentim sese reciperet.

XXXV. Inter hæc C. Plautius, die ad populum dicta, damnatus lege Majestatis, quod rebus male gestis imperium populi Romani minuisset, exilii causa solum mutavit. Q. Fabius Æmilianus consul, cui senatusconsulto decretum erat, uti legiones duas scriberet, tirones scripsit: ut iis, qui modo Africam, aut Græciam, aut Macedoniam subegerant, pro navata utiliter opera aliquod ex vacatione præmium foret. Cum his & auxiliis sociorum in Hispaniam profectus, Orfone copias recensuit. quindecim millia peditem, equites ferme bis mille reperti. Hos quotidianis exercitiis confirmare instituit, priusquam hosti non spernendo novum militem objiceret. Id quoniam per legatos agi poterat, ipse trajecit in Gaditanam insulam, Herculi sacra facturum, quem etiam gentili religione colebat, quod Fabiorum progenitor ille credebatur.

XXXVI. Per absentiam consulis Lusitanî, lignatoribus Romanorum insidiati, multos occiderunt; etiam legatum consulis, collatis signis dimicare ausum, fuderunt, ingenti præda potiti. Ad horum famam cum Fabius accurrisset, Viriathus victoria ferox, & ut cum tironibus pugnaret, subinde instructis copiis consulem ad pugnam provocabat. Sed ille consilii tenax cum universis quidem copiis in prælium descendere recusabat; per crebras velitationes modo hos, modo illos suorum ferendo hostium conspectui, vulnerumque & mortis terrori, assuefacere contentus. Pari sollicitudine, ne inter pabulandum improvise hostis incursum opprimerentur, providebat; ipse plerumque cum equitibus cir-

cumcursitans, & armatorum custodia metentibus apposita. Hanc enim diligentiam a patre Paulo, cautissimo imperatore, Persei bello didicerat. Cujus etiam severitate in tuenda militari disciplina usus, clarissimam exinde famam reportavit.

XXXVII. Sed in urbe C. Licinius Crassus tribunus legem promulgavit, *uti sacerdotes non, ut antea, cooptatione collegarum, sed suffragiis tribuum crearentur*. Erat plane popolare legis argumentum: populi enim beneficium fiebat, quod hactenus in potestate fuerat paucorum. Non placebat res senatui, cujus in contumeliam tribunus, mutato veteri more, non in curiam & comitium, sed in forum versus, agere cum populo instituit. Dissuasit legem C. Lælius Sapiens prætor; nobilique oratione religionem iniecit populo, si quid in rebus ad cultum Deorum pertinentibus temere mutaretur. Eundem Lælium in Hispania res gessisse, quanquam annalibus exciderit, magni tamen auctoris testimonio constat. Nam egregium illum Viriathi bello fuisse, ferocitatemque illius in prætura comminuisse, ita ut facile bellum reliquis traderet, in M. Tullii Ciceronis lucubrationibus scriptum est.

XXXVIII. Sub hæc tempora magnæ iterum mutationes rerum in Syria fuere. Alexander non melior, quam pro obfcuritate generis sui, rex, amicos neque ferre, neque regere prudens, pluribus interfectis, opera reliquorum personam principis sine auctoritate sustinebat. Ex quibus Hieracem, & Diodotum Apamenum (qui deinceps sub Tryphonis cognomento tyrannidem exercuit) Antiochenæ urbi præfecit. Adversus hunc ob stultitiam invisum populo Demetrius, rege Demetrio genitus, bellum excitavit. Illum cum fratre Antiocho pater hospiti Gnidio cum magna vi pecuniæ commendaverat, ne universam domum periculo belli, quod cum Alexandro gerebat, exponeret. Audito patris exitu, in

§ XXXVI. Plut. in Fabio c. 1. Appian. § XXXVII. Vellejus 2, 5. Cic. in Lælio c. 26. Varro de re rustic. 1, 2. Cic. in Bruto c. 21. Idem de nat. Deor. 3, 2. Idem de offic. 2, 11. Liv. Epit.

Cretam perfugit adolescens; donec hortante Lathene, Cretensium duce, & ex eadem insula suppeditante auxilia, repetendis avitis opibus animum adjecit. Alexander, intellecto Demetrium ex Creta in Ciliciam trajecisse, magis metu suo, quam hostis robore pulsus, Antiochiam recessit, relicta Cœlesyria: cujus prætor Apollonius, cum Demetrii partes secutus, hujus auspiciis contra Jonathanem Judæorum ducem male pugnavisset; meliori spe sublatus Alexander, viribusque potior, conatus hostium haud difficulter eludebat.

XXXIX. Ergo Demetrius, majoribus auxiliis opus esse cernens, Ptolemæum Philometorem Ægypti regem excitat. Quanquam enim is filiam Alexandro uxorem dederat, tamen, sive infensus genero, sive occasionem invadendi regni vicini amplexus, cum ingentibus pedestribus equestribusque copiis in Syriam venit, tanquam genero suppetias laturus. itaque civitates ei portas, ut amico, aperiebant, jubente Alexandro, sive credebat sinceram foci mentem esse, sive simplicitate sua putabat illius obligari fidem & pudorem posse: nisi tamen dissimulatione ista occasio quærebatur tollendi per insidias, quem viribus non erat repellere. Nam & quæ secuta sunt, hanc suspicionem vehementer affirmant.

XL. Cum enim Ægyptius per Azotum & Joppen (ubi Jonathan ei, Judæorum dux, occurrit) Ptolemaida venisset, firmatis præsidio quas relinquebat urbibus, propemodum interfectus est Ammonii dolo, qui omnia apud Alexandrum poterat. Ergo per literas petito ad supplicium, nec dedito Ammonio, generum insimulans *consciū infidiarū in caput suū fuisse*, cum Demetrio societatem amicitiamque pangit. Habebat jam in potestate totam oram maritimam, ad Seleuciam usque, quam cognomento Pieriam vocant. inde Antiochenos sollicitans, & ipsos Alexandro iratos, ob scelera Ammonii, in partes suas attrahit. Commodum aberat

§ XXXVIII. Diod. ap. Vales. Eusebius. Trogi Prol. 35. Liv. Epit. Justin. 37, 2. Sulpicius Severus. Joseph. 13, 8. Machab. 1, 10. § XXXIX. Josephus. Machab. Zonar.

cum meliori parte copiarum Alexander, ut Cilicum nonnullos, qui defecerant, ad officium armis revocaret.

XLI. Ita licentius mutantibus fidem Antiochenis, Ammonius in muliebri stola, quam ad dissimulandam personam induerat, interficitur: uxor Alexandri ad patrem redit, statimque Demetrio in matrimonium traditur. Ptolemæus, Antiochiam ingressus, a populo militibusque rex Syriæ salutatur, & omnibus magno studio tendentibus, gemino diademate insignis, utriusque regni dominum proficitur. Sed ut erat natura bonus, & æquitatis amans, ad hæc futuri non improvidus, neque recte se facere, neque prudenter, arbitrabatur, si alienum imperium invitis Romanis occuparet: quos utique æmulatione potentiæ certos hostes putabat habiturum, quisquis Ægypti Syriæque regna conjunxisset. Quare, convocatis in concionem Antiochenis, post enumerata beneficia sua, in hunc maxime modum disseruit: *Erant hæc omnino talia, ut nemo præstaturus alteri videretur: ideoque plerique ad regnum Syriæ comparandum hæc a me fieri sentiebant & loquebantur. Quorum ego opinionem quia factis refellere decreveram, verba verbis coarguere supersedi. Nunc autem & illis respondebo, & meorum factorum omnium rationem vobis reddam; hujus postremi maxime, quod & accipere Syriæ regnum mihi placuit, & reddere acceptum placet.*

XLII. Non enim aut cæca cupidine raptus hoc diadema cepi: aut coactus a quoquam, vel aliqua perperam facti pænitentia depono: sed utriusque temporis iustissimis rationibus inductus. Cum enim in Syriam eo tempore descendissem, quo divisæ mutuis dissensionibus opes, suum in exitium velut ruina ferebantur, & illum, quem benevolentia mea regem generumque fecerat, ipsius ingratus animus, compositæque in caput meum insidiæ hostem effecissent; nihil tam nocere rebus animadverti, quam quod honesta pars civium, qui in pace & republica constituenda suam incolumitatem, suorumque fortunas omnes consistere intelligebant, non tam præsentibus mæsti, quam de futuro solliciti erant;

§ XL. Plin. 5, 21. Josephus. § XLI. Liv. Epit. Sulpicius Severus. Polyb. ap. Vales. Josephus.

neque, quo se verterent, aut in quo deinde spes opesque suas ponerent, reperiabant.

XLIII. Alexander neque ab initio justus legitimusque rex a plerisque creditus, tanta sævitia superbiaque egerat, ut eo salvo neque publicam rem, neque privatam cuique salvam esse possent confiderent. Demetrium paterna odia prægravabant, & quia neque, qualis futurus esset, præsciri; neque, quantam potentiam ad defendendos, quos sibi applicuisset, habiturus foret, provideri poterat. Idcirco temere permixta fortunæque permissa omnia neque consilium certum, neque propemodum voti copiam relinquebant. Nam ubi vi agitur, neque recte aut secus factis idoneus ultor propositus est, boni mores illico exstinguuntur. Hoc ego rerum statu meum nomen, meamque auctoritatem accommodandam censui, qui probos pariter improbosque adverterem, & finem aliquem calamitatis ac maleficiorum, expectare alii auderent, alii facere cogerentur. Sic erectis civitatum animis, ingens statim ad meliores partes transitio facta, & ipsa caput Syriæ Antiochia decedit littem: abdicatoque Alexandro, cæso ministro scelerum Ammonia, & filiam mihi restituit, & insignia regni dedit.

XLIV. Hastenus ego nihil pristina mea abstinentia indignum feceram, quod meritum virtute præmium ratio non erat aspernari. Sicut enim Olympicis Isthmicisque certaminibus victores virtutis causa coronantur, idque longe præcipuum tota Græcia decus est; sic ego non alienum nec injustum arbitrabar, me quoque laborum aliquam mercedem capere: sed hanc, quæ semper summa ab omnibus æstimata est, laudis & gloriæ. Nam opes, potentiam, regna immodice augere velle, non tam magni clarique, quam cupidi animi, opus est. & hæc interdum a fortuna etiam infantibus deferuntur. Mihi sicut minime dolet, quod summa voluntate vestra Syrorum rex appellatus, ad tuendam ejus nominis dignitatem animorum opumque satis habeo: ita majoris me viri specimen daturum arbitror, si, honore contentus, Syriam, cui & Dii destinaverunt, & vos non invidetis, restituam.

XLV. Gener meus Demetrius, bonus & fortis adolescens, Seleucidarum haud dubius sanguis, unus est hodie, cui, Diis hominibusque approbantibus, possim hoc imperium reddere. Neque

vos moveat, quod cum patre ejus iras atque bellum habuistis. Sepultis cum mortuo inimicitiis, potiora nova merita erunt. neque, si in me quidquam auctoritatis esse putatis, clementis imperii magister duxque deero. Te quoque; Demetri, ne paternorum temporum memoria ita subeat, ut illud incitamentum potius irarum, quam mansuetudinis, habeas. Crebra mutatio regum nec imperantibus, nec quibus imperatur, læta esse potest. Jam a multis annis triste documentum Syria dedit, quid inter populum regemque discordiæ possint: & quam invictos, si consentiant, inter similitates exiguæ sæpe & inopinatæ causæ possint evertere. Igitur, quod mihi vobisque faustum sit, quod a vobis accepi diadema, en restituo, ut huic Demetrio imponatis. Mihi sufficiunt Ægyptiæ opes, quæ Magno Ptolemæo, ceterisque majoribus meis suffecerunt. Et tamen quantum abest, quin in parte imperii esse videar, cujus & filiam reginam relinquo, & reges spero nepotes?

XLVI. Ita persuasis Antiochenis, Demetrius in regnum recipitur. Neque milites, quorum plerique sub patre Demetrio meruerant, signa cunctanter ad eum transferebant. Redit inter hæc ex Cilicia Alexander cum numerofo exercitu, finesque Antiochenos igni ferroque pervastat. Occurrunt ei reges totis viribus. in campis ad Cænoparam amnem pugna committitur, duorum regum exitio. Nam Alexander, cum ex adverso prælio ad regulum Arabiæ Zabdiolum (Græci Dioclem interpretantur) cum quingentis ferme equitibus in urbem Abas perfugisset, suorum proditione & hospitis perfidia trucidatur. Ptolemæus paucos post dies ex vulneribus obiit. Cum enim equus ejus, elephanti barritu exterritus, regem excussisset, hostes multis in caput plagis prostratum convulnerarunt. Unde raptus a custodibus corporis in tabernaculum, cum medici terebrare ossa capitis contenderent, toto quatrinduo sine voce & sensu jacuit. quintus demum dies utrumque, sed in perpetuum ablaturus, reddidit; conspecto ante mortem Alexandri capite,

quod Zabdielus ad eum miserat. id ergo sumtæ ab inimico ultionis imagine postremum exspiranti solatium gaudiumque fuit.

XLVII. *Oraculum in Cilicia paulo ante hanc expeditionem ab Apolline Sarpedonio* (sive Dianæ potius hoc cognomento fanum fuit) *redditum Alexandro* dicitur, *caveret locum, ubi biformis esset editus. Hac ambage significatas Abas* putant, *ubi nata quædam Heraïs fuerit, quæ postea mutato cum sexu nomine Diophantus, ex acie cum Alexandro in patriam suam refugerit.* Demetrius, ob victoriam cognomine Nicatoris a Syris honoratus, mortem duorum regum in occasionem suam convertit, nihilo magis iis parcens, qui in iisdem partibus, quam qui in adversis steterant. statim enim & auxilii, quod a Ptolemæo acceperat, & quam cum eo contraxerat, affinitatis oblitus, exercitui ejus insidias struere cœpit: passimque prælidia Ægyptiorum a civitatibus sunt interfecta. Reliquæ copię Alexandriam se recepere, relictis tamen elephantis, quos Demetrius cepit. Alexandrini fratrem extincti regis, Physconem cognomento, Cyrenis, ubi regnabat, arcessitum Ægypti regno præficiunt. quod homo omnium facinorosissimus per annos quindecim, quibus Alexandriæ regnavit, maximis implevit calamitatibus.

XLVIII. Nam eodem die, quo ad accipiendum regnum Alexandriam intraverat, multos ex principibus, quos fratris filio favere cognoverat, interemit. Nuptiis deinde matris ejus Cleopatræ, quam sororem suam, fratris alterius viduam, matrimonio sibi jungebat, ipsum quoque puerum, mox illorum etiam, a quibus vocatus in regnum fuerat, quotidie multos occidit. Hinc exacerbatis omnium animis, odioque simul ac metu ægris, vulgo jam occasio deficienti circumspiciebatur: plenaque omnia, inter infensos & suspectos, diffidentię & irarum erant.

§ XLVI. Eusebius. Joseph. Strab. l. 16. Diod. 32, 1. Polyb. Liv. Epit. § XLVII. Appian. Syriac. Joseph. Machab. 1, 2. Liv. Epit. Joseph. contr. Appian. l. 2. Diod. ap. Vales. Idem ap. Eusebium. Justin. 38, 8. § XLVIII. Justin. Diodor.

XLIX. Igitur Demetrius, cum, sublato in Syria æmulo, rebus Ægypti per intestinas discordias invalidis, omni se periculo exentum esse crederet, in segnitiam pariter factumque prolapsus, magnitudinem, quam fortuna adstruxerat, suis consiliis factisque cœpit demoliri. Sed duabus maxime rebus graviter impegit, quod & despiciebat suos, nec ex peregrinis legebat, ut quisque aliqua re excelleret, sed qui suas virtutes impudenter jactarent, & inepte prædicarent regias. Non tam proclive est bono, quam sequiori principi, similem sui aulam efficere: sponte ferimur in deteriora; virtutum exercitatio difficilis est, etiam cum præmio placendi.

L. Igitur Demetrio, hominis regisque officium negligenti, non defuere, qui magis magisque præcipientem ad parva facta consultaque agerent. Maxima præ ceteris auctoritate Lasthenes erat, non levi merito reducti in avitum solium regis, illum Demetrius etiam in publicis edictis patrem vocare solitus, gravissimis regni negotiis præfecerat. ipse ad otium & voluptates applicabat animum, etiam meretriciis amoribus deditus. Quippe Myrinen Samiam, quæ corpore quæstum fecerat, ita diligere dicebatur, ut nihil in regno præcipuum ipse præter diadema haberet, in ceteris haud inferior Myrinæ potestas esset.

LI. Lasthenes igitur, homo pravus & temerarius, juvenem blanditiis & assentationibus impelli facilem, primum ad tollendos e medio, qui adversati ei fuissent, impellit. mox persuadet, ut, exauctorato domestico milite, tantummodo Cretensis, ceterisque insularium, qui secuti eum in militiam fuerant, stipendia præstentur. Ea res non modo plerosque privato dolore commodorum ereptorum urebat, sed reliquis etiam novi nec probandi exempli videbatur: quia prioribus regum, ad servandam vulgi benevolentiam, etiam in pace alere exercitus consuetum fuerat.

LII. Accedebat & sævitæ odium, quo ipsum quoque

§ L. Josephus. Diodor. ap. Vales. Nicolaus Damascenus ap. Athenæum l. 13. § LI. Diod. Joseph. Herodian. l. 2.

patrem vincere videbatur. Igitur Antiocheni, pronum ad seditiones genus, non diu temperare animis potuerunt, quin dictis factisque contumeliosis Demetrium lacefferent. Contra ille, mercenariis copiis conductis, arma tradere Antiochenos jubet. Illi magis irritati, quam fracti hoc imperio, centum viginti hominum millibus regiam circumdant, mortem aut vincula Demetrio minitantes. Facit in hos impetum cum mercenariis rex, & a majore oppidanorum numero repellitur. eratque in magno & evidenti periculo, nisi auxilia Judæorum (tria millia Jonathan miserat) tecto arcis consensu, in oppugnantes impune jaculati, ex vicinis domibus eos abegissent, domosque super incendissent.

LIII. Plena ædificiis, maximam partem ligneis, erat Antiochia: quare brevi tempore sumtis viribus tota fere urbe incendium pervagatum est. Rex oppidanos, partim igne extinguendo, partim eripiendis uxoribus liberisque occupatos, prælium omisisse videns, repente per angiportus erumpit: multisque cæsis, arma ponere ceteros, & clementiæ victoris se permittere cogit. atque illa magis promissa deditibus sese, quam deditis præstita est. Multi tanquam concitores seditionis excruciatu tormentis, supplicioque affecti sunt, bonis publicatis. plures metu odioque regis, patria relicta, passim per Syriam oberrabant, occasionem vindictæ quæritantes. In ipso porro tumultu hominum interiisse dicuntur millia centum.

LIV. At Demetrius, quasi parum inimicorum haberet, etiam amicos cœpit infestare. ducique Judæorum minaces literas misit, *ni tributa omnium annorum, ex quo pendi desissent, repræsentarentur*. Lætus hæc Diodotus Apamensis audiebat: qui fidus adhuc Alexandro, sub quo ad amplissimas præfecturas fuerat provectus, aut propriis causis, Malchum Arabem, apud quem Alexandri filius Antiochus educabatur, exorat, *ut sibi puerum tradat, tempus enim adesse, quo in patrium ille regnum restitui possit*. Bimulus admodum

§ LII. Joseph. 13, 9. Diodor. Machab. 1, 11. § LIII. Diodor. Joseph. Machab. 1, 11. Eusebius.

puer erat : quem in Syriam adductum, protinus deficientibus ad eum, quas Demetrius sacramento solverat, copiis, regiis insignibus ornat. Occurrit & cum suis Demetrius : sed pugna commissa vincitur. Diodotus elephantos, & mox Antiochiam urbem, in potestatem redigit : sponte oppidanorum, quibus Antiochus Epiphanes, & qui ab eo jactabant genus, comiter præsuerant ; Demetrius patri avoque similis, ut propria illi familiæ superbia crudelitasque videretur, effecerat. Demetrius cum Laodiceam perfugisset, ne adversis quidem factus temperantior, per voluptates & suorum injurias, luxuriosus simul & sævus, ingenio obsequebatur.

LV. Postea, cum ibi quoque tutum se fore desperaret, in Ciliciam concessit ; Seleuciæque (ad Calicadnum amnem sita urbs est) aliquamdiu regiam habuit : cum, veluti divitis Syriæ opibus, Antiochus puer cum tutore Diodoto Antiochiæ regnaret. De his rebus crebræ per id tempus legationes a regibus civitatibusque Asiæ Romam venerunt. Inter quos & ab Jonathane, Judæorum principe, quidam missi, foedus, quod populus Romanus cum fratre Jonathanis Juda pepigerat, renovarunt. Magnus hic vir & industrius habebatur, & illo quoque bello, cum, injuriis Demetrii coactus, cum hostibus ejus societatem inivisset, magna illi damna intulerat, sæpe fuis regiis prætoribus, & præter Ascalonem, Gazam, Damascum, nobilissimas urbes, pleraque Phœniciae parte abstracta.

LVI. Dum hæc in Syria geruntur, L. Mummius, profectis ex Achaja legatis, donec præsens status coalesceret, simul ne forte motibus Orientis recens stabilita Græciæ Macedoniæque pax sollicitaretur, aliquantisper substitit. quo tempore & quod in Isthmo delubrum est, instauravit, & Delphicum templum ornavit, etiam Olympiæ Jovem æneum, itemque clypeos inauratos unum & viginti, de manubiis

§ LIV. Liv. Epit. Joseph. Diodor. Machab. § LV. Liv. Epit. Fufeb. Strab. lib. 16. p. 321 & 161. edit. Casaubon. Josephus. Machab.

Achæorum dedicavit primus Romanorum; nam ante illum donum in aliquo Græciæ fano Romanus nemo privatim posuerat. Postea civitates pleraque obiendo, exquisitis ubique honoribus exceptus est. Meruerat enim coli non tantum victoris auctoritate, sed magis etiam ob mansuetudinem, & abstinentiam: qua virtute illis etiam temporibus, cum adhuc multum antiquæ severitatis in moribus esset, admirationi fuit. cum enim longe opulentissimam urbem cepisset, omnisque generis ornamentis instructissimam, ex iis plane nihil in suam domum intulit; adeoque pauper decessit, ut *exemplo majorum filia ejus dotem ex publico senatus dari juberet*.

LVII. Et erat alioqui ad intelligenda magnorum artificum opera rudis in tantum, ut, cum tabulas ac statuas in Italiam portandas locaret, edixerit conducentibus, *si eas perdidissent, novas esse reddituros*. Sed ille satis habuit his talibus triumphum suum instruere, quem de Achæis in Capitolium duxit; quo nullus neque antea, neque postea, rerum istarum spectaculis ornatior fuit. Hic etiam, licet delibata per Metellum victoriæ gloria fuerat, cognomen *Achaici* acceperat, favente urbe, quæ non minus magnificis ejusmodi civium suorum titulis crescere videbatur, quam ductu illorum auspiciove crevisset. Illi victoriæ maximam pulcherrimamque partem ornamentorum suorum in tabulis statuisque Roma debuit. sed & vicinæ circum urbes liberaliter excultæ sunt; etiam in ceteram Italiam, ipsasque adeo provincias, exundante copia.

LVIII. Vir enim magnanimus, & qui majoribus ex rebus quærendam sibi gloriam arbitrabatur, non erat sane in concedendo talia difficilis: ferturque L. Licinio Lucullo, qui votam bello Hispano ædem dedicabat, commodato

§ LVI. Polyb. ap. Valef. Pausan. l. 5. Liv. Epit. Polyb. Front. Strat. 4, 3. § LVII. Vellejus 1, 13. Appian. Punic. Virgil. Æneid. 6. Eutrop. Valer. Max. 7, 5. Strab. l. 8. Plin. 3. Cic. de offic. 2, 2. & in Verrem 1, 21, & 4, 2. Auctor de Vir. ill. c. 40. Diodor. ap. Valef.

T. Liv. Vol. VII.

E e

acceptas statuas reddere detrectanti, quod *consecratione templi exemptas hominum commercio* diceret, neutiquam fuc-
censuisse, manubiasque suas sub alieni nominis inscriptio-
ne conspici, æquo animo passum. Atque hic tam severus
cetera, ludorum tamen Græcorum in urbe elegantius eden-
dorum (nam L. Anicius incomite fecerat) primus exem-
plum dedit : quod vulgo deinceps secuti homines sunt,
cum probitas & abstinentia viri paucissimos imitatores
inveniret.

§ LVIII. Tacit. 14, 12. Polyb. ap. Athenæum l. 31.

JOANNIS FREINSHEMII
SUPPLEMENTORUM
LIVIANORUM

LIBER XVIII.

IN LOCUM LIB. LIII. LIVIANI.

E P I T O M E

LIBRI QUINQUAGESIMI TERTII.

Ap. Claudius consul Salassos, gentem Alpinam, domuit. Alter Pseudophilippus in Macedonia a L. Tremellio quæstore cum exercitu casus est. Q. Cæcilius Metellus proconsul Celtiberos cecidit. a Q. Fabio proconsule pars magna Lusitanix, expugnatis aliquot urbibus, recepta est. C. Julius senator Græce res Romanas scribit.

I. **S**ER. Sulpicius Galba, L. Aurelius Cotta consules sequuntur. Quorum in magistratu, aut circa hæc tempora, cum innovatum esse de provinciarum administratione haud absurdis rationibus conjiciatur, utile erit, veterem circa prætorum imperia morem, & qui deinceps obtinuerit, exponere. Et quidem de initio magistratus hujus, & quomodo ab uno prætore ad binos, postea ad quaternos numerus

E e 2

auctus sit, adjectis deinde Hispaniis seni creari cœperint, suis quodque temporibus relatum est. Tum igitur, cum adhuc seni quotannis prætores fierent, neque plures creari placeret, eveniebat, ut plures essent provinciæ, quam qui in illas cum imperio mitterentur.

II. Nam & nuper adjectis Africa, Macedoniaque, & Achaia, magnis imperium auctibus creverat. Igitur ista deinceps ratio placuit, ut non prætores, sed ex prætura provincias regerent, annum præturæ in urbe exigent, præter consuetas inter cives peregrinosque jurisdictiones, aliis etiam quæstionibus rerum capitalium, quæ exinde perpetuæ haberi cœperunt, in sortem missis. Hoc modo fiebat, ut, cum uno anno prorogatum imperium provincias obtinentibus esset, & sequente deinceps sex earum, quas senatus censuisset, iis, qui modo prætura essent functi, sorte darentur. Sed hæc quidem, quo maxime pacto, quoque tempore sint introducta, parum exploratum. illud non jam ambiguae conjecturæ, sed ex probatis monumentis certæ fidei est, neutrum ex consulibus ejus-anni ad Hispanienses exercitus mitti placuisse, cum de eo inter ipsos gravis contentio incidisset.

III. Quo tempore cum, senatu in diversas opiniones scisso, P. Africani sententia ab omnibus cupide expectaretur, *neutrum*, inquit, *placet mitti: nam alter nihil habet, alteri nihil est satis*. Ea vox utrique speratam provinciam ademit. nam & Galbæ in maximis divitiis nota avaritia erat, per quam in prætura quoque multa prava facta fecerat: & Cotta obærat, vix, quemadmodum creditoribus suis honeste satisfaceret, reperiebat. Igitur Patres conscripti, æqualiter infensam esse imperatoris innocentie magnam inopiam sine magna probitate, atque in maximis opibus majorem cupiditatem, existimantes, imperium Hispaniarum Q. Fabio Æmiliano prorogarunt.

§ I. Polyb. in Annal. Rom. § II. Cic. in Brut. c. 17. § III. Val. Max. 6, 7.

IV. Ergo Q. Fabius, cum eoque studiose exercitas copias viribus animisque confirmasset, haud dubitavit cum Viriatho congregari: duobusque praeliis superior, urbem quandam, quæ in societate hostium erat, diripuit; deinde aliam incendio delevit. ipsum quoque Viriathum ad locum, cui Bæcor nomen est, fugientem consecutus, multos interfecit. rebusque his perfectis, cum interim exisset ætas, Cordubam hibernatum abiit. In urbe M. Titius prætor, qui inter cives & peregrinos jurisdictionem fuerat sortitus, negotium a senatu accepit, Anienfis Appiæque aquæ ductus vindicandi, qui vetustate, aut privatorum fraudibus, minuebantur. eidem injectum, ut novas quoque aquas curaret inducendas. majorem enim aquæ modum incrementa urbis postulabant: cum a tot hominum millibus incredibilis ejus vis non potu solum, sed etiam abluendis corporibus, eluendis vestibus, quotidie absumeretur.

V. Pecunia ad hæc ex ærario decreta, sestertiū millies octingenties. Consularibus deinde comitiis Ap. Claudius Pulcher, Q. Cæcilius Metellus Macedonicus facti. Metellus post geminam continui biennii repulsam difficulter obtinuit, majore civitatis pudore, quam suo. nam uti tertio ante anno Q. Fabius fratri Scipioni, L. Mancinus rebus ad Carthaginem utcunque gestis, debere consulatum potuit: ita proximum par consulum, cui neque provincias credi senatus censuerat debere, nihil habebat, cur nobilissimo viro, fortissimoque imperatori anteferretur: sed videlicet, quemadmodum alia externa, sic honores atque magistratus, non continuo virtutis argumentum sunt: quia nonnunquam deterioribus cupide tradita, bonis, ob hoc ipsum, quod sunt boni, denegantur. Idque Metello nocuerat, quem ob integritatem morum, & in Macedonia Achajæque antiqua severitate actum imperium, corruptior in dies plebes, ut iniquum & tristem, aversebatur. Sed ipsam hanc injuriam civium incitamentum ille virtutis habuit, ostensurus, non

leviori damno civitatem tali consule, quam se talem virum consulatu caruisse.

VI. Æquiores ad hæc, inito consulatu, fortem expertus, quam ad obtinendum eum populi suffragia fuerant, Hispaniam accepit, in qua bellum gerebatur; cum Appio Italia evenisset. In qua quia pacata erant omnia, Metello invidens vir inquieti animi, & triumphi avidus, undique materiam belli captabat. Evenitque ei levis occasio, cui adeo non defuit, ut ex hac mox prætextum exsculperet, arma Salassis inferendi. Salassi gens Alpina valli amplam incolebat, partemque montium, quibus ea claudebatur. Lis erat ipsis perpetua cum populis infra eos habitantibus ob Duriæ amnis fluentia, qui ad usum metallorum (nam in Salassis aurum provenit) varie divisus intercipiebatur, ne rigare inferiora colentium agros posset. Eam injuriam, qui læsos se putabant, apud senatum questi, obtinuerunt, ut Appio consuli disceptatio ista mandaretur. Ille, gentem innoxiam laceffendi arrepto titulo, regionem late vastando, capere arma Salassos omiſsa cunctatione cogit. Sed cum in locis impeditis & difficilibus non minori cupiditate gereret bellum, quam concitaverat, ad quinque millia hominum adverso prælio perdidit.

VII. Ejus rei nuntio Romam perlato, decemviri M. Æmiliū Lepidum prætorem adeunt, nuntiantes, se, cum prodigiorum causa libros Sibyllinos inspexissent, reperisse, quoties bellum Gallis inferendum esset, sacrificari in eorum finibus oportere. monuerunt etiam ex iisdem libris, aquam non Marciani, sed Anienem, in Capitolium perducendam esse. De aqua M. Titio negotium datum: ad consulem ex decemvitorum collegio missi duo, qui nuntiarent simul, quid fieri oporteret, curarentque faciundum. Ita velut placatis numinibus, majori omnium spe redintegratum est bellum: collatisque signis quinque millia hostium caesa. In

§ V. Lips. de magnitud. Romanor. 3, 11. Auctor de Vir. ill. c. 61. Val. Max. 7, 5. § VI. Diodor. ap. Valos. Liv. Epit. Strab. l. 4. Oros. 5, 4. Jul. Obsequ.

pari utrinque clade, cum haudquaquam par ad reparanda damna facultas esset, perculsa gens Salafforum, legatis ad consulem missis, imperata facturam ostendit. Consul aurifodinas, & quod agrorum in planis erat, ademit: superiora relicta; ut tamen aquarum ad metalla copiam redemptoribus pretio concederent, pactum.

VIII. Ea victoria tumens Appius cum ad urbem revertisset, non a senatu, non a populo petita potestate triumphandi, tantum *pecuniam ex arario ad sumtus triumphi*, tantquam suo jure, postulavit. Quod ubi ob detrimenta, quæ passus fuerat, una cum ipso triumpho negatum est; *legis beneficio* dicens *usurum, quæ triumphum daret ei, qui hostium quinque millia una acie occidisset*, privatis sumtibus, majore cum infamia, quam gloria, triumphavit, filiae pietate adjutus. Nam cum intercedere ac vetare tribuni plebis vellent, essetque, qui prætervehentem de curru detracturum minitaretur; adversus sacrosanctam potestatem, sacerdotii haud minus inviolabilem reverentiam filia consulis (alii sororem faciunt) virgo Vestalis opposuit; simulque conscenso curru, in Capitolium usque triumphantem profecuta est.

IX. At in Hispania longe prosperiore fama Metellus agebat, quanquam validiorem hostem, & gravius bellum nactus. Viriathum enim adversæ cum Fabio Æmiliano pugnae monuerant, ne solis armorum viribus confideret. Ergo consiliis & legationibus apud Arvaccos, Titthosque & Bellos, pugnacissimas gentes, in tantum connisus est, ut animos eorum ab Romana societate abalienaret. Unde seorsim aliud bellum in Hispania citeriore ortum, quod a præcipuæ virtutis urbe Numantia celebratum historiis nomen habuit. In quo administrando dum strenue vigilanterque Metellus se gerit, adversus Viriathum male pugnatum est a Quintio, qui Æmiliano successerat.

X. Læta huic principia belli fuerant, conjectusque in

§ VII. Frontin. de Aquæduct. Liv. Epit. Strab. § VIII. Diodor. Orosius. Val. Max. 7, S. Sueton. in Tiber. c. 2. Cic. pro Cælio. c. 14. § IX. Appian. Hisp. Val. Max. 3, 2.

fugam Viriathus, & ad Veneris montem repulsus, haud exiguam spem dabat gloriosæ laureæ. sed, ut infida hominibus expectatio magnæ fortunæ esse solet, conversa fors est eruptione subita hostium, qua multis pugnando cæsis, & signis quibuldam ereptis militaribus, Romanum exercitum in castra sua rejecerunt. Inde Viriathus Itucam deflexit, oppidumque istud, expulso præsidio Romano, cepit; inde vastavit Bastetaniam, non prohibente Quinctio, qui per imperitiam & ignaviam medio adhuc autumno in Cordubensia hiberna concesserat: quanquam subinde manum quandam emitteret, C. Marcio duce, qui ex Italica Hispaniæ genus ducens, locorum & belli peritus habebatur.

XI. Mirum videri queat, unum hominem nullis suis viribus, nulla cognatorum potentia fultum, ne populi quidem judicio electum, tot per annos arma populi Romani sustinuisse: verum enimvero tantum in eo virtutis robur fuit, ut a se explere posset, quidquid fortuna dare neglexerat. Animus adversum pericula intrepidus, sagacitas ingens, peritia militaris rei summa, corpus edoctum animi imperia sequi. His omnibus justitiam, humanitatem, abstinentiam incredibilem addiderat. Partas armis opes inter suos æquissima partitione dividebat: ipse nihil inde locupletior, eodem armorum, vestium, corporisque cultu, quo bellare cœperat, post tot insignes victorias agere perseverabat.

XII. Hunc tenorem vitæ nulla solemnitas festorum, nulla remissio animi, ne nuptiarum quidem omnibus gentibus hominibusque probata hilaritas ulla ex parte interrompebat. Cum enim ditissimi cujusdam viri filiam matrimonio jungeret, multisque poculis aureis argenteisque, multaue stragula veste eximii operis adornatum triclinium esset, hæc allevans lancea, *ab hac pendere ista omnia* dixit. Multum deinde rogatus, *ut lotus accumberet*, non paruit; sed ex instructissimis mensis nihil, nisi panem & carnes, tollens, dabat comitibus suis; & ipse stans comedebat haud diu: deinde

sponsam adduci jussit. Quam, peractis Hispano more solennibus, equo impositam, statim ad montes, in quibus eo tempore præsidia sua habebat, secum abduxit. Hac disciplina intentam negotiis mentem, & valida membra, & illibatum virtutis robur ad extremum usque retinuit.

XIII. Interea Romam Æmilianus Scipio, Sp. Mummius, L. Cæcilius Metellus, ex Ægypto Asiaque redierunt. Miserat eos senatus ad res regnorum componendas, quæ vitio dominantium, aut ambitione dominationem affectantium, variis motibus vexabantur. Demetrius, amissa majore parte regni, cum socordiam suam contemptui esse videret, tanquam ex diuturno somno excitatus, bellum adversus Parthos sumerat: neque causa improbabili, neque parum idonea occasione. Nam Mithridates, Parthorum rex, paulo ante victo Demetrii præfecto, Babyloniam Syris eripuerat. Idem omnibus vicinis terribilis, Medos, Hyrcanos, Bactrianos, & quidquid inter Hydaspen & Indum gentium colit, partim subegerat, partim subactus videbatur. Itaque superioribus in præfecturis incolentes Græci continuo missitabant nuntios ad Demetrium, omnia polliciti, *si ad liberandos a superbo Parthorum dominatu venisset.*

XIV. *Alexandri expeditiones, quibus primum apertus Oriens Græcorum colonias accepisset, memorabantur: civitatesque a successoribus ejus, ut essent fræna domitarum gentium, conditæ. Sed jam versa vice servire illas, quibus imperaverint. Id adeo Græcorum accidisse discordia, bellisque civilibus, ut ignobilis ante gens Parthorum, quæ sub Persarum imperio contemptissima servientium pars fuisset, primo libertatem arripuerit, mox affectarit dominationem. & sane processurum ei propositum, ni Seleucidarum oppositis viribus coerceatur. Ad hos enim solos id decus pertinere: Demetriique hanc, velut a majoribus relictam, hereditatem esse belli gloriæque. Sic avum Antiochum, sic proavum Seleucum arma rebellibus Parthis intulisse. Neque perventuros*

§ XII. Diodor. ap. Vaies. § XIII. Cic. Acad. quæst. 4, 2. Justin. 36, 1 & 38, 8. Athenæus. l. 6. Strabo l. 15. Orosius. Josephus 13, 9.

ad tantam potentiam fuisse Arsacidis, nisi pater Demetrius, aliis bellis impeditus, deinde supposititius Alexander ignavia socordiaque sua, fiduciam spatiumque crescendo præbuisſent.

XV. *Hinc adeo Mithridatis inflatos eſſe ſpiritus, ut ultro contemnere Macedonas, eiſque nuper Meſopotamiam auſus ſit adimere. Qua victoria ſi expletas eſſe barbari cupiditates Demetrius putet, pernicioſo in errore verſari. Nam apud tales animos irritamenta non ſatietatem plura deſiderandi parere, quidquid hauſtum eſſet. Neque illud ignorare Demetrium debere, ferocius in ceteras ejus provincias incurſurum Parthum eſſe, niſi rebus ipſis oſtendat, ſuper-eſſe Syriæ vires, quibus & quæ teneat deſendere poſſit, & quæ amiſſa ſint repetere. Audacia regem eſſe factum; ne dubitet, quibus artibus tuendum amplificandumque imperium habeat. Attamen non vocari ad tantum periculum, ut non pleramque ejus partem ſuſlinere poſſint velintque, a quibus vocetur. Omnes eas regiones Græcis civitatibus maximis opulentiffimiſque ita diſtinctas eſſe, ut has tenenti minime magnæ molis futura ſit barbarorum expugnationo. Eſſe ſibi viros, arma, naves, commeatum, pecunias: ſed ſub cuſtode. eum qui tantillum ſubmoverit, & velut alligatas liberaverit manus, iſdem, cum voluiſſet, uſurum.*

XVI. *His atque talibus auditis, Demetrius, ſi bellum iſtud ſucceſſiſſet, etiam ad recuperanda amiſſa vires inde fore reputans, ſtrenue in Parthos movit. Erant eæ nationes tum aſſuetæ Macedonum imperio, tum Parthorum, ut novi populi, factum ac ſævitiam nequaquam lætis animis tolerabant. Igitur præter Græcas urbes, etiam Perſæ, & Elymæi Bactrianique auxilia Demetrio miſere. quibus auctus multa proſpera prælia fecit, multasque occupavit provincias: donec inſidiis circumventus (quippe pacis ſtudium ſimulantibus improvide crediderat) in poteſtatem hoſtium vivus pervenit, omni exercitu amiſſo.*

XVII. *Nec occaſioni Diodotus deſuit, quin per abſentiam Demetrii cetera Syriæ invaderet: & alia parte Judæi*

§ XVI. Juſtin. 36, 1 & 9. & 38, 9. Joſeph. Oroſ. Machab. 1, 2. Strab.

propinquas sibi regiones infestabant; alia Cilices, multis prædonum exortis manipulis ducibusque, latrocinia continua exercebant, regum discordiis tuti. Nec in Ægypto minus turbarum erat, per sævitiam Ptolemæi, quæ nulla fortunæ indulgentia mitigabatur. Nuper enim, cum Ægyptiorum lege regale Memphi solium conscendisset, natus ei filius erat, quem inter solemnia regiæ inaugurationis editum, etiam omine lætus, *Memphiten* appellaverat. Neque tamen aut hilaritas ista, aut natalitiis pueri debita celebritas, impedimento crudelitati fuit, quin per eodem dies Cyrenensium amicorum principes occideret, quorum opera perductus in regnum Alexandriæ fuerat. Causa tantæ sævitæ fuit, quod regem amice monuerant, *ne uxorem, a qua & regnum paulo ante, & nunc stirpem haberet, pellicis Irenes blandimentis posthaberet.*

XVIII. Sed ille flagitia flagitiis cumulans, paulo post filiam uxoris per vim stupratam ducit, Cleopatram sororem repudiat. Inter hæc cædes continuantur, non regis tantum imperio, sed multa peregrinorum militum libidine fieri. Quibus malis Alexandrini fatigati, jam ubivis tolerabilior sibi vitam, quam in patria, futuram rati, passim urbem deferunt. Ptolemæus, quo solitudini subveniat, peregrinos, ut in vacuis ædibus habitatum veniant, edicto sollicitare cogitur. Hæc & alia cum & regum & civitatum continuis legationibus in senatu exponerentur, quod is cum aliorum, tum Ægypti & Syriæ regnorum, quasi perpetuus quidam tutor longo jam tempore fuerat; legatos ad inspicunda fociorum regna Scipionem atque ceteros mitti placuit.

XIX. In ea legatione, qua magnæ orbis terrarum partis arbitrium acturus erat, vir tantæ dignitatis atque gloriæ, contentus fuit uno comite Panætio, quem domi peregreque secum habere præstantis ingenii causâ consueverat, & septem servulorum ministerio. ex quibus cum unus in itinere esset mortuus, domesticis scripsit, *ut alium sibi domo trans-*

mitterent : emere enim nolebat, ne quis, domini disciplina non institutus, aliquid committeret, quod ad heri probrum posset ullo pacto pertinere. Postquam Alexandriam perventum, & ex navi digressus Scipio caput pallio tegebat : circumfusa multitudo Alexandrinorum rogavit, *ut conspiciendum se præberet hominibus* : impetratoque, ingentem clamorem atque plausum præ lætitia edidit.

XX. Rex, cum ad excipiendos honorandosque legatos nihil studii prætermitteret, magnam impendit curam, ut exquisitis epulis acciperentur, & quidquid in regia visu dignum, artificioque aut opulentia eximium esset, inspicerent. Ipse etiam cum iis circumibat, ostendens singula, vir deformis habitu, vultuque, & obesi ventris prominenti mole, belluæ, quam homini, similior : unde *Phyſconis* ei cognomen impositum fuerat. Ob eam corporis gravitatem cum vacillante gressu Romanos obambulantes ægre consequeretur, ridiculus iis est visus, Panætioque in aurem insusurravit Scipio, *jam tum aliquem adventus nostri fructum ceperunt Alexandrini ; nobis enim debent, quod regem suum ambulantem videre.*

XXI. Ceterum contentis, quæ maxima Ægypto videbantur, gulæ atque oculorum deliciis, ad ea, quæ vere digna spectatu erant, considerata haud perfunctoriam operam contulere : situque & magnitudine urbis, & quæ circa Pharam admiranda erant, perlustratis, Memphin adverso Nilo vecti, bonitatem agri, commoda fluminis, multitudinem urbium, frequentiam innumerabilem populi, munimenta regionis, totius denique regni excellentiam tantam repererunt, ut minime dubitarent, cujuslibet magnitudinis imperio sedem eam idoneam esse potuisse, si dignos se rectores invenisset.

XXII. Ex Ægypto in Cyprum, deinde per Syriam &

§ XIX. Plutarch. Apoph. Rom. 24. Vellej. 1, 13. Auctor de Vir. ill. c. 58. Athenæus l. 6. Justin. § XX. Diodor. ap. Fulv. Ursin. Justin. Posidonius ap. Athenæum l. 12. Diodor. ap. Valesium. Plutarch.

continentes regiones domum reversi, de rebus suis in senatu exposuerunt. Plurimas adierant gentes, ubivis excepti dimissique cum benevolentia & laudibus. Controversias, alias sponte partium composuerant, alias adactis ad æquiora, qui pertinaciores in faciunda injuria fuerant, plerumque verborum admonitionibus, partim etiam armorum metu intentato. Quod vero ob difficultatem negotiorum, aut alias causas, relinqui voluerunt, ad senatum rejecerunt. Ita passim apud reges atque civitates, renovatis, quæ unicuique cum populo Romano erant, fœderibus, rei que publicæ majestate vehementer aucta, plurimum ubique venerationis Romano nomini conciliarunt.

XXIII. Secutæque sunt undiquaque legationes gratulantium gratiasque agentium senatui populoque Romano, *quod tantos ad se viros, Scipionemque, non unius modo urbis, sed omnium gentium virtutibus gloriaque principem, misissent.* Res regnorum in priori fere statu relictæ. Certum enim erat, imperantium culpa pleraque peccari: neque illos removendi causa ulla justa erat: Ægypti regibus semper amicis; Syris eo quoque nomine tutis, quod contra fœderis cum progenitoribus eorum initi leges, pudebat in pace fociis & amicis auferri, quod a majoribus relictum bello victis fuerat.

XXIV. Eodem anno rogationem de sumtibus tribunus plebis Didius tulit: qua pœna legis Fanniae in ceteram quoque Italiam, & ad eos etiam, qui sumtuosioribus, quam lex sinebat, epulis interfuissent, extendebatur. Triste videbatur & oblcœnum, inter famem & funera, pœnasque irati numinis, quorundam luxuriam conviviorum impenfis sine modo & pudore grassari. Magna enim sub id tempus annonæ caritas, &, quæ hanc ferme sequitur, pestilentia fuit: cuius causa cum novi consules L. Metellus Calvus, Q. Fabius Maximus Servilianus inivissent, per decemviros supplicationes habitæ. neque tamen aut hæc remedia, aut sævius aliud, androgynus haruspicum jussu mari merfus, ad

averruncanda mala præsentia profuerunt. Usitatum id magis antiquitus Romæ, quam probabili ratione nifum, ut in prodigiis ambigui mares habeantur, putant, qui causas rerum attentius consideravere. neque ambiguum est, complura, tanquam a mundi legibus abhorrentia, cum horrore aspici, non quia nullæ sint earum a natura legitimæ causæ, sed quia, quæ sunt, ignorentur.

XXV. Sed nos ad ordinem rerum gestarum Q. Fabius consul vocat, qui in ulteriorem Hispaniam (citerioris Q. Metello prorogatum erat imperium) duas legiones Romanas, sociorumque auxilia, in universum ad octodecim millia peditum, mille sexcentos equites induxit. Quorum assumpta parte cum Itucam festinaret, objecit se in itinere Viriathus cum sex millibus suorum, & cum clamore tumultuque barbaris solito impetum in Romanos fecit. Erat cum voce strepituque dissono, tum etiam aspectu horrida acies: non cetero modo ornatu, sed comis quoque muliebrem in morem obumbrantibus vultum. accedebat summa hominum diuturno jam bello exercitorum pugnacitas. Sustinuit tamen irrupentes consul, reque infecta discedere coactis, ipse institutum iter profecutus est.

XXVI. Ut deinde reliquus exercitus advenit, decemque ex Africa elephanti, quos Numidiæ rex Micipsa miserat, castris pro magnitudine copiarum auctis, prior pugnandi potestate facta, hostem splendide vicit: sed inter insequendum cum distracti ordines essent, Viriathus, ut erat ad omnia præsenti animo, suis repente ex fuga collectis victores aggreditur: tria eorum millia prostermit; reliquos compellit in castra, tanto ex subita fortunæ conversione metu, ut, vix paucis ad portas resistentibus, magna pars in tentoriis se absconderent, neque ab imperatore & tribunis ad pugnam capeffendam adigi possent. Insignis ea die C. Fannii virtus exstitit, qui C. Lælii gener, iis tum in

§ XXIV. Macrob. Saturnal. 3. Jul. Obseq. Oros. 5, 4. Diod. l. 32. § XXV. Liv. Epit. Appian. Hispan. Strab. l. 3.

castris militabat. Per hunc maxime retenta munimenta sunt: & nox superveniens diremit certamen.

XXVII. Neque tamen postea Viriathus destitit, modo noctu, modo fervidissimo tempore diei, negotium consuli faceffere; cum, leves agilesque & homines & equos habens, parvo suo incommodo hostem indefinenter fatigaret: donec, motis castris, Servilianus concessit Itucam. Tum Viriathus quoque, cui minor exercitus, neque huic sufficiens com-
meatus erat, noctu incensis castris, in Lusitaniam est pro-
fectus. Servilianus, cum velocissimum hostem assequi ne-
quidquam contendisset, in Bæturiam impressione facta,
quinque oppida, quæ cum Viriatho senserant, ordine ex-
pugnata diripuit: inde in Cuneos hiematum abiit.

XXVIII. Eodem anno censores in urbe fuerunt P. Cor-
nelius Scipio Africanus, L. Mummius Achaicus. In eun-
dem cum Scipione locum Ap. Claudius petierat: qui cum
nobilissimis viris stipatus, Africanum, populari turba cir-
cumfusum, in forum descendere vidisset, alta voce exclamavit, *ingemisce apud manes, Paulle Æmili, filium tuum sen-
riens ab Æmilio præcone, & Licinio Philonico censorium can-
didatum deduci.* Ceterum ille, censuram populariter adeptus,
non ideo minus incorrupte ac severe egit; illud moribus
civitatis, hoc suæ magistratusque dignitati tribuens. Ergo
& populum ad mores antiquos gravissima oratione hortat-
us est: & L. Mummii facilitatem gravatus, pro rostris
dixit, *omnia se ex majestate populi Romani gesturum fuisse, si
sibi cives vel dedissent collegam, vel non dedissent.*

XXIX. Interim in Macedonia denuo turbatum, non
minus improvise fine motuum, quam initium fuerat. Al-
ter Pseudophilippus, qui Persei se filium ferebat, cum su-
bito incremento ex servis aliisque perditis hominibus, qua-
les recens Macedonia Græciæque rei mutatio magno nu-

§ XXVI. Jul. Obseq. Appian. Cic. in Læl. c. 1. § XXVIII.
Tab. Capitol. Plutarch. in Æmil. c. 64. Idem. in præcept. gerent.
reipubl. c. 30. Agell. 4, 20. Val. Max. 6, 4. Auctor de Vir. ill.
Jul. Obseq.

mero pepererat, ad septemdecim hominum millia contraxisset; castra Romana tentare est ausus. Spem dabat absentia Licinii Nervæ prætoris, qui certas ob causas nuper ex Macedonia discesserat, Cn. Tremellio quæstore in castris relicto. Is vocatos ad concionem milites in hanc sententiam est cohortatus:

XXX. *Est, quod fortunæ gratias agamus, milites, novam & insperatam gloriæ materiam objicienti. sæpe querelas audi-vi, immo, fateor enim, inter querentes de sorte nostra fui: dum alii Romani exercitus justum hostem, & ex eo præmiorum uterem occasionem habeant, hunc in agro pacato, paucos rebellium Macedonum, aut latrunculos Thracas persequentem, non modo copiam, sed ne spem quidem habere majoris alicujus rei. At nunc subito se offert ita comparatum agmen, ut multitudo hominum speciem, nomenque prælii sit factura, genus armorum militumque, ad hæc conditio ducis certam nobis & incruentam polliceatur victoriam.*

XXXI. *Quid enim contra legionarium militem, lorica clypeoque tectum, pilo ac gladio terribilem, tot insuper stipendiis exercitum, fervorum agrestiumve tumultuaria manus possit, nullis militaribus armis legibusque neque causam neque spem idoneam ad bellum afferens? Quid autem rex ille scenicus, quem paulo ante natum esse nesciebamus? Sane nuper etiam sic insurrexit Macedonia; sed tum majore ingenio apparatuque instructa erat fabula, multi potentes in provincia viri, nonnulli quoque externi reges, audaciam Andrisçi clam palamque magnis auxiliis fulciebant. At hic præter miseram egenorum turbam, quæ non tam ipsius promissis, quam tædio vitæ, ad periculum properat, nec spem nec rem usquam ullam habet: nec quia victoriam sperat, sed quia aliter facere non potest, ad castra nostra successit, animam supplicio debitam, rebus suis desperatis, lubentius armis nostris daturus.*

XXXII. Cum deinde, quid fieri vellet, ostendisset, &

inter tribunos & præfectos loca militesque esset partitus, admonuit, *ut signo dato secundum ea, quæ præcepisset, erumperent*: addiditque, *se celeriter disjecturum hostes, ut porcellos scropha soleret*. Quod cum factum esset, victoria illustri parta, qua cum exercitu Pseudophilippus cæsus est, Licinius Imperator est appellatus, quæstori Scrophæ cognomentum hæsit, quod posterius quoque retinuerunt.

XXXIII. Difficilius in Hispaniis bellum erat, hinc Celtiberis, inde Viriatho Romanos duces exercentibus. Sed ut adversus Viriathum dubiæ Serviliano res, ita Q. Metello proconsuli prosperæ magnificæque fuerunt. Vir acer & intentus nihil neque apud hostes inexploratum, neque apud suos remissum patiebatur; digno, quod referatur, severitatis saluberrimæ exemplo. Cum ad Contrebiā rem gesseret, cohortes legionarias quinque, quod loco cesserant, indignatus, ad eundem locum recuperandum continuo remisit. edixit etiam, *ut qui eorum nisi victor in castra revertisset, pro hoste caderetur*: neque mutavit sententiam, cum omnes, ut certam ad mortem ituri, testamenta in procinctu facerent. Ea necessitas acuit virtutem: & qui modo multitudini hostium cesserant, ii eundem, licet victoria recenti animatum, repulerunt: quæque inexpugnabilis habita fuerat civitas, capta est. Hæc disciplina Romanum militem confirmavit, Celtiberos fregit: qui & collatis signis cæsi sunt a proconsule, & egregias urbes amiserunt, Arvacorum majori parte domita; quibus tempore messis, cum frumento convehendo intenti cetera incuriosi agerent, improvise incubuerat.

XXXIV. Ista cum severitate perfecisset, haud minorem ex clementia fructum tulit. utriusque enim clara exempla edidit, illustri testimonio, non sævitia, sed ratione rebusque cogentibus, duriora nonnunquam imperasse. Nertobrigam obsidebat, unaque parte oppidi, qua sola subiri pote-

§ XXXII. Liv. Epit. § XXXIII. Jul. Obseq. Flor. 2, 17. Val. Max. 2, 7. Front. Strat. 4, 1. Vellej. 2, 5. Aust. de Vir. ill. c. 41. Appian. Hisp.

rat, murum admota machina erat disiecturus. Opponunt obfelli primis hostium ictibus Rhetogenis filios, viri inter suos primarii, qui ad Metellum transferat. neque movebatur pater; sed ultro hortatus imperatorem, nullam esse viam aspernandam dicebat, quæ ad victoriam duceret; ex ea sibi postmodum solatium fore. Tum Metellus parentis duritia damnatam liberorum vitam sua mansuetudine redemit, solutaque obsidione urbis unius, multas alias admiratione hujus facti sponte ipsarum in populi Romani ditionem redegit. Duæ maximæ restabant urbes, Termantia & Numantia, situ locorum & viribus feroces: adversus quas tum quidem, quoniam hiems aderat, nihil movendum ratus, quamprimum anni tempus fineret, has quoque ad imperata faciunda coacturus videbatur.

XXXV. Interea consularibus Romæ comitiis Q. Pompejus A. F. designatus est, qui primus e gente Pompeja summos honores, nulla commendatione majorum affecutus, amicitia Scipionis excidit, quia Lælio suffragantem astute fefellerat. Interrogatus enim, an petere consulatum constituisset, negavit, ultroque Lælio opem suam gratiamque ad petendum obtulit. Interea ipse profectus in forum, ambire strenue cœpit. Id cum expectantibus eum esset renuntiatum, ceterique stomacharentur; *Nos vero ineptos*, inquit Africanus, *quæ tanquam non homines, sed Deos, effemus precaturi, sedemus tibicinem expectantes!* nam mater Pompeji indecora fama laborabat, tanquam tibicini corpus prostituisset. Q. Pompejo collega Cn. Servilius Cæpio fuit. qui, cum magistratu inito de provinciis retulissent, certamen de Hispaniis ortum, eas retinere, qui ibi proconsules erant, cupientibus. ad extremum Q. Fabio Maximo Serviliano prorogatum est imperium in ulteriore provincia, citeriorem consul Q. Pompejus obtinuit.

XXXVI. Quod ubi Q. Macedonico nuntiatum, vir ce-

§ XXXIV. Florus. Val. Max. 5, 1. Appian. § XXXV. Vellej. 2, 1. Cic. in Brut. Plutarch. Apoph. Rom. c. 21. Eutrop. Val. Max. 2, 3.

tera cum maximis comparandus, iræ dolorique temperare non potuit; non eo maxime offensus, quod omnino successor sibi, sed quod Pompejus mitteretur, quocum similitates exercebat. Ne igitur illi suis laboribus quæsitum obtingeret præmium, modis omnibus exercitum imminuere studuit: missiones & commeatus petentibus promiscue dando: horrea, remotis custodiis, ad rapinam relinquendo: eo etiam profectus, ut *sagittas Cretensium fractas in amnem abjici* jusserit; *elephantis cibaria dari* vetuerit; qua indignatione non solum inimico laudem victoriæ, sed populo Romano fructum, sibi que meritum ceteris factis triumphum eripuit. Res enim eas gefferat, ut non minus hac expeditione *Celtiberici*, quam priore *Macedonici* cognomen meruisse videatur. Adeo nimirum plures aliis, quam sibi, bene imperant; faciliorque adversus armatos exercitus, quam vitiosos animi motus, contentio est.

XXXVII. Atqui ut hunc ereptum imperium ad moram rebus injiciendam sollicitavit; ita prorogatum in altera Hispania Fabio Serviliano stimulos addebat prosequendi alacriter belli. Quippe ex Cuneis exercitu moto, Viriathum, quia se non offerebat, in sua Lusitania quærere instituit. Per viam dimicandum ipsi cum latronum ducibus Curio & Apulejo fuit; qui, opportunis locis insidiati, prætervehentia impedimenta abstraxerunt. Occisus tamen in prælio est Curius; præda quoque paulo post a Serviliano recuperata. Venerunt etiam in potestatem urbes multæ, quæ præsidii infestæ Viriathi fuerant: quarum Escadia, & Gemella, & Obulcula fuere. Hæ pro meritis singularum diversimode tractatæ; aliis venia data, quædam direptæ sunt. Ex captivis etiam ad quingentos supplicio capitis affecti: novem millia quingentos proconsul sub corona vendidit.


XXXVIII. In urbe interea P. Scævola tribunus plebis de judicio L. Hostilii Tubuli ad populum tulit, qui proximo anno prætor quæstionem de sicariis exercuerat, homo


§ XXXVI. Flor. 2, 17. § XXXVII. Appian. Hisp. Liv. Epit. Cic. de fin. 2, 16. 4, 14. 5, 22. Idem ad Attic. 12, 5.

pudoris ita profligati, ut *palam & aperte pecuniam ob rem judicandam cepisse* diceretur. accepta rogatione, senatus quæstionem Cn. Servilio Cæpioni consuli mandavit: quare intellecta reus, cum manifestissimo crimine teneretur, non exspectato judicio, disparuit. Interesse tamen publici exempli visum, ne homo ex omni memoria sceleratissimus & audacissimus, tam levi pœna defungeretur. Itaque revocari ab exilio ad causam dicendam placuit. Sed ille, qui nullum alium eventum sperare poterat, quam ut in carcere necaretur, veneno epoto necem properavit.

XXXIX. Sub hæc tempora, ne tantummodo armis præstare ceteras gentes Romani crederentur, ingenio tardiores; cum alia se studia erexere, tum etiam historia scribi accuratius cœpit: hætenus enim qui ei admoverant manum, breviter exposuisse res contenti, annalibus similia scripserant. Neque tamen adhuc Latini sermonis ea copia & venustas esse putabatur, ut ejusmodi operibus dignitate & gratia responderet. multique res Romanas Græcorum lingua tradiderunt; ab illis majestatem, ab hac decorem magis petendum arbitrati. quos inter tum C. Julius senator fuit: cum etiam A. Postumius idem tentaret. quos deinde P. Rutilius; L. Lucullus, & alii plerique sunt imitati.

§ XXXVIII. Cic. de Nat. Deor. 3, 30. Idem de fin. 2, 16. Idem pro M. Scauro. Afcon. Pædian. in Scaur. §. XXXIX. Cic. de Orat. 2, 12. Justin. præf. Liv. Epit. Athenæus l. 4.





PA
6452
A2
1784
v.7

Livius, Titus
Historiarum libri qui
supersunt omnes

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

